



BIBLIOTECA NAZ.
Vittorio Emanuele III

XXVII


C

36

NAPOLI







XXXVII

C

36



X. XVII

C

38

~

SAMUELIS WERENFELSI
BASILEENSIS
DISSERTATIONUM
VOLUMINA DUO,
Quorum prius de
LOGOMACHIIIS
ERUDITORUM
& de
METEORIS ORATIONIS,
Posterius
DISSERTATIONES
VARII ARGUMENTI
Continet.

Di Gennaro Gjannelli



AMSTELÆDAMI,
Apud ROD. & GERH. WETSTENIOS H. EE

clō 15 ccxvj.






REVERENDISSIMO
IN CHRISTO
PATRI AC DOMINO
D^N. GILBERTO
DIVINA PROVIDENTIA
EPISCOPO
SALISBURIENSI

SAMUEL WERENFELSIUS

S. P. D.

Ui libros Magnis atque
Excellentibus Viris de-
dicant, hoc fere solent
audaciæ suæ prætexere:
patronos se lucubrationibus suis
168 * 2 quæ-

D E D I C A T I O.

quærere, quorum nomina in frontispicio posita, illas literato orbi commendent, atque adversus iniqua, quæ metuunt, judicia protegant. Enimvero si hæc foret idonea ratio, nemo illam potiori jure, atque ego, adducere posset. Quod enim Nomine Tuo, ILLUSTRIS-
SIME PRÆSUL, majus totoque orbe celebrius inveniri potest? quod omnibus eruditis notius? quod ad libellum huncce meum quibusvis mundi plagis, feræque adeo posteritati, commendandum accommodatius? Quis acutius Te de rerum omnium pretio judicare potest? quis judicare solet candidius? quis, Te sententiam dicente, non acquiescet? quis
damna-

D E D I C A T I O.

damnaverit, quod Tu approbas?
quis denique vel hircere auderet
contra qualescunque has differ-
tatiunculas meas, si Magnus ille
Salisburienſis Episcopus illas pa-
trocinio ſuo dignari vellet? Sed
fateor, non hanc, licet pervul-
gatam, fuiſſe conſilii mei ratio-
nem, quippe quam nunquam
valde ſolidam exiſtimavi. Nemo
enim ex eo, quod ego hoc quic-
quid eſt libelli Tibi offerre auſus
ſum, recte concluſerit, illud
propterea Tibi probari. Temeri-
tas mea nullam Tibi neceſſita-
tem imponit hujus opusculi pa-
trocinium ſuſcipiendi, neque, ſi
ſapio, quicquam hujus ſperare
poſſum. Gratiâ ubique indigent
hæ meæ diſſertationes: at Tu,

DEDICATIO.

MAGNE PRÆSUL, ubique, cum in incomparabili illa Reformationis Anglicanæ historia, tum in aliis immortalibus Tuis scriptis, atque ipso adeo familiari colloquio, testaris, Te in judicando veritati omnia, nihil gratiæ dare: perspicacissimumque illud iudicium Tuum, tam vastâ eruditione, tamque longo rerum usu subactum, corrumpi atque à vero deflecti nullo modo posse. Unicum igitur, quod me ad hoc, quod cernis, Nomini Tuo, REVERENDISSIME DOMINE, inscribendum adduxit, est Virtutum Tuarum, nostro hoc sæculo prorsus insolitarum, admiratio, altissime animo meo infixâ, inde ab eo tempore, quo Te primum
in

D E D I C A T I O.

in Patria mea alloqui contigit;
hinc Tecum Heidelbergam us-
que proficisci : atque interea,
(ô me tunc felicem!) lateri tuo
per aliquot dies hærere, atque ab
ore Tuo pendere : inde Hagæ
Comitum denuo Te revifere ; ac
denique Cliviæ, in Aula Electo-
rali, ultimum Te amplecti ac
vale Tibi dicere. Da veniam,
CELEBERRIME PRÆSUL, quod
ego homo obscurus hic in me-
moriam Tibi revocare audeo
tempus illud, quod præcipuam
vitæ meæ partem semper duxi,
cujusque nunquam recordari
possum, quin pectus hoc meum
mirifica voluptate perfundatur.
Fer me, de hac mea felicitate,
immoderatus quam pudentem

* 4

de-

DEDICATIO.

decet, publice gloriantem. Si benigne interpretaberis, quod profundam Nominis Tui Venerationem, quam tunc temporis animo conceptam atque intra præcordia usque adhuc pressam, nunc amplius continere nequeo, hac epistola testatam faciam, summam votorum mihi videbor affecutus. De libello, cui illustre Nomen tuum præfigere ausus sum, judicabis interea, ut soles, & nisi fallor, nihil in eo invenies probandum nisi animum Auctoris à vanis, quibus Ecclesia scinditur, pugnis alienum, huicque malo medendi avidum: forte etiam simul dolebis, vires meas bono conatui non respondisse, aliumque magis idoneum

D E D I C A T I O.

neum ad idem tentandum excitabis. Sed hac de re prorsus securus sum, qui non approbationem Tuam quæro, quam me non mereri scio, sed benevolentiam, quam etiam minime merentibus indulgere consuevisti. Deus Te, Illustre Britannia totiusque Christianæ Ecclesiæ Sydus, diu incolumem præstet, omnique bonorum genere cumulet. Dabam Basileæ Rauracorum pridie Nonas Novembris A. cld lcccl.

LECTO-

LECTORI

qui

PRÆFATIONES

legere dignatur.

QUOD nobis accidit domi inter familiares versantibus, ut, cum in sermonibus tum in actionibus nostris examinandis, multo remissiores simus, quam cum in publicum virorum gravium confessum prodimus, idem mihi propemodum in hujus, quod cernis, libelli compositione contingit. Theses sunt Academicae, ut appellant, diversis temporibus scriptae atque ad disputandum propositae, id quod ex stili & tractationis diversitate ipse conjicies: qualia scripta vix extra civitatis unius pomeria egrediuntur, & in hac ipsa

Prima
Disp. habita fuit
A. 1688.
postrema
1692.

P R Æ F A T I O.

à paucis plerunque, nec magna attentione, leguntur. *Judicia Virorum doctorum, quos habet Patria, non magnopere metui. Amici sunt & familiares, quibus facile satisfacimus, præsertim cum nihil magni à nobis expectant. Hinc factum est, ut in dissertatiunculis meis, scribendis dicam? an effundendis? impetum potius sequerer, qui ut sit in compositionis fervore, nunc huc nunc illuc me abstulit; quam accuratam quandam scribendi formam; denique res, verba, ordinem non ita ponderarim, ut faciendum mihi fuisset, si inter scribendum omnes illi veri judices & rigidi censores, quibus hodie abundat Respublica literaria, animo identidem fuissent obversati. Emendandæ, fateor, fuissent Theses meæ, antequam Libri nomen iis imponeretur: hoc vero tentare volens statim consilium mutavi; severa enim castigatio scriptum hoc meum penè ad nihil redegisset. Quis igitur,*
in-

P R Æ F A T I O.

inquis, te cogit, ut illud ita crudum in publicum protrudas? Possem dicere, amicos, iterum iterumque hoc à me flagitantes, id tandem à me extorsisse. Sed hoc tam sæpe falsò jactatum est, ut etiam vere affirmanti non amplius credatur. Unica causa, cur, ut hoc quicquid est libelli publici juris fieret, consensi, est, quoniam arbitror, id, non obstantibus plurimis, quos in eo animadverto, defectibus (quanto plures observabunt perspicaciores?) omnibus lectu utile futurum. Dicit enim nequit, quantum hoc facere possit ad profectus uberiores, tum in vera sapientia, tum in solida pietate, si omnes, quotquot literas tractant, sive libros aliorum legunt, sive scribunt ipsi, sive disputant, sive disputantes audiunt, identidem recordantur, quot sint in omnibus artibus, scientiis ac disciplinis Logomachiae; quam variae earum species; quam paucae disputationes, quibus non aliqua verborum

P R Æ F A T I O.

*horum pugna sit admixta ; quam
 noxius Ecclesiæ Reique literariæ sit
 hic disputatorum morbus ; quam pe-
 riculosa habeat symptomata : si con-
 siderant, quæ hujus sint mali causæ,
 cum in nobis tum extra nos ; quibus
 signis dignosci possit ; quænam denique
 illi paranda remedia tum θεραπευτικὰ
 tum προφυλακτικὰ. De his omnibus
 dixi, non quæ dici poterant, aut
 præ aliis dici debebant ; sed quæ in-
 genium qualecunque subito inter scri-
 bendum suggessit : eaque omnia exem-
 plis illustravi, quæ memoria, haud
 adeo felix ; non solícite quærenti
 suppeditavit ; in quibus si quando
 erravi, facile erit doctioribus me-
 liora & aptiora in eorum locum sub-
 stituere. Meretur vero argumentum
 à me susceptum, ut ab alio tractetur,
 qui ad illud ingenium capacius,
 maturius judicium, majorem erudi-
 tionis apparatus & experientiam af-
 ferre queat : atque hoc ut fiat, ex ani-
 mo opto. Sed interea non inutile, spe-*

P R Æ F A T I O.

ro, erit, legere, quæ mihi de hac materia in mentem venerunt.

Petierunt amici, ut his de Logomachiis cogitationibus meis adjungerem Dissertationem, quam de Meteoris Orationis scripsi, cum in Academia Patria eloquentiam docerem; id quod negare ipsis non potui; præsertim, cum mihi confirmarent Viros quosdam celebres, in quorum manus incidit, ejus lectione fuisse delectatos. Nec male hæc conjungi crediderim: quemadmodum enim maximum & frequentissimum in dialecticis disputationibus vitium est; dissensum inanem verborum cum vero de rebus ipsis dissensu confundere: ita & frequentissimum, & ineptissimum in dicendo vitium est, ut sublimitatem dictionis affectantes in vana incidant orationis meteora. Quod si, Lector, animadvertis, me ipsum in præcepta mea peccare, atque aliquando aut λογομαχεῖν aut μετεωρολογεῖν, illud documento tibi erit,

P R Æ F A T I O.

erit quantâ diligentîâ tibi sit cavendum, ab iis vitiis, quæ ne ii quidem, qui de illis scribunt, etiam cum de istis scribunt, vitare possunt. Vale & hoc qualicunque labore nostro frueri.

IN.

INDEX CAPITUM

Dissertationis

DE LOGOMACHIIIS.

I.	D E nomine Logomachia, variisque ejus significationibus.	I
II.	De Logomachiarum subjeſto, ſeu ubi potiſſimum reperiantur.	20
III.	De variis Logomachia ſpeciebus	47
IV.	De morbi hujus gravitate.	71
V.	De morbi hujus cauſſis, quæ in linguis ſunt.	121
VI.	De iis, qui ſententiam ſuam non recte proponentes Logomachiarum cauſſa ſunt.	142
VII.	De iis, qui verba eorum, quibuſcum diſputant, perperam intelligunt.	161
VIII.	De ſignis hujus morbi.	192
IX.	De remediis hujus morbi.	218
X.	De præſervativis, ut appellant, adver- ſus Logomachias novas.	254
	DISSERTATIO de Meteoris Ora- tionis.	269

DIS-

DISSERTATIONIS

De

LOGOMACHIIIS

ERUDITORUM

C A P. I.

*De nomine Logomachiae variisque
ejus significationibus.*

§. I.

Ropositum mihi est morbo gravissimo, quique diu *Autoris
scopus.*
Rempubicam literariam
vehementer afflixit, hoc
tempore medicinam fa-
cere : quem si non tol-
lere omnino, quod sperandum certe in hac *Ejus neces-
sitas.*
contendendi libidine non est, at saltem
imminuere aliquo modo possem, nã ego
neque tempus neque chartas hæc perdi-
disse mihi viderer. Dicit enim vix potest,
quantum sit Logomachiarum inter eas, *Utilitas.*
quæ doctissimos homines dividunt, di-
sputationes ; quotque proinde quantisque
litibus & rixis, si verborum pugnae ali-
quando

Difficultas. quando evanescerent, Res literaria, misere his toties dilacerata, sublevatam se visura esset. Neque tamen sum nescius, quanta sit hujus mali pertinacia, quantaque curationis difficultas, imo quam odiosum aliquando sit hoc ulcus tangere: sed neque relinquendus est ægrotus, tametsi remedia respuat, neque difficultate absterri debet Medicus; sed facere quicquid in se est, eventum Deo committere.

Logomachia est morbus.

§. 2. Enimvero si *Logomachiam*, aut potius *Philologomachiam* morbum appello, nemo, credo, hoc nomine offendetur: præterquam enim, quod omnia animi vitia mentisque errores morbos Philosophi vocare consueverunt: habeo hic præeuntem Paulum Apostolum, qui de eo, qui semel à salubribus sermonibus deflexit, ait, quod sit *νόσος περὶ Λογομαχίας*, agrotans circa verborum pugnas. Quare, tametsi quæ sit inter hanc animi & corporis morbos convenientia clarissimè deinceps videbimus, liceat nobis hic in antecessum *Logomachiam νόσον* hoc tanto auctore appellare.

Significatio duplex.

Prior, pugna, quæ fit verbis.

Posterior de verbis.

§. 3. Hæc autem vox duo potissimum significare potest, aut *μάχην*, quæ fit *λόγῳ* verbis; aut quæ fit *περὶ λόγου* de verbis.

Priori

Priori sensu Homerus de illo Agamemnonis & Achillis jurgio :

“Ὡς τὼ γ’ ἀντιβίοισι μαχεσσαμένῳ ἐπέεσσιν Iliad. α.
Ἀσπότην. — — — — —

Sic hi contrariis contendentes verbis

Surrexerunt. — — — — —

Equidem disceptationes eruditorum, quæ verbis fiunt, sed de rebus, & rebus quidem gravissimis, vitiosas hic vocare nolum: hæ enim, si intra modestiæ terminos coërcentur, solamque veritatis cognitionem propositam habent, tantum abest, ut morbi sint, ut gravissimorum etiam animi morborum, ita errores voco, sint remedium: sic enim fit, ut non ad primam quamque, quam audivimus, opinionem tanquam ad saxum adhaerescamus, sed cognitis etiam aliorum sententiis & validissimis utrinque rationibus, quid constantissime dicatur, videamus. At simulatque in rixas & altercationes degenerant, si; quemadmodum bella, capitalibus utrinque odiis geruntur: si veritate neglecta, sicut in præliis, nihil nisi victoria quæritur; si nihil pensi habent disputantes, dummodo Adversarium quisque suum, sive voce sive scripto contemtui, & ludibrio omnium exponat: hunc prosterнат, hunc conculcet, huic-

*Illa sape
etiam mor-
bus.*

que insistens insultansque grandior appareat. Si crebrae calumniae, atrocissima convicia, tanquam tela, utrinque jaciuntur: si Sophisticis stratagematis alter alterum supplantare nititur: revera μάχαι sunt, pugnae, & pugnae immanissimae: in quibus, quia verba & sermo (certe non in hunc finem homini datus) arma sunt: recte ut à reliquis ὀπλομαχίαις distinguantur, λογομαχίαι vocantur, in quibus, uti eleganter Eusebius, alii alios vulnerant, ὀπλοῖς καὶ δόρασι τοῖς διὰ λόγων. Quæ sane pugnandi libido, quanta mala Rei literariæ, religioni totique adeo orbi attulerit, nemo ignorare potest: plane, ut hanc non morbum modo eruditorum, sed pestem teterrimam appellare possimus. Cujus cum infinitæ propemodum sunt causæ (nam de hoc quin aliquid in transitu dicam, temperare mihi non possum) tum illa latissime mihi patere videtur, quæ ex insita hominibus superbia oritur, aliorum mentibus judiciiisque imperandi, immoderata cupiditas. Nimirum vult unusquisque, ut quamplurimi sibi assentiantur: atque ut Reges latissime imperare, & continuo alios atque alios sibi populos subicere gloriosum existimant: ita magna literatorum pars in hoc gloriæ summam

Euseb.
hist. Eccl.
lib. 8. cap.
1.

*Rei literariæ
ex religioni no-
xius.*

*Ejus causa
primaria,
aliorum
mentibus
imperandi
immoderata
cupiditas.*

nam collocant, si multorum mentes subjugare; his alias aliasque continuo addere possunt. Hic si voti compotes fiunt, protinus imperare sibi assentientibus videntur, hos tanquam aliquo modo sibi obnoxios considerant: hujusque imperii finem, identidem proferre laborant. Iidem vero, si qui assensum negant, praesertim, si periculum est, ne aliorum quoque à se animos avertant, aut, quod gravius est, eos etiam, quorum subjectione jam gavisi sunt, eo adducant, ut jugum suum excutiant: hos tanquam inimicos, qui suis rebus gestis intercedunt, persequuntur. Tum in partes itur, eam quisque partem defendit, aut cui se jam subjecit, ne errasse videatur, aut ubi aliquo numero est; tum rixæ oriuntur: tum iræ utrinque accenduntur: tum, si quos rationes deficiunt, hi ad convicia calumniasque confugiunt. Quid? nolunt illi nobis assentiri? Ergo nos cæci, bardi, stolidi videmur? Viderint, qui fient. Dumque interim pro sua quisque gloriola pugnant, aut pro imaginario illo imperio, cujus ipsi aut duces se, aut aliquam certe non contemnendam ejus partem esse putant, videri volunt pro veritate pugnare, imo, adeo parum nosmet ipsos cognosci-

Ejus absurditas pluribus ostensa.

mus, ipsi sibi videntur. In quo quidem facile est, quam ipsos ratio fallat, ostendere. Sane si quis serio veritatem amat, alium non odio dignum judicat, quem ab ea aberrare credit, sed commiseratione. Non irascitur qui vinum amat abstemio, qui ejusdem dulcedinem ignorat. Qui thesaurum amatum possidet, facile patitur alios pauperes esse. Nemo unquam cum vicino expostulavit, quod is suam uxorem non tantopere, quantum ipse, amet. Potius zelotypia amorem sequitur, ut, quod amamus, soli possidere velimus. Sic si homines magno veritatis amore tenerentur, potius in illud inciderent vitium, ut aliis veritatem à se agnitam inviderent, quam ut, propter eorum infelicitatem, irascerentur. At enim fit aliquando, ais, ut avarus divesque infestus sit dissoluto & liberali. Fateor: sed non ideo id fit, quod alterum infelicem esse, bona sua ignorare pati non potest, id enim curat scilicet; sed ideo, quod is inficitiae, aut etiam insaniae se accusare videtur, quod tantopere divitiis inhiet. Pariter hic se res habet. Veritatem affecutus es? Felix es, qui re amata frueris. At alii hanc non affecuti sunt. Quid irasceris? an ideo, quia alii te sunt infeliciores? Qui
homi.

hominem cognoscit, facile videt hanc non esse humanam indolem. Quid igitur? Non potes ferre dissentientem, quia dissentiens iudicium, ingenium, eruditionem, sapientiam in te requirere, stultitiam tibi exprobrare, se tibi præferre, te præ se contemnere videtur. Hinc illa sunt jurgia, hinc illæ tantæ

animis cælestibus iræ.

Quæ quidem suspicio aliquando, non diffiteor, est vera: sed sæpe etiam falsa. Non ideo plerunque alii tuæ sententiæ non accedunt, quod ex contemptu tui nolunt, sed ideo, quod non possunt. Non enim nostri arbitrii res est, alteri, quandoque volumus, assentiri. Vis ut tibi assentiar? Age, volo. Fac modo, ut mihi sententia tua vera aut saltem verisimilis appareat. Profer rationes, utere argumentis, quibus tibi ipse persuasisti. Feci, ais, at tu nimis pertinax es. At mihi nondum sufficere videntur. At mihi, ais, videntur. Vellem & mihi: quid irasceris? At sic, inquis, alter nostrum cæcus est. Non statim cæcus est, qui non omnia videt. Nemo est, qui non videat nonnunquam aliquid à sapientiori non observatum. Sed hac saltem in re, ais, te oculatiorem me esse vis. Dic potius feliciorem,

ciolem, & si in hoc fallor, ut tu me falli existimas, tanto sum te infelicior, quominus infelicitatem meam agnosco. Sed hoc utut sit: hanc certe suspicionem velim deponas, quasi ego propterea me tibi antepōnam, quod hic aliquid me observasse puto, quod tu non vidisti. Novi illud: *quandoque bonus dormitat Homerus*. Tu modo illud vicissim cogita: *Interdum est olitor valde opportuna locutus*. At longius ab instituto cursu abripior, quanquam neque hoc prorsus, uti postmodum videbimus, ab instituto nostro sit alienum. Sed redeo in viam.

Hæc, quæ
est de ver-
bis,

§. 4. Dixi Logomachia nomen præterea significare pugnam *περὶ λόγῳ de verbis*, cum qua significatione illa quoque conjuncta est, si hac voce pugnam *κατὰ λόγων, cum verbis aut adversus verba* susceptam, aut *ὑπὲρ λόγων, pugnam pro verbis*, intelligimus; quarum significationum illa verba tanquam partem adversam, hæc tanquam partem defensam considerat. Sed hæc dico conjuncta semper esse. Omnis enim, quæ *de verbis* est, pugna, ab una parte *pro verbis*, ab altera *contra verba* suscipitur. Cum autem *λόγοι* Græcis non verba modo, sed sæpe in universum iugas aut res nihili significant: unde illa Comicorum vox,
lōgi,

logi, & fortasse etiam illud Latinorum, verba dare: possumus hoc nomine generatim quasvis de rebus vilibus & inutilibus complecti disputationes, quas Græci aliquando *σκιαμαχίας*, aut *πολέμους περί ὄντων σκιῶς*. Flaccus facete *rixas de lana caprina* nominat. Aristophanes id appellat *λεπτολογεῖν, καὶ περί κἀπνῶν στενολεσχεῖν*. Neque ab hoc morbo (nam morbum esse, quis neget?) literati immunes sunt, nisi quis dicere velit, hos ante alios eo laborare. Quantam enim Deus bone! librorum partem occupant de rebus vilissimis ac plane ridiculis concertationes. Quis non rideat, cum audit, disputari inter doctos, fuerit ne piscis, qui Jonam deglutiit, mas an foemina; utrum pedem primum Æneas in Latium intulerit; quæ fibularum Romanarum forma fuerit, & sexcenta hujus generis alia. Bene est, quod plebs ignorat hæc certamina, quippe quæ Latina lingua tegere solet, alioquin, quodnam sæpe de eruditis judicium ferret? Quid dicam de Philosophis, quam frivolis de rebus aliquando disputant? Jam suo tempore Lucianus dixit: *Πάντες περί ὄντων σκιῶς μάχονται οἱ Φιλοσοφῶντες: Omnes Philosophi de umbra asini depugnant*. Quid diceret, si Scholasticorum libros legisset, aut alia

generatim, est Concertatio quasvis de rebus vilibus & inutilibus. Ejus varia nomina.

Latè se extendit.

Luciani notabile dictum de Philosophis.

Controver-
sia cucurbi-
taria inter
Augusti-
num &
Hierony-
mum.
Vide hos
Auctores
in Jonam.

nostra praelia aspiceret *nullos habitura triumphos*? Est etiam, quando Sanctissimi Theologi in hujusmodi ineptias incidunt. Quis enim non miretur, cum audit Orientalem Ecclesiam cum Occidentali de his inter alia disputare, num Sacerdotes barbas alere, Episcopos annulos gestare conveniat? quo pertinet cucurbitaria illa controversia, ut false à Drusio vocatur, Hieronymum inter & Augustinum de planta illa Jonæ, cujus umbra tantopere gavisus est; fuerit ne Cucurbita, an Hædera. Fatetur Augustinus, tumultum in templo motum esse, lecta versione Hieronymi, qui pro Cucurbita Hederam posuerat. Hieronymus conqueritur de quibusdam, qui propterea sacrilegii se damnarint. Ipse Augustino acerbè & fere hostiliter, ut Calvino videtur, respondet. Sane miratus fui sæpenumero, quoties vidi, doctos homines & qui sapientiæ studium profitentur, tantas de rebus nihili tragœdias movere posse, quasi de magna aliqua hæreditate dividenda ageretur, cum tamen, utcunque lis componatur, nihil inde ad eos utilitatis redeat: desii tamen mirari, simulatque perspexi, non de rebus disputari, de quibus disputari videtur, sed de disputantium ingenio &

& eruditione. Erras, si existimas, disceptare inter se Scaligerum & Cardanum, an hædus tot habeat pilos, quot caper : non hic, qui videtur, controversiæ status est. Quis igitur? Uter doctior sit, Scaliger ne an Cardanus, uter plus ingenio valeat. Atque idem de aliis dicendum, neque unquam homines, de rebus supervacaneis litigare desinent, quamdiu in his magnam eruditionis partem consistere sibi persuadebunt. Ubi magnopere vellem, hoc saltem cogitarent, nugas non cessare esse nugas, si difficiles sunt, neque quæstionem frivolum fieri utilem, si ad eam decidendam ingenium multorumque librorum lectio requiritur : quin potius verissimum esse illud Martialis ad Clasicum :

*Turpe est difficiles habere nugas,
Et stultus labor est ineptiarum.*

§. 5. Sed tamen nos nunc quidem non tam quamlibet de rebus levibus, quam speciatim eam, quæ de verbis instituitur, contentionem Logomachix nomine intelligimus. Magna vero & hic disputationum diversitas est. Aliquando enim, cum de verbis disputamus, nos de verbis disputare scimus, talesque videri volumus. Hicque iterum à verborum quandoque mutatione

Scaligeri
& Carda-
ni pugna de
numero pi-
lorum hæ-
di & ca-
pri.

Specia-
tim, est
contentio,
quæ de ver-
bis institui-
tur.
Ejus ma-
gna diver-
sitas.

Gramma-
ticorum
& Philo-
logorum
rixa.

tione aut explicatione res magni momenti dependent, ut nonnunquam fit, cum de verbis legis, testamenti, sacrarum literarum, eorumque interpretatione certatur: quæ disputationes non tam *de verbis* sunt, quam *de rebus ipsis*. Aliquando tamen lites plane *in verbis terminantur*, quales sunt Grammaticorum & Philologorum de vocum in qualibet lingua pronunciatione, scriptione, flexione, significatione, constructione dissensiones, quas uti lubenter ferimus, ita optaremus, ut neque nimium in iis temporis consumeretur, neque tanta inter dissentientes animorum contentione agitentur. Sed eo res processit, ut Grammaticorum rixæ pene in proverbium abierint. Utere vocabulo aut loquendi forma, quæ parum Latina Aristarcho cuidam videatur: statim *infamia* te notabit, & forte librum in te hoc titulo emittet. Verte aliquid ex Græco, aut Hebraico, parum ad palatum alterius: confestim in te convenire quidvis videbitur, quod dici potest in stultum: *caudex, stipex, asinus, plumbeus*: & nisi placaveris hominem, *tandem superabit tua stultitia hac omnia*. Cave, ne barbarismi aut solœcismi talem accuses; ferret lubentius, si flagitii insimulares. Non illepidum

pidum videtur, specimen hic Belli Grammaticalis acerrimi, ex quo de aliis iudicium ferri possit, exhibere: quod olim gestum est inter Nicodemum Frischlinum & Martinum Crusium, quod eo usque exarsit, ut nullum tam atrox convicium sit, quod alter alteri non dixerit. Appellat Crusius Frischlinum, ita ipse conqueritur, *sycphantam, sophistam, equisonem, stolidum, stupidum, furiosum, cuculum, cuculorum patrem, porcum, aprum vastatorem*: innumerisque ejusmodi ornat encomiis. Quid contra Frischlinus? non minus fortem dices militem. Vide, quam strenue se defendat. *Licuit, inquit, Crusio per convicium dicere me sycphantam, sophistam, furiosum aprum & quid non? Liceat ergo mihi juste & ex ipsius merito dicere sycphantam, & nebulonem, & asinum, & hominem nequam.* Maesti virtute bellatores! qua de re agitur? *non de lana caprina*, ait Frischlinus, *sed de re omnium maxima, nempe de Grammatica arte recte tradenda.* Hui! itane de Grammatica? Sed qua tandem in re dissentiunt tanti viri? Intelliges ex his Frischlini verbis: *Ecquid vos pudet, ea quae ad syntaxin nominum pertinent, referre ad quartam regulam de syntaxi verborum, loco alienissimo?* Qua-

*Specimen
belli gram-
maticalis
acerrimi
inter
Frischli-
num &
Crusium.*

*Vid.
Frischlini
Strigilis,
Gramma-
tica &
Poppy-
snus.*

so te mi Crusimusissime Crusimusi (ita lepide Crusii nomen transformat) quid est virulentia, quid acerbitalis quod dixi, vos omis-
 sisse in syntaxi verborum cum genitivo casu verba significantia motum de loco, & in etymologia omis-
 sisse nomina montium è prima regula? Paulo post adversarios accusat, quod syntaxin participiorum & supinorum transferunt à sede participiorum ad sedem verborum. Hujus generis omnia fere sunt, de quibus in duobus libris disputatur: quæ non ea mente profero, ut ullos rideam, sed hoc consilio, quo Helotas ebrios Lacedemonii adolescentibus suis conspiciendos præbuerunt. Neque aliæ linguæ minus sunt litium Grammaticalium feraces, quam Latina. sed tanto plus contentionum ferunt, quo magis earum notitia, utpote rarior, homines inflare potest. Qui quidem morbus non alia ratione mihi sanari posse videtur, quam si quis istis hominibus persuadere posset, linguarum & Grammaticæ cognitionem, quantumvis ad certa studia utilis sit, nondum tamen veram eruditionem & sapientiam esse, neque proinde operæ esse pretium, ut de his tantopere litigemus. Sed suadeat id, qui volet, nollem ego id tentare: novi quam hoc sit non difficile modo, sed peri-

periculosum. Neque tamen literatis hisce suspecta esse potest auctoritas Briani Waltoni, summi Viri, & qui, si quisquam alius, multarum linguarum scientia gloriari potuit. Is postquam pluribus docte, ut solet, de linguarum utilitate differuisset, tandem ita concludit: *Antequam finem huic dissertationi imponam, Sciolorum quorundam supercilio occurrendum est: qui in omnibus scientiis & disciplinis plane infantes, si forte linguarum cognitionem umbraticam adepti sunt, elati & tumidi omnes alios ipsis longe doctiores, & in rerum scientia superiores spernunt & contemnunt; quasi ipsi soli docti essent, reliqui volitarent sicut umbra. At sciendum est, linguarum peritiam januam quidem esse ad rerum doctrinam adipiscendam: at rerum ipsarum cognitionem illud esse, quod viros vere doctos reddit: (lingua enim putamina sunt, nucleus vero est ipsa rerum cognitio:) nec linguas propter se, sed propter aliud addiscimus: qui vero in linguis haerent, similes sunt iis, qui in porticu subsistunt, in domum non intrant, neque ejus penetralia vident. Unde inter Sciolos, Grammaticos, vel Criticos numerari possunt; in doctorum albo poni vix merentur. Hæc Waltonus, quæ ego suo loco relinquo: sanc nollem ut mihi*

Brianus
Waltonus
laudatus.
Ejus verba
in sciolos
Grammaticos.
Apparat.
Bibl. proleg. I.
§. 24.

impu-

imputarentur; nullum enim minus atque hoc hominum genus, in quod heic Vir Clarissimus invehitur, offendere tutum est.

*Veterum
Scriptorum
emendato-
res critici
quidam,
λογομά-
χοις ac-
censendi.*

*Eorum fri-
vola saepe
conjecta-
siones.*

§.6. Sunt etiam inter Veterum Scripto-
rum emendatores, quos *Criticos* vulgo ap-
pellant, qui λογομάχοις merito accenseri
possunt: adeo de suis illi nonnunquam e-
mendationibus certare solent, ubi sæpissi-
me Rei literariæ parum interesset, hoc
an illo modo legeres. Nil viderunt, qui
ante me hunc scriptorem ediderunt; ego primus
hunc locum restitui. Quid tunc? ego hoc ante
subolfeci; ego ita legendum censeo; ego reti-
nendum; ego aliter distinguendum; ego levi-
ter mutandum. Hem audaciam! pro omnium
exemplarium fidem! At hic stupor est ingenio
suo nihil indulgere. Imo hac mutatio res est
summi periculi pessimique exempli. Qua de
re agitur Doctissimi Viri? an fortasse hæc
supra nos de plebe homines? Imo vero de
sententia aliqua distinguenda, de voce
addenda, demenda: de syllaba aut litera
mutanda. Legendumne sit *Vergilius* an
Virgilius, *Agellius* an *A. Gellius*, *ceri-
monia* an *ceremonia*, *munditia* an *mundi-
tie*. Equidem summa laude dignos exi-
stimo, eos, quorum opera Veteres Scri-
ptores multorum seculorum barbarie pes-
sime

sime depravatos hodie emendatiores legimus: neque me fugit, quantæ hoc eruditionis sit: novi, nonnisi Herculis fuisse hoc Augiæ stabulum repurgare; sed tamen ut hoc non gloriosissimum fuit Herculis operum, optassem sæpius, ut optima ingenia modum aliquem in hac re tenuissent, atque Herculis exemplo monstra quoque errorum & vitiorum domuissent: neque perpetuo in mustaceo laureolam quæsiuissent: saltem de his rebus, tam pugnaciter nunquam inter se contendissent. Sed unde hæ doctissimorum hominum contentiones venerint, malo ex summi cujusdam Critici confessione, quam ex meis verbis intelligatur: *Quidam* (verba sunt Adriani Turnebi) *hac* Turnebi locus in criticos sui temporis. *tempestate ita studiosi sunt vetustatis, ut suæ memoria sueque prope obliviscantur: & antiquarii illi tam perditæ ruinas literarum antiquarum scrutantur, ut si quid ex illis eruere possint, sibi videantur triumphatores & Augusti esse. Itaque rudera rimantur auctorum erosorum & vetusta fugientium, & putria saxa & marmora exesa pervestigant, & si quid inveniunt, urbem aliquam sese bello cepisse subegisseque existimant. Eodem fere & morbo ipse laboro, ut vineia egomet cadam mea. Itaque cum in manus sumsissem Festum*

B Pompe-

*Pompejum in litera R. sic latebras ejus tineo-
sas & lacunas inanes pervestigavi, ut pene
cerebrum perdiderim, vixque tandem quic-
quam repererim &c.* Hæc Turnebus: ut
minime sit mirandum, Helenam, quæ
tantopere & amata & culta fuit, rixas ali-
quando inter amatores peperisse.

*Qui existi-
mant se de
rebus gra-
vissimis di-
sputare,
cum non
nisi verbis
dissideant,
ineptissimi
sunt λογο-
μαχοι.*

§. 7. Inter omnes vero pugnas, quæ
Logomachix appellari possunt, nullam
credo & ineptiorem & simul perniciosio-
rem esse, quam *cum existimant quidem ho-
mines, aut saltem videri volunt, se de rebus
iisque aliquando gravissimis disputare, cum
tamen interea nonnisi verbis inter se dissi-
deant.* Cum enim aliis atque aliis signis,
quibus eandem sententiam significant,
utuntur, fit, ut parum perspicaces,
quorum non ultra verba penetrat acu-
men, aut non satis attenti putent, ma-
gnam esse in rebus ipsis controversiam.
Hinc jurgia, lites, & omnia illa, quæ in
disputationibus sæpe evenire, ab initio
conquesti sumus. Quæ quidem pugna illi
prorsus mihi similis videretur, si Germa-
nus ad singulare certamen provocaret Per-
sam, quod is caput in conspectu suo non
aperuisset: hocque sui contemptum inter-
pretaretur: cum Persa interea suo more
honorem, quem potuit, maximum, ho-
mini

*Quibus
sint simile.*

mini testificari non omiserit. Viris vero perspicacibus ejusmodi disputatores non minus risui sunt, quam duo cæci essent videnti, qui magnis viribus gladios suos hinc inde vibrarent, sed ita essent constituti, ut alter alterum ferire non posset: ita enim horum *λογομάχων* omnes vani sunt ictus, qui non adversarium, sed aërem, & quod sibi in caligine sua fingunt, spectrum feriunt: quod ipsum quin morbus sit sapiente prorsus indignus, nemo inficias iverit. Qui quidem, si ad Logicam, nam hujus potissimum est de his mentis morbis agere, referendus est, putem, speciem quandam esse *ἑτεροζητήσεως*, aut *ἀγνοίας τῆς ἐλέγχου*. Ignoratur enim & hic utrinque, quid in quæstione sit, & in quo diffideat à nobis adversarius, & quem re dissentire putamus, verbis tantum discrepat: imo, nullus prorsus est dissensus, cum tamen verba utriusque partis talia sint, ut primo aspectu dissensus esse videatur.

§. 8. Sed ad quodnam genus hic morbus pertineat, non magnopere solliciti erimus: id potius videndum nobis est, quodnam illi remedium sit afferendum: nam hunc morbum, missis reliquis, quæ pariter sub Logomachiae nomine comprehendi pos-

Hujus morbi curandi methodus, in sequentibus observanda.

sunt, curare nunc quidem animus est. Atque imitabor etiam hic, quantum potero, Medicos: *primum in quibus potissimum reperiatur, videbo, quod ipsi subiectum morbi vocant, post, præcipuas quasdam species attingam: deinde morbi naturam gravitatemque ostendam: tum causas ejus aperiam, mox signa indicabo, & denique remedia præscribam.*

C A P. II.

De Logomachiarum subiecto, seu ubi potissimum reperiantur.

§. I.

Magna ubique Logomachiarum copia, maxime inter Eruditos.

Magna, fateor, ubique est Logomachiarum copia, sed tamen nemini, spero, me temerarium visum iri, si nusquam plures esse dixero, quam inter eos, inter quos minime oportebat, qui eruditi vulgo vocantur. Quanquam enim literæ omnes ad hoc potissimum comparatæ sunt, ut animo medicinam faciant, tamen nescio, quomodo idem hic, quod in corporis nonnunquam medicina, contingit,

git, ut eo frequentius homines ægrotent, quo sæpius remediis utuntur. Cujus quidem rei causam nondum inquirō: sed rem ita se habere demonstratu est facillimum. Percurrat modo aliquis animo omnes eruditionis partes, ac disputationes penitus inspiciat: mirabitur tam parum esse inter tantopere dissentientes dissensus.

§. 2. Sanctior *Theologia* videri poterat, quam ut hac labe contaminaretur: sed quasi parum alias rixarum esset in ea disciplina, quæ, cum pacem ubique spirare debebat, à multis tota eristica & polemica facta est, inventæ quoque sunt verborum pugnae, quæ Christianos dividerent, de quo adeo jam sua erat ætate Paulus conquestus. Quis nescit celebrem illam litem Græcos inter & Latinos, *sit ne dicendum in Deo esse τρεῖς ὑποστάσεις*, ut Græci volebant, cum Latini unam tantum ὑπόστασιν esse dicerent? Hi enim nomen ὑποστάσεως substantiam reddiderunt, idemque quod *ἁπλῆν* significare existimarunt: tres igitur personas, quam tres hypostases dicere maluerunt. Græci contra, quia metuebant, ne forte in his verbis Sabelliana lateat hæresis, unicam Patris, Filii & Spiritus S. hypostasin dicere nefas duxerunt. Quis crederet? Ad hanc litem dirimendam Sy-

In Theologia multa Logomachia.

Exempla varia.
Inter Græcos & Latinos de Hypostasi. Vid. Forbes. Instr. Hist. Theol. I. t. c. 2. §. 8.

22 *Dissert. de Logomachiis*

nodus erat cogenda, convocandi Episcopi quaquaversum ex Italia, Ægypto, Arabia & Lybia. Ac tum denique, utraque parte audita, deprehensum est, totam hanc controversiam, tanta contentione

Dallæus
de usu pa-
trum l. 2.
c. 5.

De Trini-
tate.

agitata, meram fuisse *λογομαχίαν*. Reliqui Ecclesiæ Doctores, quoties de verbis tanquam de rebus concertant? Sunt, qui in doctrina de Trinitate voces causæ & effecti usurpant: Alii tanquam periculosas rejiciunt. Sunt, qui ordinem inter Trinitatis personas constituunt: alii voces ordinem significantes ferre non possunt. Latini de solo Filio dicunt, quod sit Patris imago: Græci & Spiritum S. sic dici volunt: Basilii non vult, ut Filius Dei *γέννημα* *progenies* appelletur. Alii in hac voce non sunt ita religiosi. Ipsam il-

De processione Sp.
S. à Patre
& Filio

Disp. de
Supposito
cujus De-
odon au-
ctor fer-
tur.

Dissensus
Nestorii &
Orthodo-
xorum.

lam controversiam, quæ tantopere Græcos Latinosque collisit, de processione Sp. S. à Patre & Filio, aut à Patre per Filium, plurimum Logomachiae admixtum habere, multorum fuit judicium. Et si recentiori cuidam Philosopho credere-
mus, & ille dissensus inter Nestorium & Orthodoxos nonnisi in verbis fuisset, atque idcirco injuste hic ab Ephesino concilio damnatus: quod uti affirmare temerarium est, ita non dubitamus, multos

in-

incaute cum Nestorio Mariam Virginem Θεοτόκον negasse, & fortasse in hodiernis quibusdam Ecclesiis Græcis negare, qui nonnisi verbis à nobis dissident, neque cum Nestorio unicum Christum in duos Christos dividunt. Tempore vero Caroli M. ingentes turbas dedit insignis Logomachia, occasione cujusdam Felicis Urgelitani in Ilergetibus ad Pyreneos montes Episcopi, qui docebat, Christum secundum humanam naturam non proprium patris filium, sed adoptivum esse, non dissimilis illi, quæ inter Scholasticos postea est mota: *An Christus secundum humanam naturam sit Dei servus*; illique quæ etiamnum sæpe movetur: *An Christus, quatenus est Mediator, sit adorandus*. Quæsitum enim tum erat: *An Christus secundum humanam naturam sit Filius Dei naturalis an adoptivus*. Adoptivum Felix dicebat, cui se adjunxit Elipandus quidam Toletanus, qui tanta vehementia sententiam suam defendit, ut adversarios, servos, discipulos & præcursores Antichristi, & tanquam hæreticos exterminandos esse dixerit. Hadrianus vero primus Pontifex Romanus, existimans in verbis Felicis hæresin Nestorii de duabus in Christo personis latere, Christum etiam secundum

Logoma-
chia Felicis
Urgelitani.

* Vid. ejus
program-
ma fest.
nativit.
Christi.
An. 1643.

*Logoma-
chia Scho-
lasticorum.*

dum humanam naturam proprium Dei filium, non adoptivum, (ne duplex filius statuatur, quod, vane licet, metuebat,) definiit, adversamque opinionem tanquam hæreticam condemnavit, idque tribus Conciliis, quorum uni ipse Imperator Carolus interfuisse dicitur. Utramque vero partem re ipsa consensisse pluribus Georgius Calixtus * peculiari dissertatione demonstrat.

§. 3. Jam si ad Scholasticorum seculum accedimus, dubitari non debet, utrum multæ inter infinitas illas Theologorum *Nominalium & Realium, Thomistarum & Scotistarum* controversias, extiterint *Logomachia*: cum eum in finem Theologia omnis tot horridis menteque cassis vocibus obtenebrata esse videatur, ut in tanta caligine lites eo magis ab hominibus, omnem in disputando eruditionem collocantibus, augeri possent, & ubi de rebus disputandi materia eos deficeret, saltem de obscuris & à neutra parte satis intellectis verbis contenderent: nisi vero illas de rebus quæstiones esse volumus, cum disceptarunt: *An Sacramenta sint in aliquo predicamento: An si quis baptizaret in nomine Patris, Filii & Spiritus S. baptismus esset legitimus: An asinus possit bibere baptismum:*

&c

& alias hujus generis, quas adducere puerdet. Atque utinam hodie Theologia à Scholasticis istis Logomachiis penitus perpurcata esset: utinam non aliæ deinceps fuissent natæ & quotidie nascerentur. Sed audimus & legimus passim piorum hominum de crescente indies hoc malo querelas.

Etiam inter Theologos hodiernos.

Inter alias movet hanc querelam Joh. Claubergius: *Justinianus Imperator*, inquit, pluribus Institutionum paginis hanc sibi laudem iribuit, quod cum juri veteri nimis angustas & subtiles formulas & scrupulosam observationem abrogarent, ipsam Jurisprudentiam hac ratione ad majorem simplicitatem unitatemque reduxerit Optandum foret, similem in Theologia virum exurgere, qui rejectis litigiosa subtilitatis nodis & amputatis curiosarum nimis & superfluarum, addo & vanissimarum questionum minutiis, quas Theologia cum Scholastica Philosophia conjugium invexit, SS. Theologiam repurgaret atque ad simplicitatem sobrietatemque divini eloquii revocaret. Enimvero si, quod *Henricus Altingius* fecit, in singulis Theologiæ capitibus Logomachix à reliquis controversiis discernerentur, si id fieret non perfunctorie, ut ille fecit, sed accurate: si ab ipsis de rebus controversiis, quicquid Logomachix admixtum habent,

Theol. Elenctica.

diligenter separaretur : quantus Logomachiarum catalogus texi posset? Sed recentiora tutius est deplorare tacite secum, quam palam reprehendere.

*Jurecon-
sultorum
Logo-
machia.*

§. 4. De Jureconsultorum litibus nolo ego quidem judicare, ne falcem in alienam messem mittere videar: tamen, cum ab initio librorum ab illis scriptorum disputari video, *An jus in bruta quoque animalia cadat*, suspicor neque hos Logomachiis carere; cum tota hujus controversiæ decisio à sola vocabuli juris explanatione dependeat. Sed si quas inter se verborum pugnas habent, has ipsi component: hoc modo velim, ut cum aliis, qui Jurisperiti non sunt, neque titulum de vocabulis juris edidicerunt, quod vocibus aliquando non eodem, quo ipsi, sensu utuntur, ne statim litigent: neu, si quis v. g. *contractum* vocet, quod ipsi *nudum pactum* appellant, continuo hoc tanquam gravi errore offendantur, possunt enim recte & cum Jureconsultis sentire, qui non, ut Jureconsulti, loquuntur: quod si fit, non majus hoc vitium est, quam si quis hodie in Germania inter venatores pedes cervi, pedes appellaret, cum ipsi lingua sibi propria aliud illis nomen imposuerint. Quia Jurisconsultorum mentio facta

facta est, dicam, quod sæpe observavi, *Eorum qui
jus naturæ
explicant.*
eos, qui jus naturæ explicant, nam vehementer hoc in usu hodie est; frequenter *λογομαχεῖν*, cum quærent, *sine aliquid
juris naturalis nec ne?* Dixerit v. g. aliquis, legem de non furando non esse juris naturalis; continuo graviter alii offenduntur, & offenderentur merito, si idem, quod ipsi, juris naturalis nomine intelligeret. Sed si nihil aliud hoc vocabulo significare vult, quam jus illud primigenium, quod in statu, qui fingitur, hominum naturali ante ullum eorum pactum, ac propterea ante rerum divisionem locum habuit: tota lis in Logomachiam convertitur, quæ protinus evanescet, simulatque disputantes in significatione vocis convenire voluerint.

§. 5. Medici, fateor, circa rem versantur, ubi non tam facile est *λογομαχεῖν*, quippe quæ sensibus aliquo modo est subiecta. Ipsi tamen viderint, annon aliquando de *nomine* potius morbi disputent, quam de *ejus natura* atque medendi ratione: numquid Logomachiae indicium sit, quod, qui sententiis mirum quantum discrepare videntur, simulatque ad ægrotos ventum est, omnes eadem pene remedia præscribunt. Viderint, annon disputent ali-

*Medico-
rum Logo-
machie.*

aliquando, *sine morbus in humoribus, an in partibus*, cum sit in utroque; in humoribus immediate, & per humores in partibus: annon *de causis morbi* nonnunquam dissentire videantur, quorum alter proximam, alter remotam & primam causam investigat: annon *Chymici*, qui *novam prope introduxerunt linguam*, multis quoque hoc ipso Logomachiis occasionem dederint. Hæc & alia perspicaciores Medicorum rimentur. Ego ad Philosophos festino.

Philosophia, Logomachiarum semper feracissima.

** De natura Deorum. l. i.*

Probatur exemplis Stoicorum & Peripateticorum.

Vid. Gell. Noct. Attic.

l. 18. i.

§. 6. Hic vero videmus, semper Philosophiam Logomachiarum fuisse feracissimam, inde usque ab eo tempore, quo in varias sectas dividi cœpit. Meminit Cicero ** libri* cujusdam ab *Antiocho Academic* conscripti, quo probavit, *Stoicos & Peripateticos re consentire, verbis discrepare*. Nota est illa inter Peripateticos & Stoicos controversia, sitne aliquid præter virtutem, valetudo puta, aut divitiæ, aut honor, in bonis numerandum: itemque, sitne aliquid malum præter vitia, an inopia, an dolor: Ajunt Peripatetici, negant Stoici. Magnum in re gravissima dissensum diceret. Quid? an Aristotelici hæc virtuti æquant? honorem? divitias? Minime illud quidem: concedunt; omnium

omnium bonorum virtutem longe esse maximam, cum quibus cætera minora bona vix comparari possint. Quid Stoici? Nimirum hæc externa corporisque bona prorsus contemnunt? Neque illud certe. Tantum bona esse negant, contrariis autem præponenda esse concedunt; προηυμένα igitur vocant, quod Cicero præcipua, præposita reddit. Contraria autem, inopia, dolor, annon sunt mala, annon fugienda? fugienda concedunt Stoci, mala esse negant: sed ἀποπροηυμένα rejectanea. Concludunt ratiunculis Stoici, (en quam lepide homines irrideat Cicero *) quare dolor non sit malum: quasi de verbo, non de re laboretur. *Quid me decipis Zeno? nam cum id, quod mihi horribile videtur, tu omnino malum esse negas, capior & scire cupio, quomodo id, quod ego miserrimum existimem, ne malum quidem sit. Nihil est, inquit, malum, nisi quod turpe & vitiosum est. Ad ineptias redis. Illud enim, quod me angebat, non eximis. Scio, dolorem non esse nequitiam: desine id me docere: hoc doce, doleam nec ne, nihil interesse. Nunquam quicquam, inquit, ad beate quidem vivendum, quod est in una virtute positum: sed tamen est rejiciendum. Cur? asperum est, contra naturam, difficile perpassu, triste, durum. Hæc copia verborum*

* Tusc.
quæst. I. 2.

30 *Dissert. de Logomachiis*

verborum est, quod omnes uno verbo malum appellamus, id tot modis posse dici. Definis tu

**De Finib. mibi, non tollis dolorem. Alibi *Pisonem*
bon. & mal. l. 4.

introducitur ridentem Stoicos, quod divitias bona esse negent, præposita dicant: cum tamen *longius sit verbum præposita, quam bona*. Idem prorsus judicandum est de illa controversia Stoicorum: *an omnia peccata sint paria*; nonnisi verborum pugnam esse. Cum enim satis utrinque disputatum est, tandem apparet, aliam Stoicorum sententiam non esse, quam omnia peccata à lege deflectere, id quod nemo unquam negavit.

De illa monstrata, ut videtur, & quam
**Ep. 113.* Seneca * ipse concoquere non potuit, Stoicorum sententia, qua virtutes & vicia animalia esse dixerunt, perinde est sentiendum. Nihil enim minus animalis nomine intellexerunt Philosophi minime infani, quam quod nos vulgo intelligimus.

Vid. Diog. Laërt. in Zenone & Platone. Quo, pertinet & illa quaestio, sitne vox corpus nec ne. Stoici corpus esse dicebant: neque id mirum: definierunt enim vocem; *ἀέρα πεπληγμένον, aërem percussum*. Alii negarunt corpus esse: maluerunt enim vocem cum Platone definire, *πλῆξιν τὸ αἶρος, percussionem aëris*; quis hic Logomachiam non observat?

Illā

Illa quoque inter Stoicos & Peripateticos celebris de affectibus dissensio: *an vid. sapiens affectibus omnino careat, an vero eos moderetur*; quorum illud Zeno, hoc Aristoteles tenuit; si propius aspiciatur, nihil aliud quam Logomachia est. Negat enim ille in affectibus esse moderationem, quia quod moderatum est, affectum non vocat.

Magna causa cur Stoici affectus plane improbarunt fuit nomen πάθος, quod morbum quendam significat. Quam in rem lepidam de Plutarcho A. Gellius narrationem à Tauro factam refert: *Plutarchus, inquit, servo suo nequam homini & contumaci, sed libris disputationibusque Philosophia aures imbutas habenti, tunicam detraxi ob nescio quod delictum, cedi- que eum loro iussit: cœperat verberari; obloquebatur, non meruisse, ut vapulet; nihil mali, nihil sceleris admisisse: postremo vociferari inter vapulandum incipit: neque jam querimonias, aut gemitus ejulatusque facere, sed verba seria & objurgatoria: Non ita esse Plutarchum ut deceret; philosophum irasci turpe esse: librum quoque περὶ ἀπορυγίας pulcherrimum conscripsisse; iis omnibus, quæ in eo libro scripta sunt, nequaquam convenire, quod provolutus effususque in iram plurimis se plagis mulctaret. Tum Plutarchus lente & leniter:*

*Lepida de
Plutarcho
narratio
A. Gellii
Noct. Att.
l. i. c. 6.*

32 Dissert. de Logomachiis

leniter: *Quid autem, inquit, verbero nunc ego tibi irasci videor? ex vultu meo, an ex voce, an ex colore, an etiam ex verbis correptum me esse ira intelligis? mihi quidem neque oculi, opinor, truces sunt, neque os turbidum; neque immaniter clamo; neque insperumam iramve effervesco: neque pudenda dico, aut pœnitenda, neque omnino trepido ira & gestio: hac enim omnia, si ignoras, signa esse irarum solent, & simul ad eum, qui cadebat conversus, interim, inquit, dum ego atque hic disputamus, tu hoc age.* Hæc Taurus apud A. Gellium: ex quo conjici potest, etiam Stoicos per iram, quam à sapiente abesse crediderunt, nihil aliud intellexisse, quam quod Aristotelici vocarunt iræ excessum & ἀμετρίαν. Hic est idem ille Plutarchus (& hoc Logomachiae exemplum) de quo hic ipse Gellius alibi dicit, eum in Epicuro accusando nimis minute λέξεις τηρεῖν.

In universum de Stoicis Cicero hoc fert judicium, quod verbis se potius à cæteris sectis, quam sententiis distinxerint. *Ex iisdem verborum prestigiis (ita * alloquitur Stoicos) & regna vobis nata sunt, & imperia, & divitiæ, & tanta quidem, ut omnia, quæ ubique sint, sapientis esse dicatis: solum præterea formosum, solum liberum, solum*

* De fin.
bon. &
mal. l. 4.

lum civem : stultorum omnia contraria , quos etiam insanos esse vultis. Verbis denique à reliquorum Philosophorum decretis diffidere statuit illorum παράδοξα , quæ ipse mirabilia reddit. Hinc tandem hæc de Stoicis conclusio : Re eadem defendunt, quæ Ibid.
*Peripatetici ; verba tenent mordicus : quæ rursum dum sibi evelli ex ore nolunt , horridiores evadunt , asperiores , duriores & oratione & moribus. Sed & de Academicis & Peripateticis noster ait Cicero * , eos rebus congruentes , nominibus differre , esseque eorum unam & consentientem duobus vocabulis Philosophia formam.*

* Acad. quæst. I. I.

Quas vero magis Philosophorum sectas de fine bonorum dissensisse credimus adhuc , quam Stoicos & Epicureos ? Quid Epicuro Voluptatis magistro , omnis spurcitiei , ut multis videtur , auctori commune videtur cum tetricis illis & severis Stoicis ? Est tamen aliquid atque adeo multum. Epistol. Epicuri ad Menocea dicit Philosophiam docere : ὡς ἔστιν ἡ δέως ζῆν ἀνευ τοῦ Φρονίμως , καὶ καλῶς , καὶ δικαίως ἀνευ τοῦ ἡδέως Lactant. I. 3. de falsa sapientia : *Epicurus summum bonum in voluptate animi esse censet. Aristippus in volupt. corporis. Plato : non alia est vera voluptas præterquam prudentis. Audi Torquatum apud*
C Cicero-

Logom. Stoicorum & Epicureorum.

L. I. de
fin.

Ciceronem: *Clamat, inquit, Epicurus; quem vos voluptatibus deditum esse dicitis, non posse jucunde vivi, nisi sapienter, honeste, justeque vivatur; nec sapienter, honeste, juste, nisi jucunde. Quod si ita est, quid aliud Epicurus voluptatis nomine intelligit, quam illam, quæ ex virtutis studio oritur, animi tranquillitatem, cui si aliquando corporis quoque ἀναλγησίαν addit, quæ temperantiæ, quam identidem inculcavit, comes est; quid est, quod Aristoteles, Zenove reprehendere possit?*

De vita
beata.
c. 13.

Sed si hominis Epicurei suspectum tibi iudicium est: audi Stoicum acerrimum: *Mea quidem, inquit Seneca, ista sententia est: sancta Epicurum & recta præcipere, & si propius accesseris, tristitia: voluptas enim illa ad parvum & exile revocatur: & quam nos virtuti legem dicimus, eam ille dicit voluptati. Jubet illam parere natura: parum est autem luxuriæ, quod natura satis est. Quid ergo est? Ille qui desidiosum otium & gulam, & libidinis vices felicitatem vocat, bonum mala rei querit auctorem; & dum illo venit, blando nomine inductus sequitur voluptatem, non quam audit, sed quam attulit: & vitia sua cum cœpit putare similia præceptis, indulget iis non timide nec obscure: luxuriatur enim inoperto capite. Ita non*

non dico, quod plerique nostrorum, sectam
 Epicuri flagitiorum magistram esse: sed illud
 dico: male audit & infamis est, & imme-
 ritq. Et sane mirari aliquis posset, tantum
 esse inter Philosophos de voluptate dissen-
 sum, nisi sciret, solere nonnunquam eos,
 ubi in re conveniunt, in verbis dissentire.
 Epicurus voluptatem summum bonum
 statuit: Aristoteles bonum, sed non sum-
 mum: Zeno indifferens: Speusippus &
 Critolaus malum: Antisthenes denique
 summum malum; plane, ut dicere non
 dubitarit *μανείην μάλλον ἢ ἡσθείην. Insani-*
rem potius, quam voluptatem caperem. Quis
 hos tantopere de re satis nota dissentire
 posse crederet: si non justa esset causa su-
 spicandi: eos in significatione vocabuli
 voluptatis, boni, mali, non convenire?
 Platonem vero & Aristotelem, qui, si
 ipsi fidem habemus Aristoteli, in multis
 admodum discreparunt, in plerisque ho-
 rum consentire; probare instituit Boë-
 thius, ille Peripateticæ Philosophiæ pri-
 mus inter Latinos instaurator: & videre-
 mus sine dubio majorem inter Aristotelem
 cæterosque omnes Philosophos consensio-
 nem, nisi Aristoteles parum candide alio-
 rum decreta proferendo, sensum eorum
 corrupisset; atque ut fraus tanto minus

Vid. Gell.
 Noct. Att.
 l. 9. c. 5.

Logom;
 Platonis,
 & Aristot-
 telis.

deprehenderetur, superiorum scripta posteris furripuisset. Plato Democriti libros comburere voluit: sed abductus est ab hac sententia Amiclæ & Clinix Pythagoricorum monitis; quod apud plerosque diffusi essent hujusmodi libri: sed quod Plato voluit, Aristoteles ope Alexandri perfecit. Vid. Plin. in præf. ad Vesp. Joh. Picus Mirandula op. tom. 1. p. m. 83. *Nullum est quasi naturale & divinum, in quo Aristoteles & Plato sensu & re non conveniant, quamvis verbis dissentire videantur. Alia vide Logomachia inter Philosophos exempla ibidem.*

Scholasticorum Philosophorum Logomachia.

§. 7. Redeo nunc ad Scholasticos Philosophos, de quibus idem, quod de Theologis ante, judicium est ferendum: quamquam ne hi quidem distinguendi ab illis sint, quippe qui eandem ex Philosophia & Theologia disciplinam fecerunt. Hic an quoque Logomachia fuerint, quæris? Imo potius quære, an aliud quam Logomachia. Tantopere his delectati esse videntur, ut ideo semper in generalibus substituisse, nunquam ad specialia, & utilia, & clara venisse videantur, quia in his non perinde, ut in illis, licet *λογομαχεῖν*. Longa illa disciplinarum prolegomena, per quæ unus erat ad Philosophiam aditus, quid aliud continent, quam Logomachias?

Magnæ,

Magnæ, credo, controversiæ sunt: *An Physica sit scientia, an ars: an detur Physica,* *In Physica.*
 (vereor ne & hic lis mihi moveatur, quod illam quæstionem huic antepono: gravis enim controversia est, *num quæstio an sit precedere debeat quæstionem quid sit*: sed forte citra præjudicium ita sunt locatæ) *an Physica subordinetur Metaphysica*, & si hoc ita est, *annon hoc derogat nobilitati Physica: quodnam sit ejus objectum proprium, adequatum, & formale: an possit perfecte definiri: in quo predicamento sit: aut omnino an sit in aliquo*: An recte addatur in definitione illud, *quatenus naturale*: illudque, *quatenus sit ne reduplicativum an specificativum*? Quæ omnes controversiæ, præterquam quod inutiles sint, si modo decidi merentur, sola vocabulorum explicatione decidi possunt.

Quid Metaphysica Scholasticorum? tota, quanta est, ex Logomachiis confuta *In Metaphysica.*
 est: ac si omnes idem barbaris illis, quibus omnia ibi resonant, vocabulis, significarent: si & ipsi Metaphysici sese, & alii alios intelligerent: alta foret in hac disciplina pax. Quod ex uno alterove exemplo facile conjici potest:

Nulla fuit majori inter Scholasticos nisi pugna pugnata: quam illa de *universalibus*,

Joach. Ca-
merarii te-
stimonium.
In vita
Philippi
Melan-
chthonis.

dentur à parte rei, nec ne : quæ plane to-
tam Scholasticorum gentem in duas sectas
divisit. Affirmant *Reales*; negant *Nomi-
nales* : inter quos, si Joachimo Camera-
rio credimus, non solum contentiones & jur-
gia, sed dimicationes etiam ac pugna commi-
sa fuerunt, interdum concertationibus non per-
tinacibus modo verborum, sed manuum quoque
violentis. Hæc dissidia (pergit laudatus au-
ctor) & Tubingensem Academiam invase-
rant, contubernio bonarum artium & Philo-
sophiæ studiis destinato, in duo quasi castella
diviso, ex quibus de opinione sua factiones il-
la acerrime præliantes, inimicitias graves ex-
ercebant. Illa tamen tanta lis, audeo dicere,
non potest esse nisi Logomachia. Quære
ex illo, qui universalia statuit à parte
rei : An detur alicubi in rerum natura sub-
stantia, quæ neque est spiritus, neque cor-
pus, neque alia substantiæ species, imo
neque hæc, neque ista, neque illa sub-
stantia : sed simpliciter substantia, & nil
nisi substantia : prout nos concipere ali-
quando possumus substantiam simpliciter
& nil nisi substantiam. Nullum credo us-
que adeo *Realem* esse posse ; qui, dummo-
do hæc verba tua intelligat, id sit unquam
affirmaturus. Sed nihil aliud negant, qui
universalia à parte rei esse negant. Quære
deinde.

deinde ex eo, qui hoc negat, an id, quod ipse concipiat, cum nonnisi substantiam concipit, sit, (quanquam non solum, uti ego solum concipio,) sed sit tamen revera in hac, in illa, in ista substantia, quæ in rerum natura est. Nemo itidem vel maxime *Nominalis*, si modo te intelligit, id negare audebit. Sed nihil aliud volunt, si modo sciant quid velint, qui universalia à parte rei esse dicunt. De supposito multæ hujusmodi controversiæ motæ sunt: quæsitum v. g. inter alia est, *an anima Petri à corpore separata sit suppositum*, nec ne, & adhuc sub judice lis est. Negat hic suppositum esse: cur? non est substantia singularis, completa. Quid? annon est anima completa? Est; sed non est completus homo. Quasi quisquam animam separatam completum hominem esse diceret? Sed tamen, pugnant, non est suppositum, quia pars est hominis nunc quidem separata, sed suo tempore iterum cum corpore conjungenda. Quasi ego hæc negem? Quid igitur disputas? Non amplius disputo; video enim nos in omnibus consentire, præterquam in vocabulo suppositi. Ego quamvis substantiam singularem ab alia separatam suppositum appellabam: tu nonnisi eam, quæ non ad id destinata.

20 *Dissert. de Logomachiis*

est, ut cum alia suo tempore iterum unia-
tur: sed non tanti est suppositi vox, ut
propterea amici esse desinamus. Facile
demonstrare possem, tales esse omnes
prope Metaphysicorum disputationes, *an*
omne ens sit unum, sit verum, sit bonum;
sit perfectum: quodnam sit principium indivi-
duationis: an relationes existant revera, &
alias per totam illam disciplinam.

Physica
Scholasti-
corum.

Ejusdem commatis sunt Physica Scho-
lasticorum, & longi illi in octo libros Phy-
sicorum Aristotelis commentarii: quas
enim alias controversias expectes, ubi ni-
hil nisi voces sunt, quibus nulla plerun-
que aut saltem confusa subiecta est vis,
quam Logomachias? Nimirum valde dis-
fident, qui disputant *detur-ne motus ad*
substantiam, sit-ne generatio motus nec ne,
fiat-ne in instanti, ut loquuntur, an successi-
ve. Quis non agnoscit hic Logomachiam?
per generationem intelligunt, quod sit
primo momento, quo forma intrat in ma-
teriam: quare si tempus ad generationem
plantæ ex semine requiri, objicis; dicent,
omnia quæ tempore fiant, esse prævias
alterationes; generationem unico mo-
mento peragi. Omnis Scholasticorum
Physica his plena est, nisi existimes ma-
joris momenti esse, quærere, *an privatio*
sit

fit principium: an materia sit pura potentia: quomodo ex potentia materia forma educatur: quomodo in corruptione in eandem potentiam redeat. An forma elementorum maneant in mixto. An qualitates elementorum symbolica differant specie. An temperamentum sit quinta qualitas à primis diversa &c.

Postremo nihil magis vereri ubique In Logica. videntur Scholastici, quam ne non satis sit in Philosophia logomachiarum. Hunc in finem voluerunt, ut discipuli, quando eos Logicam docuerunt, distinguerent inter has enunciationes: *Leo animali est fortior, & Leo est fortior animali.* Si quis non assas modo, sed adustas carnes edisset, hunc recte voluerunt dicere: *Ego crudas carnes comedi:* non autem sic: *ego comedi crudas carnes.* Si cui pars pecuniæ ablata est, parte relicta: non audet ita apud judicem conqueri: *spoliavit me denariis,* sed dicendum: *denariis spoliavit me.* Fieri potest, si hos audis, ut verum sit hoc: *Papam verberavi,* cum eodem tempore falsum sit: *Verberavi Papam.* Quem in finem hæc omnia? certe in nulum alium, quam ut nunquam contendendi materia deesset.

§. 8. Recentiores Philosophi quidam, Recentiorum Philosophorum quia planius loqui solent, & Geometras secuti,

pauciores
Logoma-
chia
Steph.
Gauſſenus
laudatus.
Dissert. de
usu Phil.
in Theol.
Cartesius
multas lo-
gom. sustu-
lit.
Multis ta-
men inter
prisca &
nova philo-
sophia cul-
tores con-
tentionibus
occasionem
dedit.
Quod pro-
batur
exemplis.

secuti, ambiguitates vocum remouent, tot inter se Logomachias non habent: quare non injuria Stephanus Gauſſenus, singulari judicio Theologus, Cartesium propter hoc præcipue laudavit, quod Logomachias è Philosophia sustulerit. Sed quanquam ejus sequaces ipsi inter se de verbis raro litigent; tamen hæc ipsa Philosophia multis inter priscae & novae Philosophiae cultores contentionibus occasionem dedit, quæ nonnisi Logomachiae sunt.

Hic *cogitationem animam esse* dicit. Putat alter, accidens ex anima fieri cum corpore interiturum, & jam clamat: actum esse de immortalitate animæ. At hic per cogitationem substantiam quandam intelligit: quam ideo solum cogitationem vocat, ne quis existimet, mentem esse substantiam quandam, cui cogitatio tanquam res distincta accedat; cum ipsius illius substantiae naturam, quantum nobis cognita est, in perpetuo quodam cogitandi actu consistere velit: quem si tollimus, nihil in mente reliquum sit, nisi conceptus generalis substantiae, qui nusquam est in rerum natura.

Hic Philosophaturo *dubitationem* suadet: putat alter; jam Pyrrhonismum atque adeo Athei-

Atheismum in Scholas introduci. At hic fortasse nihil aliud vult, quam nihil sine ratione esse credendum, atque an sufficientes ad aliquid credendum rationes habeamus, hoc modo optime probari, si ponamus, (non credamus, sed ponamus aut fingamus) id esse falsum, ut si postea rationum vi ad id credendum adigamur, tanto magis in sententia nostra confirmemur: ut pote quæ non anticipata quædam opinio sit, sed quam ipsa ratio & evidentia nos amplecti coëgit.

Negat hic, *Spiritus esse in loco*, imo aliquando *nusquam* esse dicit. Statim est, qui metuit, ne forte prorsus Spiritus negentur: ac jam de Sadducæismo & Atheismo cogitat: aut saltem nullam spirituum ad corpora relationem statui putat. Sed nihil est, quod vereatur. Alter enim in loco esse dicit ista tantum, quæ eandem ad locum, quam corpora, relationem habent, quæ spatium aliquod occupant, quorum aliud tangit aliud: & cum Spiritus hanc ad corpora relationem habere negat; negat in loco esse; & quia nusquam idem significare credit, quod nullo in loco: dicit, Spiritus nusquam esse.

Aliquis Deum nonnisi per operationem in mundo,

mundo esse dicit. Protinus alius, qui aliquando audivit Vorstium quendam statuisse, Deum in cœlo solo per essentiam, in reliquis locis per virtutem & operationem esse: quadam verborum similitudine deceptus; atque, inquit, hic illa est opinio: fugite hinc: in hac herba anguis iste latet. Vanus vero iste est metus; Cum enim ille Deum sola operatione in mundo esse dicit, non essentiam excludere vult, voluntatem enim, qua Deus omnia operatur, ipsissimam ejus essentiam esse agnoscit, sed diffusionem, expansionem corporalem, quam ipse ille Vorstius Deo attribuit.

Negat quis, ante *conditum Mundum Deum fuisse usquam*, aut hodie *extra mundum esse*. Credet alius, Deum ante mundum fuisse, aut fuisse infinitum, negari: aut hodie negari ejus immensitatem. At ille nihil aliud dicere vult, quam, ante mundum conditum, cum nulla res fuerit præter Deum, neque hodie ulla res extra mundum sit; nulli quoque rei Deum ante mundum fuisse, & hodie extra mundum esse præsentem.

Sunt, qui disputant inter se, sitne *error in intellectu, an in voluntate*, qui in hoc conveniunt in simplici perceptione ob-
scuritatem

securitatem & confusionem, at in solo judicio errorem proprie dictum esse; ut omnis in eo controversia sit, num judicium ad intellectum, an vero ad voluntatem sit referendum: quasi intellectus & voluntas reapse, & non solo considerandi modo inter se distinguantur.

Negat aliquis *ignem esse calidum*. Hic vero insanire aliis videtur, & jam ad fornacem calefactam provocant. At iste ignem calefacere concedit, negat in igne sensum caloris, nam hunc calorem vocat, aut aliquid huic sensui simile esse.

Negat aliquis Sensum aut dolorem esse, nisi in cerebro, atque adeo in mente. Ridet alter, & jam fustem, quo contrarium probet, poscit. At hic non negat causam doloris posse in quolibet membro oriri, ipsum doloris sensum in mente esse dicit, qui non oriatur ad motum cujuslibet membri, nisi ille motus usque ad partem quandam cerebri deferatur.

§. 9. Neque verò ii sumus, qui talium concertationum numerum nos inire posse arbitremur, quod neque una atque altera *In Mathesi Logomachias esse exemplis demonstratur.* dissertatione, neque omnino ab uno homine peragi potest: cum ita late per omnia disciplinarum genera lues ista se diffuderit, ut ne Mathesin quidem, quant-

tacunque se solitudine, suis nominum definitionibus, ab hac contagione præservavit, intactam prorsus reliquerit. Pugnent enim inter se Clavius & Pelletarius, *angulus ne sit*, illud, quod inter tangentem & circuli peripheriam intercipitur, spacium, sive aliter describere placet id, quod vulgo *angulum contactus* vocant: simulatque in significatione hujus vocis, *angulus*, convenire vellent, fortasse, de quo disputarent, non haberent. Quæ vero Thomas Hobbesius Mathematicis objicit; quis non videt, in verbis maximam partem consumi? definitiones eorum in ordinem cogit, non animadvertens, nominum definitiones esse, quæ semper in definientis potestate fuerunt. Quo pertinent illæ quæstiones, quæ serio nonnunquam fiunt, *sine punctum pars linea?* *sine unitas numerus?* quod Stevinus contra Euclidem affirmat. Quin & illud observes, evenire quandoque, ut, si quis nominibus non eo utatur sensu, quem Mathematici iis subjecerunt, veluti si quis *signum*, quod ipsi *asterismum*; aut *proportionem* vocaret, quod ipsi simplicem *rationem* appellant; quanquam revera idem; quod illi, sentiat; non aliter rideatur, quam si in furorem incidisset: obliti vid-
erant

erant acutissimi homines, se in nomenclationibus istis, non rationem, sed arbitrium suum esse secutos. Quare si in eorum hortulis crescit hoc infelix lolium, qui tanta sollicitudine ejus incrementum impediunt, quid de iis cogitabimus, qui illud & copiosissime crescere patiuntur, & sicubi crevit, de eo evellendo, nedum de eradicando, vix unquam cogitant, utinam non alerent!

C A P. III.

De variis Logomachiae speciebus.

§. I.

EX his, quæ superiori capite, nullo quidem delectu habito, sed, ut in quæque incidimus, allata sunt, Logomachiae exemplis, perspicuum est, quam leves sint sæpe inter ea, quæ, maximo inter eruditos strepitu disputantur, verborum pugnae: neque dubitamus, quin paucula illa, quorum mentionem injecimus, innumerabilia alia perspicacioribus in memoriam redegerint. At nos in cursu incepto pergemus nuncque, ut instituimus, in præcipuas quasdam *Logomachiae species* digitum intendemus.

§. 2. Ac

*Logomachiarum
varia species.*

Cap. I.

§. 7.

*Harum
differentia
prima.*

§. 2. Ac primo quidem observamus, in disputationibus doctorum, quas logomachias appellare licet, ea significatione, quam supra elegimus; aliquando omnem in verbis esse dissensum, in re prorsus nullum: aliquando, esse quidem aliquam eamque veram inter disputantes dissensionem, ita tamen, ut verba utriusque alteriusve partis longe aliam eamque in pluribus & gravioribus præferant. Fit enim sæpe, ut dissidentium uterque, aut alter, cum sententiam alterius oppugnat, non id modo refellat, in quo revera ab eo dissentit, sed verbis quibusdam non intellectis offensus, simulque, uti fit, affectu abreptus, latius vagetur, atque ea etiam refutanda sibiumat, de quibus inter se & adversarium convenit: hæcque omnia crescente disputantium fervore, ita inter se permisceantur & confundantur, ut tandem, in quo consensus in quo dissensus sit, vix amplius discerni possit; quod vitium partim ἐτεροζητήσει, partim πολυζητήσει vicinum videtur. Illam priorem nos *Logomachiam puram*, hanc *mixtam* appellabimus. Illa ineptior est, sed plerunque detectu facilior: hæc quanto difficilior cognitu, tanto magis est metuenda. Ac tametsi illa minime rara sit, uti vidimus, hæc tamen longe est frequentior

*Logomachia pura
& mixta.*

tior, plane, ut dicere possimus, perquam paucas eruditorum disputationes esse, quæ non aliquam verborum pugnam admixtam habeant.

Pauca disputt. absque verborum pugna.

§. 3. Quo minus temeritatis accusabor, si, quod nunc quidem ante alia occurrit, exempli loco attulero, ortam ante lustra non ita multa, inter summos Viros, de *Sabbathi*, uti loquuntur, *moralitate*, disputationem. Non enim negaverim, esse hic aliquam in eo dissensionem, quod alii ad illud, quod etiam nunc obtinet, septem dierum intervallum, inter dies publico Dei cultui sacros, Ecclesiam Christianam æque, atque Judaicam olim adstrictam esse, contendunt, quæ communis Ecclesiæ nostræ sententia est: alii dicunt, prudenter quidem hoc dierum intervallum ab Ecclesia Christiana esse retentum; egisse tamen eam, quod hic egit, non præcepto quarto ad id obligatam, sed pro ea, quam illi præ Veteri Ecclesia tribuunt, libertate.

Disputatio hodierna de moralitate Sabbathi.

In hoc quanquam dissensio sit, alia tamen longe nonnunquam esse videtur. Sæpe enim ad nescio quas *de morali* contentiones deflectitur disputatio, ubi in significatione hujus vocis neque omnes conveniunt, neque iidem sibi constant: nunc hoc

D

vo-

vocabulo intelligentes, quod ex ipsa Dei natura sanctitateque ita derivatum est, ut Deus ipse aliter id præcipere non potuerit; nunc quod ex notionibus homini natura inestis necessario deducitur; nunc quod, licet non juris naturalis, perpetui tamen est; nunc denique quod quoquo modo ad mores pertinet.

Ut primum vero tenebræ semel abortæ sunt, ad alia itur, atque incalcescentibus animis ita quandoque disputatur, ac si altera pars, omnes præcepti quarti apices juris perpetui esse, diceret, ac Sabbathum Judaicum revocaret: altera, tantum non omnem cultum Dei publicum aboleret. Quo fit, ut, velut atris nubibus menti offusis, vix amplius cerni possit, de his omnibus inter tantos Viros plane convenire: Non omnia, quæ in præcepto quarto mandantur aut prohibentur, juris esse perpetui; non septimi, a Creatione mundi, diei numerationem, non multa in rigida illa, quæque ipsa bruta animantia complectitur, quietis observatione: non alia, quæ mysticam futuri significationem habebant. Perpetui vero juris esse hæc omnia: Deum non modo intra privatos parietes, sed publice in frequenti cœtu colendum, utque cœtus convenire possint, idque

idque recte & ordine fiat, statuta tempora necessario observanda esse; tantumque abesse, ut hæc rariora inter Christianos, quam inter Judæos esse possint, ut potius inter illos crebriora esse oporteat, majorique sint, frequentia, attentione, religione, ardore celebranda. Cum igitur Ecclesia Christiana, in statis hisce temporibus, idem, quod Judaicæ olim observavit, dierum intervallum retineat, ac septimum quemque diem Deo consecret, quod ut mutetur, neutra pars disputantium suadet, (sive id præcepto quarto adstricta fecerit, sive hac in re libertate sibi concessa usa fuerit,) obligare quemque perpetuum præceptum Dei, ut, posthabitis omnibus aliis negotiis, diebus his divino cultui unicè vacet, cupide ad sacras congregationes veniat, domi se ad easdem rite præparet, omniaque, quæ vel tantillum in re tam necessaria se impedire possint, seponat: idque non ideo solum, quia Deus velit, ut constitutioni Ecclesiæ pareamus, sed præcipue, quia his solis & non aliis diebus hoc modo publico & solenni colatur Deus; qui cultus publicus & solennis, privato minime sufficiente, juris sit perpetui & immutabilis, homini, cui ad eum patet aditus, à Deo

in omnia secula mandatus : adeo , ut hunc iis diebus , quibus aut solis , aut saltem præcipue peragitur , negligere , non modo sit ordinem hominum sanctissimum , licet & hunc à Deo constitutum , negligere ; vota sua precesque cum omnium Christianorum , his ipsis diebus , fufis precibus conjungere nolle : sed Deum ipsum , idque *directe & immediate* , ut in cujus honorem hic tam gratus tot in orbe Christiano votorum , precum , aliorumque pietatis exercitiorum fit concentus , contemnere ; eumque tributo non minus à Christianis , si non pluribus nominibus , quam olim à Judæis , ipsi debito ; quod alio tempore , quam cum Ecclesia convenire solet , pendere illi non possumus ; defraudare . Atque ad hunc , in hisce omnibus , partium disputantium consensum sicubi non attenditur , sed ita disputatur , ac si in his aut universis aut quibusdam partes quoque diffiderent ; hæcque iis , in quibus verus dissensus est , permiscetur : tum vero oritur illud contentionis genus , quod nos *mixtam Logomachiam* appellamus .

Altera disputatio de ἀπίστοις & ἀπειροῖς ἀμαρτιῶν.

§. 4. Audeo , quia hanc controversiam adducere sustinui , alteram hic inter eodem agitatam , attingere : *An fideles , qui ante*

ante Christi mortem vixerunt, obtinuerint ἄφεσιν ἀμαρτιῶν? quam utrum ad puras, an ad mixtas Logomachias referam, nescio: adeo enim Græcæ hæ voces hic mihi necessariae videntur, ut verear, ne, si Latine loquar, controversia omnis in auras abeat: quare & in vulgi ore, in ea regione, ubi cœpit, Græca hæc vocabula ἄφεσις, πάρεσις identidem fuisse, ajunt. De salute nostra agi, crederes; cum tamen omnino de nobis non agatur, sed de iis, quibus nostro judicio non amplius aut prodesse aut obesse possumus.

Sed quid? an forte illi, qui fidelibus ante Christi mortem ἄφεσιν negant, hos sententia sua in orcum detrudunt? Longe absunt illi quidem ab hac crudelitate. At certe in limbo quodam ad Christi resurrectionem expectare jubent? Hunc vero limbum una cum aliis rident. Fortasse in vita proprias peccatorum ab ipsis pœnas exigunt? Ne unicam quidem. Ergo sane post mortem in purgatorium quoddam ablegant, ubi à peccatis, quorum ἄφεσιν non acceperunt, mudentur? Imo vero recta ad cœlum evolasse, statimque à morte in beatorum vitam, eamque nunquam finiendam ingressos, &, quod majus est, quosdam eorum vivos eo sublato esse,

contendunt : hæcque omnia obtinuisse ajunt, per solam fidem in Christum Filium Dei, quem, constituto tempore, pro omnibus & singulis peccatis suis, Deo certo satisfacturum noverant, ex innumeris promissionibus, vaticiniis, typis & pignoribus; quorum, quod mireris, longe plura ubique in omnibus V. T. libris, ii ipsi qui fidelibus V. T. ἀφεσιν ἀμαρτιῶν negant, quam cæteri simul omnes, inveniunt.

An in hoc dissident, quod hi statuunt: ante Christi mortem, unicum pro peccatis sacrificium, Deo pro peccatis nondum *actis* fuisse satisfactum, hocque sensu peccata nondum *actis* fuisse expiata? quod aliqua hujus rei commemoratio, quam peccati ἀνάμνησιν vocant, fuerit in cerimoniis sacrificiisque Judæorum? quod propterea Deus aliquam inter fideles ante Christum & post Christum distinctionem fecerit, illos durius tractaverit, multa onera imposuerit, sæpius terruerit, Christum obscurius annuntiaverit? Video de his & multis aliis hujus generis, quæ ad Oeconomix veteris & novæ varietatem pertinent, inter utramque partem, dummodo altera alteram intelligat, convenire.

Ubi igitur tandem dissensus est? sane
 si

si mentem in omnes partes verto, perspicere non possum, revera alteram partem plus aut negare, aut tribuere patribus illis, atque alteram, verbis id facere videri. Quid enim? Negat illa his ἀθεσι, quia peccata, tametsi iis non fuerint imputata, fuerunt tamen commemorata, atque hoc sensu aliquo modo debitum ab iis exactum: id quod altera pars, si recte explicetur, non negat; existimat tamen, has duas non imputandi peccati rationes, quarum altera fit sine tali commemoratione, altera cum commemoratione, in S. literis nominibus non ita distingui, ut illa ἀθεσις, hæc παράθεσις vocetur,

Quare, quod tantopere hæc controversia efferbuerit, hæc mihi causâ esse videtur; quod in explicanda fidelium post mortem Christi, præ iis, qui ante eam vixerunt, prærogativa, de qua utrinque conveniunt, altera pars verbis utitur, quæ alteri duriora & in hos inclementius dicta esse videntur; hæc vero, quia verba ipsius Spiritus S. ex S. literis deducta esse existimat, eripi sibi ex ore non vult; unde nonnunquam à controversiâ abitur, deque locis illis, unde hæ locutiones desumptæ sunt, disputari solet, atque an ad fideles ante Christum pertineant, disquiri.

*Authoris
sententia
de origine
hujus disp.*

Quid igitur? *purane* hæc est Logomachia? Ita quidem dicerem libenter, nisi durum mihi videretur statuere, tot tantosque viros de solis vocibus inter se tam acriter disputasse: quare malim credere, adhærere huic verborum pugnae, veram aliquam de re dissensionem, sed adeo exilem & tenuem, ut ego, & qui me acutiores non sunt, eam conspicerere non possumus. Sed & aliæ Logomachiarum varietates promendæ.

*Altera differentia
Logomachiarum.*

§. 5. Altera, quam observamus, inter Logomachias differentia in eo est: *quod alia quidem in uno aut saltem paucis vocabulis aut locutionibus, quæ à disputantibus non eodem sensu accipiuntur, consistit: alia in longa verborum, quorum singula quandoque ambiguitatem nullam habent, serie, atque adeo in tota rem, de qua convenitur, tradendi ratione docendique modo ac methodo versatur; præsertim si & tum, quod sæpe fit, ita disputatur, ac si verum in sententiis iisque maximi momenti esset dissidium; cum tamen utraque pars, via licet diversa, eodem tendat.*

*Prior facili
perspicitur.*

Ac prius quidem Logomachiae genus facile plerunque perspicitur: quis enim tam parum est acutus, quin, dummodo attentionem qualemcunque afferat, non statim

statim videat, quæstionem hanc, *an voluntas cogi possit*, sola verbi, *cogere*, explicatione solvi posse: atque, si tum demum voluntas cogi dicatur, cum eo adigitur, ut aliquid nolens velit, i. e. eodem momento idem & velit & nolit; hæc inter se pugnare, atque ita voluntatem cogi non posse: quod si vero tum cogi dicatur voluntas, cum mali intentati metu, eo redigitur, ut velit aliquid, quod sine hoc nollit, demtoque metu iterum sit rejectura, neminem rerum humanarum adeo ignarum esse, qui hoc modo voluntatem sæpissime cogi nesciat? Idem de aliis, quæ in paucorum verborum ambiguitate consistunt, Logomachiis dicendum.

Cum vero in longa oratione, atque universa docendi methodo Logomachia est, difficilior est cognitio, ut non raro minime hebetes, tametsi in sola rem eandem tradendi ratione inter se dissideant, tamen adeo pugnaciter disputent, ut vix id ferri posset, si maximus inter illos in rebus gravissimis esset dissensus.

§. 6. Cujus quidem rei, cum multa sint exempla, tum nullum illustrius nunc quidem in mentem venit, quam atrocissimum illud inter Aristotelis interpretes, & Petrum Ramum ejusque discipulos olim

Quæstio: an voluntas cogi possit?

Posterior cognitio difficilior.

Hujus exemplum illustre: bellum inter Aristotelicos & P. Ram.

D 5

exor- mum, pro-

*lixius re-
presenta-
tum.*

exortum bellum, quod universam pene Europam pervasit, & quicquid tum temporis erat Philosophorum in duas sectas, Aristoteleam & Rameam, divisit; unicumque propemodum Disputationum Philosophicarum in celeberrimis Galliae & Germaniae Academiis multos per annos fuit argumentum.

*Rami In-
stit. diale-
ctica, &
Animad-
versiones
Aristoteli-
ca.*

Quantas turbas in sola Academia Parisiensi, ubi ortum est, dederit, quia eadem nonnunquam, mutatis personis, fabula agitur, speciminis loco pluribus narabo. Ediderat Petrus Ramus duos potissimum libros, quibus Aristotelica docendi ratio perstringebatur, quorum alterum *Dialecticas Institutiones*, alterum *Aristotelicas Animadversiones* inscripserat.

Ant. Goveanus.

Indignum hoc facinus visum iis, quibus Aristotelis auctoritas a sua sejuncta esse non posse videbatur. Ergo, duce Antonio Goveano, celebri Jurisconsulto, indignari, fremere, libros hisce, uti putabant, novitatibus opponere. Quæ omnia, cum ad incendium hoc, ut ipsis videbatur, restringendum non sufficerent: tum vero alia tentantur, atque ad prætorium tribunal, summumque, quod Parlamentum vocant, Parisiensis curiæ consilium curritur; quod librorum, si Diis placet, pestilen-

*Res defer-
tur ad Par-
lamentum.*

stilentissimorum lectionem auctoritate sua inhi-beret. Nimirum Hannibal erat ante portas, & interitus urbi imminebat. Sed & hoc bello huic Dialectico non satis vali- dum remedium videbatur. Rex Galliae, & tandem
incredibile dictu, & Rex Franciscus I. in ad Regem.
partes trahendus erat, qui, tanquam um- braticus Doctor, in Dialectica disputa- tione iudex federet.

Vix Priamus tanti, totaque Troja fuit.

Accepit tamen ille conditionem, atque, ut omnis causa à quinque viris cognosce- retur, publice edixit: quorum duo, Pe- trus Danesius, Franciscus Vicomerca- tensis à Goveano; duo itidem, Joh. Quin- tinus & Johannes Bellomontanus à P. Ra- mo lecti sunt; quintum Rex ipse addidit, qui Regis Personam referens, inter cæ- teros arbiter esset. Hic vero, diebus mul- tis inutilibus disputationibus consumtis, cum Ramus, ut qui tres ex quinque judi- cibus adversos sibi videret, causæ suæ timens, ab his provocare vellet: tres ju- dices (postquam & duo à Ramo lecti se inæquali pugnae subtraxissent) summa, sine provocatione, auctoritate à Rege impetrata; tandem Ramum, ejusque libros condemnant, judiciumque suum ad Regem deferunt, qui edicto * bene lon- go, cap. 13.

Qui quin- que consti- tuit arbi- tros.

* Hoc edi- ctum, ex quo omnia hæc ex- scripsi, Gallice etiamnum extat apud Launoium de varia Aristote- lis for- tuna.

go, regio sigillo munito, perque omnes amplissimi Regni provincias promulgato, hoc triumvirorum judicium comprobato, *Ramus ne posthac doceat, librique ejus, ne imprimantur, vendantur, aut ullo modo publicentur, irrogata transgressoribus corporis pœna, severissime mandat.*

Hæc omnia non jam à Doctoribus, non à summi Senatus præsidibus, sed à Rege potentissimo adversus Ramum pro Aristotele acta. Felicem hoc defensore Aristotelem! *quis enim in eum scriberet, qui poterat proscribere?*

De qua re
in illorum
confessu
fuerit di-
sputatum.
In Acadē-
mia ad
Carol.
Lotharin-
gium.

Sed tu fortasse, quisquis hæc legis, scire aves, qua de re in illo quinque virorum, Regia auctoritate congregatorum, confessu disputatum fuerit. Audi igitur hac de re Audomarum Talæum: *Biduo, ait ille, magna contentione (arrige aures) de Dialecticæ artis definitione & partitione, quæ in Logici Organi libris nulla essent, concertatum est. Tres Aristoteleis iudices primo die contra omnes bene descriptæ artis leges (en imperitiâ!) judicarunt, ad Dialecticæ artis perfectionem definitione nihil opus esse. Joh. Quintinus & Joh. Bellomontanus, qui duo iudices erant à Ramo delecti, pro singulari eruditione sua & doctrina (vel ex hoc vides) censuerunt, omnem disputationem, qua*
via

via & ratione procederet à definitione proficisci debere, idque per scriptum obfignarunt.

Vides non potuisse in Dialecticæ definitione convenire tantos Viros toto hoc die: at quid de divisione? *Postridie*, pergit Talæus, *tres judices Aristotelei vehementer conturbati* (turpiter nempe se heri dederant) *de partitione assentiuntur, Dialectica legitimas esse partes, inventionem & judicium, atque de hac re sententias suas perscribunt.* Beasti! metui à partitione. Jam igitur macte virtute Rame, argumentare ex concessis; insta! Itaque fecit. *Verum cum Ramus urgeret Aristoteleos, igitur à se merito reprehendi Aristotelem, quod propria partitione pratermissa, totam Dialecticam mille tenebris obrueret, tribus judicibus ampliari causam placuit* (illud durum) *& in alium diem rejici.* *Postea vero, proh, ubi fides!* novum consilium initur, *ut ab initio tota disputatio retexatur, omniaque (etiam ea, quæ post tot labores de partitione Dialecticæ utrinque obfignaverant) in judicata ducerentur & pro nihilo haberentur.* Hic vero Ramus tantam injustitiam judicum non ferens, ab iis provocavit. Hoc scilicet erat, *Aristoteli repugnando, Theologiam & aries enervare*; hujus enim criminis Ratum postulatum esse, idem Talæus auctor est.

Hac

Tragicis
hisce ver-
bis intcri-
psit hanc
rem Aca-
demix li-
brario.
Vid. Lau-
noium l.c.

Hac, si Guilielmo Montuello, illo tempore Academiae Parisiensis Rectori, credis, fuit illa *ingens omnium studiorum perturbatio, quae nescio quo malo genio in Academiam irrupente, repente facta est*. Hic morbus ille, cui mature occurrendum. Hæc pestis, quam Rex fugiendam esse, confectis regio sigillo notatis literis omnibus Regni partibus significandum censuit. Tanti hæc tum esse videbantur, nunc, quantacunque sit antiquitatis reverentia, tamen impedire non potest; quo minus

Rideat pugnas vitio parentum

Nostra juvenis.

Quis enim est hodie, qui nesciat, Ramum nullam de re ulla novam sententiam excogitasse? quis, cum variæ de rebus variis Philosophorum opiniones producuntur, unquam Ramum sententiam dicentem audit? In modo methodoque docendi, in definitionibus & divisionibus ab Aristotele recessit, de quibus, qui tanquam de magnis rebus litigant, merito à nobis inter λογομάχας referuntur.

§. 7. In hoc enim λογομαχία, quæ in una locutione consistit, cum hac μεθοδομαχία convenit, quod, qui ita disputant, ii in sententiis & rebus ipsis conveniunt, & nonnisi in modo sententiam suam explicandi,

plicandi, diffident. Quidni igitur ad *λογομαχίας* referamus plerasque Dialecti- Pleraque
Dialecti-
corum con-
troverſia
ad Logo-
machias
referenda.
corum controversias: *de numero & ordine categoriarum, de numero & ordine prædicabilium; quæ ad categorias referenda, quæ inde excludenda; doctrina de locis, de Syllogismo, de sophismatis, quæ referenda? de definitionibus, an ubique sint necessariae, an genus aliquando omitti possit; an διχοτομῆαι sint meliores an τριχοτομῆαι? De disciplinarum divisione, de subordinatione earundem, de assignando suo cuique objecto, quæ contenta, jus alterius ne usurpet? Enim vero indignum videtur Metaphysicæ scientiæ, quæ cæteris objecta distribuere solet, quod Logica, contra omne jus & fas, doctrinam de toto & partibus, causâ & causâto, subjecto & adjuncto, sibi arrogaverit. Nec minus graviter Pneumatica de Metaphysica conqueritur, quod spiritus, nequaquam suæ ditioni obnoxios, quò jure quave injuria, detineat. De homine vero dici non potest, quantum Pneumatica & Physica litigent, utraque partem poscente: ut mirer, nondum existere peculiarem disciplinam ἀνθρωπολογίαν, quæ litem componat, atque hominem utrique ademtum sibi vindicet.*

Quid his de rebus disputatis Philosophi?

*Auctoris
sententia
de assi-
gnando
cuique di-
sciplina suo
objecto.*

phi? Ego sane, dummodo omnia, quæ cognitu utilia sunt, tradantur alicubi, & tradantur ea & brevitate & perspicuitate & ordine, ut ea intelligere & memoria retinere possim, non magis sollicitus sum, quomodo vocetur illa disciplina, in qua hæc traduntur, quam quomodo appelletur Doctor, qui me ista docet.

*Seneca lo-
cus in hanc
rem. E-
pist. 89.*

Agnovit levitatem istarum disputationum Seneca: *Philosophia*, inquit, tres partes esse dixerunt & maximi & plurimi auctores: *moralem, naturalem, & rationalem*. Ceterum inventi sunt & qui in pauciora philosophiam & qui in plura diducerent. Quidam ex Peripateticis quartam partem adjecerunt, *Civilem*: quia quandam propriam exercitationem desideret, & circa aliam materiam occupata sit. Quidam adjecerunt his partem, quam Græci *διονομηκην* vocant, administranda rei familiaris scientiam. Quidam & de generibus vite locum separarunt. Nihil autem horum in illa parte morali non reperitur. Epicurei duas partes *Philosophia* putaverunt esse, *Naturalem* atque *Moralem*. *Rationalem* removerunt. deinde cum ipsis rebus cogerentur ambigua secernere, falsa sub specie veritatis latentia coarguere, ipsi quoque quod iudicium & regulam alio nomine appellant, *Rationalis* loco induxerunt, sed eam accessionem esse *naturalis*

naturalis partis existimant. Cyrenaici naturalia cum rationalibus sustulerunt, & contenti fuerunt moralibus: sed hi quoque qui remouent, aliter inducunt. In quinque enim partes moralia dividunt: ut una sit de fugiendis & expetendis, altera de affectibus, tertia de actionibus, quarta de causis, quinta de argumentis. Causæ rerum ex naturali parte sunt, argumenta ex rationali, actiones ex morali.

§. 8. At ego, inquis, confusionem ferre non possum: ordinem amo; hic mihi concinnior videtur. Equidem non nego: magnam ubique ordinis rationem esse habendam, cui enim non placet ordo? cui placet Chaos,

Ordo semper & ubique observandus.

————— congestaque eodem
Non bene junctarum discordia semina
rerum?

Sed ordinem volo observari, non de eo disputari; nedum ita disputari, ac si de summa Reipub. ageretur. Commodior tibi via tua videtur & brevior. Utere; quis impedit? perge in ea, prospera, curre. Quid stas? quid eam supervacanea de methodo disputatione longiorem facis? quin progredieris & re ipsa ostendis, tum cum ante alios metam tetigeris, optimam te & compendiariam elegisse viam.

Sed de eo non disputandum.

Omnino imitantur hic Philosophi sæpe
E malos

Philosophi contra.

rium fa-
cientes,
similes ma-
lis causa-
rum patro-
nis.

malos caussarum patronos, qui, dum id se agere simulant, ut ordo & in cognoscendo & in iudicando observetur, id agunt, quod maxime e re sua est, i. e. ut iudicia differantur, nunquam finiantur, atque interdum ne quidem incipiantur.

Nimis an-
xia de ordi-
ne sollicitu-
do putidam
diligen-
tiam redo-
let.

Præterea fit nonnunquam, ut nimis anxiosa de ordine sollicitudo, nescio quam putidam diligentiam redoleat: sæpissime enim ordo plane arbitrarius est, ut de eo multis disputare, perinde sit, ac si quis quæreret, satiusne sit ad vinum diluendum aquam vinó, an vinum aquæ infundere. Sapienter, cujus nos iudicium libenter sequimur, Gaussenus: *Methodi disciplinarum in puncto indivisibili non consistunt, quod qui non attigerit, eum à scopo aberrare necesse sit; sed possunt innumerabilibus viis & flexibus explicari. Sicut igitur possumus totam rerum naturam vel in decem Archyta categoriis collocare, vel ad duas revocare, substantiam & accidens: vel, si animo ita visum est, ad tres redigere, substantiam, accidens, & non ens, ita ut sub non ente denominationes externa, relationes, privationes, &c. comprehendantur, aut etiam, si lubet, novas categorias comminisci: cum unum hic quaratur, ut quaecunque sint in natura certo quodam ordine distinguantur, in memoria subsidium:*

Gaussenus
laudatus.
Dissert. de
studii
Theolog-
ratione.

fidium: pariter nihil vetat disciplina nostra (Theologiæ) dogmata varie ordinari, prout quisque id suæ memoria, cujus non minor est, quam vultus, diversitas, commodum existimat.

§. 9. *Tertia*, quam animadvertimus, *Logomachiarum* varietas in hoc consistit: quod nonnunquam in vocabulis ita dissentiunt disputantes, ut in re ipsa convenient: ut duo Politici, qui probe cognoscentes Reipubl. alicujus constitutionem & administrationem, in eoque convenientes, de forma illius, sitne simplex an mixta, disputarent. Aliquando in solis quidem verbis dissensus est, at in re consensus nullus: id quod tum fit, quando non modo alter alterum non intelligit, sed neuter seipsum: hi enim, quamquam solis inter se verbis diffideant, sensu tamen, cum verba eorum nullum habeant, non conveniunt.

Tertia Logomachiarum differentia.

Hanc nos distinctionis gratia *Logomachiam cecam* appellamus. Vera enim est Andabatarum pugna; quæ, ut fortasse videtur, non ita rara est; ac nescio an sæpe viderimus, disputationem illi, quam Michaël Montanus describit, non prorsus absimilem; qui vidisse se ait, quendam amicorum animi causa disputantem, cum quodam, qui eruditus suo tempore habebatur; hic de industria composuit

Logomachia ceca.

Essais de Montaigne livre 1. chap. 24. du pedantisme.

nescio quem sine sensu & ordine centonem, ex variis locutionibus non cohærentibus confutum plenum vocabulis quos terminos artium vocant; eoque, quasi objectiones alteri proponeret, integrum diem hunc hominem occupavit; qui, durante illo ludo, serio objectiones propositas diluere, apteque ad omnia respondere sibi videbatur.

*Scholasticorum
quædam
pugna huc
referenda:
ut de materia
prima.*

In hac disputatione alter saltem sciebat, se nihil dicere; at in multis uterque disputantium id ignorat. Refer huc quasdam Scholasticorum pugnæ; quomodo enim, non dico alios; sed se ipsos intelligent, qui disputant, de illa materia prima, quæ est *neque quid, neque quantum, neque quale;* vel, ut Porphyrius, *quæ est quasi ludus entis in non ens refugiens, imo verum non ens;* ejusque mirifica illa *potentia*, ex qua (quantum sit longe minoris & tenuioris texturæ, quam ipsa materia prima,) possit tamen, quod ex materia non potest, *educi* substantia aliqua, quæ neque est spiritus, neque corpus, neque omnino per se existit, *sed dependet a materia in esse, fieri, & operari:* quæ autem substantia, de qua nihil aliud scimus, quam quod sit *actus quidam simplex*, prout materia est *pura potentia*, (*formæ enim rerum sunt ignotæ:*) quæ

quæ, inquam, substantia conjuncta cum materia, (in qua ante non erat, sed potius eius *privatio*, quæ est *tertium principium corporis naturalis*) materiam ita *actuet*, ut quod ante potentia tantum in ea erat, jam *ex potentia*, nescio qua vi, *eductum*, constituat una cum materia *unum per se*. Hæc verba, an ab aliis intelligantur, equidem nescio: ego certe nihil intelligo, & mecum fortasse alii: ac plane, si sensum eorum assequi volo, idem mihi contingit, quod Æneæ Virgiliano umbram defunctæ uxoris amplecti volenti:

*Ter conatus eram collo dare brachia circum,
Ter frustra compressa manus effugit imago,
Par levibus ventis volucrique simillima
somno.*

Omnino idem mihi hæc *materia*, una cum sua *potentia*, ex qua *formæ substantiales educuntur*, fatum habuisse videtur, quod Echo, quæ Heroicis temporibus pulcherrima fuit virgo, nunc nil nisi sonus est; ira sane hæc quondam (nam & Philosophia habuit sua tempora Heroica) aliquid fuerunt, nunc ita attenuata sunt, ut voces sint, prætereaque nihil.

Sed si *cacas* hæc *Logomachias* amant, illorum etiam, qui disputant de iis, quæ captum ho- qui videri volunt intelligere, quod non intelligunt; illi necessario in hoc vitium

*minum su-
perant.*

incidunt, qui disputant de iis, quæ plane supra captum hominum sunt: cum enim de eo disceptant, cujus nullam à Deo notionem acceperunt, fieri aliter non potest, quam ut verba, quibus utuntur, sensum nullum habeant; omnesque, qui cœlestia comprehendere volunt, eodem modo, si non alias temeritatis pœnas dant, deluduntur, quo ille in fabulis, qui, loco Junonis, nubem complexus est: ita enim hi non nisi obscuram quandam verborum nubem, loco rei, quam humana fors non attingit, cōplectuntur.

*Alia Logo-
machia
aliquot spe-
cies.*

Alias Logomachiarum species adducere possemus: nunc enim observes, *pugnam hanc esse ab utraque parte*; ita ut neuter se cum altero revera consentire videat; *nunc ab una tantum*, ita, ut alter consensum videns, de quo pugnet, non habeat. Illam *reciprocam* Logomachiam, hanc *simplicem* appellare licet. Præterea aliquando pugnant inter se, *quorum alter alterius verba intelligere non potest*: aliquando pugnant, *qui sese inter se intelligere nolunt*. Est & Logomachia, *cum alter verba alterius melius intelligere vult, atque ille ipse, qui iis utitur, plane, ut quomodocunque & quotiescunque mentem explicet; alter tamen identidem id refellat, quod in verbis ejus la-
tere*

tere existimat; licet hic aliud se credere; diserte profiteatur: quam nos *Logomachiam affectatam* vocare possumus. Sed hæc pluribus, cum de morbi hujus causis agemus, prosequemur.

C A P. IV.

De Morbi hujus gravitate.

§. I.

SI quis est, qui nimium nos operæ in re levi ponere, atque in eundem, quem in aliis reprehendimus, morbum incidere existimet: is eodem tempore Homero vitio det, quod in principio Iliados, perniciosam illam Achillis iram, quam rapta juveni muliercula accendisse legitur, tam operose nobis descriptam reliquerit. Quemadmodum enim illa, licet causa levissima, eventu gravissima fuit: sic, etsi nihil his, de quibus scribimus, certaminibus levius videri possit, ut quæ ab uno atque altero vocabulo non eodem modo intellecto oriuntur; tamen, si partium studia spectamus, si contentionem, si odia, si damna, quæ inde in Rem literariam, in Religionem, atque adeo in collegia, templa, forum, curiam,

Respondetur illis, qui existimant Authorem nimium operæ in re levi ponere.

Iliad. x.

redundant: possumus fortasse idem de his
 eruditorum jurgiis dicere, quod de Aga-
 memnonis & Achillis jurgio Homerus,
 Logomachiaæ studium sæpe fuisse, quod

— — — — — *μυρί' Ἀχαιοῖς ἄλγέ' ἔθηκε·*
Πολλὰς δ' ἰφθίμους ψυχὰς αἰῖδι προΐαψεν
Ἡρώων.

Verba
 sunt Na-
 zianz. in
 laud.
 Athanas.

Quis enim leves eas dixerit controversias,
 quæ varias nobis toties non modo Philo-
 sophorum sectas, sed Christianorum etiam
 schismata pepererunt? quæ usque eo sæpe
 exarserunt, ut de verbis jam non verbis,
 sed verberibus fuerit certatum; ut peri-
 culum aliquando fuerit, *ne orbis terrarum*
fines cum syllabis à se invicem distraherentur?
 ad quas sedandas summorum ex diversis
 orbis partibus Episcoporum Concilia
 congregare prudentissimis viris necessa-
 rium est visum? quæ dignæ sunt habitæ,
 ut in summis judicarentur curiis, ad Prin-
 cipum tribunalia deferrentur, à Regibus
 componerentur? Quis leves dixerit illas
 disputationes, in quibus alii alios impieta-
 tis, hæreseos, atheismi, horrendarum
 in Deum blasphemiarum [& quorum non
 criminum?] postularunt? in quibus alii
 alios execrati sunt, orco addixerunt, at-
 que, ut nos loqui solemus, tot anathe-
 matum fulminibus percusserunt? At tales
 fuisse

fuisse non modo de rebus levissimis, sed plane de nudis etiam verbis concertationes, jam in superioribus cernere potuimus.

§. 2. Equidem aut vehementer fallor, aut sæpe mihi observare visus sum, Logomachias nunquam fere minori, sed majori ut plurimum contentione, quam solent de rebus gravissimis controversiæ, inter doctos fuisse agitatae. Quis nescit, atque utinam nesciri id posset! esse inter eos, ad quos tanquam fratres complectendos toties, heu toties frustra! brachia nostra extendimus, qui magis nostros amplexus horrent, quam infesta inimicorum odia; quam crudelitatem eorum, qui non verbis, sed ferro flammisque cum adversariis suis disputant; quam intolerabile humanarum traditionum jugum; quam superbissimum ejus, qui se supra Reges effert, dominatum; quam barbarum illud, quod Inquisitionem vocant, nescio cujus Phalaridis inventum? quos facilius adduceres, ut Babylonem reversi, cum iis foedus inirent, quorum doctrinam ut Antichristianam, quorum cultum ut idololatricum, quorum regimen ut conscientiarum carnificinam, majores suos tanta sollicitudine fugisse sciunt; quam

*Impedimur qui-
dam hodie
solis Logo-
machis,
non veris
Controver-
siis, quo-
minus pa-
cem cum
fratribus
in funda-
mento non
dissentien-
tibus co-
lant.*

E s

ut,

ut, non dico cum iis in gratiam denique redirent, sed quoquo modo tolerarent, saltem non omnibus diris devoverent eos, qui una cum ipsis Babylonem reliquerunt olim, cultum ejus, doctrinam & tyrannidem abominantur etiam nunc, sævitiam ejus sentiunt pariter, jugum ejus pariter extimescunt.

Tantarum vero irarum causa est, non aliquis in fundamento fidei dissensus, sed (quod nemo non videt, qui modo rationis aut compos est, aut aurem illi præbet) in paucis quibusdam, si non levibus, certe fundamentum fidei non subvertentibus. Equidem non omnes, ne quis subdole me agere existimet, non omnes, quotquot inter nos sunt (notum enim est, de quibus loquar) controversiæ, meras Logomachias esse affirmo. Est interdum verus dissensus, fateor; quem si quis non de re prorsus nihili esse dicat, non repugno: sed qualiscunque sit; certissimum illud est, non ea, in quibus verus dissensus est, tanta inter partes excitasse odia, tam difficilem hodieque pacem facere; sed ea, in quibus falso dissensus esse videtur: plane ut Logomachiis solis, non veris controversiis, quicquid hic mali est, sit imputandum. Quibus resectis, si tandem aliquando

quando alii alios intelligere vellemus, forent quidem aliquæ inter nos dissensiones, sed longe & leviores, & pauciores utrique parti viderentur. Sed hic forsitan morbus est, quem inter immedicabiles post tot virorum sapientissimorum frustra tentata remedia referre possumus. Quare ad alia veniamus exempla.

§. 3. Quæ unquam disputationes cum pertinacissima Judæorum gente, cum impuris Mahometanis, cum blasphemis, cum Libertinis, cum Atheis, omnisque religionis derisoribus tam pugnaces fuerunt; quam nuper illæ sive puræ sive mixtæ Logomachiae, quarum supra * mentionem fecimus, cum in aliis Academiis & Scholis, tum præcipue in Belgio fuerunt? Risit invidia; exultavit livor; objecerunt nobis æmuli non sine maligna lætitia διπλοῦν κάππα Belgium infestans: fuerunt, qui ex libris de his controversiis conscriptis formulas convitiandi, egregios scilicet flosculos, excerpserunt. Nimirum, quemadmodum rixæ inter fratres vicinosque, sicubi accensæ sunt, ardentissimæ esse consueverunt: ita verissimè dixeris, inter eos, qui sententiis quam maxime vicini sunt, atque adeo, qui in solis quandoque verbis dissident, fervi-

*Acerissima
nuper in
Belgio Lo-
gomachia.*

* cap. 2.
§. 8. & 3.
§. 3. 4.

diffi-

diffimas plerumque altercationes intercedere.

§. 4. Quod ut clarius perspicias; finge disputatorem aliquem ex eorum numero, quos nos Logomachos appellamus. Oppone illi duos adversarios, alterum qui ab ejus sententia alienissimus, verbis, sensu quantumlibet diverso, iisdem, quibus ipse, utatur; alterum qui sententia prorsus cum ipso consentiens, aliis tantum verbis eandem exponat. Cum utro horum athleta noster pugnabit vehementius? Cum illo putabis, à cujus sententia est alienissimus. At falleris: in illum summa contentione invehetur, in illum omnem disputandi vim effundet, qui sententia nihil quicquam à se abhorrens, verbis aliis idem dicet. Mitius illum tractabit, qui secum loquitur; quam hunc, qui secum sentit: imo, quod mireris, cum illo ne pugnabit quidem: atque haud scio, an fœdus etiam cum illo adversus alterum junctis viribus debellandum sit facturus.

Hoc, quod fabula plerisque videbitur, quis crederet unquam contigisse? At contigit fortasse sæpe: ego vero exemplum hujus rei memorabile invenio, apud Elegantissimum illum, qui sub nomine Ludovici Montaltii latet, literarum provincialium

cialium Scriptorem. Exagitabantur in Academia Parisiensi Jansenii dogmata, atque inter alias duæ potissimum controversiæ, quarum altera erat: *An justis habeant potentiam proximam implendi Legem?* altera: *An omnes homines à Deo accipiant gratiam ad conversionem sufficientem?* Affirmare utrumque Jesuitæ? Jansenistæ pernegare. sed & alii extiterunt, quos novos Thomistas appellabant, qui eodem modo quo Jesuitæ loquentes idem prorsus, quod Jansenistæ, sentiebant. Dicebant cum Jesuitis, justos habere potentiam proximam implendi legem, at contra eosdem cum Jansenistis statuebant, potentiam illam sine peculiari Dei gratia in actum deduci non posse, id quod Jansenistæ, potentiam proximam non habere, vocabant. Idem novi Thomistæ cum Jesuitis dicebant: omnes homines à Deo accipere gratiam ad conversionem sufficientem. At cum Jansenistis gratiam istam, nonnisi nova accedente gratia, efficacem reddi affirmabant, quam gratiam nova indigentem Jansenistæ, uti revera est, non sufficientem appellare maluerunt. A quorum vero partibus novi hi Thomistæ steterunt? Jansenistarum dices; quid ni enim fecissent, qui idem prorsus, quod illi,

Contentio
inter Je-
suitas, no-
vos Thomi-
stas, &
Janseni-
stas.

illi, senserunt? At hi, vide quid verba possint, Jesuitarum partibus, cum quibus loquebantur, cum quibus in solo verborum sono convenerant, sese adungere satius esse duxerunt, & ita adungere, ut unitis viribus eos, quibuscum sentiebant, Jansenistas impeterent, atque persequerentur.

*Gravitas
morbi ex
periculosi
symptoma-
tibus di-
gnoscentia.*

§. 5. Ex his quanquam satis perspicuum sit; graviores nonnunquam Logomachias, quam solent de rebus maximi momenti controversiæ, esse: clarius tamen id patebit, si morbi hujus naturam & periculosa ejus συμπτώματα attentius considerabimus. Nemo melius ea intellexisse videtur, quam Paulus Apostolus, dum eum, qui hoc morbo correptus est, ita nobis describit: *Is, inquit, inflatus est, nihil sciens, sed egrotans circa quæstiones & pugnas de verbis: ex quibus nascitur invidia, lis, maledicentia, suspensiones mala: perverse exercitationes hominum mente corruptorum, & qui privati sunt veritate, & quæstui habent pietatem: abscede ab eis, qui hujusmodi sunt.* Potuit ne vividioribus coloribus ægrotus noster depingi? quare & nos Apostoli ductum, omnesque tanti artificis lineas sequamur.

*S. Pauli
sententia
1. Tim 6.
v. 4-5.*

§. 6. Nimirum, ut primum animum
homi-

hominis contradicendi studium occupavit, quod tum fit, ubi mens à sermonibus salutaris sapientiae avertitur: jam non amplius pro veritate, sed pro victoria aut qualicunque victoriæ umbra pugnari solet.

Qui vincere sibi videtur, qui ultimo loquitur, qui futili garrulitate alios superat, hic, quanquam revera sit imperitissimus, non aliter triumphum canere, quam si totas legiones cæcidisset, provinciasque bello cepisset, ideoque inflari:

τετύφωται
μηδὲν ἐπιστάμενος,
quid sit?

— *plausuque sui gaudere theatri:*

adversarium præ se tanquam multis partibus minorem contemnere. Et quia res semel belle homini cecidisse visa est, nemo est, quem non provocet, nihil tam certum, quod non in dubium vocet, nihil tam perspicuum, quod non disputando obscurum reddat. Hæcque adeo consuetudo in morbum abit denique, ut nihil ipsi disputationibus prius sit, nullam nisi in contradicendo voluptatem, nullam nisi in altercando requiem inveniat; idemque fatum, quod Hecuba quondam, quam in canem mutatam esse Poëtæ fabulantur, fortiatur: eodem enim modo hic canis naturam induit: obvium quemque allatrat, mordet; disputat non modo cum adversariis, sed etiam cum amicis; non modo

ἀλλὰ νοσῶν περὶ λογομαχίας,
quid?

modo cum dissentientibus, sed etiam cum consentientibus : disputat non modo de rebus gravibus, sed etiam de levissimis: imo non tantum de rebus, sed etiam de verbis, & sæpius quidem de verbis quam de rebus. Ubi adversarium non invenit, facit: ubi repugnantia nulla est, fingit: tantum, ut nunquam triumpho materia desit.

ἐξ ὧν γίνε-
ται φθόρος.

§. 7. Hic, si quando fit, ut aliquem offendat in eodem ludo doctum, qui dubiam sibi palmam facere videatur. Si quando plures adversario, quam sibi plaudentes videt, aut alios non tantum, quantum ipse sibi, plaudentes: Si timet ne alius se doctior, aut, quod summum doctrina apicem existimat, disputator melior videatur: tūc vero invidia invadit hominem, tum æmulatio accenditur; nunc livor genas, nunc rubor frontem occupat, labia comprimuntur, dentes fremunt, nunc cathedra manu, pede nunc terra pulsatur. Non parem Pompejus noster, si Diis placet, ferre, non Cæsar superiorem. Quid? mene incepto desistere victum? Hancine ego ut contumeliam tam insignem in me suscipiam? Ergo omnes vires colliguntur, omnes ingenii nervi intenduntur. Atque altero
minime

minimè cedente, restituitur acies, renovatur pugna,

Pro se quisque viri summa nituntur opum vi. ἑρις.
nullusque certaminis finis cernitur, lis litem trudit, quælibet vox temere missa novæ disputationi occasionem præbet. Imo non jam sunt disputationes, sed clamores & rixæ: vix præ fervore, furorem pene dixeram, qua de re litigent, sciunt: id unum sciunt, se velle altercari, & tam diu loqui, tam diu scribere, adeo ne scribendi quidem mora ira defervescit, donec adversarius sileat.

§. 8. Jamque ad convicia itur & quicquid Satyræ habent acerbi, quicquid atrocis poëtarum diræ, quæcunque in comædiis in servos, parasitos, meretrices, lenones jaciuntur maledicta, audiuntur. Omnia priscorum hæreticorum nomina ex orco cientur. Tu *Sadduceus* es: at tu *Phariseus*. Tu *Pelagianus*: at tu *Manicheus*. Tu *Sabellianus*: at tu *Photinianus*. Tu *Nestorianus*: at tu *Eutychianus*. Tandem etiam, rixantium muliercularum ritu, ea, quæ prorsus ad rem non faciunt, alii aliis exprobrant. Agitur de dogmatibus, & alii aliorum insectantur mores. Agitur de doctrina, & alter alteri natales objicit obscuros. Agitur de quæstione Critica, &

alter alteri *vervecum patriam crassumque*
aëra occinit. Agitur de methodo philoso-
 phandi, & alter alteri *oggannit spurios*. A-
 gitur de problemate Theologico, & alter
 alteri probro dat *verberatam mulierem ejus-*
que abortum. Agitur de scriptis Origenis;
 & tanta disputantes ira accenduntur, ut
 hinc Epiphanius Chrysostomo dicat :
 Ἐλπίζω σε μὴ ἀποθανεῖν ἐπίσκοπον : *Spero te*
non moriturum Episcopum : Illinc Epipha-
 nio Chrysostomus, (at quanti hi quam
 sancti viri!) respondeat : Ἐλπίζω σε μὴ
 ἐπιβῆναι τῆς αὐτοῦ πατρίδος.

Socrates
 libro se-
 xto hist.
 Ecclef.

ὁ πόντος
 πονηραὶ
 quid?

§. 9. Cum vero altercantium odia his &
 aliis tantopere sunt accensa, non amplius,
 ira impediēte animum, veritas cerni
 potest; densissimæ mentem obruunt tene-
 bræ; atque ut in tenebris plena metus,
 atque suspicionum sunt omnia; ita etiam
 hic omnia vanissimis suspicionibus referta
 videas. In qualibet pagina nescio quōt
 hæreses, in qualibet locutione aspis, in
 quolibet verbo virus latet. Atque in hac
 à pravis affectibus orta caligine videntur
 homines meticulosi nunc hic nunc illic si-
 bi in adversariis suis videre è sepulchris
 excitata priscorum hæreticorum spectra.
 Ostende, te, quanquam gratiæ Dei,
 quicquid in nobis boni est, attribuas,
 stu-

studium virtutis, ac pietatis, nihilo minus, quam qui maxime solent, urgere. Monstra, te alienum esse à poëtarum fato, quod eandem omnibus rebus necessitatem induxit. Dic te horrere sententiam eorum, qui Deum turpitudinis auctorem faciunt. Clama, & tibi absolutum illud decretum, quo Deus, nullo ad peccatum habito respectu, homines innocentes, pro sola potestate sua absoluta, ad æternum exitium destinasse dicatur; monstrum horrendum, informe, ingens videri. Dic, te conclusiones omnes absurdas & impias, quæ ex sententia tua deducuntur, hæreses, quæ tibi tribuuntur, non modo non videre, non agnoscere, sed detestari. Hæc ad ravim usque repete, explica, inculca, clama, conquerere de injuria, Deum hominesque testare: nihil ages; augebunt hæc, non adiment suspicionem. Satis ad hæc omnia respondisse sibi videbuntur, qui cum Poëta illud, *ad populum phaleras*, identidem ingeminabunt. Remitte vocis contentionem, loquere blandius, porrige manum, pacem offer: tum vero in promptu erit illud, *Equo ne credite Teucris*; atque ut rusticus ille apud Comicum Chremes blanditiarum urbanarum ignarus, dicent, *sibi insidias fieri*.

Παραδια-
τρίβαι
quid?

Διατρίβη
Græcis
inter alia
scholam
significat.

L. Vivis
verba de
Scholis ri-
xosis.
lib. 1. de
causs. cor-
rup. art.

Et Caselii
de dispu-
tantibus.
Quid sit
disφραμέ-
ων ἀνθρώ-
πων τὸν
νοῦν καὶ ἀ-
πεφραμέ-
ων τὸ σῶ-
μα

§. 10. Tametsi vero hoc lolium sponte sua, ut sunt homines natura ad rixas proni, satis cresceret: tamen ne quando perniciofa hæc herba deficiat, feminaria quoque litium constituuntur, ludique, quibus mature teneri animi hoc veneno imbuantur, aperiuntur. Diatribæ, quas verius, quam Diogenes quondam Cynicus Platonis διατρίβην, κατὰ τριβὰς dixeris: quales fuerunt quondam Scholasticorum Philosophorum scholæ, de quibus graviter Ludovicus Vives conqueritur: *Puer in scholam deductus primo confestim die jubetur disputare, & docetur jam rixari, qui fieri nondum potest.* Quo fit, ut Academiæ Scholæque, quæ scholæ pietatis, scholæ sapientiæ esse debebant, totidem fiant Myrmillonum familiæ, in quibus discipuli à Magistro lanista ad vana hæc certaminum ludicra præparentur. Et utinam tantum vana essent, utinam non perniciofa & pestifera, veraque essent Caselii verba, qui contentiosum, quod in hoc ludo formatur, genus hominum *pestem esse terriorem dicit, quam vulgus hominum judicat.* Neque vero in tanta hominum perversitate tales rixarum magistri unquam deerunt. Quemadmodum enim in morbis corporis gustus quandoque ita depravari solet, ut agro-

ægrotus salubrem cibum fastidiens non nisi noxiū appetat: ita qui hoc morbo infecti sunt, non veritatem modo, quæ, ut Publius Mimus ait apud Macrobiū, *Nimium altercando amittitur*, sed omnem penitus veritatis gustum ita perdiderunt, ut nihil jam ipsis præter lucrum dulce sit. Ideo enim solum contentiosum hoc, *non quietum*, ut quondam Cicero vocavit, *disputandi* genus sequuntur, quia quæstuosum est; & erit semper, dum invenientur homines stolidi, quibus splendido pietatis zeli pro religione prætextu imponere poterunt; qui Theologiam, *cognitionem veritatis secundum pietatem*, in altercando positam & pugnacissimum quemque optimum Theologum esse putabant. Audi hic iterum Vivem docentem, *De causis corrup.*
quid suo tempore hos rixarum ludos pepererit: *Humilibus, inquit, & sordidis ingeniis, quique dejecto capite hac sola intuerentur levia & momentanea, parum est visum magnum pretium ab studiis probitas aut veri intelligentia, quæ duo illi, quod non satis acutè cernerent, nec quanta essent estimationis assequerentur, præsentem mercedem quasi fuerunt pecunie vel aуре popularis.* *art. l. 1.*

§. II. Hæc omnia efficiunt, ut Logomachia non tantum sit morbus gravissimus, *Spiritus contradictionis &*

alii pernicio-
si fructus scho-
larum
rixosarum.

mus, sed etiam contagiosus: sic enim fit, ut adolescentes studiorum tyrocinio peracto, quos ex Academiis in Ecclesias pietatem & religionem afferre oportebat, in curias prudentiam, in forum æquitatem, in familias concordiam, ad parentes honorem, ad propinquos amorem, ad amicos fidem, ad cives humanitatem, ad inimicos ipsos patientiam & mansuetudinem; nihil aliud ex his scholis domum afferant, quam perpetuum dissentendi, etiam ubi nullus dissensus est, pruritus, quem vulgo *spiritum contradictionis* vocare solent; artem ubique controversiam inveniendi, levissimumque errorem, & quodlibet verbum minus aptum in pestilentissimam hæresin mutandi; adversaria referta formulis calumniandi; animos in disputationibus irreconciliabiles; pectora plena odii, plena irarum; cerebrum plenum sinistrarum suspicionum; linguas aspidum; ora maledica; calamos non nisi ad lædendum acutos; frontem corrugatam; adducta supercilia; oculos minaces; vultus truces, & vel ipso aspectu iis, quibuscum disputant, terribiles. Hærixarum scholæ fecerunt, ut tempore Scholasticorum Theologia, Philosophia, Artes omnes perpetua fuerint jurgia, & ceu

ceus totidem nocturna, ubi nemo quem aut quo modo feriat videt, certamina; futes Logomachiae, plane, ut tum temporis *totus pene*, liceat mihi ad hoc aptare verba Hieronymi, *ingemuerit Orbis, & se Logomachum factum esse sit miratus*. Quid igitur mirum, si Apostolus, ne ab huius morbi contagione corripiamur, fugere nos jubet? fugere tanquam pestiferos, qui hoc morbo sunt infecti: fugere scholas illas, ubi virus hoc maturè tenellis discipulorum animis instillatur: fugere tanquam veneficos, qui, neglecta sedata veritatis inquisitione, pietatis nomine abutentes, in corrumpendis atque imbuendis hoc morbo adolescentium animis aut gloriam aut lucrum quærunt. Hæc sunt lineamenta: hi colores, quos ad depingendam morbi nostri gravitatem ab Apostolo Paulo mutuati sumus; nunc si quæ alia perniciofa sunt Logomachiarum effecta persequamur.

ἀφίστασθαι
ἀπὸ τῶν
τοιαύτων.

§. 12. Enimvero si nihil aliud in Logomachiis vitii esset, quam quod Synodus quondam Alexandrina de illis pronuntiavit: *Esse videlicet λογομαχεῖν εἰς ἑδὲν χρόνον, μηδὲ ταῖς τοιαύταις λέξεσι διαμάχεσθαι, ἀλλὰ τῷ Φρονήματι τῆς εὐσεβείας συμφονεῖν*, hoc ipso, quod inutiles sunt, satis quoque

Alii perniciofi Logomachiarum effectus.

Synodum hanc refert Calvinus ad

noxiae forent. Dum enim frivolis his controversiis tempus terimus, atque ut eleganter eadem Synodus ἐπὶ τοῖς λεξειδίοις φιλονεικοῦμεν, quot utiliora, imo quot necessaria praetermittimus? Monstrat nobis Theologia salutis viam. Proficiendum in cognitione Dei, in cognitione nostri, proficiendum non in eruditione modo ac sapientia, sed in fide, in spe, in charitate. Et nos cum tantum pensum habeamus, quasi nihil esset, quod ageremus, puerorum instar literis, & syllabis ludimus. Quin ingredimur denique verae sapientiae viam? omnis hic mora periculosa est; satis litibus est datum, satis disputationi: incipiatur aliquando actio; mors instat; quanto satius est, ut ab ea deprehendamus agentes, quam de verbis concertantes?

Egregie huc quadrat parabola, quam in vita Philippi Melanchtonis, Joachimus Camerarius in disputatorum nostrorum gratiam ingeniose confictam narrat:

J. Camerarii parabola in Logomachos.

Quendam ne in facinare deprehensus manifeste opprimeretur, jussu fuisse sibi prospicere, & fuga consulere, demonstratumque locum, quo evadere concederetur, ubi nimirum in area puteum vidisset. At iste cum ad locum venisset, & non reperisset puteum, sed ruinas quadam

dam veteris putei, recurrit & exposulat cum monitoribus, ac negat esse in eo loco, sed ruinas putei. Quid tua? inquit illi, non enim ut biberes, sed ut fugeres suavisimus. Reperistine autem demonstratam maceriam? Reperi, inquit ille; at vos non debuistis putei, sed ruinarum veteris putei facere mentionem, non enim iste jam putens est, sed aliquando fuit. Tu vero, inquit illi, tibi prospice, & maceria ruinas quarito, non disputato de putei ruinis, si tibi tua salus cura est. At vos, inquit ille, tamen male monstratis. non nos quidem, inquit hi, male monstravimus, sed tu male tibi consulis rixando alieno tempore. Dumque non desinit iste nugator altercari, adveniunt qui comprehendere eum volebant, & correptum inter litigandum ad supplicium trahunt. Satis sapientibus dictum, at nostris disputatoribus parum fortasse.

Quod si vero nobis tantopere bella placent; nondum nobis hostes quibuscum pugnaremus deerant, ut jam

Secundum vota Persarum sua

Urbs hac periret dextera.

Certare poteramus cum Hoste generis humani, qui id agit, ut perpetua inter homines diffidia spargat, & ex quolibet verbo male intellecto Eridis pomum cudad: pugnare nobiscum ipsis, cumque

F 5 affecti-

affectibus nostris, qui nos singulis pene momentis ab officio abducunt, tum vero à charitate transversos sæpe agunt, ut festuca in fratrum oculis trabs, verbum mutatum hæresis esse videatur; pugnare cum opertis veritatis hostibus, cum apertis; cum iis, qui negant Jesum Christum in carnem venisse; cum iis, qui conscientis vinculum injiciunt, qui ferro, flammisque fidem propagant, qui tot victoriis de nostris fratribus gloriantur. Tot hostes cum habeamus, tot pericula cum nobis undique impendeant, tot victoriarum occasio cum nobis suppetat,

*Cumque superba foret Babylon spolianda
trophæis,*

Nos certamus in commune nefas, &, ne causa nos excuset, sæpissime propter voces certamus.

*Logomachiarum
nocumenta
in aliis disciplinis.*

§. 13. Jam si à Theologia ad alias Artes Disciplinasque transimus, quantum illis nocuerunt inutiles, & inanes, quæ tot volumina occuparunt, tantum temporis consumserunt, Logomachix? Audimus toties sapientissimorum hominum querelas, cum tantum in scientiis & disciplinis singulis à doctis viris motum semper fuerit, tam parum tamen esse promotum. Sunt, qui conquerantur cum Hippocrate
de

de artis longitudine, vitæque brevitate: Cum Theophrasto accusent naturam, quod Cic. l. 3. Tuscul. quæst. corvis & cornicibus vitam diuturnam; quorum id nihil interest: hominibus, quorum id maxime interfuisset, tam exiguam vitam dedisset: quorum si atas potuisset esse longinquior, futurum fuisse ut omnibus perfectis Artibus, omni doctrina hominum vita erudiretur.

Nos potiori jure accusamus tot vanas hominum curas, interque has potissimum illud, quantumcunque est in Logomachiis & inutilibus disputationibus, inane. Audi hac de re Senecam: Ideo, inquit, homines non discunt necessaria, quia supervacua didicerunt. Quatuor millia librorum Didymus Grammaticus scripsit: Miser si tam multa supervacua legisset. In his libris de patria Homeri queritur, in his de Aenea matre vera: In his libidinosior Anacreon an ebriosior vixerit: in his an Sappho publica fuerit: & alia, quæ erant dediscenda, si scires. I nunc, & longam esse vitam nega. Adeo præceptum illud salutare excidit: Tempori parce. Non vis cogitare, quantum temporis tibi auferat mala valetudo, quantum occupationes, quantum somnus. Metire aetatem tuam: tam multa non capit. De liberalibus studiis loquor: Philosophi quantum habent supervacui, quantum ab usu recedentis? Ipsi quoque ad syllabarum distinctiones, & con-

Seneca hac de re judicium, Epist. 88.

jun-

junctionum & prapositionum proprietates, descenderunt, & invidere Grammaticis, invidere Geomeiris, quicquid in illorum Artibus supervacuum erat, transulere in suam.

*Ad Scholasticorum
cacas Logomachias
applicatum.*

Quam vellem Stoicus iste Scholasticorum tempore vixisset, quantum fuisset in frivolas eorum disputationes & ineptas circa verba curas inductus? Quid enim aliud toto illo tempore, quo hæc natio dominatum Artium & Scientiarum occupavit, philosophari fuit, quam disputare? quid disputare, quam *λογομαχεῖν*, & quidem illo plerunque pugnae genere, quod Logomachiam cæcam appellamus? Didicerunt nimirum adolescentes in illis disputationibus non tam quæ responsiones, quibus argumentis, quam quæ verba, neque ab ipsis neque aliis satis intellecta, quibus verbis quadrarent. In hoc disputationum obscurissimarum luto cum hæserint fere omnes, quid mirum est, quod tam parum progressi fuerint? quod vix hoc seculo Philosophia ex tot spinosissimarum quæstionum laqueis extricata veritatem in eodem, quo Dēmocritus olim, profundo quærere cœpit; quod in Physicis v. g. non omnia qualitatibus obscuris, fictisque earum octo gradibus transigantur: Sed quod mecha-

mechanicæ ubique rationes quærantur, eaque perpetuis experimentis confirmentur; in qua via si strenue perrexerimus, spes est fore, ut termini Philosophiæ naturalis tandem aliquousque proferantur. Sin frugibus inventis, glande vesci malumus; referatis portis in atrio semper hærere; dicet nobis fortasse aliquis in aurem, cum sapientissimo Bacone: *Non officimus, quin Philosophia ista receptas disputationes alat, sermones ornet, ad professoria munera & vita civilis compendia adhibeatur;* sed & hoc addet, sapientiam istam, quam à Græcis hausimus, pueritiam quandam scientiæ videri, atque habere quod proprium est puerorum; ut ad garriendum prompta, ad generandum invalida, & immatura sit. *Controversiarum enim ferax, operum effæta est. Adeo ut Fabula illa de Scylla in luerarum statum, qualis habeatur, ad vivum quadrare videatur; quæ virginis os & vultum extulit, ad uterum vero monstra latrantia succingebantur & adherebant. Ita habent & scientiæ, quibus insuevimus, generalia quædam blandimenta & speciosa; sed cum ad particularia ventum est, veluti ad partes generationis, ut fructum & opera ex se edant, tum contentiones & oblatrantes disputationes oriuntur; in quas desinunt, & quæ partus locum obtinent.*

Bac. Verulamii verba de iisdem. Org. scient. in præf.

Memini

*Theologi
cujusdam
eadem de
re narra-
tio.*

Memini Theologum quendam mihi narrare, se, cum adolescens Philosophiæ operam daret, atque dictata præceptoris, utitum moris erat, domi diligenter describeret, supervenisse Patrem, atque arrepta charta, cum vidisset, prolegomena esse Logica, cum in aliis satis longa, tum præcipue in vero Logicæ genere demonstrando, sitne illud ars an scientia: Tum vero patrem indignatum, vanæque filii diligentiae misertum dixisse, Apage has ambages; quin tu accingeris aliquando & discis Logicam tuam, parum sollicitus, sitne illa ars appellanda an scientia? Idem pene cæteris omnibus dici potest, qui non adolescentiam modo, sed ætatem omnem in Logomachiis istis conterunt: quin vos discitis aliquando rerum naturalium causas, qui de naturæ definitione ejusque genere tantopere disputatis? discitis aliquando liberales esse, qui quæritis sitne Liberalitas tam in accipienda, quam in expendenda pecunia? & sic de aliis.

*Ridicula olim inter
Stoicos aliosque
Philosophos
controversia.*

§. 14. Fuit quondam inter Stoicos aliosque Philosophos controversia, cujus vix sine risu meminisse possumus, *an cum sapientia bonum sit, etiam sapere sit bonum:* Negabant Stoici sapere bonum esse, tametsi sapientia bonum sit: audi rationem,
& si

& si potes capere, cape: quia sapere, dicebant, incorporale est & accidens sapientiae; itaque neque facit quicquam & prodest; quod autem bonum est, illud prodest; quod prodest, facit aliquid; quod facit, est corpus: corporis nomine substantiam intellexerunt. Alii minus, quam Stoici, subtiles, tam acute distinguere non potuerunt; & sapere aequè ac sapientiam bonum esse, tanquam unus aliquis de plebe, dixerunt. Quid enim, inquiunt, an beate vivere non minus bonum est, quam beata vita? Seneca ipse hac in parte à Stoicis suis recedit, & postquam pluribus contra illos disputavit, tandem ita vanos hos Logomachos reprehendit: *Obsecro vos, cur tam necessariam curam majoribus, melioribusque debitam, in re nescio an ficta, certe inutili, terimus? quid mihi profuturum est scire, an aliud sit sapientia, aliud sapere? quid mihi profuturum est scire, illud bonum esse, hoc non esse? Temere me geram; subibo hujus voti aleam, tibi sapientia, mihi sapere contingat: pares erimus. Potius id age, ut mihi viam monstres, qua ad illud perveniam. Dic mihi quid vitare debeam, quid appetere. Hac est sapientia, hoc est sapere, non disputatiunculis inanibus subtilitatem vanissimam agitare. Tot quaestiones*
tibi

Seneca de-
 cijio. Epist.
 117.

tibi fortuna posuit, nondum illas solvisti, jam cavillaris. *Quam stultum est, cum signum pugna acceperis, ventilare? Remove ista luseria arma: decretoriis opus est.*

Plura mala que ex Logomachiis proveniunt.

§. 15. Sed & illud ex tot, quibus omnes pene Scientiæ & Disciplinæ undique & undique scatent, Logomachiis oritur malum; quod cum vident homines pauca esse, de quibus non in utramque partem disputetur, veniunt tandem in eam cogitationem, ut existiment, omnia dubia atque incerta esse; aut, si quæ sit certitudo, in Arithmetica & Geometria, ubi nullus istiusmodi disputationibus relinquitur locus, tantummodo esse quærendam. Nam si quid in cæteris, inquirunt, certi est, cur non in eo genus humanum, aut certe ii, qui harum Artium periti dicuntur, conveniunt? Cur quod huic verum, alii falsum; quod huic evidens, alii obscurum videtur?

Nascitur inde apud multos Pyrrhonismus.

Hinc potissimum ortos esse credo Academicos, Pyrrhonios, eorumque ἐποχὴν, σιέψιν, ἀπορίαν, ἀκαταληψίαν, & fortasse idem hodiernis Libertinis, Deistis, atque Atheis originem dedit. Certe Seneca Academicorum & Pyrrhonorum dubitationem subtilibus & inutilibus disputationibus attribuit: *Audi, inquit, quantum mali*

mali faciat nimia subtilitas, & quam infesta veritati sit. Protagoras ait de omni re in utramque partem disputari posse ex æquo: & de hac ipsa, an omnis res in utramque partem disputabilis sit. Nausiphanes ait, ex his quæ videntur esse, nihil magis esse, quam non esse. Parmenides ait, Ex his, quæ videntur, nihil esse in universum. Zenon Eleates, Omnia negotia dejecit, ait nihil esse. Circa eadem fere Pyrrhonii versantur & Megarici, & Eretrici, & Academici, qui novam induxerunt scientiam, nihil scire.

Sed errant illi, qui ex tanta de omnibus pene rebus disputationum multitudine concludunt, nihil certi esse. Quod si enim propius plerasque illarum aspicerent, viderent non veras in illis dissensiones esse, sed quas verba aliter atque aliter intellecta præ se ferant: viderent nullam pene esse disputationem, ubi partes non in pluribus conveniant, quam discrepent: viderent causam, cur in Mathematicis disciplinis non tot, quot in aliis, sint dissensiones, non eam esse, quod aut Mathematicæ certiora sint principia, aut quod nullæ demonstrationes in aliis disciplinis locum habeant, sed hanc potissimum, quod Mathematici in significatione verborum quibus utuntur, utuntur au-

tem plerisque horum soli, melius conveniant, & convenire possint, quam qui vocabulis ex communi plebis usu petitis utuntur, in quorum significatione neque omnes conveniunt, neque iidem sibi constant.

*Morbus hic
litteratos li-
terasque in
contem-
ptam ad-
ducit.*

§. 16. Illud vero minime hic prætereundum est, quod morbus hic litteratos literasque omnes, si quisquam alius, in contemptum adducit, imperitorumque dictariis exponit. Inter hos enim morbos hic noster numerari potest, qui alios homines non ad commiserationem, sed, ut multi, ad risum commovent. Non jam loquor de religione, cui nec ipsi sæpe infidelium cachinni pepercerunt, cum frivolas nostrorum hominum disputationes audiverunt.

*Ejus rei
exempla.
Ex Joh. de
Secubia.*

*Johannes de Secubia Hispanus, in præfatione particularum indeclinabilium, fate-
tur, gloriosas in generatione sua progenitores
fecisse libros, (Concordantias) Alphabetico
ordine, sed præcipue vocum declinabilium,
addens, qua occasione collegerit ipse par-
tim proprio Marte, partim opera vicaria
sui Capellani M. Waltheri Schonaw Scoti re-
liquas voces non flexiles, nempe in usum
concilii Basiliensis, ut hinc adversus Græ-
cos vox particularum EX & PER, il-
linc adversus Hussitas & Bohemos vocula
NISI omnes excuterentur: Irrisisse enim*

Sul-

Sultanum Turcicum Gracos veniam eo proficiscendi petentes, quod Christiani ob tam exiles & contemptas dictiones, tantopere digladiarentur invicem, dum Orthodoxi Spiritum S. tam ex Patre quam Filio procedere, Graci vero solum ex Patre per Filium contendebant. quemadmodum Turcarum ille Imperator risisse dicitur cum à Græcis quibusdam Patribus audivit, quænam Græcæ Ecclesia cum Latina intercedat controversia: dicendum ne sit cum Latinis, Spiritum sanctum procedere à Patre & Filio. an cum Græcis à Patre per Filium. Vix enim credibile barbaro Imperatori videbatur, homines sanæ mentis ob unicam particulam, ita enim putabat, tantopere dissidere posse.

Non toties risit Romana olim plebs, cum genus illud gladiatorum, qui ex equis, galea frontem oculosque tecti pugnabant, *Andabatas* vocabant, spectare solebat: non tantum splenes spectatorum & pulmones exercuerunt, tot vani cœcorum equitum cursus, tot in aërem ictus, quantos ludos præbent non sapientibus modo, sed infimæ etiam plebi nostri Logomachi. Hinc est, quod satyræ, quod comœdiæ hodiernæ in his hominibus ridendis sibi temperare non possint.

Quis non rideat, cum Satyricum Ital- Ex Boccalino relat.

ex Parnas-
so. c. 21.

lum lepide, ut solet, bellum Grammaticale inter ludimagistros describentem legit; ideo in Parnasso exortum, quia inter illos convenire non poterat, *an vox consumptum cum p, an sine p sit scribenda*; ab altera parte stante Paulo Manutio, ab altera Dionysio Lambino: cumque hac in pugna ad verbera & arma ventum fuisset, Manutium Lambino veterem lapidem, in quo consumptum cum p scriptum fuerit, rusticius monstratum naso imegisse, ejusque os confregisse. Fabula hæc est, sed quo tendat, nemini potest esse obscurum.

Ex *Molio. Ma-
riage For-
cé Act. 1.
scen. 4.*

Et quis risum continere potest, qui Philosophum illum apud Comicum videt? (nam qui minus liceat mihi Gallicum laudare Poëtam, quam Græcum aut Latinum) vah! quam iratus est? quot convitiis adversarium impetit? quantum inscientiam exaggerat hominis, qui nunquam Philosophum pictum, quod dicitur, viderit? *quomodo ponit eum infra infimos*, liceat mihi hæc verba ex Latina comœdia mutuari, *infra omnes stultos, stolidos, fatuos, fungos, bardos, blennos, buccones*? quomodo fidem Quiritium implorat? quomodo præ iracundia alloquentem non audit? Quærere ex illo, quæ tantarum sit causa irarum? quænam sit illa adversarii sen-
ten-

tentia, quæ tantum ipsi stomachum faciat, quam tantopere *aversetur, condemnet, horreat, excretur*; quæ sua, ad quam *pugnans & calcibus, unguibus & rostro propugnandam* sit paratus? Dicet tibi, expecta modo, donec ira defervescat: sine, homo ad se redeat: audies tandem, audies, O tempora, o mores! agi de re omnium maxima, sit ne dicendum, *forma pilei an potius figura pilei*: quis neget, ut hæc controversia decidatur, magni Reip. interesse? Perge cum isto disputatore colloqui: videbis hominem omnis prorsus in vita civili consilii expertem, & nonnisi scholasticis tricis & Logomachiis cerebrum impeditum habentem: quem si roges aliquid, quod in vita utile esse possit; nihil respondebit aptum; imo te ne quidem audiet, putabit identidem ex se quæri; *an ens respectu substantiæ & accidentis sit genus univocum? an Logica sit ars an scientia? an objectum ejus sint tres operationes mentis, an tertia sola? decemne sint categoria, an una? an conclusio sit de syllogismi essentia? an essentia boni in appetibilitate, an potius in congruentia consistat? an finis & bonum reciprocentur? an finis moveat entitate sua reali an intentionali?* Ultra quæ si quid ex hoc homine cognoscere deside-

ras, antequam tecum loquatur, nescio quid de orationis origine, natura, usu ordietur, ne scilicet contra methodum à magistris præscriptam peccare videatur.

Hinc dictoria & scommata imperitorum in literatos.

§. 17. Ita hodie, ita in scena disputatores nostri depinguntur, & hi ibidem, o dedecus! literati, eruditi, Philosophi, Doctores appellantur. Hoc cum audiunt rudes literarum, quantopere sibi in illa inscitia sua placent? quam abjecte de Liberalibus Artibus sentiunt? quantopere illud omne, quod eruditionis nomine comprehenditur, contemnunt? Nempe ab ipsis doctus & fatuus pro eodem habentur; scholas non jam aspiciunt, ut bonæ mentis officinas, sed ut bonæ mentis impedimenta, ingeniorum corruptrices, in quibus sapientes stulti, stulti stultiores evadant.

Hic mihi aliquis de Satyricorum & Comicorum petulanti lingua queritur: non repugno, quin his irascamur, indigne factum! clamemus: ulciscamur illorum dicacitatem, invehamur in scurrilitatem eorum, mala multa ingeramus. At postquam animo morem gessimus, redeamus ad nos ipsos, & de iis etiam, quid enim attinet ulcera nostra celare, conquæramur, qui poetis istiusmodi, disputationibus suis ineptis ludendi materiam præbent.

bent. Riserunt hæc non soli poëtæ, non soli in scenamimi, sed graves etiam Philosophi: hæc, inquit Seneca, *disputamus attractis superciliis, fronte rugosa. Non possum hoc loco dicere illud Cæcilianum: o tristes ineptias! ridicula sunt. Quin itaque potius aliquid utile nobis ac salutare tractamus, & quarimus, quomodo ad virtutes venire possimus, qua nos ad illas via adducat. Doce me, non an fortitudo animal sit; sed nullum animal felix esse sine fortitudine; nisi contra fortuita convaluit, & omnes casus antequam exciperet, meditando prædomuit.*

Epist. 113.

§. 18. Videmus igitur, qua ratione iis sæpenumero, qui sapientiæ studium profitentur, vulgi fabula fiant. Interea vero, dum ex hoc morbo convalescimus, non est quod imperiti literarum nobis insultent, & quasi ab hoc morbo prorsus alieni essent, omnes Logomachias in scholarum & Academiæ parietes concludant. Egre diamur aliquantisper ex scholarum umbra in lucem, & quid in rebus publicis, quid in foro, quid in curia, quid in celebritate agatur, videamus.

Sunt etiam extra scholas Logomachia.

in foro. in curia.

Hic vero, quis crederet etiam Logomachiis aditum patere? Exemplo nobis sit non Græcula aliqua Resp. de verbis ad superstitionem usque sollicita. Non De-

Farum exempla. Demetrius R.

Plutar-
chus in
Apoph-
theg.

Suidas.
Athenien-
ses.

Romani.

metrius ille Rex, qui cum Atheniensibus fame laborantibus frumentum dedisset, hancque liberalitatem suam ad populum retulisset, *barbarismi, qui imprudenti exciderat, indicium sexcentis medimnis se remunerare velle promisit*. Non doctæ Athenæ, quæ civitas, fame licet pressa, in summis angustiis beneficio peregrini opem & pecuniam pollicentis uti noluit: donec benefactor, qui verbo minus Græco *δαεινῶν* opem tam necessariam promiserat, *correcto solacismo δαεινῶν* dixisset. Exemplo nobis sit, victor ille terrarum populus, minime ille quidem ineptus, & in verbis curiosus: exemplo Roma, *cui par est nihil, nihilque secundum*. Exosos Tarquinii Regis superbia fecit, quid? reges? Tarquinium? imo potius *nomen Regum, nomen Tarquiniorum*. Hæc vocabula, hæc syllabæ, hæc literæ Romanis odio fuerunt. Hæ Tarquinium Collatinum vindicem libertatis, Regum expulsores, Consulatu motum in exilium pepulerunt. Hæ jusjurandum illud Romanis extorserunt, quo *neminem Romæ se passuros regnare* jurarunt. Quid tandem jurarunt Romani, *se neminem esse Regem* passuros, an potius *neminem Regem vocari*? Regnum quidem ipsum, dummodo nomen abesset, facile ferre potuerunt.

runt. Tulerunt consulare imperium in hoc solo ab initio a regio diversum, quod annuum erat: *præterea enim nihil diminutum erat ex regia potestate. Omnia jura, omnia insignia primi consules tenuere.* Tulerunt dictaturam, quæ potestas non diuturna quidem, sed quamdiu fuit, regia plane fuit. Tulerunt omnibus Magistratibus abrogatis in tertium annum decemviros, à quorum jussis ceu totidem regibus provocare non licebat. Tulerunt denique & Syllæ & postea Caji Cæsaris dictaturam perpetuam, quod quid fuit nisi regnum? Tulerunt bis triumviros, id est, tres sub hoc nomine reges, qui imperium Orbis inter se fuerunt partiti, *factamque*, ut Poëta canit, *tribus Dominis communem Romam.* Tulerunt monarchiam Octavii, dummodo cuncta non sub regis, sed *principis nomine sub imperium acciperet.* Tulerunt servitutem, dummodo libertatis vanum nomen relinqueretur. Tulerunt auctoritatem senatus abolitam, dummodo superessent, qui senatores vocarentur. Tulerunt potestatem summam, dummodo tribunitia potestas, quæ plebis quondam libertatem propugnauerat, diceretur. Passi denique sunt non modo Reges, sed Tyrannos, sed monstra, dummodo ne re-

Liv. verba
de cad. 1.
l. 2.

Lucan. l. 1.

Tacit. An.
nal. l. 1.

ges, sed aut principes aut Imperatores appellarentur. Si non Caligula aliquis aut Nero; sed Augustus Titusve, optimi principes, *Reges* se vocassent, quantopere adversus se patres, equites, plebem concitassent? quantopere in se orbem universum armassent? quantum in periculum non regni modo sed vitæ etiam amittendæ se conjecissent? quam infame etiamnum eorum nomen in annalibus foret, quam exosum posteris? non minus certe, quam fuit M. Manlii Capitolini, qui regni affectati damnatus, de saxo Tarpejo dejectus fuit: addito in ejus notam Senatus-consulto, *ne cui de gente Manlia Marci cognomen esset*. Ut vel hinc videas, quam infesta Romani cum nominibus bella gesserint.

Liv. de-
cad. 1. 1. 5.

Nevero existimes rudem tantum plebeculam acrius nonnunquam pro verbis quam pro re pugnasse: istud nonnisi Patribus & Senatui attribui potest. Agitabatur inter patres & plebem controversia de consulatu cum plebe communicando. Vincere plebs videbatur: cum patres, qui rem sibi tenere non posse videbantur, pro nomine retinendo pugnarunt: non recusarunt, quo minus ratio plebis haberetur in consulari potestate, dummodo
ne

Liv. de-
cad. 1. 1. 4

ne consules sed tribuni militum consulari potestate crearentur.

Ipsum quoque Sacerdotium morbus hic infecit. Solebant ante ejectos Tarquinius sacra quædam à Regibus peragi. Regibus exactis nemo ad ea idoneus videbatur: quare inveniendus erat aliquis, cui *Regis nomen* imponeretur, quique *Rex sacrificulus* appellaretur: Ita remedium huic malo, nomine isto inventum esse videbatur: sed extemplo alius extitit ex hoc nomine terror: nihil enim tum magis quam regis nomen metuebatur. Ne igitur hic *Rex* non potestate sua, nullam enim habebat, sed nomine abuteretur, Pontifici erat subjiaciendus, ut sic ejus auctoritas coerceretur, ne, ut ait Livius, additus nomini honos aliquid libertati officeret.

Liv. de-
cad. 1. 1. 2.

Ut jam taceam, quantopere iidem pugnaverint, ut in sacris nonnisi bona verba audirentur; adeo ut vox inauspicata temere missa omnia sacra polluisse videretur: hinc illa: *Favete linguis, Bona verba*; hinc tibiæ in sacris usus; impedire nempe debebat earum strepitus, ne vel minimus vocis sonus exaudiretur, quo sacra profanari existimabant. An non hoc erat pro verbis pugnare?

Bartholin:
de Tibiis
c. 5. p. 187.

Et si de veris certaminibus loqui malumus,

mus, etiam cum hostibus pugnaturi Romani, non armis modo sed vocabulis, sed nominibus militem instructum esse voluerunt. Notum est ex Livio aliisque, in delectu habendo, Consules pro tribunali sedentes, vel sellis in foro positis, civium singulorum nomina citari iussisse. Hic vero maxima religione observatum est, ut primus miles *buno fieret nomine*, & aut *Valerius*, aut *Salvius*, aut *Statorius* appellaretur. Thraso apud Comicum ad Sangam, quem centurionem suum vocat:

Quid ignave? peniculone pugnare, qui istum huc portes, cum hoste cogitas?

Eodem modo Romanis tum dicere licuit: quid vos superstitiosi, verbisne nominibusve, qui de his tantopere solliciti estis, cum hostibus vestris pugnare cogitatis?

§. 19. Neque vero hodie minus, quam olim, Logomachiarum etiam extra Scholas reperiri, credendum est. Quantopere enim & hic de vocibus sæpe pugnari solet? Quoties accidit, ut, postquam aliquandiu homines inter se litigaverint, tandem utrique parti appareat, nullum fuisse inter ipsos dissensum? quoties accidit, ut, si quis à consuetis loquendi formulis recedit, quanquam idem prorsus dixerit, aliud dixisse videatur.

Sunt

Ciccr. l. i.
de divi-
nat.

Et hodie
dantur Lo-
gomachia
extra scho-
las.

Sunt qui, cum Orationem Dominicam vernacula lingua recitant, Latinorum, Græcorumque exemplo contra Germanicæ Linguae genium pronomen in duobus primis vocabulis nomini postponant. Quid levius hoc est? Et tamen si in multis id locis mutare velles, universus offenderetur populus, & tantum non novam religionem introduci quererentur.

Quoties fit in sententiis dicendis, ut omnes adversos, omnes dissentientes habeas: muta, non sententiam, sed unum alterumve verbum, omnes protinus tibi assentientes habebis?

Nunquamne fuerunt integri populi, qui, ut Romani quondam, Regum pertæsi, Reges, protectorum nomine, ferre potuerunt? Nulline reperiuntur, qui libenter serviunt, dummodo liberi vocentur?

Sane dantur multi, qui lubentius, quicquid nomine significatur, amittunt, quam nomen; & contra alii æquiore animo malum nomine significatum, quam nomen ferre solent. Sunt qui paupertatem sine querimonia patiuntur, dummodo ne pauperes dicantur. Sunt, qui ad vilissima ministeria se demittere non erubescunt: dummodo honestum iis nomen quærat. Invenies, quibus, ut quondam Ovidio

Multilubentius, quicquid nomine significatur, amittunt, quam nomen.

Poë-

Poëtæ, mitius exilium videtur, si non exules, quod durius nomen videtur, sed relegati, quod mollius, appellentur. Cave quosdam, qui podagra laborant, podagra laborare dicas: aliud quidvis huic morbo nominis impone: non tam doloribus podagræ, quam hoc nomine irritantur.

Gloria cupido sæpe Logomachia.

Honorum, gloriæ cupido, quid aliud sæpe est, quam pugna pro verbis? Pugnant hi pro inanibus sine re titulis, illi pro honorum gradibus, alii pro immunitatibus, & privilegiis, quæ sæpius in solis verbis consistunt. Pugnant non ut docti, sapientes, prudentes, pii sint, sed ut ita nominentur. Pugnant pro eliso dentibus aëre, pro illo *ψιθυρισμῶ* aquam ferentium, pro illo susurro vilissima mulierculæ dicentis, *εἶς ἐκεῖνος*, *hic est ille*, quo se Demosthenes tantopere delectatum esse fatebatur. Pugnant pro vana nominis immortalitate acrius quam pro solida & beata immortalitate animæ, & ita pugnant quidam, ut Herostrati exemplo parum curent, utrum nomen suum laudetur, an vituperetur, dummodo ne prorsus nomen, i. e. hæ literæ, hæ syllabæ intereant.

Ælian. l. 9. c. 17.

Ut & Divitiarum cupido.

Ipse illa, qua pluribus nihil solidius videtur, tam immoderata divitiarum cupiditate,

do, quid aliud sæpe est, quam Logomachia? Ille avarus, qui tantopere contendit, ut opes opibus cumulet, non ut iis unquam utatur, sed gazæ incubet,

Ut magnus Draco, quem canunt Poëta Martial.
lib. 12.
Custodem Scythici fuisse luci.

pro qua re pugnat, quam ut nomine-
tur dives? Quid enim præterea ad ipsum
ex tot congestis auri argentique acervis
lucris redeat, quam nomen divitis, equi-
dem non video.

Et quis non mirabitur, si ipsa atrocis-
sima bella sæpe Logomachias esse dixero. *Bella sæpe
non n. si Logomachia.*
Ut jam de eo non dicam, vanos nonnun-
quam Principum titulos caussas maximo-
rum bellorum esse: pro qua re utpluri-
mum tot corporum stragibus, tot san-
guinis fluminibus, tot urbium incendiis,
tot agrorum depopulationibus pugnare
solent Reges, quam ut nomen Magni,
Victoriosi, Audacis acquirant, ut nomen
suum etiam post mortem in annalibus le-
gatur, ut posterius vocem hanc, (horreant,
ament, nihil refert,) in ore habeant;
tanti hæc esse videntur; tum vero cum
Poëta dicunt:

*Non omnis moriar, multaque pars mei
Vitat Libitinam.*

Quid tandem? multane pars tui? imo
vero.

vero vox cassa, nomen inanē & plerisque odiosum, pictæ in charta syllabæ; & si vis, literæ marmori insculptæ, nihilque præterea. Bene est, quod bella hæc magnis se auctoribus tuentur, auderemus alioquin dicere; ea, si causam spectamus, sæpe numero non minus vana non minus ridicula esse, quam ineptissimæ Magistrorum in scholis Logomachix; nunc non audemus.

*Logomachia morbus curatu difficili-
mus, pluribus de causis.*

§. 20. Desinant igitur frivolas scholis disputationes exprobrare ii, quibus nihil est cum illis commercii. Habent & ipsi suas Logomachias, habent, quibus medicinam faciant, ægrotos; sed hos illi, quorum interest, curent; nos ad nostros, à quibus digressi sumus, curandos revertimur. Sed & hoc ad hujus, de quo loquimur, morbi gravitatem accedit, quod curatu difficilimus sit: accidit enim hic, quod in plerisque animi morbis, ut pars morbi sit, ignorare morbum. Corporis plerumque morbos agnoscimus, fatemur: Animi non item: quid ita? inest omnibus aliquid aut turpitudinis aut stultitiæ? Hæc vero quis agnoscit, quis, si agnoscit, fatetur? Quæ vero spes salutis est, ubi nemo se ægrotare sentit? ubi Medicum nemo quærit, nemo audit.

Idem

Idem plane est hujus morbi nostri genius. Adi nostros Logomachos; inculca illis vulgatum illud: *ubi in sensu convenitur, de verbis non est litigandum*: comproba id Gregorii Nazianzeni * dicto: οὐδὲν περὶ τῶν ὀνομάτων ζυγομαχήσομεν, ἕως ἂν πρὸς τὴν αὐτὴν ἔννοιαν αἱ συλλαβαὶ φέρωσι. Objice illis Aristotelem † suum dicentem: Ἐυλαβητέον πρὸς τὸν ὄνομα διαλέγεσθαι. Adde Ciceronis * illud: *Rebus intellectis in verborum usu faciles simus*. item alterum: *Vitiosum est controversiam intendere propter nominum mutationem*. Laterem lavabis, nihil horum ad se pertinere existimabunt.

* Orat. 39.
in sancta
lumina.

† in Topi-
cis.

* Lib. 3.
de fin. Ad
Herenn.

Accede propius, dic, quam potes, blandissime cum servo illo Terentiano.

Fortasse unum aliquod verbum hanc inter vos iram conciverit.

Hic vero, te non amplius ferent iracundi homines. Putabunt se insanix insimulari, saltem levitatis aut cæcitat. Ergone, inquit, nos tibi homini acuto, & ad pacem faciendam de cœlo scilicet delapso, Logomachi videmur, vitilitigatores, cæci, quorum acumen ultra syllabas & literas non penetrat. Tales tibi quoque videntur majores nostri, vah quam graves, quam sapientes, quam sancti viri! qui iisdem de controversiis tanquam de

H

rebus.

rebus gravissimis, tanquam pro aris & focis, toties disputarunt. Vani igitur erunt, ridiculi, inepti, tot nostri, tot aliorum libri de his contentionibus scripti. Vanæ tot disputationes habitæ. Vana trophæa nostra ex his pugnis reportata. Vana tot cruditorum encomia. Tempus omne, quod his datum est, inutiliter consumptum. Frustra toties irati fuimus; Cum umbra etiam pugnaverunt præceptores nostri, hoc erit ardoris, hoc virtutis præmium:

Hoc pretium studii vigilatorumque laborum,
ut populo spectaculo sint, & tanquam de umbra Asini tam diu certaverint, cum larva pugnaverint, bella sine hoste gesserint, in circulis rideantur.

Hinc confestim nova disputatio: an prior disputatio Logomachia fuerit: & cum nova disputatione nova animorum exacerbatio, novæ rixæ, nova convicia. Hic partes iram in conciliatorem vertunt, qui Logomachiam disputationibus suis admixtam esse dicit: Iste enim plerumque non aliam ab iis, quibus optime consultum vult, gratiam init, quam ut utrique parti æque odiosus sit, imo magis etiam odiosus, quam altera alteri fuit usque adhuc, præsertim in rebus ad Religionem per-

pertinentibus, ubi Logomachi pro gloria Dei pugnare, si non ipsi sibi videntur, certe aliis videri volunt. Quod si enim verissimum illud Verulamii est: *Pessima res est errorum ἀποθέωσις & pro peste Intellectus habenda est, si vanis accedat veneratio*: Non minus sane periculosa res est ἀποθέωσις & consecratio Logomachiarum, si totidem pro Deo & Patria pugnae habentur, ut quod morbum hunc tantum non prorsus insanabilem reddit.

Tum enim iis, qui acutius disputationum levitatem cernunt, &, quod cernunt, ingenue profitentur, idem plerunque accidit, quod illis inter Græcos Philosophis, qui propius, quam rude vulgus, ad cognitionem unius Veri Dei accedentes, larvas illas Deorum eorumque infinitam multitudinem atque adeo totam plebeculæ superstitionem riserunt. Quemadmodum enim hi propterea ἄθεοι vocati sunt, atque in summo apud populum odio fuerunt: ita illi nostri Logomachiarum iudices, utrique parti invidi, ab altera callidi, versuti, impostores, fraudulentii appellantur, qui homines adolescentulos eductos libere in fraudem illiciant, sollicitando & pollicitando illorum animos lætent; ab altera vocantur repidi in religione, fri-

gidi, indifferentes, pravaricatores, proditores, transfuga, & sicubi ira crescit, profani, impii atque Athei.

Ita gratiæ aguntur iis, qui pestem hanc curare aggrediuntur: quis non, hae mercede propofita, Medicus esse velit? Contra illi soli sancti, illi religiosi, illi zelotæ sunt, qui nihil remittunt adversariis, omnia eorum dicta in hæreses transformare, levissimas quasque dissensiones, immane quantum exaggerare sciunt, omnem tolerantiam, omnem mansuetudinem, concordiam, tanquam communionem Christi cum Belial execrantur; qui identidem ex cathedra, ex suggestu cygneam Didonis Virgilianæ repetunt cantionem:

Stirpem & genus omne futurum

*Exercete odiis, cinerique hac mittite nostro
Munera, nullus amor populis nec fœdera
sunt.*

Hoc plebeculæ placet. Lubentius audiunt, qui adversarios, quam qui vitia sua petunt. Quid tu? audivistine hodie Nostrum. Hui quam strenue se gessit? quantopere invecus est in eos, qui fratres nostri esse volunt? Quomodo eos in orcum deturbavit? Hic vir, hic est! hic adversarios suos ferire novit! Hoc stat Orthodoxia! Quis non tanta gloria propofita,

ta, libenter huic militiae nomen det, quam nos Logomachiam appellamus?

§. 21. In hoc etiam morbus, cujus curationem suscepimus, periculosus admodum est, quod magnopere verendum, ne, dum illum sanare volumus, augeatur, veraque ex apparenti controversia fiat. Quamprimum enim aliquem mones, videat, ne de verbis cum adversario certare dicatur, hoc tanquam gravissimo convicio offensus & exacerbatus, incipit dissensum verum inter se & eum quicum disputat quærere, neque desinit, donec aliquem tandem, ubi nullus ante fuit, exsculpserrit. Majores nostri non fuerunt Logomachi, non vitilitigatores; fieri igitur non potest, ut hæc fuerit eorum sententia; ita enim sentiunt, quibuscum disputabant, adversarii: alia fuit. Ergo novam, de qua ne somniarunt quidem, illis affingit sententiam, eamque ipse amplectitur, tantum ut ne fateri cogatur, illos, quos tantopere admiratur, Logomachos fuisse illos, quos tantopere odit, secum sensisse.

Epicurus in voluptate summum bonum posuit, sensu non malo, ipsa enim hæc sunt Epicuri apud Laërtium verba: *Constat igitur, quando voluptatem beatæ vitæ di-*

Logomachia morbus periculosus, ob metum ne illum augeamus dum sanare volumus.

Epicurus in voluptate, bono sensu, summum bonum posuit.

cimus finem, non intelligere nos eas voluptates, quæ sunt virorum luxu diffluentium, aut aliorum etiam, quatenus spectantur in ipsa actione fruendi, quæ nimirum sensus jucunde dulciterque afficitur: veluti quidam ignorantes, aut à nobis dissentientes, aut alioquin adversum nos male affecti interpretantur: sed illud duntaxat intelligimus, μήτε ἀλγεῖν κατὰ σῶμα, μήτε ταραττεσθαι κατὰ ψυχὴν, non dolere corpore, neque animo perturbari. Si quidem non computationes, commensationesque perpetuæ: non ipsa puerorum mulierumque consuetudo: non piscium delicia, aut quæcumque alia mensa lautioris cupedia, jucundam vitam pariunt, sed quæ cum sobrietate serenoque animo est ratio.

Alii Philosophi, non tam contra Epicuri sententiam, quam contra vocabulum voluptatis disputant.

Hæc quanquam sententia Epicuri fuerit, tamen non ferunt eam alii Philosophi, imo propter hoc ipsum Epicurum Philosophi nomine indignum exclamant. Hinc tot disputationes sapientissimorum hominum non tam contra Epicuri sententiam, quam contra vocabulum voluptatis. Qui hos sequuntur, vix credere possunt, vanas fuisse has disputationes: quare intelligunt ita Epicuri sententiam, ut ab adversariis explicari audiunt. Credunt Epicurum, i. e. hominem, quem aliis in rebus sapientem fuisse putant, summum bonum

bonum in vita perpetuo luxu, comessationibus, computationibus, aliisque obscœnis corporis voluptatibus diffluente posuisse. Hanc sententiam, ii quorum ingenio convenit, quorumque sensus titillat, non desunt qui amplectantur, gaudent, quod ad tantum Philosophum sectæ hujus originem referre possunt. Hinc illi, ut vocat Flaccus, *Epicuri de grege porci*, hinc illi *insanientis sapientia consulti*; Hinc Piso ille apud Ciceronem, quo nihil libidiniosius, nihil impurius, nihil intemperantius cogitari potest, *laudat Philosophos*, Cic. orat. pro Sext. *qui dicuntur præter ceteros esse auctores & laudatores voluptatis*. Hinc denique Epicurei, qui jam non verbis, sed revera & toto, quod ajunt, cœlo à reliquis Philosophis dissentiunt, sed non minus dissentiunt ab Epicuro, quo nihil continentius nihilque temperantius fieri potuit.

§. 22. Præterea quoties alicui in disputationis æstu locutio aut vox excidit, minus apta illa quidem, & quæ aliud plane, quam quod dicere volebamus, si accuratius loqui voluissemus, significaret? hæc protinus ab adversario arripitur, in pessimum sensum detorquetur, fiunt inde consequentiæ; Alter quid faciat? pudet fateri, se melius loqui potuisse, hoc enim
H 4 esset,

Vox temere elapsa, & defensa pertinaciter, ab in Logomachiam, curatu difficilem.

esset, concedere adversario: defendendum est quicquid excidit, hæc lex disputantium. Hinc nascitur Logomachia, quæ ab initio benigna verbi minus apti interpretatione facile sanari posset. Hoc vero toties exagitur, ac propugnatur, ut tandem, qui male locutus est, ne male locutus esse videatur, male sentiat: & defendat denique, quia adversarius ita vult, sententiam, de qua ante ne cogitavit quidem, tantum ne fateri cogatur, inepte, imperite, pueriliter, insulse, quod ad nauseam ipsi occinit, aut se, aut præceptores esse locutos. Hinc iterum vera ex Logomachia controversia.

*Præsertim
odio inter
Logomachos
accidente.*

*Ter. Hec.
a. 3. f. 1.*

Odium etiam inter Logomachos ejusdem rei causa esse potest: non enim propter dissensus levitatem odium quoque leve est:

Non maxumas, quæ maxumæ sunt interdum ira, injurias

Faciunt: nam sæpe est, quibus in rebus aliis ne iratus quidem est:

Cum eadem de causa est iracundus factus inimicissimus.

Hic vero pudet cum eo sentire, quem odio habes, quem averfariis. Unde fit, ut cum ab adversario ante non nisi verbis alienus fueris, verbis ad satietatem utrinque expli-

plicatis, cesset aliquando Logomachia, sed non cesset odium. Vis dissentire ab inimico, si non in eo, in quo te dissentire putasti, certe in alio; quod non desinis quærere, donec aliquid in ejus sententia, quod oppugnare possis, invenias: Ac vereor, ne à tua ipsius etiam, ne à majorum sententia recedas, simulatque eandem ab adversario credi videas; tantum ne hosti tam odioso assentiri videaris. Ita crescere solent lites, ita dissensus, qui ab initio exilis est, sensim augetur, aliis ex aliis, veris ex apparentibus natis controversiis: ac nescio an pleræque ex iis, quæ eruditos dividunt, exiguæ ab initio fuerint, & quædam Logomachiae; at, non secus ac tumores ulcerum à duris manibus tractati violentius, disputando creverint.

C A P. V.

*De morbi hujus causis, quæ in
linguis sunt.*

§. I.

QUam late pateat *Logomachia*, quantaque sit hujus morbi gravitas, satis ^{Rei difficultas.} nos arbitror demonstrasse. Neque multi hæc laboris res fuit, cum vel solus primi
H 5 cujus-

cujusque libri aspectus exemplorum, quibus ad id probandum opus erat, admonere nos potuerit: prorsus ut ludendum nobis sæpius, quam serio disputandum fuerit. Nunc, si causas hujus morbi quærimus, asperior nobis atque ardua magis via incipit; philosophandum est; inspicendi non solum libri, sed homines; excutiendi abditi animorum recessus. Quo magis veniam speramus, sicubi à nobis aliquid in difficilima inquisitione non erit animadversum.

Logomachiarum causa omnes ad duo genera reductæ.

§. 2. Omnes mihi Logomachiarum causæ ad duo potissimum genera referri posse videntur: culpa enim hujus rei vel *in linguas*, quibus disputantes utuntur, rejici potest, vel *in ipsos disputantes*: de illo prius, de altero deinceps dicam.

Spirituum à corpore sejunctorum dissensus, qualis?

Enimvero si quis est inter Spiritus à corpore sejunctos dissensus, verus est, non apparens, sententiarum non verborum: propterea, quod cogitata sua, non vocibus, sed aut sola voluntate, aut alio quodam cogitandi modo nobis incognito alii aliis manifesta faciunt. At nullum inter nos, quamdiu corpori sumus affixi, immediatum est animorum commercium: corpore tanquam mediatore quodam atque internuncio mentes nostræ utuntur; ejus-

ejusque motibus, ac præcipue oris vocibus, quid sentiant, significant: quæ signa cum sæpe obscura & fallacia sint, fit, ut sæpissime inter nos litigemus, non quod revera diversa sentiamus, sed quod alii alios non intelligimus.

Fallacia atque obscura hæc signa voco: nulla enim, ut hinc incipiam, lingua est, quæ non plurima habeat vocabula *Diffensus inter disputantes, à sermone disputantium provenit, verborum varia significatione, & vocum homonymia.* *πολύσημα* diversa significantia: (quæ de vocabulis dico, eadem de locutionibus atque adeo de integra oratione intelligi semper velim) unde toties accidit, ut verba eorum, quibuscum disputamus, aliter atque ab iis intelliguntur, interpretemur. Dissentire est de eadem re diversa sentire: sed cum diversis rebus idem nomen impositum est, fit, ut dissentire videantur de eadem re, qui non nisi de diversis eodem nomine significatis diversa sentiunt.

Saltationes sunt qui laudant, sunt qui execrantur. Quid? tanta inter homines ejusdem rationis participes sententiarum est distantia? Ita quidem videtur, si in verbis hæremus: at si remoto verborum involucro rem ipsam putamus, videmus tantam judiciorum diversitatem non esse de eadem re, sed de diversissimis. Hic fortasse

fortasse saltationis voce nescio quam motuum mimicorum petulantiam ad lasciviam excitandam unice comparatam; ille honestam quandam corporis exercitationem ad ejus mobilitatem, venustatem, dignitatemque augendam institutam intelligit. Quid mirum igitur, si de oppositis opposita dicuntur?

*Logomachiarum
fontis ubertas.*

§. 3. Sed quanquam hæc omnibus nota sint, pauci tamen satis considerant, quæ sit hujus Logomachiarum fontis ubertas. Dici enim non potest, quanta sit vocum in omnibus linguis homonymia, quanta phrasium amphibolia. Hebræi uno verbo non tantum diversa sed contraria notant. Evolvat aliquis Lexica: percurrat indices auctorum; inspiciat Concordantias, quas vocant; videbit, omnes propemodum loquendi formas, omnia nomina, omnia verba, imo omnes orationis particulas diversa significare, non tantum apud diversos, sed sæpissime apud eosdem. Et tamen quantilla ambiguitatum pars observatur aut in tanta multitudine observari potest? Notantur obviæ, insignes, quæ ab unoquoque attendente facile distingui possunt, innumerabiles aliæ leviores, subtiliores, quæ nonnisi à perspicacibus discerni possunt,
præ-

prætermittuntur. Ut non nimis audacter
 Chrysippus Stoicus, & cum eo alii plures
 nullum verbum esse dixerint, quod non
 sit ambiguum. contra quem, si quis
 Diodorum Cronum, qui nullum verbum
 ambiguum esse statuit, disputantem apud
 Gellium audiet, exemplum ineptissimæ
 Logomachix videbit. Ac Chrysippum
 quidem sententiam suam, in libris, quo-
 rum Laërtius meminit, *περὶ ἀμφοβολίων*.
περὶ τῶν τροπικῶν. ἀμφοβολίων. περὶ συνημμέ-
νης τροπικῆς ἀμφοβολίας. Aliisque hujus ar-
 gumenti satis probasse arbitror.

*Disputatio
 inter Chry-
 sippum &
 Diodorum
 Cronum.
 Gell.
 noct. Att.
 l. 11. c. 12.
 Quintil.
 l. 7. c. 10.
 Diog.
 Laërt.
 lib. 7. in
 Chrysip-
 po.*

Quæ ut nemini usque adeo paradoxa
 videatur, perpendendum, quanta sit five
 rerum, five conceptuum multitudo, quam
 pauca pro hac multitudine atque adeo in-
 finitate in lingua vel copiosissima voca-
 bula, quam multa & hic idem significant.
 Cogitandum erit in primis, ut vox aliqua
 idem semper apud eosdem, idem in ore
 diversorum significare dicatur, non suf-
 ficere, ut significationes in quibusdam,
 in multis, in plerisque conveniant; ne-
 cesse esse, ut in omnibus in minutissimis
 accuratissime concordent. Si vel levissi-
 mum significationi additur demiturve,
 jam alia res est, aliud proinde de ea judi-
 cium ferendum. Arboris vocabulo signi-
 fico

fico aliquid per se existens, extensum, vivens five nutrimento suscepto crescens, constans radice, trunco, ramis, foliis, floribus. Qui hæc omnia mecum eodem vocabulo significat, tantum adjicit his in mente fructus, aut demit flores; non obstat iste in reliquis omnibus consensus, quo minus aliud atque ego hoc nomine intelligere videatur.

Considerandum porro erit, vocabula, res quas significant, non natura significare, sed libera quadam hominum conventionione, quæ tacita magis, quam aperta, casu potius, quam consilio facta fuerit; ac præterea inter voces & res significatas nullam plerunque esse similitudinem. Jam quis credat, omnes eadem lingua utentes, ita in significatione horum signorum arbitrariorum consentire potuisse, aut posse etiam nunc, ut etiam in minutissimis conveniant, tantundemque accuratissime alter, quantum alter, subjecta eidem vocabulo notione comprehendat, nihil ille imprudens demat, quod hic addiderit, nihil addat, quod ille prætermiserit? Quin potius mirum id cuilibet videbitur, si paucos quosdam, si unum & alterum in paucorum vocabulorum significatione tam accurate convenire con-

contingat : præsertim cum consensum hic suum non aliter testari possint , quam vocabulis , quæ & ipsa ambigua sunt.

§. 4. Huc quoque illud accedit incommodum , quod sæpissime longe melius , quid ipsi vocabulis intelligamus , cognoscamus , quam verbis explicare possumus. Quod vel eloquentissimis aliquando contingit , & necesse est ut contingat in iis vocabulis & locutionibus , quæ cogitationes nostras earumque varietates significant , atque in universum omnia ea , quæ non tam *ideâ* , ut loquitur Malebrancius , quam *sensu* quodam atque *conscientia* inter se discernimus.

Sæpe longè quid ipsi vocabulis intelligamus , cognoscimus ; quam verbis explicare possumus. Recherche de la vérité Tom. 3. p. m. 167. Exemplis hoc variis declaratur.

Scio , quid sit clare rem percipere ; quod in mente lumen oriatur , cum rem ita percipio , sentio : sed quibus verbis id alteri explicem , vix reperio. Scio , quid mens mea agat , cum id agit , quod ego velle voco : si alteri , quid hoc velle sit , explicandum esset , hærerem. Novi aliter me affici cum dulce , aliter cum amarum gusto , sentio discrimen , nunquam hæc confundere soleo : si , discrimen hoc quid sit , ex me quæreretur , quod dicerem , non haberem. Ita multi de pulchritudine faciei , de ædificiorum symmetria , de gestuum venustate , de eo , quod in actio-

actionibus dictisque decet, de picturarum artificio, de scripturarum variarumque rerum antiquitate, de sonorum diversitate, de vocis & concentus suavitate, de chordarum harmonia, de styli varietate judicant, & eodem modo constanter judicant, alteri judicii sui rationem reddere non possent. Causa in promptu est, quia non tam judicant ex regulis quibusdam & principiis, quam ex suo de his rebus sensu. Aliter eorum animus afficitur cum faciem pulchram, aliter cum deformem; aliter cum gestus venustos, aliter cum inconditos vident: aliter cum chordas consonantes, aliter cum dissonantes audiunt: aliter cum Epistolam Ciceronis, aliter cum Planci legunt.

Ita sæpe audiui, Antiquarios, quos vocant, numismata vere antiqua à supposititiis atque adulterinis accuratissime quidem distinguere: sententiæ vero suæ rationem reddere non semper posse. Quod mihi nuper confirmavit, Vir harum rerum peritissimus, cujus ego quoties video cimeliarchium,

*Ausonias non miror opes Grajasque; sed illum
Qui tot opes capsis, majores pectore servat.*
Ex hoc quæsi aliquando, unde deducantur illa gnorismata, quibus Antiquita-
tis

tis periti, numismata antiqua, à recentioribus, aut suspectæ antiquitatis tam acute discernere queant. Hic ille: Vix possunt, inquit, hæc regulis comprehendere. Præcipuum hic est illud nescio quid, quod Galli harum elegantiarum studiosi gustum antiquitatis appellant, quem ii, qui hæc assidue tractant, acquirere solent. Qui quidem gustus in nulla alia mihi re consistere videtur, quam quod aliter Antiquarii viso antiquo nummo, aliter viso recentiori ad ejus similitudinem efficto, constanter afficiantur, tametsi hujus sensus discrimen eloqui non possint.

Ex eadem causa fit, ut priscorum Rhetorum scripta legentes, non semper quid sibi velint, intelligamus. Distinguit Cicero dictionem *vehementem* Demosthenis à *dulci* Theophrasti & Demetrii Phalerei. O. Sic. l. 2. Loquitur alicubi de actione oratoris *admirabili, plena spiritus, plena veritatis, plena doloris*: qui hæc nunquam, ut Cicero, sensit, verba ejus audit, nihil aut aliud, quam Cicero, intelligit. Qui libros Rhetoricorum ad Herennium scripsit, distinguit orationem in *magnificam, mediocre*, Herenn. l. 4. *tennem*. Qui exemplis ab eodem additis non eo ferme modo, atque Rhetor, afficitur, hæc verba non capit. Idem nobis
I accidit,

accidit, si Longinum de sublimi, Her-
mogenem de ideis suis disputantem audi-
mus.

*Omnia vo-
cabula, quæ
nostros
de rebus
sensus
significant,
aliqui
ambiguita-
tis habent.*

§. 5. Hinc factum est, ut omnia voca-
bula, quæ nostros de rebus sensus signifi-
cant, ut in quorum significatione *accurate*
convenire non potuimus, aliquid ambi-
guitatis habeant. Negat hic, dulce esse
suave: affirmat alter. Vera controversia
est, si idem utrinque suavis dulcisque no-
mine intelligitur. Fac in hoc esse consen-
sum, quod uterque nomine dulcis id in-
telligit, quod sentit, cum mel gustat.
At quis scit, an idem sentiant? Idem
objectum aliter hujus, aliter illius sensum
potest afficere. In vocabulo *suavis* mani-
festa est homonymia: quilibet hoc intel-
ligit, quod sibi gratum est. jam exigit
aliquis ad oppositionis leges has duas
enunciationes: Quod sentit Petrus, cum
mel gustat, Petro est gratum: Quod sen-
tit Paulus cum mel gustat, Paulo est in-
gratum: idemne de eodem affirmant &
negant? Et tamen hujusmodi disputatio-
nes innumerabiles sunt, ubi non major,
quam hic, est sententiarum oppositio.

Diximus eloquentissimis accidere, ut
suos de rebus sensus verbis explicare non
possint: id vero vulgo in omnibus fere

voca-

vocabulis contingeret, si ex illo quæreretur, quid iis intelligat. Nemo est, qui globum à cylindro atque alia quacunque figura non distinguat. Quære ex rustico quid sit globus? hærebit: explicare non poterit. Nullum videlicet aliud inter globum & cylindrum discrimen novit, quam quod visus suus aliter à globo, aliter à cylindro affici solet: hoc exprimi verbis non potest. Jam si quis considerat, linguas plerasque, non à sapientibus, sed à vulgo paulatim, utque occasio se obtulit, inventas esse; facile judicare poterit, quam accurate in significatione vocabulorum convenerint ii, quorum nullus alteri, quid vocabulo aliquo significet, saltem clare atque distincte, dicere potuit.

§. 6. At præter vocabula ambigua, quæ aliud in hujus, aliud in illius ore, vel in ore unius nunc hoc nunc illud significant, dantur alia, quæ pariter πολύσημα appellari possunt, quippe quæ in unius ore, idque simul, res diversissimas denotant. Cum enim vulgus hominum multa confundat, quæ distinguenda erant, factum est, ut notionibus distinctis, atque adeo oppositis, quæ in unam quodammodo vulgi incogitantia coaluerunt, perinde

*Dantur
vocabula
quæ in
unius ore,
idque si-
mul, res
diversissi-
mas deno-
tant.*

*Exempla
varia in
vocibus:
Sensus.*

quasi una prorsus res esset, unum quoque nomen impositum sit. Quorum, cum sit insignis multitudo, speciminis loco pauca adducam. Quoties vulgus sensus vocabulo utitur, notione huic nomini subiecta conjungit, quæ toto, ut ajunt, inter se genere dissident; quorum alia ad corpus & ejus partes pertinent, harumque motus quosdam significant; alia ad mentem, rem toto cœlo diversam, certasque ejus cogitationes denotant: hæcque ita confundit, ut ad discrimen eorum, nunquam fere, cum hoc vocabulo utitur, attendat: sed potius una voce unam quoque rem se intelligere existimet?

*Spiritus,
anima.*

Idem de illis vocabulis dicendum, quæ sensus species, quæ affectus & eorum species, qualitates item sensibiles sive patibiles, ut vocant, significant. Hæc omnia eo, quem diximus, modo sunt *πολύσημα*; atque iis respondent vulgo notiones non distinctæ, sed ex rebus oppositis corporalibus & spiritualibus conflatae. Ipsa nomina spiritus, animæ, in hunc censum referenda sunt: Hæc cum proprie ventum, halitum significant, translata sunt ad res cogitantes significandas; sine dubio ideo, quod majorem cum re cogitante convenientiam vento corporique subtili, quam

quam crassiori materiæ intercedere arbitrabantur. Hinc factum est, ut hæc nomina translata nescio quid ex propria sua significatione retinuerint; ita, ut, quamvis plerique homines spiritus animæque voce res cogitantes intelligant, tamen cum hac rei cogitantis notione venti. flatus, halitus, tenuis cujusdam aëris aut ignis notionem conjungant. Neque ipsi Philosophi hunc vocum abusum emendârunt, qui animæ nomine, nescio quid, æquabiliter per corpus solum, quod simul intelligat & velit, simul etiam cibos concoquat, excrementa ab alimentis separet, sanguinem præparet & per corpus diffundat, cor calefaciat, pulmones agitet, arteriarum pulsum excitet, membra moveat, (& quid non?) intellexerunt.

De plerisque vocabulis tropicis dici potest, illa aliquid ex propria significatione secum afferre, unde fit, ut vix unquam his vocabulis disputatores utantur, quin in Logomochias, si non puras, mixtas saltem incidant. Si quis brutis animantibus sensum denegat; non decrit, qui brutis non modo cogitationem negari putet, sed omnes motus & affectiones corporis, ejusque partium, omnia denique, quæ ipse una cum cogitatione hoc sensus

vocabulo comprehendit. Hic si pugnabit, cum umbra pugnabit.

Finis.

Memini, me ipsum aliquando in ejusmodi Logomachiam incidisse. Statuebam finem corporis nil aliud esse, quam negationem, non existentiam ulterioris extensionis ad corpus aliquod pertinentis. Diversum hic à me sentiebant celebres quidam Philosophi. Ego, ut fit, non cedebam, sed sententiam meam propugnabam: hujus enim veritatem tam clare percipere mihi videbar, quam quæ clarissime unquam percepi. Postea vero, cum cessante ardore sedatiori mente rem perpendere cœpi, animadverti, omnem nostram disputationem Logomachiam fuisse. *Finis* nomen est: cujus significatu plus dissentientes, atque ego, comprehendebant: quod quidem utrique parti licuit. Ego solam partium extremitatem finis nomine intelligebam. Illi præter extremitatem ipsas quoque partes extremas, aut saltem superficiem extremam: quidam etiam figuram, quam certus partium extremarum situs constituit, addiderunt. Quare illorum finem plus esse, quam negationem, uti facile concedo: Ita illi finem meo sensu meram esse negationem vicissim largientur.

§. 7. Huc

§. 7. Huc facit, quod Verulamius de
 verbis observat: *Verba*, inquit, *plerun-*
que ex captu vulgi induuntur; atque per diffe-
rentias, quarum vulgus capax est, res secant.
Cum autem intellectus accuratior, aut obser-
vatio diligentior, res melius distinguere volet,
verba obstrepunt. Quod vero hujus remedium
est (definitiones scilicet,) in plurimis huic ma-
lo mederi nequit, quoniam & ipsæ definitiones
ex verbis constant, & verba gignunt verba.
Etsi autem putemus, verbis nostris nos impe-
rare, & illud facile dictu sit, loquendum esse,
ut vulgus, sentiendum ut sapientes; attamen
hæc omnia non sufficiunt, quo minus verbo-
rum prestigia & incantationes plurimis modis
seducant, & vim quandam intellectui faciant,
& impetum suum (more Tartarorum sagitta-
tionis, retro in Intellectum unde profecta
sunt) retorqueant.

*Verulamii
 observatio
 de verbis.
 De au-
 gment.
 Scientiar.
 lib. V.
 cap. 4.*

§. 8. Neque vero sola homonymia vo-
 cabulorum Logomachiarum causa est, sed
 etiam Synonymia. Hinc enim accidit, ut
 diversa sæpe sentire videantur, iis præ-
 fertim, qui in verbis hærent, qui aliis
 verbis synonymis atque ejusdem significa-
 tionis idem dicunt. Hic nemini mirum
 videri debet, si linguas, quas magna vo-
 cum penuria laborare audivimus, syno-
 nymorum quoque copia laborare dicimus.

*Synonymia
 etiam sæpe
 causa Logo-
 machia-
 rum.*

*Synonymo-
 rum copia
 unde?*

Fit hoc, tum quod homines ante in familias aut urbes aut populos minores divisi, cum in unum aliquem magnum populum coalescunt, singuli vocabula, quibus ante usi sunt, & in quibus convenire non poterant, in unam linguam conferant: tum ex migrationibus gentium: tum ex commerciis: tum denique casu quodam, aut ex amore novitatis, atque eadem sæpe repetendi tædio. Quin & artifices singuli cum de arte loquuntur aliter fere res, circa quas versantur, atque artis rudes vocare solent. Quod non semper ex necessitate factum est, sed more nostrorum venatorum, ut hoc quoque modo se ab artis imperitis distinguerent. Imo nulla pene est urbs, nullum oppidum, nullus vicus, nulla familia, quæ non verba & loquendi modos habeat proprios. Si cui forte verbum usitatum non incidit, aliud arripit, quo eandem rem significet: alii imitantur: hoc item alii. Id si in angusta aliqua familia fit, verbum fit familiæ; si in aulâ Regis aut Principis, ad cujus consuetudinem omnes componi volunt, omnes ita loqui cupiunt. Hæc demum est urbana dictionis elegantia. Usitatiores provinciis relinquuntur. Sic

Horat. de
art. Poët.

Multa renascentur, quæ jam cecidere, cadentque,
Quæ

*Quajam sunt in honore vocabula: si volet
usus,*

*Quem penes arbitrium est, & jus & nor-
ma loquendi.*

Ex his oritur ingens in qualibet lingua sy-
nonymorum copia: quam auxerunt Ora-
tores, quibus necessarium videbatur, ad
evitandum Auditorum fastidium eadem
varie dicere. Unde Rhetorum de com-
mutanda & varianda oratione præcepta,
libri de copia verborum conscripti, the-
sauri synonymorum, Sylvæ vocabulorum.
Quibus magnum à Poëtica, quæ de nu-
meris suis implendis sollicita fuit, incre-
mentum accessit.

Præterea multa his synonyma sunt, quæ
ab aliis significatione distinguuntur. Di-
stinguunt veteres, si Lipsio credimus, cas-
sidem à galea, quod illa de lamina, hæc de
corio facta fuerit. Distinguunt clypeum à
scuto, quod ille rotundus fuerit, hoc ob-
longum. quoties vero à priscis & recen-
tioribus hæc nomina confunduntur, qui
tamen res ipsas minime confunderent?
Distinguunt Logici nostri inter scien-
tiam, opinionem, & fidem, quæ no-
mina sæpe in ore vulgi idem significant.
Distinguit Gellius prædam à manubiis,
*ut sit præda corporum ipsarum rerum, quæ ca-
piun-*

*Ingens in
qualibet
lingua Sy-
nonymo-
rum copia:
quam au-
gent Orato-
res & Poë-
ta.*

*Multa his
Synonyma
sunt, quæ
ab aliis si-
gnificatione
distinguan-
tur.
Lips. de
milit.
Rom. l. 3.
dial. 1.
Ibid. dial.
2.*

*Gell.
noct. Att.
l. 13. c. 24.*

piuntur; manubia pecunia ex prædâ redacta. Hæc nomina aliter Nonius, aliter Asconius Padianus, quidam plane non distinguunt. Hinc idem Gellius: *Est tamen nonnusquam invenire, ita scripsisse quosdam non ignobiles scriptores, ut aut temere aut incuriose prædam pro manubiis & manubias pro præda posuerint.*

Isdem hominibus nonnunquam vocabula idem significant quæ alias distinguere solent.
Cicero notatus à C. Calpurnio.
Disquisit. 2. in l. 1. Offic. Ciceron.

Isdem hominibus nonnunquam vocabula idem significant, quæ alias distinguere solent. Quis credat Ciceronem, qui omnes Stoicæ & Peripateticæ Dialecticæ argutias perdidicit, nescivisse distinguere inter Definitionem & Divisionem? Cælius tamen Calpurnius hujus rei ignorantiam illi objicit, quod in officiis, promissa officiorum definitione, ejus loco divisionem tradat. At nimirum Ciceroni nil aliud propositum fuit, quam præmissa divisione quæstionum, quæ de officiis fieri possunt, dicere, quam in hoc libro sit pertractaturus: id quod, tum minimè cogitans, quo sensu Aristoteles aut Chrysippus hoc verbo utantur, definire vocat. Calumnia igitur hæc est Cælii i. e. perversa dictorum Ciceronis interpretatio, & ex calumnia orta Logomachia.

In universum de omnibus vocabulis vicinæ admodum significationis, sive quæ
 res,

res, inter quas tenue valde discrimen est, significant, dici potest: ea sæpissime esse synonyma, non tantum in ore multorum; qui accurate non loquuntur, quique prorsus, distinguere eorum significationes, nesciunt, sed etiam in ore peritissimorum, qui ad levissimam significationum differentiam alias non ignotam non semper attendunt. Ex quo rursus patet, quam dives & hæc vocabulorum Synonymia sit Logomachiarum scaturigo.

§. 9. Philosophi, quorum nomine *Philosophi*
Theologos, Jurisconsultos & Medicos *qui defectus lin-*
hic quoque comprehendimus, qui defectus Linguarum emendare sunt conati, *guarum emendare*
magnam præterea linguis mutationem *sunt conati,*
attulerunt. Cum enim ad plura in rebus, *magnam*
circa quas versabantur, attenderent, ad *linguis mu-*
quæ vulgus hominum non attendit, multa *tationem attulerunt.*
taque inter se distinguerent, de quibus distinguendis illiterati, quibus fere Linguas debemus, non sunt solliciti, factum est, ut cogerentur multa nova vocabula invenire: eorum, quæ jam in usu fuerunt, significationem mutare; quædam latiora, quædam angustiora reddere: quorundam significationi aliquid addere, aliorum aliquid demere: quæ vulgo synonyma sunt, ut rerum multitudini nomina respondere

sponderent, distinguere. Sicque alia eruditorum, alia plebis lingua nata fuit, quæ pluribus Logomachiis originem dedit.

Idque pluribus Logomachiis originem dedit.

Quoties enim reprehenduntur, tanquam contra artis principia peccantes, quorum unicum hoc peccatum est, quod artis lingua non loquantur? Quoties illud auditur: quis Philosophorum ita loquitur? Cum potius quærendum fuisset, an Sapientes ita sentirent. Quoties plebs Philosophis, Philosophi plebi desipere videntur: cum tamen idem sentientes, pariter aut sapiant aut desipiant? Accedit, quod nulla Philosophorum secta cum altera in hac linguarum mutatione convenire potuerit, cum quælibet, non expectato alterius consensu, arbitrio suo usâ fuerit, de quo alteri constare non potuit. Neque, qui ejusdem fuerunt sectæ, hic accurate consenserunt; non enim certo consilio omnia vocabula, quibus alio, ac vulgus, sensu utebantur, definiébant, ut Mathematici solent: & si id voluissent, fortasse verba idonea non semper invenissent, sed talia, quorum singula nova definitione indiguissent. Imo neque iidem Philosophi in sensu vocabulorum sibi constare potuerunt, saltem eorum, quæ cum vulgo ipsis fuere com-

communia, nunc Philosophorum, nunc vulgi sensu, huc enim sæpe à multitudine trahébantur, illa accipientes. Hinc perpetuæ Logomachiaë inter vulgum & Philosophos: Logomachiaë inter Philosophos diversarum sectarum: Logomachiaë inter ejusdem sectæ Philosophos: quocunque denique aspicias, Logomachiaë.

De Logomachiis ex terminis Philosophicis & Theologicis ortum trahentibus optime judicat Georg. Calixtus in judicio de controversiis inter Lutheranos & Reformatos: *Facile est hodie terminos, quos* pag 17.18.

diximus diversimode intelligi, rebusque ipsis aptari quum aliquandiu Philosophia & disciplina diversimode fuerint tradita, & nova illa atque prava Ramaa institutio veteres terminos partim aboleverit, partim aliter, ac olim accepti fuerunt, intelligere docuerit. Hinc itaque fit, ut à nonnullis termini quos diximus, vel omnino non intelligantur, vel aliter quam eorum fert, sive indoles, sive hætenus apud alios receptus usus accipiantur.

Consentit judicium Stephani Gausseni: *Aristoteles, inquit, dividit causas, in materiam, formam efficientem & finem. Efficientem porro dividunt in procatartelicam, proegumenam & instrumentum. Bene hætenus, ut quod illi (Theologi quidam) divisiones suas*

Differt. de
natura
Theolo-
giæ.

142 *Dissert. de Logomachiis*

ad omnia Theologia adhibent & ineptire aliquando malunt, quam suum illum numerum caussarum non invenire, & illi suo labore consequuntur, ut pro una controversia, quæ Christianorum animos distinebat, sex septem pullulascant quarum absque illis divisionibus esset, nihil unquam cuique venisset in mentem; atque ita velitandi, altercandi, contradicendi, & per eandem lineam ferram reciprocandi finis nullus est.

C A P. VI.

De iis qui sententiam suam non recte proponentes, Logomachiarum causæ sunt.

§. I.

Disputantes variis modis causam præbent Logomachiis.

Quinam in linguis Logomachiarum fomites lateant; vidimus; jam qui sint in ipsis disputantibus, dispiciendum. Hic vero culpa est à duarum partium alterutra, vel utraque. Cum ii, contra quos disputatur, sententiam suam non recte proponunt: ii vero qui contra disputant, sententiam alterius sua culpa non recte intelligunt. Priori modo, nam de illo in hoc capite dicemus, peccatur *obscuritate verborum*; quæ nonnunquam
invo-

involuntaria est, nonnunquam *voluntaria* & *affectata*. *Involuntaria* appello, cum homines perspicue loqui non possunt: *affectatam*, cum perspicue loqui nolunt.

Obscuritas verborum vel involuntaria est, vel affectata.

§. 2. Ac prius quidem vitium summis quandoque ingeniis adhæret; cum enim ipsi facile obscurissime ab aliis dicta intelligent, fit, ut alios suo pede metientes suo quoque obscure dicta intelligi existiment; imo nunquam videntur sibi obscure loqui, quibus nihil fere in aliis obscurum videtur. Quibus quidem observandum esset saluberrimum Quintiliani præceptum, qui Oratori suo non tam curandum esse vult, ut auditor ipsum intelligere possit, quam ne omnino possit non intelligere.

Illa summis quandoque ingeniis adhæret, & curæ Quintilianus laudatus. l. 8. c. 2.

Sunt, qui existimant, si ipsi, quid sibi velint, sciant, alios pariter id scire, itaque orationi necessaria quædam verba, sine quibus cætera intelligi non possunt, subtrahunt, non animadvertentes, sibi hunc defectum facilius esse in mente supplere, quam aliis, qui non omnes divini sunt. Quidam existimant, alios tantam afferre attentionem ad scriptorum suorum sectionem, quantam ipsi ad compositionem eorum attulerunt: in quo illos decipit cæcus sui & suorum amor; id enintum fieret, si alii tanti nostra, quanti nos

Recensentur causa aliquot obscuritatis.

nos ipsi, facerent. Obscuritatem quoque pariunt verba male cohaerentia, atque impeditus eorum ordo: quemadmodum enim ordo perspicuitatis, ita confusio obscuritatis mater est. Quod malum non nunquam inde provenit, quod in aliis cogitationibus defixi aut subinde ad alias inter loquendum delabentes, ad ea, quæ dicimus, non satis attendimus: nonnunquam ex præcipitantia quadam, quod loqui incipimus, antequam totum, quod dicere volebamus, animo concepimus, & quid ex illo primum, quid deinde dicendum, consideravimus. Quod in publicis disputationibus potissimum contingit: ubi affectus mentem perturbant, atque, ut sereno animo de dictorum nostrorum ordine cogitemus, non permittunt. Sæpe vero confusio in verbis confusionem in mente sequitur: ut eo ordine res proferamus, quo concepimus, ut non omnino male Cartesius dixisse videatur, eos, qui ratione plurimum valent, quique ea quæ cogitant, quam facilimo ordine disponunt, ut clare & distincte intelligantur, aptissime ad persuadendum dicere posse. Malim tamen, aptissime ad docendum dixisset: nam ad movendum, in quo potissimum Oratoris facultas cernitur, plura, quam Philotophus vult,

De Methodo. p.
m. 4.

Cartesius
correctus.

vult, requiruntur : plane ut quandoque impedita & male cohærens oratio affectum dicentis exprimens ad movendum ac propterea ad persuadendum aptior sit. Qualia sunt illa Nisi Virgiliani :

Me me : adsum, qui feci : in me converte ferrum.

§. 3. Plerunque vero obscuritas sermonis ex eo oritur, quod ipsi, quæ dicere volumus, non clare percipimus : ut sæpe tenebræ orationis, tenebras mentis prodant. Nonnunquam, cum mira & mire dicere volumus, cogitationes nostræ tam alte volant, ut ipsi eas non amplius conspiciamus. Conquerimur aliquando, verba nobis, quibus mentem explicemus, non suppetere, ubi merito nobis diceret Flaccus : de re prius cogita,

Alia obscuritatis causa, quando ipsi quæ dicere volumus, non clare percipimus.

Verbaque prævisam rem non invita sequentur. Horat. de art. Poët.

Imo fit sæpissime ut loqui velimus, cum nihil prorsus intelligimus, ac, quid dicere velimus, nescimus : ubi non potest non obscura esse oratio.

Id accidit sæpe in conflictibus disputationum : ubi turpe videtur adversario cedere. Respondenti defendenda est thesis. At est falsa : defendenda tamen. At non habet, quod respondeat : hoc nihil

Obscuritates sæpe in conflictibus disputationum, unde

K

ad

ad rem, respondendum tamen. At nescit, quid loquatur: quid tum? loquendum nihilominus; donec Opponens fileat. Si mens ipsum deserit; sentiat tamen adversarius, linguam nondum ipsum deseruisse. Similiter licet Opponens satisfactum sibi putet, non ideo statim acquiescendum: turpe est primo ictu prostrerni: turpe tam cito terga vertere. Urgendum est argumentum: instandum. Sed jam solutum est: nihil refert. Loquendum, etsi nihil, quod dicas, habeas: Ut doctus videaris, necesse est, ut loquaris, non semper necesse est, ut aliquid dicas.

Eruditi sæpe & extra conflictum obscuri.

§. 4. Sed & extra conflictum eruditi sæpe verba profundunt nihil significantia: cum docent: cum videri volunt discipulis suis intelligere, quæ non intelligunt. Durior in Oratorem suum Crassius est apud Ciceronem: quem si audis; *oratio, si res non subest ab oratore percepta & cognita, aut nulla sit necesse est aut omnium irrisione digna: Quid est enim, ait, tam furiosum, quam verborum vel optimorum atque ornatissimorum sonitus inanis, nulla subiecta sententia nec scientia?*

Philosophis hoc maxime accidere videtur.

Philosophi majore semper libertate gavisi sunt: quibus licuit, semperque licet ad ignorantiam regendam, ut loquitur Hob-

Hobbesius, *verba invenire, ex quibus nulla sententia exprimi possit. Licet aliis iis uti, dum putant se dicere aliquid, cum nihil dicunt.* Si quis ex Philosopho quærit, quænam sit caussa, quod magnes ferrum ad se trahat : quam turpe, quam rusticum foret, hic statim ignorantiam suam profiteri? Quis ferret in Philosopho plebejū illud : Nescio? Quanto satius est dicere : caussam hujus rei esse *formam substantialem* magnetis, quæ, quoniam magno Philosophiæ naturalis damno, una cum reliquis omnibus substantialibus formis, *ignota* sit, nisi quod illas *ἐντελεχειας* quasdam esse cognoscamus, ex *qualitatibus* intelligi debeat. *Qualitatem* autem magnetis non esse *qualitatem primam*; cum non ex *forma elementari immediate emanet*, sed *qualitatem secundam*, quippe quæ *emanet ex forma mixti*. Hæ *qualitates* cum sint vel *manifestæ* vel *occultæ*, quarum hæ in *sympathias & antipathias* dividuntur : *qualitatem secundam magnetis ad occultas, atque inter has ad sympathias esse referendam*; cum hujus species sit, *qualitas attractrix* qualem in magnete cernimus. Quis non crederet in his verbis graviter & vultu magistrali ex cathedra pronunciatis magna latere mysteria? At qui attentius hæc

Hobbes
de Homi-
ne c. 10.
§. 3.

Id ostendi-
tur exem-
plo virtutis
magnetica.

considerabit, cum Æsopica vulpe exclamabit: *ὦ οἷα κεφαλὴ, καὶ ἐγὼ κεφάλον ἐκ ἔχει!* O quantus verborum ambitus sensum non habet! Talia sunt plura.

Spiritus aliter in loco esse ac corpora quis nescit, qui modo scit, quid sint spiritus, quid sint corpora? de modo quo spiritus sint in loco, si Scholasticos interrogas, in promptu est responsio: Hanc esse inter corpora & spiritus differentiam, quod corpora sint in loco *circumscriptive*, spiritus autem *definitive*. Si postquam hæc vocabula non sine magna difficultate memoriæ impressisti, quæris, quid igitur hæ tam longæ voces significant? nihil ex illis exsculpi posse videbis, quod intelligas, quam spiritus non ita in loco esse atque corpora, quod ante tibi non erat incognitum. Erit etiam aliquis, qui negabit spiritus esse in loco: imperitiam esse ita loqui; in *ubi* esse, non in loco: si quæris, quomodo igitur locus & *ubi* inter se distinguantur; ridebit ignorantiam tuam, & an igitur nescis, inquiet, hoc esse discrimen, quod locus semper corporibus, *ubi* semper spiritibus à Philosophis tribuatur.

*De vocibus
mente cassis
Male-
branchii
verba.*

§. 5. De his vocibus mente cassis ita sapientissimus Philosophus: *Vocibus homines* (liceat mihi meo potius more auctoris verba

verba Gallica convertere, quam Latinum interpretem sequi,) & sibi & aliis satisfacere consueverunt. Dummodo verba aures ne offendant, tametsi sensum non habeant, satis est, ut ab hominibus recipiantur. Hac est, quæ in orbe valet, moneta. Exclusa est ex commercio hominum veritas, usque eo, ut neque loquentes neque audientes ullam ejus rationem habeant. Scire loqui, summum naturæ donum videtur. Quam imaginatio parit loquendi facultatem, certissima plurimis placendi ars est; semperque, ut rumpantur Cartesiani, memoria vocabulis incomprehensibilibus referta suis inter homines honor constabit. Ad voces has laudatus Scriptor refert vagas, ut vocat, & generales. Suntque tales, ut aliquid quidem in genere & confuse significant, sed non id in specie & distincte, quod significare debent. Quo pertinere ait, cum vulgo dicitur, corpora tendere ad centrum suum: decidere propter gravitatem: ascendere propter levitatem: moveri per naturam, mutare identidem formas, agere per virtutem, qualitatem, facultatem. Omnia denique vocabula, quæ non distincte aut rem, aut rei modum significant. Quibus qui utuntur, iis applicat verba Syracidis: *Scientia insensati inenarrabilia verba.* Idem affirmare non dubitat

Recher.
che de la
verité
Tom. 3.
p. 179
& seq.

Syrac.
21. 22.

esse, qui multa conscripserint volumina, in quibus locus ab ipsis Scriptoribus intellectus rarior avis sit, quam quisquam existimet.

Logomachia oriuntur ex obscuritate orationis affectata.

§. 6. Percurramus ita præcipuas orationis obscuræ, quæ quidem nobis invitis talis est, & species & causas: jam quomodo ex hac Logomachia oriuntur, demonstratu non est difficile. Quoties enim cum eo disputamus, quem non intelligimus, pugna non est inter nostram & illius sententiam, quam ignoramus: sed inter nostra & illius, quæ non intelligentes legimus vel audimus, verba: Ut ille, qui non ita loquitur, ut facile intelligi possit, necessario aliis hæc verborum obscuritate Logomachia occasionem præbeat. Quod si vero quis neque ipse sive in disputationis æstu, sive extra disputationem, quid dicat, scit: aut scit, se nihil dicere: tum vero oritur ineptissimum illud disputandi genus, quod nos intertio capite *Logomachiam Cecam* appellavimus.

Probatur testimonio.

§. 7. Idem quoque malum oritur ex obscuritate orationis affectata. Quæ tanto magis est reprehendenda, quo major hic in loquente culpa est. *Neque hoc vitium*, ait Quintilianus, *novum est, cum jam apud Titum Livium inveniam, fuisse præceptorem* ali-

Quintilianus: Inst. Orat. lib. 8. c. 2.

aliquem, qui discipulos obscurare, quæ dicerent, juberet. Id quod ex inepta persuasione protectum esse dicit, quæ multi ducuntur, ut id jam demum eleganter atque exquisitè dictum putent, quod interpretandum sit. Ut Erasmus, quosdam tum demum sibi ingeniose dicere videri, ait, si ad eos intelligendos opus sit ingenio. De oratoribus loquitur Fabius: quod si enim de Philosophis sermo illi fuisset, exempla longe antiquiora attulisset.

Erasm:
De cop.
Verbor.

Heraclitus inquit quorum dux prælia primus Lucret. l. r.
Clarus ob obscuram linguam.

Notus Armeniorum, Chaldæorum, Ægyptiorum, Magorum apud Persas, Brachmanum apud Indos, Æthiopum, Hetruscorum, sapientiam non divinam modo sed humanam occultandi mos: quem à Noacho omnes hos populos accepisse, sunt qui putant; cui fabulæ liber, qui sub Beroli nomine circumfertur, originem dedit. Ab Hetruscis hic mos ad Romanos, ab Ægyptiis per Orpheum & Pythagoram præcipue ad Græcos transiisse videtur.

ex exemplis
vatis.

Beros. antiq.
l. 3.

Notæ sunt fabulæ Græcorum, quibus universam Philosophiam comprehendijunt. Noti Pythagoræ numeri, & qui hos à Pythagora accepit, Platonis, quorum

Fabula
Græcorum.
Numeri
Pythagorici.

Cic. ad
Att. l. 7.
cp. 13.

rum obscuritas in proverbium abiit, ut obscurissimum quodque *numeris Platonice obscurius diceretur*. In universum Pythagoreos & Platonem *fabulis* orationem obscurare, cum de aëris potestatibus, vel de cæteris Dis loquuntur: cum vero de *summo Deo ac mente; ad similitudines & exem-*

* In somn.
Scip. l. 1.
c. 2.
Plato.
† lib. 2. de
fin.

pla confugere, Macrobius * auctor est. Obscuritatem in Timæo Platonis agnoscit, qui in Platonis scriptis fuit versatissimus, Cicero †; & qui superiori seculo Platonice Philosophiam renovavit, Marcilius Ficinus docet, *ea, qua Plato scripsit de anima & ejus circuitu aliter, ac verba sonant, intelligi debere.*

Plat.
Theol.
l. 7. c. 4.
Aristoteles.

Nota sunt Stoicorum mirabilia: nota aliorum Philosophorum ἀπόρρητα. Nota in primis Aristotelis *Acroamatica, Esoterica & Epoptica* scripta. Nota ejus, quam, ut loquitur Simplicius, ἀντὶ παρακτεάσεως, loco velamenti elegit ἀσάφεια: quæ tanta fuit, ut Themistius sectator & interpret Aristotelis, affirmare non dubitet, *eum ita scriptis suis obscuritatem inspersisse, ut sepia, cum sese piscatoribus occultare vult, atramentum aspergit.* Ipse Aristoteles Alexandrum ægre ferentem, quod ea, quæ ab ipso didicisset, emissis libris acroaticis vulgaverit: bono animo esse

A. Gell.
noct. Att.
l. 20. c. 5.

esse jubet: *ξυνετοὶ γάρ, εἰσι, inquit, μόνοις τοῖς ἡμῶν ἀκούσας.* Forte ne his quidem: si modo verum est quod Themistius ait, *stultitiam esse, omnia Aristotelis dicta intelligere velle.* Id quod, si nihil aliud, tot Aristotelis interpretes, quorum numerum jam suo tempore ad duodecim millia pervenisse Franciscus Patritius ait, abunde demonstrant.

Discuss.
Peripat.
Tom. I.
l. 10. p. 145.

Ut Platonis ænigmaticam obscuritatem Sectatores ejus sunt imitati, quos in Platone interpretando *mirum in modum mysteriorum prurium titillari, & non tolerandas aliqui tenebras novis tenebris cumulare* conqueritur Platonis interpres Joh. Seranus: ita Aristotelici, qui fortasse in aliis præceptorem assequi non potuerunt, in obscuritate non modo assecuti sunt, sed superarunt, prorsus, ut post tot interpretes Græcos, Latinos, Arabes, non modo nihilo planior, sed in quibusdam obscurior sit. Quod beneficium præcipue Scholasticis debet, qui Aristotelem non genuinum, sed qualem ex Arabico conversum acceperunt, interpretandum sibi sumserunt.

Platonici.
In argumento Timæi.

Aristotelici.

Scholastici.

Posteaquam enim hæc barbara colluvies Philosophiam inundavit; Deus bone! quod chaos ortum est? quanta vastitas? quam omnia sepibus & spinis obsita? quæ

tenebræ? quæ obscurissima vocabula, quæ distinctionum portenta, introducta sunt in Philosophiam? quis numerus abstractionum, præcisionum? quæ entia rationis objective, subjective & effective? quæ distinctiones distinctionis in realem & rationis, ac rationis distinctionum in distinctiones rationis ratiocinantis & rationis ratiocinata? quæ realitates majores & minores? quæ entitates modales? quæ formalitates? qui actus substantiales, accidentales: primi, secundi: compositi, divisi: signati, exerciti? qui status, quæ ampliationes? quæ principia individuationis, quæ suppositivitates, quæ materie signata, quæ habetitates, ecclesiastes, petreitates, quidditates, identitates? qui appetitus formarum? qui appetitus centri? quis vacui horror? quæ qualitatum planstra? Et quis enumerare posset omnes Albertistarum, Occamistarum, Thomistarum, Scotistarum, Realium, Nominalium, elegantias? Quod tamen aliquo modo ferendum esset, si hæc tenebræ Philosophiam Scholarum solam, non omnes artes & disciplinas, non ipsam Theologiam ita occupassent, ut Theologiam in Theologia vix videre licuerit; ac vix hodie tenebræ discuti possint.

Causa obscuritatis.

§. 8. In his omnibus si causam obscuritatis quæris; varia afferuntur. Philosophos, ajunt, hac ratione cavisse, ne
sa-

sapientia nimis vulgata vilesceret: nimirum quemadmodum de Persarum Regibus traditur, eos specie majestatis oculi consuevisse. Dicunt, hanc semper fuisse inter Sophistas & Philosophos differentiam, quod illi ostentant, si quid sciunt, hi occultant. Addunt, inimicam esse naturam apertam nudamque expositionem sui: qua sicut vulgaribus hominum sensibus intellectum sui vario rerum tegmine operimentoque subtraxit: ita à prudentibus arcana sua voluit per fabulosa tractari: adjiciunt, ipsam religionem occultari, ut figura defendant à vilitate secretum. Verentur denique, ne Philosophia, si nuda vulgi oculis exponatur, vile fiat plebis proctibulum. De Aristotele speciatim Simplicius ait, cum in Acroamaticis data opera obscurum esse voluisse, ut segniores ab hujusmodi studio repellat.

Justin. l. i.

Macrob.
in somn.
Scip. l. i.
c. 2.

Ibid.

Honesti horum omnium oratio est. At nisi me vehementer antiquitatis moveret auctoritas: dicerem hos omnes affectatæ obscuritatis meros esse prætextus. Sacra Deorum Gentilium vulgare, piaculum habebatur: si rationem quæris, eandem tibi dabit Julius Firmicus: ne publicata divina scientia ad profanorum hominum notitiam perveniret. At si quis vel solum adversus gentes Arnobium legerit: longe

lib. 4.
Matth.
c. 16.

longe aliam sacrorum occultatorum causam fuisse, videbit: ne videlicet impietas eorum, impuritas, & stultitia proderetur.

Simile nonnunquam aliquid in prisca Philosophis suspicor: ideo illos obscurasse dicta sua, ne forte, si clarius locuti fuissent, pateret omnibus, quam imperfecta sit notitia sua, quam infirmis fundamentis superstructa, quam multa in scriptis suis dubia, incerta, quam male cohæreant partes, quam elumbes sint eorum conclusiones: quæ omnia sapientissimis Viris, sui que amore minime excæcatis, ignota esse non potuerunt. Tegenda igitur hæc erant quodam obscuritatis operimento: in tenebris hæc merces erant vendendæ, ne vitium emtores animadverterent: faciendum, quod Histriones hodie faciunt, qui noctu agunt fabulas, ut tanto minus fucus in facie, aurum & gemmæ adulterinæ in vestibus dignosci possint. Videbant perspicacissimi homines, se ita multis admirationi futuros:

Lucret.
l. i.

*Omnia enim stolidi magis admirantur
amantque,*

Inversis quæ sub verbis latitantia cernunt.

Jamque animo prospiciebant, alios jactantes intelligentiam obscure à se dictorum, quæ ne ipsi quidem intellexerunt; alios

alios nutu illa approbantes, ut capere videantur: alios nescio quæ in iis mysteria quærentes; alios, si nihil intelligant, tarditatem suam deplorantes; alios non intellecta addiscentes in spem venturæ intelligentiæ. Prævidebant denique, Sectatores tantam in oraculis suis explicandis ingenii & industriæ exercendæ materiam inventuros, ut vix post bis mille annos de nova Philosophia sint cogitaturi.

Hæc mihi invito nonnunquam super hac Philosophorum obscuritate in mentem veniunt, quæ, nisi me valde terre-
rent tanta nomina, pene vera esse dicerem. Sed quod de his non audeo, de Scholasticis post Baconem dicere haud vereor:

eos obscuritatem affectasse, *ut hoc ambiguo & fallaci lumine merces suas adulterinas ex-*

Verulam.
de augm.
scientiar.
l. 6. c. 2.

truderent: de quorum Philosophia jure, quod de Græcorum Trismegillus, dici potest, quod sit λόγων Φόφος. Hi enim ex interpretibus natura facti sunt interpretes vocabulorum, in eum finem, ut haberent, quod interpretarentur, a se confictorum; ut minime mirum sit, quod Franc.

Patritius ait, *Philosophiam quadringentis jam annis nihil aliud fuisse esseque adhuc in scholis, quam litem & verbosam contentionem.*

Tom. III.
l. 4. p. 323.

In Ecclesia Romana hæc Philosophia
scho-

scholastica, quam Aristotelicam vocant, magno in pretio est. Vident enim & hic Viri Prudentes hoc obscuritatis velo maculas suas tegi posse: quem in finem ejus auctoritas olim ^(a) ab Universitate Parisiensi stabilita ^(b) postque libellum supplicem à Facultate Theologica oblatum à Summo Parisiensium Senatu decreto est confirmata; ^(c) quod decretum repetitum postea est in hunc sensum; *non posse principia Philosophia Aristotelica labefactari, nisi Theologia Scholastica in Ecclesia Romana recepta labefactetur.*

Nostra quoque ætate idem ex occasione ortæ Philosophiæ Cartesianæ factum esse accepimus. Nimirum vident acutissimi homines, non è re sua esse, ut claræ distinctæque perceptiones, quas novatores isti tantopere extollunt, in scholas suas introducantur. Utiliorem, ubi quid tegendum est, Aristotelem sunt experti; quem Doctissimus Jesuita eo potissimum nomine commendat: *quod Ecclesia Adversarii Lutherus, Melancthon, Bucerus, Calvinus, Postellus, Paulus Sarpinus in eum acerrime scripserint, quas Invektivas summo Aristotelica doctrina honori esse gloriatur.*

§. 10. Vidimus unde manarit, quæ tot inter eruditos Logomachias peperit, ob-

scu-

a A. 1611.

b A. 1624

c A. 1629.

Vid. Rapin. collat.

Aristotelis & Platonis p.

412. Lau-

næus de

var. fort.

Aristote-

lis. c. 6. &

7.

Rapin. ibid.

scuritatis affectatio: quo & ambiguitatis affectatio referri debebat, quæ non minus frequens est. Id quod nonnunquam joco fit, ut errore male verba nostra interpretantium delectemur: serio vero sapissime. *Qui theses*, quas vocant, *ad disputandum proponunt*, sub hac ambiguitate libenter latent, ut quicquid contra proponas, effugio sit locus: ac si una eos via aggrederis, per alteram elabi possint. *Qui regulas & Axiomata varia Philosophica tradiderunt*, hac arte usi sunt: hæc enim, cum perpetuum Scholasticarum disputationum sint argumentum, (quamquam de axiomatibus disputare ridiculum videatur,) iiserant verbis concipienda, ut inveniret Opponens, quod objiceret, Respondens vero haberet aliquam, in quam tecto latere posset confugere, distinctionis arcem.

Ambiguitatis affectatio etiam parit Logomachias. Ejus studium frequens.

Disputantes.

In hanc partem peccant omnes, qui sine causa mutant vocum significationes: ut *Chymici*, qui non minus ænigmatice, quam Apollo quondam ex tripode, loquuntur. Item ii, *qui novarum sententiarum auctores videri volunt*, & cum has excogitare non possunt, ad nova verba confugiunt, novam methodum & modum antiqua tradendi. Ita Ramus Aristotelem

Chymici.

Ramus.

nova

nova veste induit; quemadmodum prius Aristoteles fecerat Platoni.

His adde eos, quos puderet cum vulgo hominum loqui: qui usque crepant mirabilia, rara, paradoxa: qui, cum supra plebem non sint sapiendo, supra eundem esse volunt loquendo. Ubi à Stoicis peccatum esse jam in superioribus ex Cicero-
Stoici. ne diximus. Unde perpetua inter ipsos & alios Logomachia. Extat Plutarchi Syn-
Tom. III. *τῶν διαφώ-* opsis, ὅτι παραδοξότερα οἱ Στωικοὶ τῶν ποιη-
των συν- τῶν λέγουσιν. Item Dialogus ejus περὶ κοινῶν
γραμμα- τῶν ἐννοιῶν, ubi probare conatur: *Stoicos pror-*
των, quæ *sus omnes communes, quæ vocantur, hominum*
vulgo mo- *notiones evertere.* Ita videbantur, quia
ralia vo-
cant. communissimas loquendi rationes muta-
 runt.

In idem incidunt vitium, qui sine gra-
 vi caussa verbis & loquendi rationibus
 utuntur, bono sensu, quæ probe sciunt,
 à pluribus in deteriore partem accipi;
 facileque prævidere possunt, hæc mul-
 torum aures offensura; *παρερμηνείας* atque
Epicurus. inde rixas paritura. Ita Epicuro ignotum
 esse non potuit, quam male audiat vo-
 luptatis nomen. Et Cartesius fortasse spe-
Cartesius. rare non debuit, nullos fore aut minus
 acutos aut malignos, qui verba quædam
 sua perverse sint intellectu; quorum
 ratio

ratio ut haberetur, ipsi forte non operæ pretium visum est: at si habuisset, multis acerrimis Logomachiis Resp. Literaria caruisset.

Denique si logomachias quæsierunt, qui *terminos*, quos vocant, *scholasticos*, in Theologiam invexerunt, ut de *materia & forma Sacramentorum* disputarent, qui de his ipsis perspicue dictis disputare non possent: ii quoque, quanquam forsan præter suam culpam, his rixis occasionem præbuerunt; qui *Locutionibus Scripturæ* aliter ac vulgo intellectis horum loco utuntur; Hi enim ab iis, qui locutiones has aliter accipiunt, nunquam recte intelliguntur. Is autem omnes artes, ipsam quoque Theologiam, optime docere mihi videtur, qui, si fieri potest, ab omnibus, sin minus, à plurimis quam facillime intelligitur.

C A P. VII.

De iis, qui verba eorum, quibuscum disputant, perperam intelligunt.

§. I.

LOcuti sumus de iis, qui sententiam suam non recte proponentes, Logo-
ma-
Eorum, qui sententiam illorum

quibuscum
disputant,
perperam
intelligunt,

machiiis occasionem dant. Sed negari non potest, maximam plerunque eorum culpam esse, *qui sententiam eorum, quibuscum disputant, perperam intelligunt.* Qui duplici mihi nomine ridendi videntur, & quod ea se capere putant atque adeo gloriantur, quæ non capiunt: & quod inepta hac persuasione ducti statim ad arma provocant; iis non absimiles, qui cum de bello somniant, hostem ad portas esse rati, noctu surgentes, amicum quemlibet obvium, pro hoste invadunt. Horum *alii bona fide agentes*, revera, eam, quam oppugnant, adversarii sententiam esse existimant: In *aliis affectatus est error*, qui nolunt adversarium intelligere: aut videri volunt non capere, quæ capiunt.

alii bona fide agunt,

in aliis affectatus est error.

Ad priores referuntur ingenia volatica & desultoria.

§. 2. Ad illos, de quibus prius dicendum est, refero primum *Ingenia volatica ac desultoria*; qui sapientiam non aliter hauriunt, quam canis aquam è Nilo. Hi nusquam consistunt, semper currunt; attentionis paulo longioris sunt prorsus impatientes. Ad alia, ad alia usque & usque festinant. Unde est, quod vix quicquam eorum quæ legunt, & audiunt recte intelligunt. De iis tamen audacter pronunciant: quod displicet, reprehendunt. Horum iudicio si stare nolis, paratæ lites.

Pri-

Primum caput, aut primam paginam meditationum Cartesii legunt; idque sine attentione: sufficit hoc ad condemnationem. Atheus est, Scepticus: *blasphemavit, quid opus est amplius testibus.* At probat existentiam Dei. At Vaninus idem fecit. Quid? quæris. Lata sententia est; nullus provocationi locus.

Hæc levitas mentis naturæ nonnunquam vitium est, dantur enim tales, qui natura attentionis, omnis incapaces sunt. Nonnunquam vero provenit ex ambitione quadam, quod hi homines videri velint omnia celeriter percipere: qui aucupantur illud Phormionis elogium apud Comicum, de quo ita servus Geta:

Ego hominem callidiorem vidi neminem:

Vix dum dimidium dixeram, intellexerat.

Nonnunquam hoc oritur ex superbo quodam aliorum contemptu, quod non operæ pretium esse existimant, ut multum temporis in addiscendis aliorum sententiis conterant, hæc esse ex eorum numero, quorum falsitas & stultitia vel obiter legentibus pateat. Quandoque hujus rei causa est multa sciendi cupiditas. Fit enim, ut, qui nimis multa comprehendere volunt, nihil comprehendant. Iis præsertim hoc contingit, qui Viri multæ lectio-

Levitas in his Natura nonnunquam est vitium.

Sape provenit ex ambitione:

Terent.

Phorm.

act. 4. sc. 2.

tum ex superbo quodam aliorum contemptu:

quandoque ex multa sciendi cupidine.

nis audire volunt ; rarissimum enim est, ut quicquam debita attentione legant : ac propterea, ut quicquam paulo difficilius recte intelligant. Quare fingunt inter ea, quæ legerunt, similitudines, ubi nullæ sunt. Si verba quædam in priscis viderunt, quæ in recentioribus reperiunt ; jam eadem priscorum & recentiorum sententia est. Democritici sunt omnes, qui de corpusculis loquuntur, Stoici, qui de fato, Epicurei, qui de voluptate. Hæretici denique sunt omnes ; quos in verbis quibusdam cum priscis Hæreticis convenire in locis suis communibus inveniunt.

Ingenia superficialia vocantur illi, qui verba non intellecta oppugnant, quomodo aut ingenii desultorii differant.

§ 3. Aliorum verba non intellecta oppugnant, illa quoque ingenia, quæ, quod in exteriori rerum superficie perpetuo hærentes ad interiora non penetrant, *superficialia* vulgo appellantur : à desultoriis hætenus diversa, quod hæc aliorum dicta perperam intelligunt ob defectum attentionis, illa propter defectum acuminis. Neque solos hic stùpidos noto, quos, ut scientiarum vocabula memoriæ infixant, clamore & jurgiis tandem adiges, ut res ipsas vocabulis subjectas percipiant, nunquam efficies : sed illos etiam, qui ingenio non prorsus destituti, externa, & quæ primo intuitu se nobis offerre solent, cele-

celeriter percipiunt, probeque discernunt: at hæc ipsa externa, in quibus dijudicandis tam prompti tam acuti videntur, ita totam eorum mentem occupant; levia hæc & parum ad rei ipsius cognitionem facientia tam vehementer sensum eorum atque phantasiam afficiunt, ut omnes in his cogitationes tanquam in luto hærentes, ad interiora atque ea, quæ in rebus ipsis præcipua sunt, progredi nunquam possint.

De hoc ingeniorum defectu, ac *naturalibus ejus causis* multa, ut solet, acute sæpe à nobis laudatus *Malebrancius*: ad quem lectores remittimus. Istud observasse ad institutum nostrum vehementer pertinet, aciem horum ingeniorum, perinde atque eorum, quæ stupida prorsus sunt, in addiscendis disciplinis, percipiendis aliorum sententiis, dijudicandis eruditorum controversiis, parum ultra verba, formulas loquendi, modumque tradendi procedere: quo fit, ut quæ in his conveniunt, similia; quæ in iisdem differunt, diversa his hominibus appareant. Cum vero sæpissime verbis magnopere discrepare videantur, qui idem prorsus sentiunt; accidit, ut, cum hi disputant, uti nullum genus hominum

Malebrancius laudatus.

Rech. de la verité Tom. 1. part. 2. cap. 1. §. 1. & cap. 9. §. 1.

Cart.
Princ.
part. 1.
§. 74.

magis est ad ejusmodi certamina proclive, de verbis disputent. Et quanquam verissimum sit illud Cartesii: *cogitationes omnium hominum circa verba magis, quam circa res versari*; in hoc tamen magnum est inter homines discrimen, quod alii in verbis subsistunt, alii in verbis res ipsas quærunt.

Inter litteratos multi quorum omnis eruditio est in verbis.

Hic nemini audacter nimis dictum videri velim, quod certissimum est; inter eos, qui literati atque eruditi audiunt, multos reperiri, quorum omnis in verbis eruditio est: idque non solum in Grammaticis, ubi de vocabulis agitur, sed in iis etiam scientiis, quæ circa res ipsas versantur. Has intelligere, sæpe nihil aliud est quam vocabula, quæ *terminos artis* vulgo appellant, memoria complecti; iisque, sicubi scientia ostentanda est, rudium aures obtundere: plane, ut nobis liceat; quod olim, alio licet sensu, factum est; non tantum Philosophos, sed omnes eruditos vulgo dictos in *Reales & Nominales* distinguere.

Hinc omnes eruditi in nominales & reales distinguere possunt.

Gaussenus laudatus. Dissert. de utilit. philosoph. & theolog.

Ingenue hoc de se confitetur sæpe laudatus Gaussenus: *Nos, inquit, qui per totos quatuor annos Dialecticam & Metaphysicam publice praelegimus, si quando mos, impropria res, jubeat, ut qua ratio contexit*
ratione

ratione dissolvamus, toties rubore toti suffundimur, qui hoc tacito conscientia sensu intelligimus, nos supra hominum vulgus, extra voces technicas, nihil sapere; parum autem liberale esse facinus, voces, hoc est, fumum tanto cum apparatu è cathedra venditare. Idem alibi, prater voces, inquit, technicas, si verum dicere amamus, nihil fere habent Theologi, quo à viris quibusdam literariis discernantur: quos tamen eo quod fictitias nostras nomenclaturas non didicerint, Theologos nemo vocaverit.

De natura
Theologi-
cæ.

Reprehenditur, ac merito, Hobbesius à Cartesio, quod *judicium fortasse nihil aliud esse dixerit, quam compositionem duorum nominum per verbum est*; qui aptius compositionem duarum notionum nominibus subjectarum per illud, quod verbo *est* significatur, *judicium esse dixisset*. Verissime tamen dici potest, multorum hominum judicia plerunque nihi aliud esse, quam duorum nominum & merorum quidem nominum per verbum *est* compositiones: unde fit ut ratiocinationes quoque nihil fere sint aliud, quam talium compositionum compositiones per conjunctionem *Ergo*. Ab his igitur, si verbis recedis, satis est, jam aliud sentis. Iis enim, quorum scientia in verbis consistit,

Hobbesius
à Cartesio
correctus.
Object. 3.
ad Medita-
tion. Car-
tes. p. 96.

dissentire est aliter loqui. Verborum discrimen vident, sententiarum convenientiam non perspiciunt. Pro veritate pugnare videntur, cum pro formulis loquendi pugnant. Cum multis denique horum nulla pacis spes affulget, nisi quis sententiam suam totidem, quot ipsi solent, verbis, eodem ordine dispositis, proponat. Hoc vero si fecerit, etsi aliud sentiat, imo etsi nullus sit verborum sensus, confecta res est:

*Sic ait & dicto citius tumida equora placat,
Collectasque fugat nubes solemque reducit.*

Vitio institutionis & educationis assuescimus verba non intellecta pronunciare.

§.4. Hujus vitii causas naturales exponit, uti diximus, Malebrancius. Multa tamen huc confert præter naturam institutio atque educatio. A prima enim pueritia assuescimus verba non intellecta pronunciare: Quot vocabula, quot formulas loquendi, formulas salutandi, gratulandi, gratias agendi, formulas etiam precum à præceptoribus in pueritia discimus? Quot dicta S. literarum, Oratorum, Poëtarum, Philosophorum, Patrum? Quam longas sæpe Christianæ religionis institutiones? Quot modos loquendi à Parentibus, domesticis, vicinis auditos imitamur? In quibus tamen omnibus præter verba parum percipimus.

Cum

Cum ad artes disciplinasque admittimur, quanta præceptorum, definitionum, divisionum, quæstionum, respon-
sionum, axiomatum, theorematum, distinctionum, terminorum, ut vocant copiam memoriæ impressam, sicubi à nobis consuetis interrogationibus requiritur, prompte reddimus? Sed adeo non intelligimus, ut si vel verbum in interrogatione mutetur, quod respondeamus, non habeamus. Numquid in proverbium abiit, ut, si quis aliquid memoriter dicat eo modo, qui indicat, ad id quod dicitur non attendi aut id prorsus non intelligi, hoc sicut discipulus lectionem recitare dicatur? Longæ quin etiam habentur orationes, dialogi, comœdiæ, ubi loquentes vix quicquam intelligunt. Ipsæ denique regulæ, quarum ope Latina lingua addiscenda est, Latine à rudibus hujus linguæ memoriæ mandantur. In quibus quid præter vocabula non intellecta disci possit, non video.

Qui sicut discipuli lectionem recitare dicantur.

Hæc omnia non equidem improbo. Exercenda est memoria, quamdiu viget; recondendæ in ejus penu non res tantum, sed multa etiam verba, formulæ, dicta pia, elegantia, emphatica, ita denique utilia, ut non res ipsas modo, sed locu-

Memoria quidem exercenda.

tiones etiam & verba per omnem vitam memoria tenere atque in promptu habere pro-
 fit. Horum multa addiscenda nonnun-
 quam, antequam intelligi possint, si pe-
 riculum est, memoriam cum ætate de-
 crescentem, tum, cum intelligi poterunt,
 verbis necessariis retinendis non amplius
 suffecturam. Hic tamen modus tenendus
 est: nisi necessitas aut magna utilitas id
 suadeat, satius est nulla quam non intel-
 lecta verba dicere. Neque diu pueri in
 bruta hac discendi ratione sunt detinendi.
 Sola in his memoria excolenda est, quam-
 diu sola in iis memoria conspicua est.
 Quamprimum iudicii atque rationis, scin-
 tillæ se exerunt; hæ excipiendæ, exci-
 tandæ, fovendæ. Exerceatur memoriâ,
 at sit illa non bruta, sed rationalis. De-
 dignetur ea discere, ea retinere, quæ
 intellectus non prius percepit. Cogitan-
 dum, Præceptoribus non picas, non
 psittacos instituendos esse, sed homines.
 Qui ut picæ instituuntur, aliquid pica-
 rum per omne reliquum vitæ tempus re-
 tinent; corvo illi, apud Macrobi-
 um *, similes, qui post Actiacam victoriam Au-
 gustum his vocibus salutavit: *Ave Caesar
 victor imperator*: atque illi alteri, qui,
 eadem salutatione dicta, cum à Cæsare
 fasti-

*At quis
 modus sit
 tenendus,
 indicatur.*

*Bruta di-
 scendi ra-
 tio vitan-
 da.*

* Saturn.
 Sermon.
 l. 2. c. 5.

fastidiretur, illa addidit verba: *Opera & impensa periit*: i. e. apposite nonnunquam ad rem præsentem loqui videntur, sed si propius rem considerabis, videbis, illos nihil eorum, quæ dicunt, intelligere.

Audi de his Ingeniorum Scrutatorem ex Aristotele: *Reperiuntur homines, qui instar brutorum animalium solo ex instinctu naturæ agunt, ex eodemque loquuntur: Quin & melius loquuntur, quam sciunt & intelligunt.* Quod vitium ex perversa illa, de qua conquerimur, institutione magna ex parte oritur. Hoc modo enim assuescunt homines mature inanes sonos, voces sine sensu edere; assuescunt sine attentione loqui; assuescunt sapientes eruditique sibi videri, si memoriam verbis nihil significantibus fartam habent; assuescunt alios mirari, qui expedite, qui cum contentione, cum auctoritate & confidentia loquuntur, tametsi nihil intelligant. Verba quærunt ubique, nihil præterea: de sensu solliciti non sunt. Hæc si sæpe audiverunt, si valde sunt ipsis familiaria, si inde ab adolescentia ipsis fuerunt inculcata: et si quid significant, nesciunt, hoc solo nomine quod sæpe audiverunt, clara, perspicua; sententiæ certæ & evidentes videntur. Ab his si recedis, statim lites

Huarte
Scrutin.
Ingen. c. 2.
p. 68.

Bruta
discendi
ratio, qua
fit?

tibi

tibi intenduntur tanto graviore, quod nulla verborum interpretatione, ut quæ ab isto hominum genere non capitur, componi queant.

*Muli qui-
dem cum
verbis, sen-
tentias
quoque per-
cipiunt, ne-
que tamen
senten-
tiarum
nexum
mente com-
plectuntur.
Qui dissipa-
tas & so-
lutas alio-
rum sen-
tentias
memoria
tenent,
nil nisi nu-
da verba
retinent;
Ibid.*

§. 5. Præter eos, qui in scientiis nihil unquam, nisi verba didicerunt, dantur alii bene multi, qui, cum præceptores docentes audiunt, aut libros legunt, una cum verbis, sententias quoque verbis significatas, celeriter percipiunt. Neque tamen, veritatem dictorum aut lectorum unquam examinantes, & quasi digerentes, sententiarum nexum mente sunt complexi. Hos Seneca diceret meminisse, non scire. Nullæ hic ingenii, nullæ judicii partes sunt. Dissipatas tantum & solutas aliorum sententias tenent memoria; quæ cum firmitus verba, quam res, custodire soleat; accidit, ut sæpe, qui hoc modo scientias didicerunt, sensum verborum obliti, nuda verba retineant.

De his Huartus mihi loqui videtur: *Video enim, inquit, hos tales concipere doctrinam ac memoria retinere firmius: quin & collocant hi figuræ figuram suo loco cum debita partium harmonia: loquuntur atque operantur bene, quoties opus est: sed quum ratio ab ipsis ac causa exigitur ejus, quod sciunt atque intelligunt, tum vero manifesto indicio*

indicio produnt, eruditionem suam non nisi apprehensionem esse terminorum ac sententiarum, quibus disciplina quaque nititur nec causam artis ac modum se cognovisse.

Horum scientia, cum tractu temporis, ad solam verborum scientiam redigatur: fit, ut pessimam ille ab iis gratiam ineat, qui disciplinarum vocabula mutare conatur. Quemadmodum enim pauperem, cui panniculos sordidos adimis, non minus offendis, quam si diviti magnam eripis auri vim: quoniam ille præter panniculos, quibus nuditatem tegat, nihil habet: ita si huic verba adimis, cujus omnes in verbis quibusdam, ex Schola retentis, facultates consistunt, in quibus unice se oblectavit, in quibus suaviter acquievit, quibus ignorantiam suam utcunque tegere potuit: non aliter vociferatur, quam Plautinus ille Euclio amissa aula sua, aut Hecuba apud Euripidem:

“Εὐκλείης ποτ’ ἔσται, νῦν δὲ γράυς, ἅπαις ἄμα.

§. 6. Huc refer eos quoque, qui verba & verborum sensum à magistris probe perceperunt, utrumque firmiter memoria tenent, numquam verbis utuntur sine sensu: sed verba & sententias, ita diuturna atque identidem iterata de his simul cogitandi consuetudine colligarunt, ut has ab

illis

nec serunt,
ut discipli-
narum vo-
cabula mu-
tentur.

Quibus
sint simi-
les?

Plaut. Au-
lular. Eu-
rip. Hec.

Alii verba
& senten-
tias ita col-
ligarunt, ut
has ab illis
abstrahere
non possint.

illis abstrahere non possint. Hinc fit, ut veritatem & falsitatem cum certis loquendi formulis tam arcto nexu cohærere putent, ut ab his si recedis, quibus veram sententiam affixerunt, à vero te recedere; si illis uteris, quibus falsum agglutinarunt, falsum dicere videaris. Frustra his explicas sententiam tuam, frustra clamas, non hunc, quem volunt, esse verborum tuorum sensum: nihil agis: nisi cerebri eorum vestigia mutaveris, sensum suum a verbis separare non poterunt.

Tales sunt plerique illorum, qui, quod sciunt, aut non ipsi invenerunt, aut saltem non assueti sunt in addiscendis disciplinis ita ingenio suo uti, ut veritatem proprio acumine ex primis principiis eruant. Hi, cum à magistris aut ex libris omnem eruditionem hauserint; cum sententiis verba quoque didicerunt: nihil enim nisi oratione magistra discere potuerunt: hæcque verba cum sententiis simul memoriæ impressa ita conjunxerunt, ut de altero sine altero cogitare non possint. Unde fit, ut hi longe quidem cæteris expeditius loquantur, quamdiu de iis, quæ è magistris didicerunt, loquuntur: vix enim de rebus cogitant, verba adiunt: celerius quoque percipiunt, quid verba aliorum, qui

iis-

*Hi longe
cæteris expeditius
loquuntur.*

iisdem magistris usi sunt, significant: vix enim verba audiuntur, sensus præsto est. At quamprimum oratio mutatur: si aut aliis, quam ipsi, verbis, aut iisdem, sed alio sensu, uteris; sententiam tuam aut prorsus non capiunt, aut perperam intelligunt.

Eorum vero, qui suo ingenio uti consueverunt, contraria prorsus ratio est; Cum enim de rebus cogitent sine verbis, fit, ut cum sententiam suam exponere volunt, verba non adsint: cum aliorum, aut scripta legunt aut dicta audiunt, sensum non statim assequantur. At cum assequuti sunt, longe melius eum intelligunt, quippe qui sejunctis vocibus & remoto cortice nihil aliud nisi res ipsas, sententias nudas, earumque principia, connectiones, atque consequentias attentissime contemplantur.

Eorum qui ingenio suo uti consueverunt, contraria ratio.

Hi in Logomachias raro incidunt. Vocibus enim parum moventur, de rebus solis solliciti. Norunt illas signa esse, signa arbitraria, signa nullam habentia cum re significata similitudinem, signa mutabilia, signa ambigua. Illi vero, qui hæc signa cum rebus significatis tam arcte colligarunt, horum omnium obliti, nescio quæ in iis mysteria, nescio quam cum rebus

Verba non natura significant id quod significant.

bus convenientiam quarunt. Hæc jam non *θέσει* sed *ὄψει* significant hoc, quod significant, atque iccirco, nisi naturæ rerum mutantur, mutari non possunt.

*Sententia
Platonis in
Cratylo.
A. Gell.
noct. At.
l. 10. c. 4.*

Quæ ipsius Platonis sententia fuisse videtur: & ineptissimo argumento probatur apud Gellium à P. Nigidio. Et, quam hæc opinio tanquam ridicula hodie à cunctis explodatur: ii tamen omnes, qui, quamprimum, eadem licet manente sententia, verba quædam immutantur, non aliter pro loquendi formulis digladiantur, ac si naturalis inter veritatem & voces nexus esset, quod verbis rejiciunt, facto ipso approbare videntur.

*Verborum
odium &
amor.*

§. 7. Ex arcta hac verborum & rerum connexionione oritur verborum quorundam odium atque averfatio, aliorum amor atque veneratio. Odio habemus non res modo & sententias, sed verba quoque & loquutiones, quæ res & sententias odiosas significant. Sic amor à rebus redundat in ea, quibus res amabiles, sententias gratas significamus, verba. Quæ si quis nobis ex ore evellere conatur, non aliter irascimur, quam canis, cui inania ossa eripiuntur.

*Verborum
amor sæpe
in superstitionem
abit.*

Hic vero verborum amor sæpe in superstitionem abit. Nescio quæ majestas, sanctitas,

ctitas, nescio quæ occulta virtus in verbis est. Non sufficit verba Homeri elegantia vocare, significantia, suaviter composita, dulcesonantia, magnifica, & si quæ alia in verbis laudari possunt. Eo usque excrescit horum verborum amor, ut vis morbos curandi in illis quæretur. Alia strenuis potioribus remedio sunt adversus ebrietatem. Alia arboribus appensa fructus in iis, ne decidunt, continent. Alia dolores arthriticos, alia faucium mala levant: nec desunt, quæ podagram, quæ alias immedicabilis habetur, pellant.

Robert.
Kuchen.
in prolegom.
notarum ad
Serenum
Samonicum.

Non minus est verborum odium. In generali Hispania historia legimus, verba sunt Huarti, quum duo in ea legati Gallici appellerent, rogatum Alfonsum nonum regem, ut regi Philippo in matrimonium collocaret alterutram filiarum suarum, quarum major insigni forma ac specie præstabat & Urraca dicebatur, minor hæud aque bella pulchraque Blanca audiebat: positis ambabus in conspectu legatorum, communem fuisse omnium opinionem, legatos in Urracam propensiores futuros, quippe quæ & primigenia esse & sororem egregia forma atque excellenti corporis habitudine nimis quantum anteiret. Verum cum nomen iuviriusque intellexissent, adeo voce illa Urraca offendeabantur, ut Blancam seligerent, dictan-

Non minus
est verborum
odium.
Huarti
narratio.
Scrutin.
Ingen.
cap. 16.
p. m. 501.

res, hoc nominis in Gallia priori multo acceptius gratiusque futurum esse.

Memorabilis de Paulo II. Pontifice historia. Justinian. Hist. Ven. l. 8. p. m. 208.

Quis nescit, nomen Henrici hodie in Gallia infelix haberi, ob Reges hujus nominis infelices? Memorabile est, quod de Paulo II. Pontifice, Veneto, ex Barborum familia, traditur. Is, cum excelso corporis habitu, eximiaque oris venustate omnibus admirationi esset, Pontificatum adeptus Formosi II. nomen sibi imponere voluit. Sed Cardinalibus ammonentibus, Formosi I. cadaver post mortem tumulo extractum digitisque truncatum in Tyberim projectum fuisse; nomen alias formæ suæ tantopere conveniens respuit, ne, ut ait Historicus, *Pontificia majestas tam fœdi casus memoria sordesceret.*

Nomen Tyranni, quam execrabile hodie est, ex quo homines odiosi illud sibi imposuerunt? Nomen Regis & Regni, quam invidiosum fuerit apud Romanos, supra vidimus. At non minus apud Græcos. Unde apud Comicum *, Græcorum mores exprimentem, ad invidiam conflandam, illa adhibentur verba: *An tu hic regnum Æschine possides? Quandoquidem tu solus regnas.* Sed & nostro hoc seculo in Anglia, Cromwellio rerum potente, hoc Regni vocabulum adeo odiosum fuisse,

* Terent. Adelph. act. 2. sc. 1. Phorm. act. 2. sc. 3. Regni nomen Anglis tempore Cromwellii adeo in-

se,

se, refert Puffendorfius *, ut orationem Dominicam recitantes, nollent amplius dicere: *adveniat Regnum tuum*; sed potius visum fuerit: *adveniat respublica tua*. Idem vocabulum *Principis absoluti* præter meritum adeo detestabile ab iis, qui in liberis civitatibus vivunt, haberi conqueritur. De Belgis suis Carolum V. dixisse ferunt, † nullos esse populos, qui *servitutis nomen* magis execrentur, *ipsam servitutem* patientius ferant.

Cum nuper inter varios sermones mentio *Comædiarum*, quæ à Studiofis Adolescentibus in Scholis aguntur, injiceretur, atque ego illud institutum vehementer probarem, suaserunt quidam amici, ut, si quid hujusmodi nostræ quoque juventuti exercitandæ aliquando utile ducerem, à nomine tantum inauspicato abstinere, hæcque exercitia minime *comædias*, sed *Studioforum colloquia* appellarem: tum vero neminem prorsus rem utilissimam reprehensurum.

Exempla talium odioforum vocabulorum & loquendi modorum sunt innumera- bilia. Sic alius ferre non potest in Theologia nomen *Absoluti Decreti*: alius abhorret à vocabulo *Fati*: alius nomen *Fortune* tanquam profanum respuit, alii *voluptatis*

visum, ut etiam ex Oratione dominica ejiceretur.

* Dissert. select. appendice p. 585.

† Dissert. de gest. Philip. p. 99. Strada Decad. 1.

lib 6. p. m. 231 *Comæliarum nomen ex- sum.*

Alia hujusmodi odiofa nomina recensita.

vox nauseam movet, alium offendit *atomi* vocabulum, alium *dubitationis* vox ad iram concitat; alii vox *idea* nescio quid peregrini sapere videtur; alius pati nequit duo hæc adverbia *clare & distincte*; alius periculose Deum *a se positive* dici clamat; alius facile patietur, ut brutis anima cogitans adimatur, dummodo ne *machine* dicantur; alius refugit vocem *novitatis*; alius horret nomen *libertatis philosophandi*. Omitto odiosiora rebus ipsis Sectarum & Hæresium nomina.

Ut paucis rem complectar, plerisque omnia verba, quibus sententiam odiosam aliquando exponi audiverunt, omnia, quibus auctores odiosi crebro utuntur, quocunque demum sensu proferantur, odiosa sunt: impediuntque, quo minus optimum aliquando in iis latentem sensum perspicere possint. Quam ob causam idem sæpe illis contingit, quod Plebi quondam Romanæ, quæ ad vindicandam Cæsaris cædem, (quia *Cornelius Cinna* Prætor Cæsarianæ necis socius fuerat, graviterque pridie in Cæsarem fuerat concionatus,) odio nominis excæcata, *Helvium Cinnam* Tribunum pleb. obtruncavit, caputque ejus præfixum hastæ circumtulit: non animadvertens, sub hoc nomine unum
ex

Dio lib.
44. Sueton. in
Jul. Cæs.
c. 85.

ex iis latere, qui maxime Cæsarem diligebant. Ita enim & nostri disputatores vocum quarundam odio cæci, illos sæpe adoriuntur, qui partium suarum sunt; amicamque sententiam oppugnant, quæ exosis nominibus obtegitur.

§. 8. Nihil vero magis efficit, ut sententias aliorum perperam intellectas oppugnemus, quam anticipatæ illæ opiniones, quas *præjudicia* vocare solemus: quæ nihil aliud sunt, quam judicia, quæ à nobis feruntur, causâ nondum cognita, five, ut Cicero definit, *cum incognita pro cognitis habemus hisque temere assentimur*: aut, ut alibi, *cum temere falsa rei vel non satis cognita assentimur*. Quæ ex duabus mihi causis potissimum oriri videntur, tum quod multa scire cupimus, tum quod eam attentionem ac diligentiam non adhibemus, quam finis iste requirit.

Inter omnia autem *præjudicia* nulla sunt pestilentiora, quam sinistra de aliis hominibus, eorumque sententiis, judicia, nullo solido fundamento innixa. Hæc enim ab innata hominibus philautia, quæ lætatur, cum aliquid invenit, in quo se aliis anteponere possit, ita fovetur, ut cæteris præjudiciis depositis, hæc tamen deponi vix queant: tum maxime, cum

Præjudicia efficiunt, ut sententias aliorum male intellectas oppugnemus.

lib. I. de offic. lib. I. de divinat.

Præjudicia unde potissimum oriantur?

Quenam maxime noxia?

Philautia hæc larva religionis, justî zeli, *Φιλαυθείας* ita tegitur, ut nos ipsi isto habitu hostem intestinum non agnoscamus. Incertis rumoribus credimus, si quid sinistri de aliis afferunt. Quare tandem? confirmat illos philautia, gravissimus auctor & testis omni exceptione major.

*Varia præ-
judicia
libros le-
gentium.*

Quanto minus mirari decet: si præceptoribus, si parentibus, si iis, quorum auctoritatem magni facimus, fidem habemus, cum auctorem aliquem dicunt periculosa dogmata fovere. perniciosum virus abscondere, hæresin disseminare, sophistam agere, falsum docere, paralogismis scatere, impium, profanum, ridiculum, ineptum esse. Hæc vero si credimus, ut ad hæc credenda proni omnes sumus: ilicet, actum est, nihil amplius intelligimus. Hunc auctorem si legimus, semper nobis videmur calcare ignes suppositos cineri doloso. Sensum ex auctore non quærimus, sed auctori inferimus.

Si campanarum sonitum audimus, articulatas nonnunquam voces nobis edere videntur: cum quas voces ludens phantasia effingit, campanis tribuit. Cum nubes suspicimus, videmur in illis sæpe variarum videre rerum figuras: unde oritur
magna

magna pars illorum, quæ ibi cernimus, prodigiorum, quæ in sola sæpe imaginatione subsistunt. Ita qui præjudiciis corrupti aliorum dicta audiunt, aut scripta legunt, vident in illis, quæ nusquam sunt, vident opiniones, quas ipsi illis attribuerunt, vident, quæ ipsi ante in animo efformarunt, sententiarum portenta; digna scilicet, quorum caussa *libri Sibyllini inspiciantur, novendiale sacrum instituantur, quæque majoribus hostiis procurantur.*

Sane, qui libros legunt, ut nugas, ineptias, errores, paralogismos, fallacias, hæreses, blasphemias, quas ante lectionem libris inesse credunt, inveniant; semper, quod quærunt, inveniunt, quia, quod quærunt, secum afferunt. *Nihil est, ait servus apud Comicum, quin male narrando possit depravarier:* Liceat nobis addere, male legendo. Pessime autem legunt, qui judicant, antequam legunt. Liber rejiciendus est: quid ita? talem esse audiavi à viris probis & sapientibus. Titulus me offendit: præfatio est inepta: dictio est vitiosa. Malus est liber: quare tandem? Auctor displicet. Cur ille autem? Novatorem esse audiavi. Ab hoc Præceptores, ut mihi caveam, serio mo-

Ter.
Phorm.
act. 4. sc. 4.

nuerunt. Virus in verbis abscondere dicitur. Ab hujus fidei, hujus sectæ, hujus ordinis, hujus societatis, harum partium hominibus nihil boni proficisci solet. Neque ab hominibus hujus regionis. *Quid boni ex Nazareth?* Dissentit hic in religione, ergo nec in Philosophia audiendus. In limine labitur, ergo nihil bonæ frugis in toto libro. Errat in uno, ergo in omnibus. Non magni faciendus est liber: cur? Obscurum est auctoris nomen: Nunquam audiui, qui ejus eruditionem de prædicarent. Novi hominem: nihil in eo est non vulgare. Merito mireris unde huic fabri filio tam subita sapientia. Non magni fit à civibus suis. Dici non potest, quam pauca promittat ejus vultus, vox, gestus, vestitus, colloquium, incessus:

Horat. l. i.
Sat. 3.

*Iracundior est paulo, minus aptus acutis
Naribus horum hominum: rideri possit,
eo quod*

*Rusticius tonso toga defluit & male laxus
In pede calceus heret.*

Quis crederet, hæc & innumerabilia hujus generis alia esse, quæ judicia magnæ hominum partis de libris, sententiisque dirigant, & ita dirigant, ut ab his solis fata eorum esse suspensa, jure affirmari possit?

His

His præjudiciis imbuti, cum ad libros legendos, aut alios differentes audiendos accedimus, quid mirum est, quod tam multa perperam intelligimus? *Omnia*, inquit Seneca, *per aquam videntibus longe sunt majora: quicquid videtur per humorem, longe amplius vero est.* Et alibi, *rectissima*, inquit, *cum in aquam demissa sunt, speciem curvi praefractique visentibus reddunt.* Ita sane præjudicia omnium rerum speciem mutant, & modo levissimos errores in majus extollunt, modo prorsus verum, ut falsum, rectum, ut curvum appareat, efficiunt. Si quis pueris præsentibus de spectris loquitur, quamprimum in tenebris soli sunt, spectra sibi videre videntur. Ita si quis in libris falsarum opinionum phasmata esse audivit, ubique se illa videre putat. At hic vere contingit, quod aniculæ nostræ inter alias nugas fabulantur, periculosum esse spectra verberare, armisve impetere: eos enim, qui hoc faciunt, se ipsos ferire. Revera enim se ipsos feriunt, & commenta cerebri sui, qui cum iis pugnant, quos, cum secum sentiant, diversum à se sentire, eaque, de quibus nunquam cogitarunt, docere arbitrantur.

§. 9. Majus vero hoc malum est, cum

M 5

præ-

Senec.
nat. quæst.
l. I. c. 6.
Epist. 73.

*Affectus ad
præjudicia
accidenter
majus hoc
malum
reddunt :
præcipue
invidia &
odium.*

præjudiciis accedunt fideles ubique comites , vehementes animorum commotiones , quas vulgo affectus vocamus : interque eos præcipue invidia , ira atque odium adversus auctores eorumque libros & sententias. Hæc cum in omnibus judiciis nostra pervertant , tum vel maxime in dijudicandis aliorum sententiis :

male verum judicat omnis

Corruptus Index.

Hoc morbo regio qui laborant , iis purissima & candidissima quæque luteo colore infecta , dulcissima amara esse videntur.

Neque hic quicquam ex me quærat , an etiam ii , qui eruditi , qui Philosophi , qui sapientes vocantur , huic sint morbo obnoxii. Quis enim nescit odia quæ sunt inter diversas religiones sectasque , odia inter diversos ordines & societates , odia inter Academias , odia inter diversorum studiorum homines , odia & æmulationes collegarum , condiscipulorum : odia inter eos , quibus vetera , eosque quibus recentiora placent : odia erga omnes , quos nostram eruditionem deprimere aut obfuscare arbitramur : odia eorum , qui sententias nostras non amplectuntur , non venerantur : qui audent à nobis dissentire
aut

aut dissentire videntur. Et quis omnia unquam enumeraverit?

Fateamur & ingenue fateamur, nos omnes qui sapientiæ studium profitemur, longissime abesse non modo à Stoicorum ἀπαθεία, sed etiam à Peripateticorum μετριοπαθεία, & futuros semper, dum sapientiam quæremus non illam, quæ nos in cognitionem nostri deducit, sed quæ nos à nobis ipsis abducit; sapientiam speciosam, non utilem, quam pauci capiunt, non quæ multis profit; sapientiam quæ superbos nos, non bonos, nihil minus denique, quam sapientes reddere potest. Hæc est illa scientia, quæ inflat, uti Paulus ait. At Salomo *perpetuas inter superbos contentiones esse dicit*. Fiat ex his duobus dictis conclusio, & apparebit, quodnam hominum genus iræ & odio maxime sit obnoxium, figuline & fabri? Me quidem concludere pudet.

1. Cor. 1.
1. Prov.
13. 10.

Cum vero hæc odia nomen mutuuntur sancti pro Deo, pro religione, pro veritate Zeli: tum vero penitus conclamatum est: tum nihil amplius neque auditur, neque videtur, neque intelligitur: tum in aliis horrendas hæreses, tametsi nusquam sint, non videre, impietas; innocentes non condemnare atque orco addicere, tepor

Odia aliquando zeli nomine teguntur.

Malebran-
cius allega-
tus.

Recher-
che de la
verité
Tom. 2.
l. 5. c. 12.

tepor in religione ; omnia in pessimum
sensum non detorquere , proditio ; non
clamare , non vociferari , non cælum ter-
ramque miscere , ἀθεώτως habetur. In ho-
minibus imbecilli ingenio , ait Malebrancius,
sicubi ad odium , quo flagrant , ad meum quo
percelluntur , adulterinus iste zelus accedit :
quæ tum in mente judicia oriuntur , quam ini-
qua , quam maligna , quam acerba , quæ vis
innocentia offertur ? Horret animus meminisse.
Non minore ad sanandos horum animos mira-
culo opus est , atque illud fuit , quo Paulum
Apostolum conversum accepimus. Dicerem
desperatam prorsus horum salutem esse : si ulli
divina & potentia & misericordia limites po-
ni possent.

Verborum
non intelle-
ctorum
alia causa
recensetur.

§. 10. Denique inter eos , qui cum alio-
rum verbis non intellectis bella gerunt ,
& illos referre licet , qui variis negotiis
districti , debitum tempus & diligentiam
ad discendas eorum , quibuscum dispu-
tant , sententias non impendere possunt :
nolunt tamen harum rudes prorsus videri.
Ii quoque in hoc vitium incidunt , qui in
colloquiis familiaribus , in disputationibus
eruditorum , corpore licet præsentibus , a-
nimo absentes sunt : aut si præsentibus sunt ,
potius cogitant , quid ipsi dicere velint ,
quam , quid alii dicant. Qui respondere

volunt, nec tamen satis sciunt, quid ob-
jectum fuerit: volunt opponere, volunt
instare: necdum sciunt, quid fuerit re-
sponsum. Hinc fit, ut neuter disputan-
tium alterum intelligat. Alter si de cepis
quærit, de aliis alter respondet. Diceret
surdorum esse disputationem, alterum
non audire alterum: aut hos disputatores
auditorium exhilarare velle illo ludi gene-
re, apud nos usitatissimo, ubi de indu-
stria quæritur, ut responsio male quadrans
interrogationi, audientium risus excitet.

§. II. Hæc de iis, qui aliorum senten-
tiam perperam intelligunt, dicta sunt.
Sed non minus Logomachias fovēt, qui
aliorum sententias intelligere nolunt. Hi
præcipue sunt illi, qui contentionibus dele-
ctantur, in quibus perpetuum est contra-
dicendi studium, qui si ais, negant; si
negas, ajunt. Omnium sententiarum o-
sores, quarum non sunt auctores: quem-
admodum Laco ille apud Tacitum dicitur
consilii quamvis egregii, quod non ipse affer-
ret, inimicus. Tum sibi placent, cum
quicquid alii dixerint, displicet. Hi no-
lunt alios intelligere, quia si intelligerent,
non esset, quod contradicerent. In di-
sputationibus publicis Respondens non vult
intelligere Opponentem: quia si intelli-
geret,

*Logoma-
chias fo-
vent etiam
qui alio-
rum sen-
tentias in-
telligere
nolunt: ex
perpetuo
contradi-
cendi stu-
dio.
Tacit.
hist lib. I.
c. 26.*

geret, cedendum esset fortasse adversario, agnoscenda thescoo falsitas, confitendum, aquam sibi hæere, se nodum solvere non posse: quod à moribus nostris vehementer abhorret. Sed & *Opponens* non vult intelligere thesin: quia si intelligeret, quod opponeret, non inveniret: non vult intelligere responsionem, quia simulatque intelligeret, acquiescendum foret, nullusque instantiæ locus relinqueretur. *Qui aliis invident*, nolunt eos intelligere, ne cogantur agnoscere veritatem ab iis inventam aut defensam esse, ne cogantur fateri, se iis aliquid debere, ne cogantur eos laudare: malunt illorum verba maligne interpretari, ut habeant, quod reprehendere possint. *Qui aliis invidiam conflare*, eosque odiosos atque execrandos reddere *volunt*, pessimum aliorum dictis sensum affingunt; si explicatur sententia, si ostenditur nihil in ea mali latere, nolunt intelligere, ne fateri necesse habeant, se illis, in quos tantopere debacchati sunt, injuriam fecisse, vanos clamores, iniqua omnia fuisse, quæ in illos conjecerunt, convicia. *Qui temere alios condemnarunt*, nolunt illos intelligere, ne temeritatem judicii agnoscere cogantur. *Schismatici* nolunt eos, à quibus secefferunt: intelligere,

sum & qui aliis invident,

aut invidiam conflare volunt;

Et alii multi nolunt alios intelligere.

gere, ne sine causa secessisse videantur. *Adversarios Præceptorum Majorumque* nolunt multi intelligere, quia alias fatendum esset, Præceptores & Majores errare potuisse. *Antiquitatis cultores* novarum sententiarum inventores nolunt intelligere: quia si intelligerent, reperirent forsan in eorum scriptis aliquid boni priscis incognitum. *Novitatis amatores* nolunt priscos intelligere: quia alias appareret, nihil se novi invenisse. *Qui aliorum sententias rident*, nolunt eas intelligere, ne ob intempestivum risum ipsi ridiculi videantur. *Qui libros de controversiis religionis scribunt*, nolunt adversarios suos intelligere, ut controversiis multiplicatis libros triumphosque suos multiplicare possint. *Qui lucrum querunt, qui auram popularem captant, in refutandis aliorum sententiis*, nolunt eas intelligere, ne, si intelligant, quod confutent, non reperiant. *Qui aliorum dicta semel male intellexerunt*, nolunt ea post intelligere: quia nolunt agnoscere, se male ea intellexisse. *Logomachi* denique nostri nolunt eos, quibuscum disputant, intelligere: quia si intelligerent, fatendum sibi esset, se Logomachos, vitilitigatores fuisse, quod quenquam adhuc confessum esse, neque legimus, neque in hunc usque diem audivimus.

C A P. VIII.

De Signis hujus morbi.

§. I.

Signa Logomachiarum cognoscere, est utile.

QUamquam Logomachia non ex eorum sit morborum numero, in quibus malum intus latens non aliter, nisi ex signis quibusdam externis, conjicitur: utile tamen est, indicia quædam Logomachiarum in pugnis Eruditorum observare, quæ tam pugnantes, quam spectantes, excitent, atque admoneant, ut attentius, qua de re disceptetur, considerantes, removeant verborum involucrum, latentemque sub eo Logomachiam detegant; non secus ac gladiatores, sanguine in vestibis conspecto, accepti vulneris admonentur, idque detecta veste vident, quod ante in æstu pugnae non senserant. Quare cum modum dissertationi nostræ ordinemque præscripsimus, quædam quoque signa Logomachiarum nos indicaturos, recepimus: nunc fidem liberamus. Itaque signum Logomachiae hoc esto:

Signum I.

§. 2. *Si quis in cæteris mentis compos, ea oppugnare videtur, in quibus totum genus humanum convenit, verisimilius est, hunc verbis*

bis quam sententia ab iis, quibuscum disputat, dissidere. Sententia enim totius generis humani est sententia hominis, quem exuere necesse est, quisquis ab ea recedere vult. Id quod de homine sanæ mentis in aliis rebus credendum nunquam est. Quare si Stoici negant, exquisitissimum dolorem esse malum; negant, sapientem in tauro Phalaridis esse infelicem: si Stilpo ille Megarensis in disputatione dialectica *negat, esse hominem*: si Philosophi quidam recentiores negant, ignem esse calidum, aërem in hyeme esse frigidum, nivem esse albam: Si quis dubitaret, an habeat corpus, an habeat manus, pedes, dissentire videntur hi à toto genere humano. Quis credat, eos revera dissentire? Imo vero non mutant hi sententiam aliorum hominum, sed, quod Cicero Stoicis objicit, tantum *verba versant*.

Diog.
Laert. in
Stilpone.

lib. 4. de
fin.

§. 3. *Si quis negare videtur rem cognitum facilissimam, quæ tibi adeo perspicue vera videtur, ut perspicuitas assensum tibi extorqueat, & tamen si velis, non possis in dubium vocare: hunc existimato a te non revera dissentire.* Est enim eadem omnium hominum ratio, fierique non potest, ut, quod uni evidens videtur, alteri si modo id intelligat, incertum, nedum falsum videatur. Falsissi-

Signum II.

N

mum

Cicer. l. 4. mum est illud Academicorum: *Omne vi-*
 Acad. *sum, quod sit à vero, tale esse, quale etiam*
 quæst. *à falso esse possit.* Imo potius nihil eviden-
 Secta *tius est, quam, multa esse evidentia:*
 Pyrrhonio- *plane, ut facilius sit cum Pyrrhone dice-*
 rum, secta *re, omnia esse incerta, quam credere:*
 menda- *recteque ille judicet, qui hanc sectam*
 cium. *Pyrrhonorum mendacium sectam vocat.*
 Ars cogit. *Et, si Augustino credimus, Academici*
 discurs. 1. *non minus ac cæteri Philosophi, dogma-*
 Augustin. *tici fuerunt, Platonisque dogmata pro*
 contra *decretis agnoverunt: tantum Stoicos*
 Academ. *exagitantes, nihil sciri dixerunt, ut ni-*
 l. 3. c. 17. *hil eos scire probarent. Certum igitur*
est, esse aliquam in veris ἐνεργειαν, quam
Cicero evidentiam, perspicuitatem reddit.
Certum illud quoque est, sciri, aliquid
evidens esse: nec minus, hoc evidens
nemini falsum videri posse, qui rem in-
telligat. Quod si quis itaque à nobis dis-
sentit revera, in eo quod evidens nobis
videtur, efficitur, cum rem non intelli-
gere.

Multa *Sunt autem inter evidentia quædam*
 sunt de *ita cognitu facilia, ita obvia, ut credi-*
 quibus dis- *bile non sit, ea à quobusquam ignorari: quare*
 sensus nul- *si in his etiam dissensus esse videtur, dis-*
 lus esse po- *sensus plerunque apparens est, non ve-*
 test. *rus; in verbis, non in re. Cum igitur*
 de

de omnibus in utramque partem dispute-
tur, innumera autem sint, in quibus
homines eadem ratione utentes revera
dissentire non possint; innumeras inter
disputationes Logomachias esse, necesse
est.

Ita de axiomatibus dissensus esse non
potest, quippe de quorum veritate & *Ut de axio-*
certitudine ex sola cognitione & *matibus;*
collatione subjecti & prædicati constat, pror-
sus, ut, intellecta vocabulorum signifi-
catione, à nemine possint in dubium
vocari. Neget aliquis, bis duo esse qua-
tuor, totum esse majus sua parte; neget,
quamdiu volet, nunquam adduci potero,
ut credam, eum diversum à me sentire.
Aliter loqui poterit, sentire non poterit.
Multæ tales veritates sunt, quæ tam cla-
ræ tam faciles cognitu sunt, atque istæ:
& tamen de istiusmodi axiomatibus di-
sputari solet. De plerisque Metaphysicis
dogmatibus ex sola consideratione sub-
jecti & prædicati, quæ simplicissimæ sunt
notiones, eademque apud omnes homi-
nes, judicari potest. Nunquam ferè ope-
rosa argumentatione opus est. Unde
igitur tot dissidia? unde, nisi quod in vo-
cibus non convenitur?

Quod de axiomatibus dico, id de iis

*De enun-
ciatis quæ
immediate
ex axioma-
tibus dedu-
cuntur.*

quoque enuntiatis plerunque verum est, quæ immediate ex axiomatibus deducuntur: paucissimi enim homines adeo stupidi sunt, ut quod tam facile ex primis principiis eruitur, non videant. Quis enim non ex hoc, quod idem simul esse & non esse nequeat, concludere potest, circum-
lum quadratum esse non posse; dummodo

*Verus dis-
sensus est in
probabili-
bus.*

hæc verba intelligat? Verus igitur dissensus est in probabilibus: in iis, quorum veritas experientia sensuum non minus quam ratione nititur; ubi memoriæ aut nostræ aut alienæ, ubi aliorum testimonio est credendum: etiam tum, cum potius audimus, quid phantasia, quid affectus, quam, quid ratio dicter, magis quid utile, quid jucundum creditu sit, quam quid verum; in his & similibus obtinet illud Comicum: *Quot capita, tot sententia.*

*Et in rebus
certis est
dissensus,
sed in diffi-
cilio-
rioribus
cognitum.*

Quid igitur? ais, an in rebus certis & evidentibus nullus est inter homines dissensus? Est sine dubio: sed plerunque in difficilioribus cognitu, quarumque cognitio longa rationum serie comparatur. Quoniam non omnes requisitis ad eas cognoscendas scientiis sunt imbuti, non omnium æquale est mentis acumen, non omnium eadem capacitas ingenii, non
omnes

omnes æque attenti, atque in attentione diu conservanda non omnes æque constantes: inde est, quod in rebus difficilioribus alii veritatem evidentissime perspiciant, alii cæcutiant, alii prorsus à veritate aberrant. In his ipsis tamen, ne incaute in Logomachiam incidas, hanc quoque velim à te observari regulam: *Si quis non minus atque tu ingenio pollens, nec minus artis, de qua agitur, peritus, oppugnat sententiam, qua tibi evidens videtur, quamque, ut Cartesius loqui solet, clare & distincte percipis: hunc à te revera dissentire, nisi controversia sapius sedato pariter atque attento animo examinata, haud credito.*

§. 4. *Si, quamprimum vir sapiens in disputatione sententiam manifeste absurdam & ridiculam propugnare videtur, tu protinus conjectes, Logomachiam disputationi subesse, non vana plerumque erit conjectura.* Qui sensum SS. literarum scrutantur, hanc inter alias observant regulam, ut si verba proprie accepta sensum pariant absurdum, ad tropicum figuratumque confugiant. Nihil enim absurdi illi, qui est ipsa sapientia, tribuendum existimant.

Alia quidem, fateor, hominum ratio est: hic enim & sapientissimi falli possunt. Sed hoc saltem iis, qui sapientes habentur,

De metho-

lib. 2. de
divinat.Critici hic
imitandi:et ii qui-
bus ani-
gmata sol-
venda pro-
ponuntur.

tur, debemus, ut illos non prorsus delirare credamus. Si cui enim paradoxon illud Cartesii non placet: *nihil aequabilius inter homines distributum esse, quam bonam mentem*: hoc saltem concedet, rationem & bonam mentem non sibi soli tributam esse, sed alios quoque portionem & quasi demensum suum accepisse. Non temere igitur credamus, eos, qui, multorum sanorum judicio, cæteris sapientiores sunt, prorsus insanire. Quodsi Cicero clamat: *nihil tam absurde dici posse, quod non dicatur ab aliquo Philosophorum*; oratoria hæc est hyperbole. Deque iis, qui absurdissima dicere videntur, verum est, plerosque eorum absurdius loqui, quam sentire.

Imitemur itaque Criticos nostros, qui, sicubi verba scriptoris, quem castigant, obscuriora aut frigidiora sibi videntur, tametsi lectio cum vetustissimis membranis concordet: tamen adduci non possunt, ut auctorem ita scripsisse credant: mendum subest, sanandus est locus, vera lectio acuta quadam conjectura restituenda. Imitemur eos, quibus ænigmata solvenda proponuntur. Omnia enim verba excutiunt, videntque nullane in iis ambiguitas sit. Si quis dicat: lapides in Helvetia

vetia non crescere: cave cum hoc disputas, ridendum te præberes: ænigma est; qui ita loquitur, illud tantum crescere vocat, cum in absunta partis locum ex alio memento apponitur quantitati quaquaversum secundum omnes dimensiones. Quæ non hac ratione majora fiunt, illa augeri in Schola dicuntur, non crescere. Talia ænigmata multa proponuntur in Philosophia. Plato *omnium rerum ideas æternas esse dicit. Qui non intelligunt ænigma, ita adversus Platonem disputant, ac si ideas hæc, non modo à rebus ipsis, sed ab intellectu etiam divino separatas, ab æterno extitisse credidisset. Hic quis non exclamet cum elegantissimo scriptore: hæc idea separata tam sunt absurda, ut non credibile sit, opinionem hanc Platoni, tanto Philosopho, in mentem venire potuisse? Apud eundem Platonem Socrates probat Alcibiadi suo, solum animum hominem esse, corpus ab homine distingui tanquam instrumentum, quo, ut coriarius cultero, utitur. In hanc sententiam quærit apud Augustinum Varro, utrum anima sola sit homo, ut ei corpus adjunctum sit tanquam equus equiti. Quod si quis ita Platonem delirasse putaret, ut non arctiorem inter animum hominis ejusdemque corpus nexum agnoverit,*

Multa sententia Philosophorum veterum et recentiorum æquius interpretanda.

Platonis.

Rapin coll. Aristot. & Platon.

Socratis. Plato in Alcibiade.

August. de Civit. Dei l. 19. cap. 3.

N 4

quam

quam inter coriarium & ejus cultrum, equitem, eumque, quo eques vehitur, equum: quam ineptam homini sapienti sententiam affingeret? quam ineptus ipse esset, si hanc sententiam refellere vellet?

Peripateticorum.

Ne proba adversus Peripateticos: *natura* nullum *horrorem*; *materia*, *elementis* nullum *appetitum* convenire. Cum enim id dicunt, non proprie loquuntur. Malim ego credere, eos nihil dicere, quam id dicere, quod proprie verba hæc significant.

Cartesii.

Sed eadem etiam erga Cartesium utere æquitate. Cum Deum *positive à se* dici posse, ait; ne crede, hominem sanæ mentis nedum Philosophum Christianum, usque eo furere, ut Deum statuerit se ipso fuisse priorem, se ipsum produxisse, ac non existentem fecisse ut existat. Neque hic mihi quisquam Sapientum Ethnicorum in religione deliria objiciat. Hic enim, fateor, valent illa Apostoli *ἐμωράνθησαν, ἐματαιώθησαν ἐν τοῖς διαλογισμοῖς*. Sed hoc ex peculiari Dei judicio factum est.

Locus Pauli explicatus.

Rom. 1.

v. 21. 22.

Quamquam si crassa Ethnicorum deliria sapientibus, quales fuerunt Socrates, Plato, Aristoteles, Zeno, tribuas, vehementer fallaris. Errarunt & hi, sed subtilius errarunt. Tales plerunque eorum invenies
sen-

sententias, quales ab hominibus summi ingenii, sed lumine SS. literarum destitutis, expectare potuisti. Ægyptiorum etiam sapientes à plebis suæ superstitione procul abfuisse minime dubitandum est. Non intellexit videlicet plebs Symbolicam illam Theologiam, literasque hieroglyphicas: ad superstitionem traxit, quod mysticum sensum habuit. Nisi forte iis, quorum sapientia in ipsis SS. literis celebratur, creditum esse existimas, quod Octavius apud Minucium Ægyptiis objicit: *eos non Serapidem magis, quam strepitus per pudenda corporis expressos extremis scere.*

§. 5. Si quis adversario, cetera perspicacis ingenii, tribuit sententiam, eamque oppugnat, quæ verbis quidem ejus convenire videtur, sed aliis certis & constantibus ejusdem adversarii opinionibus manifeste repugnat: *εὐμ λογομαχεῖν* valde veri est simile. Nihil quidem frequentius aut in libris legitur, aut in disputationibus auditur, atque ista: tecum pugnās, tibi que ipse contradicis.

Sed accusationes istæ maximam partem sunt injustæ: præsertim si hominibus perspicacibus intenduntur. Verba horum sæpe inter se pugnare videntur, cum sententiæ non pugnant. Loquor de iis, quæ, ex principiis rationis ope deducta, cognoscimus:

N 5

scimus:

Ubi &
quando nobis contradicamus.

scimus: non de iis, ubi aliorum auctori-
tate stamus, aut quorum cognitionem
soliis memoriæ beneficio debemus, ubi
sæpe ex oblivione nobis contradicimus.
In artibus & scientiis, ubi cohærent opi-
niones, non item: in his tamen erramus,
in errore tamen satis nobis constamus.
Hic, nisi velimus de verbis concertare,
nunquam temere tribuimus homini per-
spicaci sententiam, quæ hypothefibus
ejus aperte repugnat.

*Plato de-
fensus con-
tra Cicero-
nem.
lib. 1. de
natura
Deor.* Plato, ut ait Cicero, in *Timeo* dicit &
in *Legibus*, & mundum Deum esse & cælum
& astra & terram & animos & eos quos
majorum instituto accepimus. Cave tamen
hanc Platoni sententiam tribuas. Quis
nescit sanius longe Platonem de Deo sen-
sisse? Hicne tam absurde de Deo loquitur,
qui alibi tam præclare? Næc, ait apud
Plutarchum, ὁ θεός, χωριστὸν εἶδος, τετέλει-
τὸ ἀμιγρὲς πάσης ὕλης, μηδενὶ παθητῶν συμπε-
πλεγμένον. Idem Cicero in eodem loco de
Platone dicit: *Sine corpore ullo Deum vult
esse, Græci, ἀσώματον*: quæ illi sententia
constanter tribuitur. Quare Plato, cum
ea dicere videtur, quæ Cicero ipsi tribuit,
aut ex aliorum sententia loquitur, aut à
Cicerone non intelligitur.

Ita video quoque, multos graviter of-
fendi,

fendi, cum in Politicorum libris legunt, *Principem supra leges esse; legibus esse solutum*. Ergo, ajunt, Princeps jam peccare non potest: quod libet, licet. Sed quid si in iisdem libris vident, Principi præ cæteris commendari religionem, justitiam, clementiam, virtutes omnes? Si deflectenti ab his, poenæ divinæ denuntiantur; tanto graviores, quo minus Princeps humanis poenis subest? Nunquid vident homines in sententiis condemnandis nimis præcipientes, frustra se verbis male intellectis fuisse offensos?

§. 6. *Si quis in disputatione adversario suo tribuit sententiam absurdam, aut turpem, verbis quidem ejus sic satis convenientem, sed à qua vita & praxis abhorret, rarissime à Logomachia immunis est.* Ita supra diximus, Logomachia id indicium videri, si Medici, postquam de morbo aliquo ægroti ejusque natura diu inter se disceptarunt; cum ad eum sanandum accedunt, in remediis prorsus consentiunt.

Idem de multis Philosophorum disputationibus judicandum: atque optimus sæpe verborum interpret est praxis. Pyrrhonis sententiam fuisse Laërtius dicit, ὅτι ἄδὲν ἔτε αἰσχρὸν ἔτε καλὸν, ἔτε δίκαιον ἔτε ἀδίκον. Quicquid in his discriminis est, id minime

Signum v.

Exemplum
Pyrrhonis.
Laert. in
Pyrrhone.

minime à natura, sed à sola consuetudine pendere, affirmavit. Impia opinio, quæque prorsus omnem honestatem tollit. Dubitas, an hæc Philosopho excidere potuerint: recte hic assensionem aliquandiu sustines. Sed dubium hoc idem adimet Diogenes, cum subjicit, ἀκόλuthος δ' ἦν καὶ τῷ βίῳ. Fuisse igitur hanc ejus opinionem vita probat opinioni consentiens.

¶ *Epicuri.*

Quid Epicurus? Idemne de eo sentendum? Statuit hic finem bonorum voluptatem esse. Cum hoc vero cœnare vellent Pisones nostri: hæc Philosophia ad palatum esset multorum. Nimirum existimant, se in hortis Epicuri inventuros Smindiridem quendam aut Apicium; mensam stratam loco cathedræ, extructas dapes loco librorum, lagenas, calices, vinum, loco atramentarii, calami & atramenti. Sed audite, quomodo cœnet:

Laert.
l. 10.

panis, inquit, cibarius cum aqua mihi sufficit. Ita pasci hoc tempore apud nos pœna est: at hic est quotidianus victus Magistri voluptatis. Sed quid diebus festis, hic sine dubio lautius vivit? Ne promittite vobis Vitelliana convivia: ne expectate

Sueton in
Vitellio.

duo lectissimorum piscium, septem avium millia; nullus apponetur clypeus Minervæ, nulla scarorum jocinora, phasianorum & pavonum cere-

cerebella, nulla lingua phœnicopterum aut
 muranarum lactes. Quid igitur? *Mute*, ita Laërt. ibid.
 scribit amico, *ad me casei Cytheridii aliquan-*
tulum, ut, cum paulo splendidius epulari vo-
luero, possim. Vix creditis Epicuro, hæc
 de se affirmanti: at credetis Stoico: *Cum*
quis, inquit Seneca, adierit hos hortulos & Epist. 21.
inscriptum hortulis: Hospes hic bene manebis,
hic summum bonum voluptas est; paratus erit
hujus domicilii custos, hospitalis, humanus;
& te potentia excipiet, & aquam quoque large
administrabit, & dicet: Ecquid bene acceptus
es? Multi id negarent, qui tamen in Epi-
curum & Epicureos quotidie declamitant.
 Si quis summum bonum in divitiis ponere
 diceretur, qui in summa paupertate sum-
 ma esset abstinencia, simulque ἀυταρκέ-
 στος: ejusego sententiam non recte in-
 telligi, existimarem. Quis dubitat igitur,
 perperam intelligi sententiam Epicuri?
 Id sentire, quod sentire dicitur, & ita
 vivere, ut vixit,

*Non bene conveniunt & in una sede mo-
 rantur.*

Utinam Theologi ex praxi adversariorum
 suorum de eorundem doctrina sæpius ju-
 dicarent, ex praxi, inquam, quæ ab
 ipsis laudatur & probatur, non toties
 alii aliis injuriam facerent, non tot per-
 nicio-

niciosus Reipubl. Christianæ Logomachiis implicarentur!

Signum
VL.

§. 7. Si, duobus inter se disceptantibus, affirmans iisdem ad sententiam suam probandam utitur argumentis, quibus utitur negans, raro verus inter disputantes dissensus esse videtur. In disputationibus ad objectiones sæpe responderi solet κατὰ τὸ βίαιον, per argumenti retorsionem, uti loquuntur, cum quis adversarii argumento utitur, ad suam sententiam probandam. Hoc si evenit, præsertim inter Viros eruditos, qui consequentiarum leges didicerunt, disputationem Logomachiam esse, valde probabile est. Viri enim sapientes, qui in argumentis consentiunt, in iis quoque plerunque consentire censendi sunt, quæ ex argumentis legitime deducuntur, præsertim si consequentia facilis & perspicua est. Duo autem opposita ex eodem argumento legitime deduci non possunt. Quare illa quæ ex uno eodemque argumento concludunt, tametsi opposita videantur, sæpissime opposita non sunt. Exemplo celebri, quod dico, perspicuum reddam.

Salmasii
& Heinſii
disſertatio de lin-
gua Helleniſtica.

Claudius Salmasius ac Daniel Heinſius, summa ſeculi noſtri ornamenta, magna contentione inter ſe diſputarunt de lingua Hel-

Hellenistica; an hac peculiari, sive lingua, sive dialecto, scripta sint & versio Græcæ Veteris Testamenti, LXX. Interpretum, & Novum Testamentum. Negat ille, hic affirmat. In partes ivit, quicquid tum doctorum erat: non pauci pro utraque sententia libri conscripti sunt: neque acerbitas, ut suos quoque maximi viri patiuntur manes, abfuit. En quomodo concludat Salmasius librum, qui funus linguae Hellenisticae inscribitur: introducit Heinziolum, ita enim vocat adversarium, Phœniculum seculi sui, Eruditorum Regalium, Eloquentium Lusciniolum flebilibus modulis inconsolabiliter gementem, non Hylæ fata, non Hermegardis suæ, sed amissam caram filiolum, gratam illam & amabilem puellulam, deliciolum suum, Hellenisticulam nomine, ereptam sibi grandi facinore Salmasii, magni viri, sed Heinziolo minoris. Si tamen refecemus, quæ huic controversiæ admiscetur, varia ad historiam antiquitatesque Judæorum, Græcorum, Romanorum pertinentia, explicationes aliquot locorum S. Scripturæ, aliorumque scriptorum, in quibus aliquando dissensum inter eruditissimos Viros agnoscimus; præcipuam, quæ relinquitur, quæstionem Logomachiam esse, multi per-

perspexerunt. Qui linguam LXX. Interpretum ac scriptorum N. T. linguam Hellenisticam vocant, intelligunt hoc nomine linguam, quæ non pure Græca sit, sed Hebraïsmis, Syriaïsmis, Chaldaïsmis plena. Talem esse LXX. Interpretum, talem scriptorum N. T. linguam, haud difficulter probant. Quid ad hæc Salmasius, & qui cum eo sentiunt? Dicunt, linguam hanc commentum esse. Quare tandem? Hoc ipso inter alia argumento utuntur, quo Adversarii. Probant, hanc linguam innumeris Hebraïsmis scaterere; magisque ἑβραΐζειν quam ἑλληνίζειν; tantum igitur abesse, ut Hellenistica sit, ut potius sit Hebraïtica, exhellenistica, aphellenistica. Agnoscis uno eodemque argumento suam quemque sententiam confirmare: id quod nos Logomachiae indicium esse diximus.

*Signum
VII.*

§. 8. *Pleraque disputationes de definitionibus & divisionibus Logomachia sunt.* Præterquam enim, quod ejusmodi disputationes solam plerunque methodum, modumque disciplinas tradendi spectant, quas Logomachiarum species esse observavimus: ut de definitionibus primum loquamur: definitiones aliæ nominis dicuntur, aliæ rei. In definitionibus rei sæpissime non tam reprehend-

*Definitio-
nes rei.*

henditur falsitas, quam quod perfectæ definitionis legibus non conformes sunt: quæ tamen leges non omnes ejusdem sunt necessitatis. Hæc paullo obscurior est: Si verbum hoc additum fuisset, clarior esset. Sed ita definitio non esset brevis: hic genus omittitur: hic genus paulo propius inveniri potuisset: vocabulum hoc est ambiguum: clarius definitur Logica, *ars bene cogitandi*: sed illud *bene* jam latet in artis vocabulo. Grammatica est *ars bene loquendi*: alii addunt, & *scribendi*: quam imperite, quam invenustum est illud *Et* in definitione, quæ *sine copulatione & disjunctione partium proponi* debet?

De *definitionibus nominum* disputare in Philosophia est aperte *λογομαχεῖν*. Sed innumeræ sunt definitiones quæ videntur esse definitiones rei, quæ meræ sunt definitiones nominum. *Definitio-
nes nomi-
num.* Causam definitionis, *principi-
um ab eo, cujus principium est, reapse distin-
ctum.* Tu fortasse aliter, nec repugno. Sed ita, ais, nec materia nec forma causæ erunt corporis. Illa enim à corpore tantum distinguitur considerandi modo: hæc *modaliter*, ut recentiores Philosophi loquuntur. *Causa.* At quid hic mali est? Si materiæ & formæ causæ nomen adimimus, numquid iis decedet? Nisi forte veremur, ne utraque

que in jus nos vocet propter titulum, quo jamdiu gavissæ sunt, ademptum. Sed neque partes erunt materia & forma, si vera tua est partis definitio: quod *res sit ab aliare ejusdem totius realiter distincta*. Fateor & hoc nudabuntur nomine: sed nihilo propterea ignobilia erunt corporum principia.

Motus. Pessima, ais, tua *motus* est definitio, quæ soli *motui locali* convenit. Sed quid si solum motum localem definire volui? quid si solum hunc motum voco? At ita *generatio, corruptio, argumentatio, diminutio, alteratio* motus non erunt. At tu jube istos motus vulgo dictos bono animo esse, alius iis quæretur titulus in ejus locum, quem ab Aristotele acceperunt.

Divisiones rerum. Non majoris sunt momenti disputationes, *de divisionibus rerum*. Rectiusne *Ens* in decem categorias, an in duas, an in tres dividatur. Satiusne sit dividere magnitudinem, in *lineam & lineatum, lineatum vero, in superficiem & corpus*: an continuo in *lineam, superficiem, & corpus*. Sintne quinque tantum *sensus externi*, an sex, ut Scaliger voluit; an *plures*, ut illi, qui statuunt tactum non esse sensum unicum, sed tot species sensus, quot species tactilium qualitatium. *Duone* sint plantarum genera *arbores & herba,*

Exerc.
adv. Car-
danum
286.

herba, ut Moſes diviſit: an *tres*, *arbores*, *frutices*, & *herba*: an *quatuor*, *arbores*, *frutices*, *herba*, & *olera*: an etiam *quintum* genus ſit addendum, quo *fungi*, *tubera* & id genus alia comprehendantur. Logomachia, quæ ſcrutatorem veritatis remorantur! An eſurientes in convivio ferrent ſciſſores ferculorum diu inter ſe diſceptantes, in quot fruſta acipenſer appoſitus ſit diſcerpendus, aut, ut eſt apud Satyr.

Quo geſtule lepores & quo gallina ſecetur?

Juvenal.
l. 1. Sat. 5.

Ita neque avidi veritatis ferre poſſunt moram, quæ jam non dico diviſionibus, ſed diſputationibus de diviſionibus impenditur. Dummodo nullum in ſciſſione fruſtum pereat: dummodo nulla in dividendo pars prætermittatur, quæ conſideratione digna eſt: ſatis in cæteris arbitrariæ pleræque ſunt diviſiones.

§. 9. Si quis nimium tenax vocabulorum valde generalium, quæ aut nihil diſtincti ſignificant, aut nescio quot ſignificationes admittunt, juſſus illa explicare, hæret, clariora non invenit, ſua tanquam clariffima identidem inculcat: cum eo ſi diſputetur, diſputatio plerumque Logomachia eſt. Non deſunt, qui cum utuntur vocabulo aliquo communi uſu trito, cui tamen in mente nulla diſtincta notio, ſed vaga tantum, uti loquuntur,

Signum
VIII.

tur, confusa & generalis respondet; nihilominus, quia usitatis vocabulis utuntur, clarissime sibi loqui videntur. Hi, cum ipsi, quid velint, non intelligant, qua ratione intelligere poterunt ii, qui adversus eos disputant? At isti statim se produnt, si iussi verba sua declarare, non possunt: quin etiam irascuntur, quod alii se tam perspicue scilicet loquentes intelligere nolint. Aut si iussi à verbis, quæ disputationis causa esse videntur, abstinere; nolunt, mordicus illa tenent, prorsus

Ut canis à corio nunquam absterrebitur uncto.

Pro libertate hi decertant: libertas iis semper in ore est: quicquid agunt superiores, contra libertatem est: quicquid agunt ipsi, id vero libertas licitum reddit. Si dicis, hoc nomen valde generale & ambiguum esse, rogas, explicent clarius, quid hoc vocabulo intelligant: indignantur, hoc quenquam quærere. Sed tamen, pergis, an libertatem intelligitis totius civitatis, an singulorum civium: & si hanc, an immunitatem ab omni subjectione hac voce significatis, an à certis quibusdam oneribus? Hic tandem irati, libertas, dicent, libertas est: quis nescit, quid sit libertas? Alii privilegiorum restitutionem flagitant. Frustra ex his quæris,
quæ

quæ tandem illa privilegia sint : nihil est, quod dicant : & tamen privilegia sua identidem crepare pergunt. Nimirum in hoc nomine confuse nescio quid latere putant, cujus si compotes essent, felicissimi forent mortaliū.

Hic tamen probe observari velim : hoc me Logomachia signum dicere : si quis abstinere non vult à voce obscuræ & ambigua significationis. Quod si enim vox valde clara & perspicua est, ut vix significantiorem invenias : ille tenebras quærere videtur, qui vocem ferre non potest, qui aliam substitui vult. Ita nullum est dubium, Arianos olim vocem ὁμοσίου respuisse, non propter vocis ambiguitatem, sed propter nimiam perspicuitatem : quæ non permisit, ut sententiam suam tegerent ; maluissent sub obscurioribus vocibus diutius delitescere : quare non vocabulum, sed rem rejecisse sunt censendi.

§. 10. *Si duos inter se disputantes audis, de Signum IX.*
re, quæ captum tuum non superat, deque arte,
cujus non minus, atque disputantes, peritus
es ; neutrum tamen disputantium intelligis :
non leve hoc Logomachia indicium est. Quod
si enim tu, cujus attentio in eo solo est oc-
cupata, ut nunc hujus, nunc illius men-
tem

tem intelligas, nihil tamen eorum, quæ ultro citroque dicuntur, capis: an is, qui in disputationis æstu versatur: cujus attentio plerunque in id potius fertur, quod ipse dicere vult, quam quod adversarius dicit; cui obversatur vincentis laus, victique pudor: an is, inquam, melius alterum intelligere est putandus? an illi perspicuum videbitur, quod tibi tam videtur obscurum? Quod si vero nihilo melius alter disputantium alterum intelligit, actu alterutrius sententiam intelligis: efficitur, disputationem Logomachiam esse; nisi forte, casu disputantium sententias opponi, velis dicere. Sed necessarium mihi videbatur addere: hoc valere in disputatione de arte, aut scientia, cujus non minus peritus es, atque disputantes. Id quod de proximis quoque, quæ sequuntur, Logomachia signis est intelligendum. Imperitis enim multa obscura videntur, quæ scientibus perspicua sunt. Hæc quatuor postrema (& hoc observari velim) signa præcipue Logomachiarum sunt in disputationibus Academicis, ubi viva voce inter se disceptant Respondens, uti vocatur, & Opponens. Exempla non addo, quia quilibet, qui frequens est in ejusmodi συζητήσεσι τοῦ αἰῶνος τούτου,

exemplorum satis facile observabit.

§. 11. *Si attentus in disputatione, thesi, de* Signum X.
qua disputatur, probe intellecta, Opponentis,
quod in contrarium affert, argumentum non
intelligis: Logomachia & hoc signum esse pu-
rato. Quia sæpe fit, ut Opponens oppo-
nere incipiat, tametsi, quid objicere
velit, non distincte cognoscat. Genera-
lem tantum habet intentionem opponen-
di: hæc facit, ut loquatur, & si quid
loqui velit, nondum certo apud se con-
stituerit. Id si evenit, evenit autem sæ-
pius, quam quisquam crederet, mirum
non est, si objectionem non intelligis,
quam neque ipse Opponens intelligit.
Hic vero frustra se defendit Respondens:
cum umbra pugnat: hostem non habet,
aut hostem, qui justis armis non est in-
structus. Magno strepitu pugnam ciet,
sed præter strepitum, nihil est, quod
metuatur. Intolopetis ejus, si ita loqui
licet, multum pulveris est pyrii, glans
nulla est: sonant, sed nihil efficiunt;
terrent, non vulnerant.

§. 12. *Si in disputatione, intellecta thesi* Signum XI.
& Opponentis argumento responsionem defen-
dentis, utcumque attentus, capere non potes,
quod reliquum est disputationis, Logomachiam
esse suspicator. Sæpe enim indicium hoc

est, Respondentem nihil observare in Opponentis argumento, quod tuto negari possit. Taceret, si tacere liceret: tateretur assensum, nisi hoc turpe videretur. Vult aliquid reponere, etsi, quid reponat, non reperiatur. Hic inter arcana Reipub. disputatoriae, in qua *salus Respondentis suprema lex est*, hoc est præcipuum: Simul ac nihil est, quod respondeas, vicisti, si quid dicis, quod non intelligat adversarius, quod nunquam certius assequeris, quam si ipse dicta tua non intelligis. Inter strategemata hujus militiae non postremum est censendum, si hostem nulla ratione repellere potes, oculos ejus conspergere pulvere obscuræ cujusdam distinctionis: (optimæ illæ sunt, quæ ne quidem à proferentibus intelliguntur) ut illo excæcato, post varios ictus, quæ adversarium fatigant, te non lædunt, honeste retrocedere possis. Hic si Opponens insurgere vult contra responsionem, quid aliud impetit, quam verba inania omni-que sensu destituta!

Signum
XII.

§. 13. Si in disputatione posteaquam aliquandiu & Respondentem & Opponentem probe intellexisti: subito oriuntur tenebrae, & quantacunque attentione adhibita, nihil amplius capere potes: tum conjicito, disputationem
omnem

omnem tandem in Logomachiam abiisse.
Hoc fere fatum est omnium disputationum, in quibus non veritas sed victoria quæritur. Animadvertis ab initio perspicuitatem, ordinemque: argumentum opponitur thesi: responsio quadrat argumento: instantia, ut vocant, responsioni: omnia probe intelligis: ubi sint disputantes, semper vides: comitaris euntes: quousque pergunt, facile eos animo sequeris. Tum vero subito sese ex conspectu tuo subducunt, atque evanescunt: nescis, quo se proripuerint. Hic tu suspicator, evenire disputantibus, quod tibi evenit, alterum non amplius videre, ubi sit alter; cumque ita in tenebris adversarium quisque quærere pergit, tandem non amplius scire, ubi ipse sit: i. e. omnem disputationem abire in cæcam quandam Logomachiam.

Hæc sunt, quæ mihi in mentem venerunt. *Logomachia signa*: poteris huc quoque referre, quæ in superioribus de causis earum dixi, nam & *caussa effectus signum est*, ut nubes venturæ pluviae. Nolim tamen quisquam credat, me omnia, quæ adduxi, signa æque certa esse putare: non hæc mea mens est. Nolo etiam, ut, si quis unum aut plura ex his signis in disputatione animadvertat, sine ulteriori exa-

*Signa hæc
omnia non
æque certa.*

mine statim Logomachiam esse, certo judicet. Nam & hic temerarium nimisque præceptus nos seducere posset iudicium. Hoc tantum volo, ut, si quis ista observet, de dissensu vero disputantium tantisper dubitet, donec ex intellecta distinctissime utriusque partis sententia, eaque, quam fieri potest, accuratissime inter se collata, qua in re dissentiant disputantes, quousque convenient, clarissime peripiciat: ante hoc examen autem, animadversis his signis, probabilius, Logomachiam esse, quam non esse disceptationem, judicet.

C A P. IX.

De remediis hujus morbi.

§. I.

VEnimus tandem ad finem dissertationis nostræ, ac, postquam, uti promisimus, unum atque alterum morbo huic remedium quæсивimus, ægrotum nostrum aliis penitus sanandum relinquemus. Hic vero nescio, an inter remedia hujus morbi, illud quoque Disputatori nostro præscribendum sit, quo Carneadem quondam, celebrem Academicæ sectæ

sectæ Philosophum, usum fuisse accepimus: qui adversus Chrysippum, aut, ut alii malunt, adversus Zenonem disputaturus, *helleboro se*, antequam rem tam difficilem aggrederetur, *purgasse* dicitur. Quod si enim ea hujus herbæ vis esset, ut mentem à præjudicatis opinionibus, animum à vanæ gloriæ cupiditate, ab ira, odio, invidia, partium studio, contendendi pruritu, sinistris suspicionibus, *Zelo scientiæ & charitatis experte* perpur-gare posset: si virtutem haberet figendi volatica ingenia, adstringendi vagum cogitationum fluxum: si denique oculos mentis, discussis præjudiciorum & affectuum nebulis, acutiores redderet, ut per verborum integumenta ad rerum ipsarum interiora penetraret eorum acies. Hæc inquam si hellebori virtus esset: præsentissimum illud adversus Logomachias esset remedium. Ac Carneades quidem utilem esse hujus usum existimavit, *ad exprimendum*, ut loquitur Valerius, *ingenium suum attentius*; idemque priscis temporibus senserunt plerique, qui, *helleborum studiorum causa ad pervidenda acrius, quæ commentabantur, sapius sumis-taverunt*. Sed nolo Empiricum agere: præscribant hoc illi, quibus herbarum vir-tu-

*Carneadis
ad versus
Chrysip-
pum dispu-
taturi, re-
medium.
Plin. hist.
lib. XX.
c. 21.*

*Valer.
Max. lib.
VIII. c. 7.
§. 5. Plin.
l.c.*

tutes cognitæ sunt: ego ex mea qualicunque officina leniora, ac, si minus efficacia, innoxia certe depromam: acturus hoc capite de *remediis morbum, ubi est, pellentibus*: sequente atque ultimo de *remediis, morbum inde, ubi nondum est, prohibentibus*, quæ vulgo *preservativa* nominare consueverunt.

*Remedium
universa-
le I.*

*Lexicon
universale
vocat Lo-
gomachia-
rum. Quo-
modo ador-
nandum.*

§. 2. Universale adversus omnes, quotquot inter eruditos sunt, Logomachias remedium esset *Lexicon quoddam universale*, adornatum à Viro assueto, uti hodie loquuntur, claris & distinctis perceptionibus, perspicaci in eruendis, acuto in discernendis eruditorum sententiis, in docendo solerti atque perspicuo: ubi omnes voces & loquendi formæ, quæcunque in hoc usque tempus Logomachiarum causæ fuerunt, secundum literarum seriem explicarentur: atque ita quidem, ut nota aliqua à cæteris distinguerentur voces & locutiones nullius significationis; voces significationis incertæ; voces significationis inconstantis apud eosdem auctores; voces significationis confusæ: in reliquis, quæ varias quidem apud varios, sed certas, constantes & distinctas notiones habent, omnes accurate enumerarentur; ad mentem aucto-
rum

rum perspicue definirentur, additis, ut in Lexicis fit, ad singulas definitiones auctorum exemplis. Ubi tamen & hoc monendum esset: si hæ ipsæ voces à quibusdam scriptoribus, aut nullo, aut incerto, aut inconstanti, aut confuso sensu usurparentur.

Dici non potest, quantum utilitatis ex *Ejus utilitas.* tali Lexico in rem literariam redundare possit, cum ad artes atque disciplinas omnis generis intelligendas, tum in primis ad Logomachias ex iis aut tollendas, aut saltem minuendas. Digna sane res, quæ tentetur hoc seculo, quod nobis tot erudita omnis generis Lexica produxit: quo nullum aliud minus acquiescit in vocibus, quod præ omnibus præteritis propendet in claram & distinctam rerum ipsarum perceptionem. Ac, si Lexicon universale aptum ad hunc finem adornare nimis amplum uni homini pensum videtur; partiantur Viri perspicaces inter se operas, alius hanc, alius aliam artem à morbo, quem curamus, perpurgandam sibi proponat: aut, quod ego quidem malim, incipiatur ab Indicibus particularibus, in certos auctores, quorum locutiones, siue sua siue aliorum culpa, multis Logomachiis occasionem dederunt. e. g.
Su-

Sumantur opera R. Cartesii, excerpantur ex iis omnes locutiones, quibus non satis intellectis adversarii ipsius fuerunt offensi; digerantur secundum literarum seriem; omnes fideliter ad mentem auctoris, ac perspicue, ut, quantum fieri potest, omnis ambiguitas removeatur, definiantur. Tentetur idem in aliis auctoribus: ac multi denique indices in unum corpus collecti constituerent *Lexicon hoc universale*, quod desideramus.

Remedium universale II. Purgatio artium à vocibus obscuris, incertis, &c. §. 3. Alterum universale Logomachiis tollendis remedium est: *purgatio artium ac disciplinarum à vocibus ac Locutionibus non modo nullam, aut confusam aut incertam significationem habentibus, quæ sunt perpetua cæcarum inprimis Logomachiarum materia: sed iis omnibus, quæ, ubi clariores non desunt, obscuritate & ambiguitate sua disputationes, alias in fumum abituras, alunt: præsertim quæ, nulla urgente necessitate, cum tantum in finem inventæ sunt, ut disputationum essent pabulum, aut ut homines, quorum in seculis barbaris non magna fuit eruditio, verbis facilia obscurando, difficilia intellexisse viderentur. Stephanus Gaußenus postquam dixit, quætionem num Theologia ars sit, an scientia &c. Logomachiam esse meram, Vis, inquit,*

inquit, rem experiri? Dubitabile illud nomen, ars, scientia, sapientia aliquantisper se pone, & quam sit Theologia natura extra hoc nomen, hodiernos istos disputatores interroga, eos videbis de rei summa plane inter se consentire, at in vocibus occupatos, quod fatale est hujus saculi malum, inanes sonos fundere.

Nolo equidem esse morosus: si quæ voces à Scholasticis inventæ sunt significantes, jamque universali eruditorum consensu receptæ: tolerantur in Repub. literaria, sed ea lege tolerantur, ut pacifice vivant, nihilque turbarum concitent: turbulentæ omnes, rixosæque ejiciantur. Neque est, quod dicatur, esse illas magnarum circuituum compendia: satius enim est, pluribus verbis dicere, quod multi intelligant, quam paucioribus, quod pauci capiant: satius decem uti verbis, quæ explicatione non indigent, quam duobus tribusve, quæ vix mille aliis explicari possunt. Quam egregiis vero compendiis Scholastici fuerint usi, experientia docuit. Inveniuntur hodie Philosophi, qui libro non magnæ molis longe plura dicunt, sine istis compendiis, quam omnes simul in tot portentosis voluminibus.

*Judicium
Auctoris de
terminis in
scholis ha-
ctenus re-
ceptis.*

At enim, ais, utile quidem, fateor, hoc est, quod præscribis, remedium, sed

*Occurritur
objectioni-
bus.*

sed difficile; quis hanc, quam suades, purgationem instituet? citius Herculi clavam suam extorseris, quam Thomistis & Scotistis suas delicias:

*Aut quia nil rectum, nisi quod placuit
sibi, ducunt;*

Horat. l. 2.

*ep. 1. Vel quia turpe putant parere minoribus,
& quæ*

Imberbes didicere, senes perdenda fateri.
Faciât hic tamen quilibet, quantum in se est. Abstineat ipse in docendo à caliginosis istis vocibus: monstret exemplo suo, commode Philosophiam illis carere posse: inculcet idem discipulis; si talia vocabula ipsi proponuntur, non erubescat fateri, se ea non intelligere, nec turpe ducat, interpretationem eorum petere: cogen- tur ita alii, si intelligi velint, perspicue loqui. Quæ quidem in re non contemnen- dos docti homines in hoc seculo progressus fecerunt; incipimus sensum in omnibus verbis quærere, definimus verba non intel- lecta mirari; neque profiteri pudet, nos voces non intelligere, quæ anab iis, qui illis utuntur, satis intelligantur, du- bitamus. Philosophi jam hodie videntur, qui sunt interpretes veritatis, interpretes naturæ: non interpretes verborum. Si hoc tantum Philosophi à vulgo distingue- rentur:

rentur: non deessent hodie, qui mallent vulgo, quam eruditis annumerari.

§. 4. Magnopere à Logomachiis artes illud quoque purgabit, *si controversiæ & pugnae, cum hominibus mutantur, quantum fieri potest, in pugnas cum sententiis.* Si non homines, non libros, non sectas, sed falsa dogmata refutamus; fieri vix potest, ut in Logomachiam incidamus: dogma enim, quod refutamus, plerumque revera cum nostra sententia pugnabit: sed si hoc dogma homini, libro, aut sectæ tribuimus, si non tam dogma refutamus, quam homines propter dogma: fit sæpe, ut cum verbis pugnemus. Qui Cartesium refutat ut Scepticum, in Logomachiam incidit, verba ejus non intelligit, talis non fuit. At qui refutat *σκέψιν* illam, quam Cartesio tribuit, recte pugnat cum sententia falsa, neque Cartesium hic repugnantem habebit, dummodo hanc illi sententiam ne imputet.

Dices, sententiam hujus hominis, hujus auctoris, hujus sectæ esse sceleratam & impiam: quid opus est? refuta opinionem illam sceleratam & impiam: educ in aciem adversus istam omnes tuas copias: nemo se læsum quæri potest, nisi qui fateri volet, suam oppugnari sententiam. Quid

Remedium universale III.

Respondetur ad ea quæ hic obijci solent.

neceſſe eſt, ut huic, illive tribuatur, qui eam fortasſe non agnoſcet? At enim monendi ſunt adoleſcentes, ut ſibi à certis hominibus, certis libris, certis ſectis caveant. Mihi vero non tantum monendi, ſed muniendi videntur: ſed muniantur ſolida veri cognitione, muniantur invictis rationibus, non odio certorum librorum & nominum: muniantur adverſus falſum, ubicunque demum reperiatur, non contra certos homines, libros & ſectas, quæ fortasſe à noſtro ſenſu non tantopere abhorrent. Suſpectam reddimus veritatem, ſi iisdem artibus illam defendimus, quibus defenditur mendacium. Quid quod experientia teſtatur, non alia ratione magis libros adoleſcentibus commendari, quam ſi à multis, ſi magna cura refutantur; ut vel ſolo Cartefianæ Philoſophiæ exemplo patet, quæ non tantum deſenſoribus ſuis debet, quantum adverſariis.

Pugnemus igitur non tam contra certos homines, quam contra falſum; quod tum fiet, ſi veritatem magis amabimus, quam gloriolam noſtram, ſi errores magis odio nobiſerunt, quam ii, quos errare, quoniam id cupimus, credimus. Sed, ſi dicere velimus, quod res eſt, prodit ſe hic, ut cum maxime, ingenii noſtri malignitas

tas. Non sufficit dicere: Deus non est à se positive, eo sensu, ut se ipsum fecisse intelligatur. Nimis jejunum hoc nostræ philautiæ videtur; non sibi hic satisfaciunt affectus nostri; amplius quærit malitia hominum; quærit, cui hanc sententiam tribuat: quem propter eam condemnet: majorem habet *ἐμφασιν*, si dicamus: Blasphemus in Deum est Cartesius, qui *Deum à se positive*, quasi se ipsum produxisset, dicere non erubescit.

§. 5. Est & illud non contemnendum minuendis his verborum pugnis remedium, si, quantum res patitur, disputationem transferimus à genere ad speciem: ab universalioribus ad minus universalia. Notiones enim generales, cum pauciora comprehendant, quam speciales: fit, ut vocabula etiam, ejusmodi notiones generâles significantia, facile inter se permisceantur; quo plura enim vox aliqua significat, eo clarius, ut ita dicam, signata est, eoque melius ab aliis vocibus distingui potest: cum contra vocabula generalibus notionibus respondentia, sint similia monentis, quibus exiguum tantum signum impressum est: quæque iccirco non nisi ab attentissimis possunt distingui. Præterquam quod generales istiusmodi notiones non

*Remedium
universale
le IV.*

uno modo à singularibus abstrahantur: alius conjungit, quæ dividit alius: animadvertit hic levissimum discrimen, de quo alius nunquam cogitat. Unde est, quod plurimæ disputationes de vocibus sint in disciplinis & partibus disciplinarum generalibus: v. g. in *Metaphysicis*, in *Physica parte generali*, in *Prolegomenis artium & scientiarum*. Cum ad specialia accedimus, si controversiæ non cessant, cessant, aut saltem minuuntur Logomachix.

Præterea, accidit fere, ut verba nostra universaliora sint, quam sensus verborum: quæ semper ad materiam, de qua cogitamus, restringimus: unde fit, ut qui verba in latitudine sua accipit, aut ad aliam materiam, de qua ipse cogitat, restringit, mentem nostram non capiat. Hincque oritur disputatio: quæ cessabit, simulatque disputantes a genere ad speciem descendere voluerint. Mutationes in Republica sunt periculosæ, ait hic, negat alter. Pugnare videntur: at non pugnant. Nimirum alter cogitat de mutatione regiminis aut formæ reipublicæ, de mutatione legum atque institutorum civilium. Alter cogitat de mutatione morum depravatorum, de profectu in pietate, in artibus omnis generis & literis,
de

de mutatione systematis alicujus Grammatici, Logici, Physici, &c. Hi, si à generalibus ad specialia venient, non habebunt, de quo disputent: prorsus, ut optimum innumeras ex artibus Logomachias tollendi remedium sit, in generalibus non diu hærere, sed ad specialia, ad quæ ipsa utilitas & jucunditas nos invitat, festinare. Sed nescio quomodo multi in generalibus verbosi esse solent, ut pauca, quæ sciunt, dilatando multa scire videantur.

§. 6. Sed & nos à generalibus ad specialia veniamus Logomachiarum remedia. *Remedia specialia.*

In Logomachias incidimus vel *nos ipsi*, ut oppugnemus aliorum verba non intellecta, cum quibus sententia consentimus: vel *alii*. Cogitemus igitur primum de *nobis ipsis*, sanandis, tum demum de *aliis*. Atque hic mutuabimur ante omnia à R. Cartesio illud, quo ipse adversus præjudicia usus est, remedium. Existimabat enim vir acutus, nihil ad hanc rem accommodatius esse, quam si quis semel in vita omnibus de rebus dubitet, ut, singulis judiciis suis postea debito ordine examinatis, ea tantum recipiat, quæ claræ & distinctæ perceptioni, i. e. solido fundamento sunt superstructa. Ita sane

*I. Cartesii
remedium
adversus
præjudicia.*

dubitemus semel in vita de controversiarum, qua nobis cum eruditis aut intercesserunt aliquando, aut intercedunt etiam nunc, veritate aut gravitate: dubitemus, utrum nos adversariorum, an nostram adversarii sententiam probe intellexerint, sitne dissensus in re an in verbis, aut saltem tantusne sit in re, quantum verba præ se ferre videntur: nullane subsit, si non pura, certe mixta Logomachia?

Non desunt dubitandi causa.

Neque vero hic unquam nobis deerit dubitandi causa, non modo, cum illa, de quibus superiori capite egimus, Logomachiarum animadvertimus signa, aut universa, aut plura, aut singula; sed tum etiam ubi nullum horum apparet. Vidimus, quot cum in linguis tum in nobis ipsis lateant Logomachiarum causæ, quam facilis sit in eas lapsus, quam non potuerint sibi ab illis cavere doctissimi homines, quam late pateant; quam variæ sint earum species, quousque sæpe processerint, quantum per omnes artes ac disciplinas diffundantur.

Jam porro consideremus, qua ætatis infirmitate in plerasque controversias primum inciderimus; quando didicerimus adversariorum nostrorum sententias, quando cœperimus eos impugnare, atque odisse:

odisse: annon tum temporis, verba quædam aut confuse aut prorsus non intellecta memoria tenere, tota nostra fuerit eruditio: annon odio habuerimus eum, quicūq; disputamus, antequam ejus sententiam intellexerimus, aut intelligere potuerimus? an sententiam adversarii ab adversario nostro, an à præceptore, adversario illius, primum didicerimus, qui & ipse eam à suo præceptore acceperit? an legimus unquam adversarii nostri scripta, & si legimus, an attente, an sine præjudiciis, ac sinistro affectu? an omnes boni interpretis partes impleverimus? de quibus pluribus nobis in sequentibus erit dicendum. Perpendamus præterea, quam difficile sit, vel nunc, confirmata ætate, ejus mentem intelligere, contra quem non intellectum aliquando, semelque in vita disputavimus; præsertim si id publice factum est; cujus auctoris odium, contemptus, fastidium præcessit intelligentiam; quam difficile sit, librum intelligere, quem legimus, quia refutare volumus; refutare volumus, antequam legimus.

Hæc & alia qui cum animo suo cogitat, fatebitur cauti & prudentis esse, dubitare aliquandiū de omnium, in quas aliquando cum adversariis incidit, disputationum

momento: tum vero, iis quæ graviores videntur, (reliquas enim utinam prorsus ex memoria delere possemus?) maturiori iudicio, uti decet, examinatis, (id quomodo fieri debeat, infra videbimus) eas tantum pro veris controversiis agnoscere, quæ in rigido hoc censu consistere videbuntur, atque ubi dissensus perspicuus est: probeque cavere, ut hoc viso, nihil, in quo nullus dissensus est, controversiæ admisceatur.

*Dubitatio
hac non est
periculosa.*

Neque vero quisquam hanc, quam suademus, dubitationem periculosam esse dicat. Sit enim illa Cartesii, ut multis placet, periculosa; quia verendum est, ne, qui semel dubitare incipiunt, ex dubitatione postea eluctari nequeant; tum quod vel ad tempus de quibusdam dubitare illicitum videatur: dubitatio nostra omni vacat periculo. Neque enim dubitare aliquandiu, sitne controversia inter me & illum vera controversia, tametsi vera, tametsi gravissima sit, illicitum dici potest: neque si assensionem hic diutius, quam videtur necessarium, aut etiam perpetuo sustinerem; damnabilis hæc esset assensionis retentio. Non enim dubito de sententia magni momenti, quam scire ad salutem est necessarium;

non

non dubito, si ne talis vera an falsa; sed dubito tantum, fieri ne possit, ut illi falsum videatur, quod mihi certum, atque indubitatum videtur: & ideo assensionem aliquandiu cohibeo, ne adversario injuriam faciam, ne cum umbra pugnando iniquus simul & ridiculus fiam. Dubitare, *sine Deo unus an plures*, atque in hac dubitatione perseverare, nemo negat periculosum esse. Sed si quis dubitaret, *an Gentiles plures Deos statuerint*, ac propterea, an in hoc dogmate revera à nobis Christianis dissentiant? hæc dubitatio imperita fortasse videretur, damnabilis certe non foret: immo vero indicium esset, adeo homini, hac de re dubitanti, de unitate Dei esse persuasum, ut credere non possit, esse, qui eam oppugnent.

§. 7. Inter remedia, quibus nos ipsos à Logomachiis sanare possumus, merito referas, si quis crebro & serio considerat, quod sapienter est à Verulamio dictum. *Videmus, inquit, quandoque fieri, ut quis doctus & intelligens, Homines imperitos, de aliqua questione inter se litigantes audiat; atque perspicue advertat, eos idem re ipsa sentire, & in unum convenire; quibus tamen ipsis nunquam aliquis fuisset dissidendi finis.*

II. Remedium speciale:

*Verulamii verba
Sermon.
fidel. cap.
de unitate
Ecclesiæ.*

Quod si hoc nonnunquam eveniat, in exigua illa judicii disparitate quæ inter homines esse potest: annon credere par est, Deum in cælis qui corda scrutatur & novit, satis perspicere, nos homines fragiles, in aliquibus, de quibus controversiam movemus, idem revera sentire & in ambobus benigne complacere.

III. Remedium speciale:
Animi purgatio à pravis affectibus.

§. 8. Utinam vero pugnandum tantum nobis esset cum præjudiciis nostris circa libros, homines, sectas, cum quibus disputare sumus ab ineunte ætate assueti! facile hæc ponerentur, si sola essent; dummodo præscripto remedio uteremur. Sed quis mentem suam purgabit à pravis affectibus, quos à teneris & quasi cum lacte materno hausit? Facile est, dubitare, eorumne, quibuscum disputamus, mentem recte intelligamus; sed non ita facile, eos non odisse, quos diu odio habuimus. Facile item est, monere alios, ne indulgeant affectibus in disputando; quis non hoc facit? sed fateamur ego, tu, ille, nos, vos, illi, ipsi, isti, ii, fateamur omnes, quotquot sumus, cum Poëta, nos hac in parte *minores esse monitis nostris.*

Remedium huius difficultatis.

Hæc vero ipsa difficultas, uti controversias apud plerosque auget: ita certe easdem suspectas reddere debet iis, qui se

se ipsos, qui alios cognoscere student. Non credunt facile iudicio suo, quoties aliorum sententiam in pejorem interpretatur partem, qui sciunt, rarissime illud ab affectu pravo immune esse. Videamus tantum, ne existimemus, odium errantium provenire ex amore veritatis. Hoc qui statuit, nescit quid amor sit, quid odium. Nunquam ego audiui, quemquam alium odio esse persecutum, quia caruerit illo bono, quod ipse possidet. Amor nostri nimius pugnat cum amore diversa à nobis sentientium: sed quuscunque amor sit veritatis, nunquam ille pugnabit cum amore errantium. Ex amore autem veritatis puro, conjuncto cum amore aberrantis à vero, necessario oritur commiseratio: atque in hac commiseratione consistit zelus ille, qui Christianos decet.

Sed vereor, ne, quicquid hic dicere possumus, inefficax sit; cuilibet transigendum hic est cum animo suo; hunc ut cognoscat, hunc ut regat. Hoc cum rerum omnium difficilimum sit, petamus, ut ille nobis hic succurrat, qui scrutatur omnia, etiam profunditates Dei: *cujus in potestate sunt corda omnium, ita ut ea, tanquam rivos aquarum quocunque vult, dirigat.*

dirigat. Quod si enim ulla in re divinæ omniscientiæ atque omnipotentiae auxilio indigemus: indigemus certe in nobis ipsis cognoscendis & regendis.

IV. Remedium spectale:
Erroris confessio.

§. 9. Hæc quidem omnia, ut nos ipsos à Logomachiis liberemus, sponte facere debemus. *Si quis autem eorum, quibuscum disputamus, nos admonet, non id se sentire, quod in disputando illi tribuimus, injuriam sibi fieri: hic vero hand difficiles nos praebeamus,* neu pudeat fateri, nos sententiam aliorum non satis intellectam oppugnasse.

Stultus & improbus hic pudor est dignusque notari.

At enim, si istud fatebor, fatebor me errasse, Logomachum fuisse: hoc est palinodiam canere: delendum erit, quod in hoc, quod in illo libro scripsi. Quid dicent amici, quid discipuli, quid admiratores? desine tam inimica honori meo suadere: in aliis sequar consilium tuum; hic non possum. Ridiculum! quasi alii id non cernant, quod nos fateri nolumus. Nimirum pueris similes sumus; qui, quando oculos claudunt, se à nemine conspici arbitrantur. Imo vero certo nobis persuademus, alios non tantum videre, nos errasse, sed insuper videre
nos

nos ridiculo pudore in errore perseverare : videre , non sine risu , ideo nos tantum in aviis strenue pergere , i. e. stultos esse , ne errasse , i. e. homines fuisse videamur. At si ingenue confitemur , nos mentem eorum , quibuscum disputavimus , non satis intellexisse : quid est , quod nobis exprobrent , quid est , quod rideant sapientes ? An quod alii meliores sunt suorum , quam nos alienorum verborum , interpretes ? an quod à verbis male intellectis fuimus decepti ? scilicet hoc nemini unquam contigit ? Quis non hoc humanum , imo quotidianum esse agnoscit , taleque , à quo sibi ne sapientissimi quidem cavere possunt ? Hoc vero non tantum candidi , sed magni etiam animi est , si quis , spreto ineptæ plebis risu , profiteri audeat , se errasse : certissimumque hoc hominis serio veritatem amantis indicium est. Cum enim omnes homines sæpissime errent , qui nunquam possunt sibi extorquere ista verba : *erravi , deceptus sum* ; aut cæci sunt , aut vilissima rumoris mancipia , qui toto corpore contremiscunt , quotiescunque de illo cogitant : Quid dicent homines ? prorsus ut idem plebi dicere possint , quod Ovidius Germanico Cæsari ,

Magni animi est , si quis profiteri audeat se errasse.

Inge-

Ovid. *Ingenium vultu statque caditque tuo.*

Fast. l. i. Hi nunquam cum Augustino retractationum libros scribent: promiserunt enim, datis obsidibus, (hi sunt libri, quos emiservunt,) plebi, à cujus iudicio pendet, se errores suos ad ultimum usque vitæ halitum defensores.

Responde- §. 10. Hic vero non ab re erit quærere:
tur ad qua- *nunquamne igitur alicui tribui possit opinio, à*
stionem: *qua se alienum esse dicit.* Sane licere id,
An nun- *quando protestatio, uti loquuntur, mani-*
quam ali- *festo facto est contraria, nullum est dubium:*
cui tribui frustra enim verbis à te amoliri conaris.
possit opi- sententiam, quam facto ipso fateris.
nio, à qua Extra hunc vero casum magna cautione
se alienum opus est. Si verba auctoris, considera-
esse dicit? tis omnibus, idque sine præiudicio &
 affectu sinistro, quæ à bono interprete
 sunt consideranda, nullum alium, quam
 quem nos illis tribuimus, sensum admit-
 tunt: Si adversarius noster proprietatis
 verborum peritus, locutus est ita medi-
 tate, extra disputationis æstum, ubi
 verba sæpe mentem præcurrunt, animo
 sereno, atque à perturbatione vacuo:
 Si denique aperta est causa, quare suam
 sententiam tegere velit; puta spes in-
 signis boni, aut metus magni cuiuspiam
 mali. Hæc tria quando concurrunt,
 non

non impedio, quo minus alicui tribuatur sententia, à qua se abhorrere, jactat. Nisi vero hæc manifestissime concurrant, longe tutius est, ut patiamur, quemlibet verborum suorum interpretem esse: ut nihil alteri tribuamus, nisi quod, ut suum, agnoscit; longe & homine & Christiano dignius, malle credere, alium minus apte locutum esse, quam impie sensisse: præsertim cum illud nos in veritate maxime confirmet, cum videmus & eos, qui à nobis dissentire videntur, in ea amplectenda, nobiscum consentire.

§. II. Sed ad illam quoque quæstionem nobis respondendum est, quæ sæpe inter eruditos est agitata, *de imputatione*, uti loquuntur, *consequentiarum*: *possimus ne alicui tribuere sententiam, quam non diserte quidem usquam proficitur, sed qua, necessaria consequentia, ex illa, quam proficitur, deduci potest?* Deo quidem in verbo suo loquenti recte tribuimus non id tantum, quod totidem verbis dicit, sed quicquid necessario ex diserte dictis fluit: nihil enim eorum non vidit, qui videt omnia. Hominibus vero, quo magis sunt perspicaces, eo magis imputari potest, quod ex ipsorum sententia consequitur. Per-
spica-

Item ad alteram: de imputatione consequentiarum.

spicaciores enim plura cernunt cum sententia sua connexa, quam stupidiores. Sed & acutissimorum non magna est perspicacia, præterquam quod & isti sæpissime cum affectibus tum præjudiciis impediuntur, ut ne quidem naturali mentis acie, fatis alias in omnibus hominibus obtusa, uti possint. In ipsis quoque consequentiis, de bonis & necessariis loquor, aliæ sunt propiores, aliæ longinquiores & remotiores ab eo, quod dilerte dicitur, ad quas non nisi per alias consequentias, & nonnunquam per longam earum seriem pervenitur. Quo propiores sunt, eo facilius videri possunt.

*Nemini
consequen-
tia impu-
tari debet
quam non
videt.*

His consideratis, ita propositam questionem solvimus: Nemini imputari debet, quod non dicit; nemo autem dicit id, quod ex verbis suis sequi non videt: unde efficitur, nemini consequentiam, quantumvis necessariam, imputari debere, quam non videt. Cui consequens est, non omnia quæ necessario ex hominis sententia deducuntur, homini tribui posse: nemo enim hominum omnia ista videt.

Sententia, ex qua falsum sequitur, falsa quidem est: sed quemadmodum qui verum dicit, non omne verum dicit, quod

quod ex eo, quod dicit, sequitur, alioquin omnia à Geometris inventa Theoremata & Problemata illi tribuerentur, quia axiomata eorum, definitiones & postulata sciret: ita qui falsum dicit, non omne falsum dicit, quod ex illo, quod dicit, necessario conficitur.

Si certum est, aliquem non videre, quod per consequentiam ex ejus sententia eruitur; non sine aperta injuria id ipsi imputari potest. Certum autem hoc esse potest: tum ex aliis ejusdem sententiis, quæ manifestæ huic per consequentiam deductæ adversantur, tum ex praxi, cum quis à praxi abhorret, quæ ex doctrina sequitur.

Si certum est, aliquem videre consequentiam: recte ipsi imputatur, quod per illam ex ejus decretis concluditur. Certum autem hoc est, cum quis agnoscit hanc conclusionem, verbis aut iisdem aut idem significantibus, aut praxi.

Quo probabilius est, aliquem consequentiam videre, eo probabilius ei sententia, quæ ex ejus verbis sequitur, imputatur. Sic, si cætera sint paria, probabilius imputatur perspicaci, quam stupido, immuni à præjudiciis & affectibus, quam ei, qui his excæcatus est: probabilius alicui imputatur deductum per consequentiam

Q

faci-

faciliorem, quam difficiliorem. Contra minus probabiliter stupido, &c. In probabilibus tamen regula est charitatis adhibenda: satius enim est, benignius de aliorum sententia sentiendo nimis facilem, quam, omnia in pejorem partem interpretando, iniquum videri.

Tutissimum est in rebus incertis à judicando prorsus abstinere.

Tutissima autem via est in rebus incertis à judicando prorsus abstinere: præsertim si contra alios judicium ferendum est; nihilque cuiquam tribuere, quod non aut verbis, aut facto agnoscit. Qua in re istud nos cautos circumspectosque reddere debet: quod, licet consequentiæ, quibus aliquid ex adversariorum nostrorum verbis deducimus, legitimæ & necessariæ sint; magnum tamen inter nos illosque sit discrimen: nos enim longe clarius videmus, quicquid mali in eorum opinionibus latet, atque illi vident, qui similes *amatori* apud Flaccum, quem

amica

Turpia decipiunt cæcum vitia,
oculos ad nævos tam charæ sibi sententiæ claudunt, clausisque oculis clarissimas consequentias non vident, atque, ut illæ cerni à se nequeant, obscura quadam distinctiuncula, quam, tametsi non intelligant, tamen intelligere sibi videntur,

tur, non tam aliis quam sibi tenebras offundunt,

Locutus sum adhuc de consequentiis *Consequen-*
rationis iisque necessariis. Quod ad con- *tia sophistica-*
sequentias sophisticas attinet, quæ bona- *ca.*
rum specie nobis sæpe illudunt, *consequen-*
tias præsertim affectuum, odii atque invidia,
pessimorum sophistarum: quin illæ ne-
mini imputari possint, nullum est du-
bium. Sed quam difficile est eas sæpe à
probris discernere?

§. 12. Denique, ut à diverticulo in *V. Reme-*
viam redeamus, & illud Logomachiis, *dium spe-*
iis præsertim, quas cæcas vocamus, re- *ciale:*
medium erit non contemnendum: *Attentia*
ad verba. si ad
verba omnis generis, quæ in memoria nostra
hærent, quibusque in disputando utimur, etiam
extra disputationem probe attendimus. Si
tum, cum animus ab affectu liber est, quo-
tiescunque aliquod horum in mentem ve-
nit, statim cogitamus; an hoc vocabulum,
quo nonnunquam utimur, in ore nostro
inanis sonus sit, cui nulla subsit notio,
an terminus, uti appellamus, ex schola
retentus, quem aliquando intellexisse
nobis videmur, cui tamen quæ respon-
deat idea, aut nunquam percepimus, aut
non amplius recordamur? an notio illi
subjecta sit clara & distincta, an vaga,

confusa & generalis? An voci respondeat idea rei alicujus, an modi rei? An rei extra nos, an sensus alicujus aut modi cogitandi in nobis? proponamus nobis aliquem, qui ex nobis quærat; quid hoc, quid illo verbo significemus: tentemus illud, quam fieri potest clarissime, definire. Hoc si sæpe, sedato animo, remoti ab ea, quæ in disputationibus est, contentione facimus: multa, cum ad disputandum redimus, mutata nobis videbuntur; multæ controversiæ in fumum abiisse, multæ plurimum de gravitate sua deperdidisse: ridebimus, quod toties cum umbra pugnavimus, ubi sæpe adversariorum, sæpe etiam nostra verba non intelleximus.

*Qua ratio
ne aliis
medicina
sit adhi-
benda?
Quid agen-
dum si nos
ipsos petant
aliorum
Logomachia.*

§. 13. Atque ita quidem nobis ipsis medebimur: nunc, *qua ratione aliis medicina sit adhibenda*, dispiciemus: ac primo, quid agendum nobis sit, *si nos ipsos petant aliorum Logomachia*, *si verba nostra*, quorum vim non capiunt, oppugnant Logomachi. Hic vero statim videndum, in nobisne, an in adversario sit hujus rei culpa, nosne sententiam nostram male explicaverimus, an ille bene explicatam male intellexerit? annon verba nostra dura, obscura aut ambigua sint? Id si est,

est, duo certissima sunt Logomachiae remedia: primum, si ingenue fatemur, nos minus apte esse locutos: alterum, si aliter in posterum nos locuturos promittimus, & promissis stamus. Sed ita, ais, fatendum mihi erit, me nescire loqui. Quid? Tibine etiam in verbis, non tantum in sententia, ab omni errore immunis videris? an ne hæc quidem tibi extorqueri possunt, tanquam mali ominis verba *clarius loqui potuisssem*? Miseri homunciones! qui nunquam magis inepti sumus, quam cum maxime cavemus, ne inepti videamur; & cum fateri nolumus minimum errorem, maximam stultitiam prodimus. Sed videantur hæc duo remedia, uti plerisque videntur, amariora: nihilne igitur pacis causa ferendum est? quanti tranquillitas animi, quæ perpetuis istis jurgiis turbatur, emenda nobis videtur?

Dura aliquis praecepta vocet mea; dura fatemur

Esse: sed, ut valeas, multa dolenda feres.
Sed tametsi verba nostra, quæ alios offendunt, immerito offendant; tamen si alia non minus perspicua adlint, quibus idem dicere possimus, utamur hic *υγκασ-
ταβάσαι*, removeamus è via lapides, ad quos parum acute cernentes offendunt,

atque abstinenceamus, quantum possumus, à locutionibus, quas videmus male intelligi. Non tanti vel aptissimæ voces nobis esse debent, ut illas sine necessitate cum pacis dispendio mordicus retinere velimus. Officium verborum est, animi nostri sensa aliis significare: cum videmus, ea suo hic officio non defungi, aliudque multis significare, quam quod significatum volumus; dimittamus ea, tanquam servos, si non malos, certe inutiles; præsertim si alia adsint ad hoc ministerium idonea. Si Erasmo veritas displicuit seditiosa; verba certe seditiosa, licet sensus eorum sit innoxius, nobis placere minime debent.

*Huic remedio non
semper est
locus.*

Equidem fateor, non semper huic remedio locum esse. Cum enim, quod alii perspicuum est, atque aptissimum, alii durum videatur & periculosum: fieri non potest, ut simul omnium rationem habentes, ad omnium captum & loquamur & scribamus. Verba præterea æque perspicua atque ad id, quod dicere volumus, accommodata facilius est quærere, quam reperire; difficilimum vero ita loqui, ut verba tua ab invidis & malitiosis interpretibus in pravam sensum detorqueri non possint. Hic vero faciendum, quod fieri potest;

potest: si à verbis, quæ quosdam offendunt, abstinere non licet, remedium Logomachiae erit *interpretatio*. Interpretemur igitur verba controversa ita clare, quantum in nobis est, ut stupidissimi illa intelligere queant, maligni vera ea intelligere cogantur.

§. 14. Cave tamen, quemquam, quem sanare cupis, aut stuporis aut malitiae accuses. Non audiantur ista: *Oppugnas, quæ non intelligis: iniquus es, injuriam mihi facis, mala fide agis, cavillaris, calumniaris, mentiris, & si quid atrocius dici potest.* Stuporis & malitia non accusandi, quos sanare cupimus.

Etsi horum aliqua vera sint,

Parcius ista viris tamen obijcienda memento.

Non ita volunt tractari ægroti nostri, irritantur his dictis, non sanantur. Quid igitur? ars adhibenda est; lenius ac mollius hic agendum. Sed remedia leniora adhibenda.

Vis ut agnoscat adversarius tuus, se verba non intellecta oppugnasse, *in te, quantum honeste id facere potes, transfer Logomachiae culpam aut in linguam qua loqueris.* Accusa ejus inopiam, quod verbis idoneis ad animi sensa aptius exprimenda destituatur: pete ab adversario, ut suppleat perspicacia sua linguæ defectum, molliat benigna interpretatione verborum duritiam. Accusa te ipsum: non illum dicere in-

intelligendo minus acutum, sed te in explicanda sententia minus eloquentem, aut saltem minus felicem: pete, ut te ferat de re tam difficili, ut potes, balbutientem, atque ipse verba aptiora, si possit, suppeditet. Fac denique, ut eum pudeat in te iniquum esse, qui tantam in te videt æquitatem.

Si verba adversarium offendentia mutare cupis; nolim, dicas: *quandoquidem verbum hoc ferre non potes, abstinebo*: hoc unico dicto Logomachiam insanabilem reddere posses: nemo vult videri de verbis concertasse: Logomachi similes sunt podagra laborantibus, qui ferre non possunt, ut morbus suo nomine appelletur. Satiùs igitur erit fateri, te in verbis deligendis minus cautum fuisse, jure id reprehendi; dic, monitis locum daturum, aliis verbis in posterum usurum.

Si qui sunt, ut multi sunt, qui in verbis hærentes existimant, te, cum verba mutas, sententiam mutare: fer hunc eorum errorem, qui tibi nec detrimento neque dedecori esse potest. Hic tamen semper decorum tibi observandum est, videntumque, ut *Lepidum* illum imitatus apud Tacitum, *teneas modum inter abruptam contumaciam & deforme obsequium*, in primis vero

vero caveas, ne adversarii, quorum pectora dictis mulcere cupis, existiment se à te deludi, quod quidam omni injuria gravius ducunt: id quod vitabis, si & revera pacis & veritatis cupidus eris, & omnia dicta tua hunc veritatis pacisque præ se ferent amorem.

§. 15. *At quid nobis faciendum est, cum animadvertimus, alios aut dictis aut scriptis acerrime pugnantes, quos tamen, si attentius eorum controversiam consideramus, revera inter se consentire videmus?* Tutissimum fortasse erit cum Palæmone Virgiliano alienas lites subterfugere: alios enim conciliare velle plerumque conciliatori noxium est; cadit apud Virgilium in bello inter alios *seniorque Galesus,*

Dum paci medium se offert, justissimus unus. Quare ut plurimum, qui eruditi vocantur, tantopere inter se litigant? si dicere volumus, quod res est, ideo potissimum, quia intolerabile alteri videtur, alterum sibi videri se sapientiore. Quod si igitur tertius superveniat, qui partes, tanquam de lana caprina decertantes, conciliare conatur, i. e. ut illi quidem interpretantur, qui sibi sapientior videtur utroque: hoc vero disputatores nostri longe minus ferendum esse rati, quicquid

Quid faciendum cum animadvertimus acerrime pugnantes, revera inter se consentire.

An conciliare Logomachos,

irarum, quicquid bilis in diutina disputatione collegerunt, id omne in miserum conciliatorem evomunt. Quis non hic illa comica usurparet: *I prae, sequar: mihi istuc neque ferstur neque metitur?* Veruntamen, si *humani nihil à nobis alienum est; si erranti comiter monstranda est via; si beati sunt εἰρηνοποιοὶ*: subeundum & hoc periculum aliquando nobis est, sed non à quolibet non sine magna cautione subeundum. Videndum ante omnia est, ne litigantes existiment, nos, cum illos conciliare studemus, hac ratione supra eos eminere velle, affectare aliquod in illos imperium, atque auctoritatem. Omnia dicta nostra non tantum verum redoleant pacis & concordiae amorem, sed germano etiam sint ubique modestiae colore tincta: quæ virtus, si quid hoc in negotio efficere volumus, non satis nobis inculcari potest. Quod si enim partibus, quas conciliare volumus, vel molliissimis verbis exprobramus cæcitatem, quod non videant ea, quæ nos videmus: actum plerunque est, nullaque postea ratione homines semel irritati movebuntur. Multo minus irridendi illi nobis erunt, tanquam qui de umbra asini tam diu inter se certaverint. Ridere Logomachos utile est adversus Logomachias

reme-

*an vero
ridere sit
utile?*

remedium, sed utile plerunque non ad sanandos eos, qui propterea ridentur, sed cæteros, qui sibi cavent ab eo, quod, in aliis rideri, animadvertunt.

§. 16. Quod si igitur litem inter duos *Conciliatio inter Logomachos quomodo instituenda.* Logomachos componere est animus: non opus est, ut hoc statim ab initio profitearis, cyclici illius apud Flaccum Poëtæ exordium imitatus. Sententiam hic meam dicere ineptum fortasse est, præsertim, si ad levia quædam descendero: si tamen ineptire mihi licet, modum præscribam, agendi cum Logomachis, ut quis in eorum animis sanandis scopum propositum facilius, ut puto, assequatur. Pugnant inter se Cajus & Titius, ac revera sibi dissentire videntur, cum verbis tantum dissentiant. Hic vero seorsum prius Cajum adito, ab eoque sententiæ suæ, in qua à Titio diffidet, explicationem petito: dic verba, quæ disputationis causam esse vides, te non satis intelligere, neque eorum explicationem exigere desine, donec hominem ab ambiguis verbis paulatim ad clariora abduxeris. Ibi tu ea diligenter excipe, atque ex dictis excerpe verba omni ambiguitate carentia, iisque sententiam illius expone, tanquam periculum factururus, an ejus mentem intelligas: dic, te ita capere

capere illius sententiam, quære an recte capias; si denique annuit, tu quasi memoriæ non satis fidens, scribe verba eaque ipsi prælege: si & lecta probat, tu, gratiis pro clara & perspicua explicatione actis, Titium adi, eademque ratione cum illo age. Postquam ita ab utroque claræ sententiæ explicationem elicuisti: Cajo Titii, Titio Caji sententiam, sed jam clare expositam, propone; tumque, si neuter alterius sententiam damnare audeat, optime utrumque conciliabis.

*Quomodo,
si scripto
litigantes
conciliare
velis.*

§. 17. *Scripto autem libro si conciliare duos de verbis concertantes conaris: neque hic opus est, ut statim in fronte liber huius illiusve Logomachiae compositionem promittat. Satius est, ut videaris primo inquirere velle dissidentium genuinam sententiam, eamque verbis perspicuis, quantum fieri potest, explicare, ut quousque convenient, qua in re dissentiant, perspicue discerni possit. In hunc finem conquire primum omnia, in quibus disputantes revera conveniunt, eaque postquam clarissime proposuisti; in singulis proba ac demonstra convenientiam ex utriusque partis tum hypothesibus, tum diserte dictis.*

His peractis, profer verba illa, in quibus omnis dissensus relictus esse videtur.

In-

Inquire in eorum vim, fac, ut enumeres accuratissime omnes sensus, quos verba admittunt, præcipue duos illos, quos adversarii subjiciunt verbis iisdem. Tum vide, quomodo uterque adversariorum verba accipiat: utriusque sensum cum invenisti, clare protulisti, ex antècedentibus, consequentibus, scopo, aliisque diserte dictis auctoris demonstrasti: ostende id, quod verbis his & hic & ille significat, inter eas esse sententias, in quibus dissidentes convenire, jam ante probaveris. Hic igitur tandem conclude, te verum dissensum inter disputantes anxie quæsitum invenire non posse: nolle quidem prorsus negare, aliquem inter disceptantes esse; conspicuum tamen esse non posse, qui tanta à te diligentia investigatus inveniri nequeat: ad eandem igitur diligentiam acutiores te invitate: interea tutissimum tibi videri assensum cohibere; illud enim plurimum referre, ut nihil credas, nisi quod verum est; quantus vero inter Cajum & Titium sit dissensus, tua non tantopere interesse.

Hanc ego cum Logomachis transigendi formulam præscribo, non quod existimem, esse optimam, sed ut significem, arte & dexteritate opus esse, si quis homines

mines istos sanare, non irritare velit; illos vero, in quibus major est dexteritas, excitent ad aliam commodiorem atque efficaciorē huic morbo medendi methodum inveniendam.

C A P. X.

De Præservativis, ut appellant, adversus Logomachias novas.

§. I.

QUa ratione à Logomachiis optime nobis cavere possimus, in superioribus maxima ex parte, arbitror à nobis esse commonstratum, cum *causas* hujus morbi, *eas præsertim quæ in nobis ipsis sunt*, indicavimus. Ille enim has verborum pugnas vitabit facillime, qui causas earum vitabit. Veruntamen quoniam nunquam satis quædam inculcari possunt, universa denuo oculis subjicienda sunt, quæ ad scopum nostrum sunt accommodata, quæque tum *in docenda nostra*, tum *in discenda aliorum, quam confutare volumus, sententia* sunt observanda. Docemus aut voce aut scripto. In utroque videndum nobis est, ut *non tam doceamus verba, quam res*: qui enim verba discipulo suo magis inculcat, quam res; facit,

*Non tam
verba,
quam res
docenda.*

facit, ut pro verbis postea acrius, quam pro rebus ipsis digladietur; facit; ut is ferre non possit eos, qui aliter loquuntur, atque ipse loqui didicit, quamvis idem prorsus sentiant.

Hic iterum iterumque monendi sunt *Præcepto-
rum in his
officium.*
Præceptores, ut mature discipulos suos ad hoc assuefaciant, ut in verbis atque in

cortice ne hæreant, sed nucleum in illis quærant, ubique sensum eumque clarum, quantum cujusque ætas fert, & distinctum investigent. Non tum præclare munere suo se defunctos esse putent magistri, cum non sine ingentibus plagis verba quædam, *Mos per-
versus
instituenti.*
nescio quando intelligenda, memoriæ discipulorum intruserint: quæ, cum recitari audiunt, sibi ipsi plaudentes, En, inquit, quid disciplina possit? Ut recitat! quam celeriter, prompte, expedite! Psittaci ista laus est. Quanto laus homine dignior! Quam luculenter in ista ætate ratio, qua homines sumus, se exerit? quam clare adolescentulus ista intelligit, quam sane judicat, quam acute hæc discernit, quam apte ad interrogationem quomodocunque propositam respondet?

Judicet quilibet pro captu suo de adolescentium institutione; mihi illi plus didicisse videntur, qui, quæ intelligunt, qua-

qualitercunque balbutiunt, quam ii, qui, quæ non intelligunt, expeditissime recitant. Eos, qui verba reperire vix possunt, quibus sententiam exprimant, longe illis antepono, qui sententiam verbis, quæ in promptu habent, subjectam invenire nequeunt. Hoc autem ut evitetur, differantur, quantum id res patitur, omnia illa in ætatem adultiorem, quæ si doceantur, certo scire possumus, discipulos per ætatem nihil nisi verba discere posse: qualia sane multa in Grammaticis, Logicis, & Rhetoricis systematibus occurrunt; ex quibus artibus, si quædam excerpamus ad captum puerorum accommodata, ut his mature imbuantur, non inutile id erit: sin has artes integras huic ætati tradere voluerimus, verissimum inveniemus illud Verulamii, *eas provectioribus magis, quam pueris & tironibus convenire: Logicam & Rhetoricam esse ex artibus gravissimis; cum sint artes artium, altera ad iudicium, altera ad ornatum.* Hic si multa discuntur, quid aliud quam verba discuntur? Logica aut Rhetorica in ore recitantis, cui nulla respondet in intellectu, definiri potest, ut Echo apud Aufonium:

Verba Verulamii
de augm.
scien. l. 2.
p. 90.

*Aëris & Linguae - filia, mater inanis
Indicii, vocem quæ sine mente gerit.*

Qui

Qui ita artibus imbuti sunt, cum disputant, non nisi de verbis disputare possunt: & quoniam *terminos artium*, vulgo inauditos, qua data occasione, orationi inferentes, imperitis admirationi sunt; quovis pignore contenderent, se artis reconditissima tenere; cumque pro vocibus suis pugnant, jurarent, se pro aris ac focis pugnare.

§. 2. Hoc quoque, si *discipulos adversus Logomachias munire volumus*, observandum nobis magnopere est, ne illos in tenera *atate nimis assuefaciamus studio contradicendi*. Ut enim vix fieri potest, quin interdum mentiantur, qui semper volunt loqui: ita non possunt, quin in Logomachias sæpe incidant illi, quibus volupe est omnia aliorum dicta oppugnare. Memini, sæpe mihi objectum esse à multis, majorem, quam in aliis, contradicendi pruritum observari in nobis omnibus, qui in Scholis atque Academiis adolevimus, ac nescio quam disputandi consuetudinem, quam in Schola imbibimus, ad vitam quoque civilem, familiaria colloquia, ac quotidiana negotia nos afferre: idque nos plerunque ingratos, molestos, sæpe etiam ridiculos facere. Et, si verum fateri volo, deprehendi sæpe in me & aliis aliquid huic, quod nobis exprobrant illiterati, valde af-

Discipuli in tenera atate non nimis assuefaciendi studio contradicendi.

Nimium disputandi exercitium quam sit noxium.

R

fine;

*Quales esse
debeant
disput. stu-
diosorum.*

fine; saltem ego, nobis hac in parte prorsus injuriam fieri, non nimis clamarem. Quo magis videndum nobis est, ut ita discipulos in disputando exerceamus, ut fructus, qui in disputationibus sperantur, non sint minores malis & vitiis, quæ ex earum abusu proveniunt. Discant in iis adolescentes non aliorum tantum sententiam oppugnare, suam pertinacissime defendere: sed discant æqui esse, patientes, modesti, attenti, dociles; discant veritati credere, sententiam aliorum elicere, cum sua comparare, optimam eligere. Bonitatem oppositionis ne metiamur tempore, quo quis argumentum, uti loquuntur, urserit; ne adolescentes existiment, eandem disputatorum rationem esse, quæ eorum, qui pila ludunt, ubi, qui ultimo eandem pilam in adversam partem torquet, peritissimus lusor habetur. Neque etiam in disputatione omnia ponantur: excogitentur aliæ studiosorum exercitationes, e quibus non minus utilitatis capiant, quæque vitia in disputando contracta corrigant. Doceantur non tantum propositam thesiam oppugnare & defendere: sed veritatem absconditam invenire, nodum difficilem solvere, de inventis à se & ab aliis acute judicare, inventa
sua

fua & aliorum perfpicue, eleganter, ficubi opus eft, aliis exponere.

Affuefcant adolefcences meditari, animum intendere, attentionem confervare, ordine conveniente à cognitis paulatim ad incognita progredi, omnia, quæ difcant, ex principiis fuis deducere: certa ab incertis, evidentia à verifimilibus, magis probabilia à minus probabilibus difcernere: affuefcant quoque ignorantiam fuam in plerisque rebus animadvertere, ut difcant ingenio fuo & fcientiæ diffidere, iudicium fæpe cohibere, ac tardi efle quidem in affentiendo, fed in condemnando longe tardiores. Exerceantur in iis, ubi difputationibus locus non eft, quales funt Arithmeticæ & Geometricæ demonstrationes, adverfus quas, fi quis argumentari vellet, merito fuo ab omnibus rideretur: quæ difciplinæ ad fcopum noftrum propterea quoque utiliffimæ funt, quia nullæ aliæ magis à verbis nos ad res ipfas deducunt. Hæ folæ ab omnibus vocabulis nihil fignificantibus penitus funt perpurgatæ: in his folis in eo nemo fallitur, quod voces quasdam, quibus nulla in mente diftincta refpondet notio, memoria tenens, rem ipfam fibi intelligere videtur. Scio, non cuilibet licere in his artibus

Qua alia exercitia difputationibus adiungi debeant.

Demonstrationes Arithmetice & Geometricæ.

consensescere, sed προπαιδείας loco periculum in iis facere, saltem in eum finem, ut mature discernere discamus, quid sit scire, quid sit nescire, ac propterea, quid nos ipsi sciamus, quid nesciamus, ubi nuda verba, ubi res ipsas teneamus, omnibus licet, omnibus utile est, si non necessarium.

*Quomodo
libri sint
scribendi,
ut Logoma-
chiis occa-
sio praecida-
tur.*

§. 3. Jam ostendendum nobis quoque erit, *quomodo libri sint scribendi, ut Logomachiis occasio praecidatur*, quia ita fere evenit, ut novus liber novas nobis pariat Logomachias. Quod si igitur sententiam tuam scripto libro exponere cupis: ante omnia videto, ut tuam ipse sententiam probe intelligas, neu primum verba fundas, quorum sensus postea sit quærendus. Tanto magis alii te intelligent, quo magis ipse te intelligis.

Ubi tria accuratissime tibi sunt perpendenda: primum, *quid sentias*, i. e. qua de re & quodnam tuum sit iudicium: deinde *quomodo ita sentias*, certone id cognoscere tibi videaris & evidenter, an verisimile tantum & probabile tibi videatur: sentiasne in te vim illam quam rei evidentia, quæ ad assensum nos cogit, nobis inferre solet, an aliquam non assentiendi, si velles, libertatem deprehendas: denique *quare ita sentias*, an habeas sententiæ tuæ
argu-

argumenta, an vero ideo tantum ita sentias, quia lubet, quia sententia optabilis, quia ita credere utile tibi, aut jucundum aut honorificum videtur; quia vulgo ita sentiunt, aut, qui morbus huic est contrarius, quia vulgo aliter sentiunt: & si argumenta habes, sintne illa necessaria, an contingentia, magis an minus probabilia: necessarione ex illis, quod probare cupis, sequatur, an quomodo conjici possit.

His omnibus probe excussis, tum demum ad scribendum accede: tum demum verbis expone, quod mente adhuc pressisti, sed ita expone, saltem in hoc omnes intende nervos, ut non possit non ab omnibus mediocriter attentis intelligi & *quid* sentias, & *quomodo* & *quare* ita sentias. Sit in omnibus, quæ scribis, genuinus quidam *ingenuitatis* & *candoris* color. Accedat *perspicuitas*, quanta potest, maxima. Deduc lectorem eadem via in cognitionem sententiæ tuæ, qua tu in eam pervenisti, fac, ut videat, qua cogitationum serie huc tandem veneris: quære verba maxime significantia, quæ cogitata tua menti lectoris quasi imprimant: Labora tu in verbis & eorum ordine, ut tanto minus in sententia invenienda animus lectoris laboret. Persuade tibi, posse aliquem nimis

ornate, nimis acute, nimis sublimiter, nimis copiose, nimis presse, nimis venuste loqui: nimis perspicue docentem loqui non posse. Cogita, te scribere non doctis modo, sed rudibus; non ingeniosis modo, sed stupidis; non hoc tantum, sed aliud agentibus; non vacuis tantum, sed occupatis; non attentis modo, sed volaticis ingeniis; non amicis modo, sed æmulis; non bonis tantum interpretibus, sed malitiosis etiam calumniatoribus: plures in libro tuo errores quæsituros, quam veritatem.

Hoc maxime observandum tibi est, *cum aliquid novi profers*, hic enim nisi summam adferas modestiam, alii, quibus inauditum hoc videtur, te sibi insultare arbitrantur; nisi summam perspicuitatem, nullæ tam atroces blasphemix, nullæ tam periculosæ hæreses erunt, quæ in libro tuo non invenientur. Tum sane in sententia explicanda prorsus esto morosus, ut tibi non satisfacias, nisi ita eam expresseris, ut ex verbis tuis nemo sanæ mentis aliud, quam tu dicere volebas, sine summa impudentia exsculpere possit. Perpende omnia tua verba, omnes loquendi formas, vide, nihilne in iis ambiguitatis lateat. Ab *ambiguis*, si potes, *abstine*: sin minus, seque-
re

re & hic Geometras, accuratissimilque & clarissimis *nominum definitionibus* voces ab ambiguitate libera. *A vulgari verborum significatione sine causa ne recedito*, sed si id necessarium est, ad easdem nominum definitiones confugito, easque ita proponito, ut appareat te nudos sonos, nuda nomina definire; ne super definitione lis tibi intendatur: à vulgari vero significatione te recedere, non amore novitatis, sed quod aliter sententiam tuam exprimere non possis.

Si qui coguntur multis in libro aliquo verbis uti ambiguis, aut consuetas vocabulorum significationes mutare; multas Logomachias præcavebunt, si libro *indicem horum verborum* adjungent cum accuratissimis singulorum definitionibus: in ipso autem libro hæc verba à cæteris aut *characteribus diverso*, aut *alia nota* distinguunt.

Locuti sumus supra de Lexico, quod utile esset Logomachiis sanandis: *Lexicon* quoque utile esset *Logomachiis præcavendis*, si tale adornari posset, ubi voces eruditæ usitatæ unico modo omnes clarissime definirentur; sique adigi possent aliqua ratione eruditi, ut *in hac vocum acceptione omnes convenirent*. Hoc fieri posse, docent Mathematici: quod si enim illi in significatione verborum sibi priorum accuratissime

Lexicon Logomachiis præcavendis utile, quod esse deberet.

sine consentiunt, quare idem in aliis disciplinis sperari non possit, non video.

Quomodo
legendi sint
libri, ut Lo-
gomachiis
ocasio præ-
cidatur.
Ante le-
ctionem re-
quiratur
voluntas
intelligen-
di,

§ 4. Quomodo libri sint scribendi, ut Logomachiis occasio præcidatur, diximus: jam quomodo legendi sint iidem, videamus. *Ante lectionem* duo ab lectore requirimus: *voluntatem* librum intelligende & *facultatem*. Voluntatem appellamus *aequitatem* sive *justitiam*, quæ hic nihil aliud est, quam *constans voluntas suam cuique scriptori sententiam ubique tribuendi*. Ad hanc æquitatem commoveat nos justissima illa naturæ lex: Quod tibi non vis fieri, alteri ne feceris. Cum enim alii nobis injuriam facere, absurdamque, quam detestamur, sententiam nobis affingere videntur; quam querimus, quam clamamus? quam inglorium vincendi genus hoc nobis videtur? quam abjectum, quam turpe? hominis hoc esse dicimus malitiosi, invidi, fraudulentum, perfidi, nequam; hominis imperiti, turpisque inscitiae sibi conscii, qui, cum videt, se parum sapere, alios prorsus desipere fingit, ut habeat, quo se illis anteponat. Videamus ne, dum alios condemnamus, nos ipsos condemnemus, aut, quod turpius est, nobis condonemus, quod tantopere in aliis horremus, Moenio illi similes, de quo Satyricus:

Ma-

Mænius absentem Novium cum carperet:
heus tu!

Quidam ait, ignoraste? aut ignotum dare nobis

Verba putas? egomet mi ignosco, Mænius inquit.

Facultatem intelligendi ad lectionem libro- *or facul-*
rum afferemus, non modo si nihil legimus, *tas.*
quod supra captum nostrum est, quodque
hac ætate, hoc ingenio, hac eruditione,
hoc rerum usu intelligere non possumus:
sed vel præcipue si animum ad lectionem
afferimus vacuum ab affectibus pravis &
præjudiciis, quæ non invitos à vero verbo-
rum sensu abducent. Ab his, quid nos pur-
gare possit, in superioribus vidimus: ad-
datur illis remediis tantus amor veritatis,
ut reliquos omnes in nobis affectus supe-
ret. Dulce alicui vinum videtur, quamvis à
vite à se plantata non provenerit, non in
horto suo creverit, non è cella sua deprom-
tum sit, nunquam ante fuerit gustatum: Ita
si quis veritatis dulcedinem gustare novit,
ei dulcis, amabilis, appetenda videbitur
veritas, quocunque in libro, veteri, no-
vo, à quocunque, amico, æmulo, ini-
mico scripta fuerit.

Videndum in primis est, ne aliorum nos *Caven-*
judicia auferant, ut nostro uti non possi- *dum ne a-*
R 5 *liorum nos*
mus.

*judicia au-
ferant.*

mus. Resistendum est huic torrenti; si sententiæ sunt vulgi de rebus supra cap-
tum vulgi,

Omnes unius æstimemus assis.

Sin sapientum nobis judicia videntur; co-
gitemus, nos aut ita sapientes esse, ut de
aliorum sapientia judicare possimus, aut
non esse: si sumus; male judicia nostra
aliis submittimus, cum longe facilius sit
judicare, de sententiæ unius aut alterius
veritate, quam de hominis alicujus sapien-
tia: si non sumus, inepte aliorum senten-
tiam sequimur, quos sapientes esse, scire
non possumus.

Sit præterea nobis in libri lectione pro-
positum, ex eo proficere; veritatem,
tametsi in barbara tellure inventam exo-
sculari; rejicere perspicue falsâ; in dubiis
assensionem cohibere: non autem scopus
noster sit ante libri lectionem, id quod
nondum cognoscimus refutare. Ita enim
in singulis versibus quæremus aliquid,
quod refutare possimus: idque innumeras
pariet Logomachias.

*In ipsa le-
ctione re-
quiritur, ut
lector sit
attentus,*

§. 5. In ipsa lectione duo à lectoribus re-
quirimus, ut attentī sint, & cauti. *Attenti*
sint non ad verborum sonum, sed rem ver-
bis significatam: attentī ad scriptoris, quem
legunt, scopum; ad verborum, quæ inter-
pre-

pretantur, vim; ad antecedentia, consequentia; ad alias ejusdem auctoris sententias; ad clariorum & obscuriorum, quæ ex clarioribus sunt interpretanda, convenientiam; ad principiorum & hypotheseum connexionem; ad praxin; ad rationes & argumenta, quibus quæque sententia probatur; ad multa alia, quæ vix enumerari possunt, quæ ea, quæ universalius dici videntur, varie restringunt atque limitant. Legantur hic quæ passim Theologi, Jurisconsulti, ac Logici de interpretatione, bonique interpretis officio docent: neque legantur tantum, sed observentur.

At non attentum modo librorum lector *et caninus.* rem esse decet, qui in Logomachias incidere non vult, sed *caninum etiam et circum-* spectum. Res illi est cum verbis, quibus nihil est fallacius: quod promittunt scribenti, non præstant, sed sæpissime & scriptorem & lectorem decipiunt. Ac lectorem quidem facile plerunque decipere possunt, si absurdam scriptori tribuunt sententiam: lectoris enim philautia cum illis colludit, ei-que persuadet, ut in erroribus aliorum credendis haud difficilem se præbeat; id enim supra alios se efferre. Versetur igitur in lectione librorum tanquam in terra peregrina, valeatque hic vetus illud, *ναφε ζειναι καὶ μέμνησο ἀπιστεῖν*: tum præcipue, cum verba scri-

Lib. 3. de
Repub.
c. 46.

scriptoris absurdum dicere videntur. Non imprudens est Florentini monitum, *ut quis, cum hostem aliquid agere cernit, quod abhor- rere videatur à ratione, suspicetur, dolum sub- esse.* Ita sane cogitemus, verba auctoris non prorsus desipientis, cum absurdum dicere videntur, nos decipere, in insidias, in Logo- machiam, quæ nos ludibrio hominum ex- ponat, perducere velle. Tum duplicanda nobis est cautio, neque certo absurda illa o- pinio auctori tribuenda, donec videamus, quid illum fefellerit, qua cogitationum serie inde à primis principiis huc delapsus sit, quousque recta via processerit, quan- do primum, qua falsa veri specie decep- tus, aberraverit.

Conclusio.

Hæc de Logomachiis meditati sumus, morbo, qui facile sanari posset, si modo, qui eo laborant, sanari vellent: ego qua ratione possint, monstravi, & ut velint, quantum potui, laboravi. Qui & ipsi sa- nari nolunt, & alios ejusdem morbi con- tagione corrumpunt; illos aliis curandos relinquimus, ad hoc enim nos neque in- genii, neque, quod hos maxime movet, auctoritatis satis habemus; nostris interim discipulis tanquam efficacissimum ad Lo- gomachias præcavendas remedium denuo inculcamus illud Apostoli; ἀφίστασθε ἀπὸ τῶν τοιούτων.

DIS-

DISSERTATIO
DE
METEORIS
ORATIONIS.



DISSERTATIO DE METEORIS ORATIONIS.

I. **M**eteora orationis, ne quis nomine
deceptus nescio quid magni ex-
pectet, nihil sunt aliud, quam *dicta in*
speciem sublimia, revera inania atque vitiosa;
quam appellationem à Longino Rhetore
accepimus, qui ὑψηλὰ in oratione & με-
τέωρα ita distinguit, ut illis vere sublimia,
his vanam granditatis speciem præ se fe-
rentia * denotet. Qua in re infelix, ut
aliorum, vocabuli fatum fuit: nam cum
ante idem quod ὑψηλόν significaret, factum
est abutentium culpa, ut in pejorem par-
tem traheretur. Illi enim, qui scientiæ
aut eloquentiæ sublimitatem ostentaturi,
qua data occasione, de cœli meteoris lo-
quebantur, μετέωρα sua identidem cre-
pando, id tandem consecuti sunt, ut
peculiari nomine μετεωρολέσσαι dici cœpe-
rint, qua voce, si Hesychio credimus,
notantur οἱ τὰ περὶ ὕραν ὡν μετέωρα Φλυαροῦ-
τες: unde & ipsa vox nescio quid odii con-
traxit, ut μετεωρολόγοι non modo dice-
rentur

*Meteora
orationis
quid.*

*Longinus
auctor vo-
cabuli.*

* *Gallis
dicuntur
des ma-
nieres de
parler
guindées:
Germanis,
berstie-
gene ste-
den.*

*Hesych.
in hac
voce.*

Abusus nominis Phœbi apud Gallos. Parler Phœbus.

rentur μεγαλορρήμονες atque inepti gloriosi, sed omnia in oratione vitiose sublimia μετέωρα à Rhetoribus appellarentur: prorsus, ut propter abusum nominis Phœbi evenit, ut omnes, qui altius in oratione, quam decet, se extollere volunt, Gal-
lis hodiernis Φαιβολογεῖν *Phœbum loqui* dicantur.

Sublime in oratione, quid. ὕψος & μέγεθος an differant.

**Boileau, Despreaux, summus Poëta.*

II. Quid in oratione μετέωρον sit, nequit intelligi, nisi prius, quid revera sit sublime, cognoscamus: id quod ante omnia planum est faciendum. Sitne idem ὕψος *Longini* & μέγεθος *Hermogenis*, uti plerisque placuit, an hæc inter se differant, ut *Tanaquillo Fabro* visum fuit, atque elegantissimo Viro, cui *Gallicam Longini versionem* * debemus: decidere nolumus. Confundant hæc, distinguant, quibus lubet: nobis dicendi præcepta tradere, non Rhetorum vocabula interpretari propositum est.

Ad sublimem orationem quid requiratur.

III. Ad grandem atque sublimem orationem, his enim vocibus idem significamus, primum omnium requiritur, ut res, de qua dicimus, grandis sit atque sublimis. Alia ab hominibus pluris, alia minoris æstimantur, quæ pluris æstimantur majora, quæ minoris, minora dicuntur: quæ inter majora excellunt, ea magna, gran-

grandia & sublimia vocamus ; produ-
cuntque hæc in hominibus admirationem,
quemadmodum ea, quæ prava sunt, con-
temptus sequitur.

Sunt igitur *magna & sublimia* ea omnia, *Res subli-
mes qua-
nam.*
*qua, quod inter illa, quæ homines aliis præ-
ferre solent, excellunt, admiramur.* Ita
Reges magni sunt, quia eminent inter
homines in dignitate constitutos, quos
aliis anteponimus: Majores qui excellunt
inter Reges: Maximus Rex Regum &
Dominus dominantium: eademque ra-
tione *actiones, & res magnæ* dicuntur.

Magna vero sunt non tantum *bona*, sed *Res magna
& subli-
mes bona
& mala.*
etiam *mala*, quoniam & hæc in suo genere
excellencia admirationem pariunt: sic
magna crudelitas dicitur, magnum flagi-
tium, magna clades, magna miseria,
magna jactura & id genus alia; quæ bo-
nis, quæ in suo genere eminent, non
modo non minora, sed majora vulgo ha-
bentur: eos enim in hominibus affectus
excitant, qui *objectum* suum, ut loquun-
tur, mirum quantum augere & in majus
extollere solent: ut sunt ira, indignatio,
metus, tristitia, terror, desperatio: qui
affectus tanto sunt in hominibus vehe-
mentiores iis, qui circa bonum versantur,
quo major est fuga mali, quam appetitus
boni.

boni. Hinc est, quod Reges valde superbi malint metui, quam diligere; quia parva etiam homines amare, sed non nisi magna metuere solent; amorque sæpe contemptui vicinus est, nihil vero minus contemnimus, quam quod valde timemus. Malunt autem isti homines magni, quam boni videri; prorsus, ut boni appellatio multis nescio quam pravitatis significationem habere videatur.

Oratori
quid
magnum.

Hic vero non semper necesse est, ut res, de qua dicit Orator, sit magna *iudicio Philosophorum*, qui in pretio rebus statuendo cum vulgo non conveniunt; sufficit, si talis est, aut *communi hominum opinione*, aut *apud eos, apud quos dicimus, tum cum diximus, atque ibi, ubi dicimus*. Sic Imperator, etsi divitias contemnat, cum milites spe prædæ ad prælium vult inflammare, potest de ea magnifice loqui: de injuria etiam, tanquam de re magna dicere licet Oratori, quam fortasse Socrates aut Diogenes nihili faceret. Quin imo, si res per se magna, tanta Auditoribus non videtur, sublimi oratione non est utendum, nisi prius humiliori stylo, magisque rationum pondere, quam verborum magnificentia, id, de quo dicis, revera magnum esse probaveris: tum de-

mum,

num, si non vanis indiciis id te consecutum esse, animadvertis, assurgere potest oratio, atque elatior incedere. Hæcque causâ est, quod pleraque *orationis exordia modestiora* esse conveniat: quia indecorum est tam magnifice loqui de argumento, quod, cum magnitudinem ejus nondum ostenderimus, potest auditori longe minus ac nobis videri.

IV. Neque vero ad dictionis sublimitatem sufficit, magnum orationis argumentum delegisse, ac nonnisi de rebus grandibus dicere velle: *ingenium nostrum argumentum* adæquet, necesse est; ut ejus, quod *eximium* est, *magnam* concipiamus in mente *ideam*, atque ita magnam, ut omnem ejus excellentiam cogitatione complectamur.

*Rei magna
magna concipienda
idea quæ
argumentum adæquet.*

Ingenium hic vocamus insignem *Imaginationis* tum *capacitatem*, tum *vim* & *vigorem*.

Capax imaginatio est, quæ simul aut saltem brevissimo tempore magnam rerum multitudinem, sine confusione, repræsentare potest; quæque propterea grande argumentum incredibili celeritate in omnes partes versat, omnia percurrit, quæ in eo maxime sunt admiranda, omnia cum quibus aut comparatum,

*Capacitas
imaginationis.*

aut quibus oppositum majus videri possit.

Vis imaginationis.

Vis imaginationis in eo consistit, ut ea omnia ac singula tam vivide menti nostræ repræsententur, ut non procul absit imaginatio à sensu, mensque non tam remota imaginari, quam præsentia cernere sibi videatur; quo fit, ut, quos aspectus harum rerum excitaret affectus, hos nuda in nobis excitet imaginatio.

Utraque in poetis maxime conspicua.

Hanc imaginationis & capacitatem & vim præcipue in Poëtis admiramur: Capacitatem, cum imagines suas ex tot partibus componunt, tot in iis circumstantias exprimunt, ut concipi nequeat, qua ratione hæc omnia in mentem illis venire potuerint. Vim & vigorem imaginationis miramur, cum hæc legentes, non tam legere quam intueri nobis videmur, neque ab affectibus, quos præsens harum rerum conspectus concitare solet, temperare nobis possumus. Utrumque ad magnam in mente rei ideam atque imaginem formandam conjungi debet: qui priori carent, eorum *oratio jejuna* est ac *sterilis*, qui posteriori, illi *elumbes* ac *languidi* vocantur. Capacitas imaginationis in *Ovidio* nunquam desiderari potest, nihil eo abundantius; vis interdum requiritur.

De Ovidio judicium.

ritur. Confer hujus *Didonem* cum *Didone Virgiliana*: dices, ibi Poëtam loqui elegantissimum illum quidem, sed tamen Poëtam: at hic *Didonem* ipsam plenam affectus, plenam desperationis.

Virg. lib.
4. *Æncid.*
Ovid.
Epist. *Heroid.* 7.

V. At non omnes in dicendo *imaginationis* sunt partes, non præcipuæ; *judicium* ubique regnare debet,

Judicii
præcipua in
dicendo
partes.

Scribendi recte sapere est & principium & fons.

Horat. in
arte Poet.

Si in carmine non omnia statim effundenda sunt, quæ concitata & luxurians *imaginationis* suggerit, quanto major delectus est habendus in prosa oratione, cujus gravitas longe minus *imaginationi* indulget.

Regat igitur *judicium* *imaginationem*, eique habenas modo relaxet, modo contrahat. Sit illud *acre* omnia pervidens, sit *incompactum*, nihil dans propriorum conceptuum amoris, sit *severum* & inexorabile, nihil indecens *imaginationi* condonans. Tale cum sit, discernat, quid in illa, quam mente concipimus, *imagine* maxime sit admirandum: quid Auditores, hoc loco, hoc tempore maxime commoveat: Num *generatim*, quæ ad rei magnitudinem pertineant, proponere satis sit, an eundem sit *per singulas partes*,

Judicium
fit acre, in-
compactum
& seve-
rum.

an *gravissima* tantum deligenda, an *uni*, quod inter cuncta eminet, sit insistendum idque vividissimis coloribus exprimendum: an etiam *tegendum sit*, quod maximæ admirationi esse volumus, sed ita tegendum, ut nescio quid magni tegi videatur. Fingat imaginem suam, refingat imaginatio, donec iudicio placeat. Vertatur in omnes partes, donec severus iste iudex pronuntiet: *hæc parte maxime est admirabilis, hæc auditoribus obvertenda.*

*Verba
equare de-
bent ima-
ginem ut
imago rem.*

VI. Postquam absoluta est in mente rei magnæ imago atque à iudicio probata: de *verbis*, quibus, tanquam coloribus, eam aliis depingamus, solliciti esse debemus, ut quanta nobis tanta & illis videatur. *Verba igitur imaginem equare debent, ut imago rem:* unde & hæc in grandi oratione grandia & sublimia esse oportet. Fit autem hoc tribus modis: *auctoritate utentium, sono, & significatione.*

*Grandia
verba fiunt
vel aucto-
ritate lo-
quentium,*

Auctoritate utentium sublimia sunt verba, quæ non ex hara, ex ergastulis, atque ex triviis petuntur, lixis & calonibus in deliciis sunt, sed hominum liberaliter educatorum, nobilium, atque in eminentia constitutorum communi usu trita. Qualia verba in omnibus linguis politiores atque elegantiores ab iis, quæ sordido-
rum

rum hominum usu viluerunt, facile distinguunt. Verba cum dico, phrasas etiam, quas vocant, proverbia, & quæ sunt his similia, intelligo.

Sono grandia sunt verba, incisa, membra, periodi, hæc enim omnia ad verborum sonum pertinent, si maiorem sonum edunt, si aures implent, percellunt, & tantum non terrent aliquando, ut cum apud *Virgilium* venti ex cavernis erumpunt, aut cum

Vel sono,

lib. 1.
Æncid.

crines effusa sacerdos

Tercentum tonat ore Deos, Erebumque

lib. 4.
Æncid.

Chaosque

Tergeminamque Hecatē.

aut cum apud *Claudianum* Ceres, amissa filia,

De Raptu
Proserpinæ.

totò bacchatur Olympo.

Sed hæc auribus dijudicantur, quas alii aliis elegantiores habent.

Maxima vero verborum sublimitas in *significatione* consistit: ubi nemo est, qui nescit, aliud vocabulum plus alio significare: ita amare plus significare, quam diligere; flagitare, quam petere; erumpere, quam evadere. Ad orationis igitur granditatem non tantum facit, vocabulis uti, *quæ res magnas significant*, sed ea deligere, *quæ plus significant*. Ita

Sed maxima, significatione.

grandius est illud : *furor arma ministrat*, quam si *iram* Poëta dixisset.

*Significa-
tiones se-
cundaria.*

Sunt autem præter notiores & *præcipuis* cujuslibet vocis *significationes* innumerabiles aliæ, quas cum illis usus hominum conjunxit, *secundarias* quidam vocant : ita si quem furem appellas, non id tantum dicis, abstulisse hunc hominem aliquid invito Domino, quæ præcipua vocis est significatio : alia plura simul innuis : te illi homini iratum esse, verbo hoc te vindictam quærere, te illum de industria offendere velle, & usque eò contemnere, ut iram illius provocando ultionem non metuas : significas etiam aliquando hoc verbo, te hominem esse parum politum.

Pauca sunt verba, quæ non complures hujus generis *significationes* adjunctas habent ; quæ cum in omni orationis genere, tum in sublimi potissimum sunt observandæ, non modò, ut nihil significemus voce, quod significare nolumus, sed ut his quoque verborum *significationibus* orationis sublimitatem augeamus. Quantum Cæsar dixit, cum unica voce, *Quirites*, seditiosum exercitum compescuit ? frustra in Lexicis quæres omnes hujus verbi *significationes*, quas milites tumultuantes, illo audito, intellexerunt. Imo dicere possu-

Suetonius
in Julio
Cæsare,
p. 70.

possumus, nullâ re orationem grandiore fieri, quam vocibus, quæ multas hujus generis significationes habent. Sic enim fit, ut in paucis verbis iisque simplicissimis grandis lateat sensus, quo nihil est in oratione sublimius.

Nulla re Oratio fit grandior quam vocibus quæ multas significationes habent.

Ita *Valerius Poplicola* vindex Romanæ libertatis, qui Romanis in regni affectati suspensionem venit, ob ædes in monte *Velia* exstructas: *Non obstabunt*, inquit, *Publii Valerii ædes libertati vestra, Quirites, tuta vobis erit Velia. Deferam non in planum modo ædes, sed colli etiam subjiciam, ut vos supra suspectum me civem habetis. In Velia adificent quibus melius, quam P. Valerio creditur libertas.* Nihil sublimius legi potest; at ut videas, quam pauca verba quantum significare possint, dele repetitum *P. Valerii* nomen, & illa verba, *suspectum civem*: videbis quantum de sublimitate eorum detraxeris.

Exemplum Valerii Poplicola. Liv. Decad. 1. lib. 2. c. 8.

Jam illa *Ciceronis*: *Senatus hoc intelligit, Consul videt, hic tamen vivit*, quam sublimia sunt? quantum significant hic verba, *Senatus, consulis* à Cicerone Consule in Senatu dicta? quanto minus dixisset, si dixisset: *Vos hoc intelligitis & ego video?* Eum in finem inventæ sunt *figura*, ut præter rem affectus nostros declararent; Ita

Ciceronis orat. i. in Catilinam.

in eadem oratione, cum Cicero exclamat: *O tempora ô mores*, non simpliciter morum temporumque perversitatem notat; sed simul exprimit, quanto se dolore hæc morum temporumque depravatio afficiat. Alios *affectus* aliæ *figuræ* produnt.

Tropis quomodo grandior fiat oratio.

Tropis etiam grandis fit oratio, *metaphoræ* præcipuè, sed in loco adhibitis: nunquam autem iis locus est in sublimi oratione, nisi sint *necessarii*, aut ad orationis varietatem, aut cum propria verba rei magnitudinem non satis exprimere videntur; tum vero recurrimus ad voces, quæ res majores significant, easque cum propriis permutamus. Sed in troporum doctrinâ Rhetores multi sunt, imo nimii.

VII. Quæ hæcenus dicta sunt, sufficere plerisque videbuntur ad dictionis sublimitatem; sed unum mihi restare videtur, quod haud scio an sit præcipuum. Orator non argumentum modo suum oratione depingit, sed se ipsum, *ἔστιν ἐκ παντός λόγου ἰδεῖν τὸ ἦθος τῆ γραφοντος*, verissimè Demetrius ait. Videndum igitur in sublimi genere, ut non *rem* modo *sublimem* pingamus, sed *animum*. *Animum* dico, non ingenium, quod in animo humili & pusillo interdum magnum est.

lib. τερτ. ἐρμηνείας.

Et animus in sublimi genere pingendus.

Magnus animus qui nam.

Est autem *magnus animus* atque excelsus ejus,

ejus, qui omni affectu ita in res magnas atque eximias fertur, ut his unice delectetur, his lubentissime occupetur, atque adeo totum se his tradat, ut ea, quæ viles animæ maximi faciunt, tanquam ad se non magnopere pertinentia, despiciat; in omni fortunâ sibi constans, semper liber, semper sui juris, verus, simplex, apertus, recti tenax; conservans ita dignitatem suam, ut propter nullius rei aut spem aut metum, aut aliam quampiam perturbationem, ad ea, quæ se indigna judicat, demittatur, atque abjiciatur. Talem se pingat Orator, si majestatem orationi quandam vult conciliare.

Talem se pingit *integro orationis habitu*, *Pingit se integro orationis habitu.* qui non putidam diligentiam, & Rhetorum scholas redolet, angusti enim animi hæc sunt, sed in quâ elucet eloquentia mascula, simplex, candida; quæ in illis est, qui dicunt, quod sentiunt; qui magis curant, quid dicant, quam quomodo; qui denique bene dicunt, non quod volunt bene dicere, sed quod aliter dicere non possunt. Talem se declarat nobili quadam *dicendi libertate* & *παρρησία*, quam ubique spirat oratio, quæ, ut nihil agreste & rusticum habet, ita aliena est à puerili pudore, servili timore, atque turpi adulatione.

Affe-

*Affectus
generosi in
oratore.*

lib. I. Æ-
neid.

*Sparsis per
orationem
sententiis
animi ma-
gnitudi-
nem prodit
orator.*

*Ut & a-
pophtegma-
tibus pri-
scorum.*

Videantur
plur. apud
Plutarch.

Affectus ipsi, qui in plerisque homini-
bus impotentis animi signa sunt, in tanto
Oratore *generosi* videntur, quales sunt *ira*
Neptuni apud Virgilium: lacrymæ Cice-
ronis in oratione pro Milone.

Sparsis denique per orationem *sententiis*
animi magnitudinem prodit Orator, ita
tamen, ut hæ orationi non de industriâ
assutæ, sed ut sibi nonnisi de argumento
cogitanti, ideo quod res ita ferebat, ex-
cidisse videantur. Hæc animi magnitudo
declarari vix potest, ubi non est: si illam
simulare velis, ostentatio ipsa & affecta-
tio, aut metaphora interdum à re levi pe-
tita, aut figura grandis in humiliori argu-
mento te prodet. In hac animi magnitu-
dine exprimenda regnat *Livius*, cum ubi-
que, tum *in concionibus*. Has cum legis,
non Livium te legere, sed ipsos illos re-
rum Dominos te audire tibi videris.

Huc pertinent quædam priscorum *a-
pophtegmata*. Nolo *furari victoriam*, *Ale-
xander* dixit; si divinandum foret, cujus
hoc esset dictum, *Alexandri* dicerent,
qui *Alexandrum* nossent. Et quis, nisi *A-
lexander*, *Parmenioni* dicenti, *Facerem hoc*,
si Alexander essem, ita respondisset, & ego,
si essem Parmenio. Illud *Casarem vehis*, quan-
tam rem significat, sed quantum etiam a-
nimum? Cir-

Circumfertur hodie dictum Ducis Genueſis, qui in Galliam ire coactus, ut Reipublicæ nomine Regi Galliarum ſe ſubmitteret, poſtquam illi, quicquid Luctetia ſplendoris habet, monſtratum eſſet, interrogatus, *quid in urbe & aula toto orbe celeberrima maximè vidiffet admirandum*: haud cunctatus, *Me*, inquit. Cui reſponſo nihil prorſus deeſt ad ſublimitatem. Maxima res dicitur; unica ſimplici ſed ſignificantiffimâ voce dicitur; ſummamque excelsi animi ſignificationem habet. Hujus ſublimitatis incredibilis quædam vis eſt: ut iſtiusmodi dicta qui legunt, qui audiunt, inter legendum & audiendum ſentiant, cum oratione ſuum quoque animum attolli, & generoſos impetus concipere.

Etiam inimica veritate, in qua hæc ſublimitas apparet, homines delectantur: & quæ alias odium pareret, tunc admirationem excitat. Alexander piratæ vitam condonaſſe dicitur, his verbis cauſſam dicenti: *Ego quoniam unico navigiolo maria infeſto, pirata nominor, tu, quum idem facias magna claſſe, Rex appellaris*. Noluſit nimirum Rex animi magnitudine, quam dictum hoc declarat, piratæ cedere.

Ducis Genueſis reſponſum
nuper Gal-
lis datum.

Pirata magna-
nima
verba ad
Alex. M.

*Sublimis
oratio
quam diffi-
cilius sit res.*

VIII. Ex his, quæ dicta sunt, cuique nunc manifestum est, quantum hoc sit, non unum atque alterum *sublime dictum*, sed *sublimis oratio*. In hac qui excellere cupit, hoc, ut paucis verbis, quæ adhuc dixi, comprehendam, requiritur, ut *magnam quandam rei grandis ideam, simulque animi sui sublimitatem verbis tam significantibus exprimat, ut auditores & in argumenti, & in animi sui admirationem rapiat.* Hujus rei difficultas, si quos ab hoc dicendi genere absterret, sapiunt illi mea quidem sententia, possunt enim in alio genere non modo placere sed eminere. Paucissimi in sublimi dictione tolerabiles sunt, excellit fortasse unus & alter, si modo excellunt. Reliqui omnes, quo magis se attollere volunt, eo magis aut judicii, aut ingenii, aut animi humilitatem produnt, *dumque humum vitant, nubes & inania captant, dum sublimia sectantur, in μετέωρα* incidunt, ut omnis *μετεώρων* origo à male affectata orationis sublimitate proveniat. Sed de his nunc, ut plura dicamus, instituti ratio requirit.

*Ut loquitur
Horatius
art. poet.*

*Meteoror.
orationis
origo à male
affectata
orationis
sublimi-
tate.*

*Tria genera
meteor.
orationis.*

IX. Omnia orationis *meteora* ad tria genera referri possunt, aut enim *oratio vera sublimis rei humili accommodatur*, aut non *vera est in argumento magno granditas orationis* :

nis: aut denique neque res sublimis est, neque vera dictionis sublimitas. Primum genus duas causas habet: vel enim majoris facimus res leves atque revera sunt, & hinc illi clamores; vel existimamus, apte & eleganter de nulla re dici posse, nisi magnifice dicatur. Prius animi humilitatem, utrumque judicii infirmitatem arguit.

Dici non potest, quot sint hujus vitii exempla. Plerunque *literati*, cum de rebus suis loquuntur, nimis magnifica oratione utuntur, fortasse, quia nimis magnifice de rebus suis sentiunt. Omnes dicendi *figuras*, quæ vehementissimos affectus significant, *impendunt*, ut dicant, *quomodo hoc aut illud sit legendum, quid hac aut illa vox significet, quâ methodo ars aliqua sit tradenda, &c.* *Julius Caesar Scaliger*, magnum inter literatos nomen, *Sylvio Filio*, postquam is primâ Latinæ linguæ rudimenta didicerat, accuratiorem hujus linguæ rationem traditurus, ita de hac re loquitur. *Egressum te ex angustiis tenuioris literaturæ, Sylvi Caesar fili, non ante decet inire rationem graviorum studiorum, quam istarum præceptionum causas notas habeas, per quas excellentissima cujusque scientia cursus aperiri debuit. Quanquam enim hac ipsa tenes, quæ certis observationibus recepta sunt, tamen*

Prioris generis causas sedue.

Plerunque literati nimis magnifice de se loquuntur.

Exempl. Jul. Cas. Scaligeri.

Scaliger in præf. lib. de cautilis Latinæ linguæ.

quia

quia sapius dubitare, an ita sit, semper quæ-
rere, quare sint talia, cogi possis, nisi te
exemptum ex his difficultatibus in tuto colloca-
tum videam, vitam mihi acerbam putes. Et
paulo post: *Ætati quidem tuæ, Fili mi,*
quanquam primo in congressu videantur hæc
asperis scula: ita tamen velim cum animo tuo
statuas, Nihil unquam vulgare pretium ullum
opera fecisse. At quanti tandem sit, excellen-
tissimis quibusque rebus à vita ipsius primordiis
assuescere? Itaque tetrica hæc nonnisi barbaris
atque incultis animis terrorem, ac desperatio-
nis facere opinionem, pro nobis vero appeten-
tibus veritatis tanquam armatas stare putes
legiones. Diceres Hamilcarem Hanniba-
lem filium ad bellum perpetuum Romanis
faciendum inflammare: aut saltem Julium
Cæsarem nostrum Sylviū suū, qua
virtute amissum Veronæ principatū re-
cuperare possit, docere; non filio patrem
præcepta Grammatica tradere.

¶ C. Lon-
golii.

L. Vives
de con-
scribendis
epistolis.

Huc pertinet Ludovici Vivis de Christ.
Longolio iudicium, Verba illū, ait, ha-
bere Ciceroniana, at sensu ineptiorem esse,
propterea, quod dicta grandia rebus exiguis
aptarit. Non enim, inquit, satis illi erat,
verba & phrasin Ciceronis miro studio imitari,
nisi etiā totum Ciceronem exprimeret, rem
illam publicam simularet & curam imperii,
quo

quo totus continebatur orbis, privatus ipse & in angulum studiosi secessus abditus, in quo tam erat ridiculus, quam si gigantis vestitum induisset, & verba ac pronunciationem gigantis effingeret, ut gigas videretur. Nunquam magis hoc *meteor*i genus apparet, quam in ejus *Apologia*, in qua ita adversus frivolas quasdam otiosorum hominum accusationes se defendit, ut Rex Angliæ Carolus I. hoc seculo capitis causam dicere coactus, majori verborum magnificentia uti non potuisset. Hæc pluribus facete, ut solet, proseguitur *Erasmus*.

In Cicero-
niano.

In idem vitium incidunt non reliqui modo *Ciceroniani*, sed plerique imitatores. Imitantur maximorum Virorum dictionem, qui? Umbratici homines, in museo latentes, non nisi pueris, adolescentibus, aut quibusdam sui similibus noti. Imitantur loquentes de rebus gravissimis, atque adeo admirandis, qui? qui nihil, quod dicant, habent, si ea exceperis, quæ ad studia literarum pertinent. *T. Livii imitator*, quoties in loci alicujus lectione, aut sententia hæret, non aliter loquitur, ac si Romanus exercitus in *furcis Caudinis* hæreret. Si quis in docendi methodo aliquid innovat, *Salustii amator* ab hoc scriptore colores ad hominis audaciam

Ciceronianis & alii imitatores scriptorum magnorum.

T

ciam

ciam depingendam mutuabitur, quibus ille *Caecilium* depinxit. *Cui Tacitus in deliciis est*, is cum de disciplina Scholastica, aut de artibus tradendis agitur, sententias loquetur, obscura oracula fundet: diceret, cum *occultas Regnantium artes & arcana dominationis aperire*. Frequens *Q. Curtii* lector de lucubratiunculis eruditorum non aliter loquetur, atque *Alexander de Asia subjugata*. Hic imagines *Velleji Paterculi*, quibus tot Heroas expressit, cui libet *amicorum*, quem laudare vult, accommodat. Ille *Bella Grammaticalia & doctorum rixas* describet ea pompa, qua *Florus* bella Populi Romani. Quid quæris? Nulla urbs est tam obscura, nullum oppidum tam parvum, in quo non Romanorum scriptorum imitatores *forum, comitium, rostra, Capitolium, sellas curules, fasces, secures, trabeas, ovationes, triumphos*, omnem denique tanquam in compendio, inveniant antiquæ urbis maiestatem. Qui quidem omnes recte fortasse cum Tityro Virgiliano dicerent:

*Urbem quam dicunt Romam Melibæe putavi
Stultus ego huic nostra similem.*

Magis ridiculi quam ille, qui exiguum fluviolum ita descripsit: *ὁς ἀπὸ τῶν Ταυρικῶν ὀρέων ὀρμώμενος ἐκδιδότ' ἐς θάλασσαν*: tanquam

Deme-
trius.
περὶ ἑρμη-
νείας.

quam si de Nili aut Euphratis impetu fuisset dicendum.

Imo, quod mireris, nostri Romani *Abusus magnorum nominum ex historia Rom.*
Magistratus Romanos togatos pariter & sagatos non in civili modo cujuslibet urbis republica inveniunt, sed in republica etiam, uti loquuntur, literaria. Huicque adeo Reipublicæ *Michael Fernus Poëmata Campani* his verbis dedicat: *Dictatori Perpetuo, Imperatori nostro Maximo, Pomponio Leto, Magistro equitum, cunctæque Reipublice literariae Michael Fernus Mediolanensis* vilis pabulator strennam pugnam, pulchram victoriam. Huc pertinent ii, quibus semper in ore sunt *magna Vetustatis nomina: Magnum illum Alexandrum ajunt: Pyrrhum Epirotarum Regem predicant; Quod Furio quondam Camillo accidit: Hannibal ille terror Romæ: Quintus Fabius, M. Marcellus, ille scutum, hic gladius P. R.* Imperitus historiæ, tanta nomina toties audiens in Academicis orationibus, merito quæret, num hi omnes Doctores fuerint, aut L. A. Magistri. Quædam horum nominum nimio usu in Gallia usque eo viderunt, ut nisi quis explodi velit, in oratione *Cambysen aut Epaminondam* appellare non audeat; si quando de his necessario loquendum est, curcuitione uti

exofus in Gallia:

Bohours, remarques sur la langue Française,

oportet. Hunc magnorum nominum in re exigua abusum facete ridet Martialis epigrammate in Postumum Caussidicum.

Martialis
lib. 6. epi-
gram. 19.

*Non de vi neque cade nec veneno,
Sed lis est mihi de tribus capellis.
Vicini queror has abesse furto.
Hoc iudex sibi postulat probari:
Tu Cannas, Mithridaticumque bellum,
Et perjuria Punici furoris,
Et Syllas, Mariosque, Mutiosque,
Magna voce sonas, manuque tota.
Jam dic, postume, de tribus capellis.*

*Aliud vi-
tium, res
levissimas
magni viri
auctoritate
comproba-
re:*

Huic vitio vicinum est illud aliorum, qui, ut plus majestatis habeat oratio, levissima quæque, quæ nemo ignorare potest, magni alicujus ex antiquitate Viri auctoritate comprobant, quasi vero non liceret dicere, *solem lucere*, nisi ante idem *Alphonsus Arragonia Rex*, aut *Agésilas interrogatus* dixisset. Qui quidem oratores sæpe non minus risu digni sunt, atque ille esset, qui in Convivio sodales ad hilaritatem excitaturus, ita graviter ordiretur: *Non minus vere quam eleganter Venuſinus Olor: Nunc, inquit, est bibendum.*

*ma-
gnam ora-
tionem
parvis re-
bus aptare.*

Magnam præterea orationem parvis rebus aptant; quorum in comædiis servus loquitur, ut Oedipus in Tragœdia: in quo-

quorum *Eclogis* Tityrus loquitur, ut *Æneas*: in quorum *Tragædiis* *nutrix* cum *Medea* de sublimitate sententiarumque magnificentia certare videtur: qui in *elegiâ* ita flent, ut *Hercules* furens bacchantur; qui in *epistolis familiaribus* ita loquuntur, tanquam si in senatu aut pro rostris dicerent: qui *colloquia* fingunt, qualia cum Diis sunt Sibyllarum, quoties oracula consulunt. Et quis omnes in hanc partem peccantes enumeraret?

X. *Alterum meteorigenus* non in eo peccat, quod humili argumento orationem magnificam, *infanti*, ut loquuntur, *Herculis cothurnos* aptat, sed quod in grandi argumento, *vitiosa* sit *sublimis* orationis: Ita omne illud voco, quod quibusdam *sublime* videtur, sed revera non est. Quo in genere peccant primo ii, quibus *sublime* omne id est, quod est *obscurum*. Quære ex his, quinam oratores sint maxime sublimes, *Panegyricos Caesarum* aut *Tertullianum* nominabunt, aut recentiores quosdam horum imitatores: Quid *Cicero*? Quem tu mihi *Ciceronem* narras, cujus oratio vel à pueris intelligitur? In historia longe *Tacitus Livio* est sublimior; quoniam hic longe facilius intelligitur. In Satyra *Persius* regnat, qui vix post tot doctissimorum

Alterum meteorigenus, cum in grandi argumento vitiosa est sublimitas orationis. Hic peccant ii quibus omne obscurum est sublime.

virorum commentarios capi potest. Mirantur, in Epico carmine *Virgilio* primas tribui, qui multo est intellectu facilior *Lucano*, *Statio*, *Claudio*, *Prudentio*, & hodiernis quamplurimis. *Horatii* odas contemnunt, quamdiu capiunt, tum demum Poëtam admirantur, cum ex conspectu suo se subducit: tum vero sublimis, tum alter *Pindarus* est.

Multa
erroris
causæ.

Mirari aliquis posset, unde hoc hominibus in mentem venire potuerit, ut & ipsi in obscuritate gloriam quærent, & aliorum obscuritatem admirarentur, cum oratio nobis non ad obscuranda, sed ad patefacienda animi sensa data sit? Multas hic error causas habet. Præterquam enim, quod semper ea majora habentur, quæ latent: existimant quidam, auctorem, qui librum suum intelligit, te, qui non intelligis, necessario hoc ipso esse superiorem; capit enim, quod tu non capis; alii, quia in pueritia scriptores vere sublimes intelligere non potuerunt, assueverunt jam in scholis obscuri & sublimis notionem confundere: quod & iis accidit, qui admirantur auctores grandes illos quidem sed simul intellectu difficiles: solemus enim in iis, quos admiramur, promiscue virtutes & vitia admirari: alii deni-

denique magnitudinem ingenii, atque eruditionis, quæ ab interpretibus ad intelligentiam obscuri auctoris requiritur, ad ipsum auctorem transferunt? Quantum est illud, quod vix *Heinsii*, *Casauboni*, *Grotii*, *Salmasii*, *Scaligeri* intelligere potuerunt?

Inquam sententiam memini cujusdam eloquentiam his verbis mihi jactantis: *Quid tu? ait, nostine illum, nominabam hominem in humanioribus literis apprime versum: doctum predicantem & ingeniosum: nostin? sed nihil ad me. Scripsi ad eum his diebus literas, quas vellem vidisses. Venio ad hominem postridie: ecquid literas meas acceperis, rego. Annuit, sed quid mihi vellem his literis querit: quasi verò, inquam, tu illas non intelligas: tum vero ille dejerare, se ne verbulum quidem capere: ego hominis misereri, dicta explicare. Quid multis? coactus est denique fateri, se, nisi venissem, nihil horum, quæ dicere volebam, unquam fuisse divinatorum. Hæc cum dixisset homo sublimis eloquentiæ, ridens me aspexit: & ego ridebam; uter nostrum graviores ridendi causas habuerit, alii velim judicent.*

Ad has causas affectatæ obscuritatis, si accedit ineptus præceptor, qui discipu-

Quintil.
Institut.
Orator.
l. 8. c. 2.

verba
Rhetoris
apud
Quinti-
lianum,
ibid.

*Tenebra in
oratione
non studio
quærenda,
cum vix
vitari pos-
sint, etiam
cum maxi-
me vitare
volumus.*

lis illud *σκότισον, σκότισον*, ubique inculcat, qui illis obscurissimos quosque scriptores, ut nimirum illos videatur intelligere, præ cæteris commendat, qui discipulos propter obscuritatem laudat: *tantò melius, ne ipse quidem intellexi*; facile quilibet videt, unde tanta obscuritatis veniat reverentia: At non necesse erat tenebras in oratione quærere, vix vitari possunt, cum summo studio illas vitamus; quod tot optimorum Scriptorum exempla docent; in sublimi præsertim genere dicendi, cum & grandia, & grandibus verbis dicere volumus. Cum enim magnam in mente rei imaginem formare conamur, sæpenumero tot tantaque imagine nostra simul complecti volumus, ut imaginatio turbetur & confundatur, ipsique adeo, quid imaginemur, nesciamus; quod necessario obscuram & confusam parit orationem. Nonnunquam imagine in mente recte formata, verba grandia defunt, quæ cum nimis longe petimus, non intelligimur. Nonnunquam nimis grandem sensum verbis nimis paucis, ad augendam orationis vim, exprimere volumus; quod si raro fit, & fit salva orationis perspicuitate, summam affert ei sublimitatem: sed quam facilis sit inde in obscuritatem lapsus, *Taciti exemplum* declarat.

declarat. Excusanda hæc sunt in magnis scriptoribus, non imitanda, præsertim ab iis, qui nonnisi vitia eorum imitari possunt.

XI. Sed & illi *meteora* tanquam sublimia captant, quibus omne id sublime videtur, quod est *insolens, rarum, atque extraordinarium*. His sordent omnia verba, omnes loquendi formæ vulgares & consuetæ. Cum legunt scriptores, ea tantum observant, quæ raro, aut, ut loqui solent, *rarenter* occurrunt. Fastidiunt fere *Ciceronem, Casarem, Cornelium Nepotem, Terentium*; nihil in horum libris est, quod excerpas. Quanto his *Barclajus* sublimior? quantus ex hoc auctore colligi potest rarissimarum vocum, phrasium, ut loquuntur, formularum, sententiarum, troporum, figurarum thesaurus. In Poëtis etiam præsertim hodiernis multa rara; In *præfationibus* vero librorum, in *Inscriptionibus*, in *programmatibus*, quot phrasæ occurrunt, *cedro digna & auro contra cara*.

Tot phrasium raritatibus, ex omnium seculorum Poëtis, Oratoribus, Philosophis, magno numero congestis, tandem stylus formatur, similis cimeliarchio, quo nonnisi rara naturæ & artis asservari solent. Hi homines nunquam ita se abji-

T 5 : , cient,

Et illi meteora tanquam sublimia captant, quibus omne insolens videtur sublimis.

cient, ut *Ciceronem*, *Ciceronem* vocent: *Arpinas noster* ex libro phrasium est vocandus: *Plautus*, *familiaris noster* *Sarsinas*. *Horatius* nunquam *Horatius* est, sed *Venusinus Cygnus*; hunc si forte cum *Virgilio* comparant, dicent, se *lacrymas* & *suspiria* inter se comparare. Quantumcumque nomen *Homeri* sit, nunquam tamen *Homerus* est vocandus, sed ex *Horatio*, *is qui nil molitur inepte*. Loquere cum his de *Martiali*; quærent an *Rilbititanum argutorem* velis dicere. Erras, si hos unquam vinum bibere aut panem edere putas: *Bacchi munera hauriunt, Cererem consumunt*. Quid quæris? Omnes communes loquendi formas *Spaniologi* isti *cane pojus* & *angue*, sic enim loquuntur, *fugiunt*, & *plusquam Vatiniano odio prosequuntur*; & ne quidem cum Deo nisi ex *Viridario* aut ex *formularum libro* loqui possunt.

Errant

quibus rariora semper sublimiora videntur.

A. Gell. lib. 1. c. 10.

Exempla.

Sed errant, quibus rariora semper sublimiora videntur: aliter sensit C. Cæsar, qui *verbum insolens tanquam scopulum fugiendum esse* censuit. Rara quoque sunt monstra, sed non ideo pulchra: Rari nani, sed non ideo grandes. Illis *Plauti*; *ipsissimus*, *geminissimus*, *exclusissimus*, *occississimus*, *sycolatronida*, *argentiextorebronida*, *fustitudinea*, *ferri crepina insula*, quæ ad risum captan-

ptan-

ptandum conficta sunt, in oratione sublimi
 uti velle, quis non videt esse ridiculum?
 Qui Alexandrum ubique *Pelleum juvenem*,
 Aristoteli *Stagyritam* vocant; magnifice
 sibi loqui videntur, quasi Alexandri &
 Aristotelis nomina non essent grandiora.
 Magnopere videlicet Carolum V. Imper-
 ratorem & Henricum IV. Galliarum Regem
 extolleret, qui alterum *Gandonsem juvenem*,
 alterum *Bearnensem* appellaret? Grandius
 se loqui existimat, qui Pindarum, *The-
 bane lyra fidicinem*, quam qui Pindarum
 dicit, qui tamen ipse mallet Pindarus,
 quam fidicen vocari. Sunt, quos nullis
 conditionibus permoveres, ut dicerent:
 Omnibus hoc notum est; malunt ex for-
 mularum libro: *Et lippis & tonsoribus est
 notum*: at lippi hi cum suis tonsoribus il-
 lustri præsentia magnificam orationem
 non valde condecorant.

Alii magnopere sibi extollere videntur
 quaslibet res, si tantum eas inter cæteras
 sui generis caput efferre dicunt,

Quantum lenta solent inter viburna cupressi:
 neque animadvertunt, hominem agre-
 stem apud Virgilium ita loqui, cui cam-
 pis, pratis atque arboribus nihil prius
 est.

Ita tropi quoque, tametsi propriis ver-
 bis

bis sunt rariores, non ideo semper sunt sublimiores. Iniqua sæpe conditione propria cum alienis permutamus, plusque est in hac permutatione jacturæ quam lucri. Qui de excellentia hominis loquuntur, non augment orationem, si eum non trita voce hominem, sed *mortalem* vocant. Qui toties de *mundi fornicibus* loquuntur, plus dicerent si *cælum cælum* vocarent. Qui *cælum buccinare* ait, longe minus dicit, quam si proprie *tonare* diceret. Qui mare appellavit *fossam ponti*, significantiore usus esset verbo, si quotidianum maris nomen retinuisset. Ita nihil in permutatione vocum lucri capiunt, qui terram cum *terra pila*, mare cum *Neptunia lacuna*, equum cum *ungula*, domum cum *nido*, majus cum minori, significantius cum minus significanti permutant vocabulo. Addere possumus honestum cum turpi & obsceno: ut sunt, *nubes Varronis aquam vomentes*, *Furii Jupiter Alpes nive conspuens*: de quibus sapienter Cicero: *Quoniam hac vel summa*, inquit, *laus est verbi transferendi, ut sensum feriat id, quod translatum sit, fugienda est omnis turpitudine earum rerum, ad quas eorum animos, qui audiunt, trahet similitudo. Nolo morte Africani castratam esse Rempubl. nolo stercus Curia dici Glanciam.*

ungula
vchi Sar-
bievius. d.

Cicero li-
bro 3. de
Oratore.

• *Quam-*

Quamvis sit simile, tamen est in utroque deformis cogitatio similitudinis. Viderint igitur, quam magnifice loquantur, quibus: maledicta evomere, blasphemias eructare, in patrios cineres mingere, cacata charta, Judais curtis oppedere, & aliæ hujusmodi munditiæ tantopere placent.

XII. Neque illi μετέωρον in Oratione & sublime distinguunt, qui nimis exquisitum in sublimi oratione affectant ornatum. *Meteora eorum qui nimis exquisitum in sublimi oratione affectant ornatum.*
Periodos ubique quærunt probe *mensuratas*, omnia *cola* & *incisa* apte sibi *respondentia*, *libratas* plurium membrorum *antitheses* & *comparationes*, earum æquales itus *reditusque*, *voces sonosque* ad numerum *repetitos*, *similiter incipientia* & *cadentia*, *rotundas sententias*, *clausulas inexpectatas*, *argutos lusus in similibus*, *oppositis*, aut *verborum ambiguitatibus*, *dicta factaque veterum*, *fabulas*, totamque rerum *naturam* per ingeniosam *allegoriam* ad *argumentum* suum *tractam*, ne dicam *tortam*. Horum quædam si modice adhibentur in oratione ad delectationem composita, aliquid venustatis habent: si frequentantur, inepta vel in ludicra oratione, at in gravi & sublimi monstra sunt non ferenda, neque magis decent, quam si vir gravis in concione populi ad numerum saltare vellet.

Ro-

Quo quid simplicius, eo sublimius. est gratissimum. Illud Geneseos: *Dixit Deus fiat lux & facta est lux, fiat terra, & facta est terra;* Cujus dicti sublimitatem tantopere Longinus deprædicat, ideo tam sublime est, quia tam simplex.

Ornatus in oratione sublimi apparere non debet. Quod si vero quædam in oratione sublimi verbis ornanda sunt; danda est opera, ut *nullus*, quantum fieri potest, *ornatus* appareat, nusquam enim minus conspicuus esse debet. Poscunt Architecturæ regulæ, ut columnæ ornatus gratia splendidis ædibus additæ, necessitatis causa, ad fulciendum ædificii pondus, illi substructæ esse videantur: Ita & in Oratione id ipsum quod ornat, non ornatus causa quaesitum, sed ad pondus sententiæ nostræ sustinendum *necessario dictum* esse videatur.

In ornatu modus adhibendus. Talis denique in ornatu *modus adhibendus*, ne auditorem ab illo affectu, quem in eo concitare volumus, ad orationis venustatem admirandam aliasque cogitationes avocemus. Id quod faciunt illi, qui, ut ait Quintilianus, *sententiosis flect*, aut *Periodis postulant*, itaque nihil aliud dicendo consequuntur, quam ut, qui his capiuntur, dicant, elegantem se audivisse orationem; cæterum dictis neque moventur neque mutantur.

XIV. Huc

XIV. Huc pertinent quoque, quas *Periphrasēs affectatae meteorā dīti merentur.* adeo multi affectant, periphrases, quæ non semper plus sensus habent, ut plus habent verborum, nisi forte magnifice is de Cicerone locutus est, qui illum *Romanorum aromatum Myropolam* vocavit. Sed & minus ineptæ enervant sæpius orationem quam augment, fitque, ut propter verborum multitudinem sententiæ vis ac sublimitas non conspiciatur. Quam sublimē est illud Virgīlii:

Et campus ubi Troja fuit.

Da periphrastice, ut Præceptor clamat, magna sublimitatis pars evanescet. Quid illud *Lucani* excusantis Romæ universæ, Cæsare adventante, terrorem, quem cum magnifice descripsisset, subjicit:

Danda tamen venia est tantorum danda *Lucan. lib. 1.*
pavorum,

Pompejo fugiente timent.

tribus his verbis plus dixit Poëta, quam si omnem Pompeji magnitudinem, si fugam ipsius magno verborum ambitu descripsisset. Id quod iis etiam dictum esse volo, qui nullum nomen, ut loquuntur, substantivum solum incedere patiuntur, sed omnia honoris causa splendido epitheto comitantur.

XV. At nec illi in Oratione *μερίσπον &*
V *subli-*

ciam depingendam mutuabitur, quibus ille *Caecilium* depinxit. Cui *Tacitus* in *delectis* est, is cum de disciplina Scholastica, aut de artibus tradendis agitur, sententias loquetur, obscura oracula fundet: diceret, eum *occultas Regnantium artes & arcana dominationis aperire*. Frequens *Q. Curtii* lector de lucubratiunculis eruditorum non aliter loquetur, atque *Alexander de Asia subjugata*. Hic imagines *Velleji Patriculi*, quibus tot Heroas expressit, cui libet *amicorum*, quem laudare vult, accommodat. Ille *Bella Grammaticalia & doctorum rixas* describet ea pompa, qua *Florus* bella *Populi Romani*. Quid quæris? Nulla urbs est tam obscura, nullum oppidum tam parvum, in quo non Romanorum scriptorum imitatores *forum*, *comitium*, *rostra*, *Capitolium*, *sellas curules*, *fasces*, *secures*, *trabeas*, *ovationes*, *triumphos*, omnem denique tanquam in compendio, inveniant antiquæ urbis maiestatem. Qui quidem omnes recte fortasse cum *Tityro Virgiliano* dicerent:

*Urbem quam dicunt Romam Melibæe putavi
Stultus ego huic nostra similem.*

Magis ridiculi quam ille, qui exiguum fluvium ita descripsit: *ὁς ἀπὸ τῶν Τευρικῶν ὀρέων ὀρμώμενος ἐκδίδωι εἰς θάλασσαν: tantam*

Deme-
trius.
περὶ ἑρμηνείας.

quam si de Nili aut Euphratis impetu fuisset dicendum.

Imo, quod miretis, nostri Romani *Abusui*
Magistratus Romanos togatos paritet & *magnorum*
 gatos non in *civili* modo cujuslibet urbis *notitium*
republica inveniunt, sed in *republica* etiam, *ex historia*
Rom. uti loquuntur, *literaria*. Huicque adeo
 Reipublicæ *Michael Fernus Poëmata Cam-*
pani his verbis dedicat: *Dictatori Perpe-*
tuo, Imperatori nostro Maximo, Pomponio
Lato, Magistro equitum, cunctaque Reipu-
blicæ literaria Michael Fernus Mediolanen-
sis vilis pabulator strennam pugnam, pulchram
 victoriam. Huc pertinent ii, quibus sem-
 per in ore sunt *magna Vetustatis nomina*:
Magnum illum Alexandrum ajunt: Pyrrhum
Epirotarum Regem predicant; Quod Furio
quondam Camillo accidit: Hannibal ille ter-
ror Rome: Quintus Fabius, M. Marcellus,
ille scutum, hic gladius P. R. Imperitus
 historiæ, tanta nomina toties audiens in
 Academicis orationibus, merito quære-
 ret, num hi omnes Doctores fuerint,
 aut L. A. Magistri. Quædam horum no- *exosus in*
 minum nimio usu in Gallia usque eo *Gallia:*
 luerunt, ut nisi quis explodi velit, in
 oratione *Cambysem* aut *Epaminondam* ap- *Bohours,*
 pellare non audeat, si quando de his ne- *remar-*
 cessario loquendum est, curcuitione uti *ques sur*
 la langue
 T 2 *opor- François,*

oportet. Hunc magnorum nominum in re exigua abusum facete ridet Martialis epigrammate in Postumum Caussidicum.

Martialis
lib. 6. epi-
gram. 19.

*Non de vi neque cade nec veneno,
Sed lis est mihi de tribus capellis.
Vicini queror has abesse furto.
Hoc iudex sibi postulat probari:
Tu Cannas, Mithridaticumque bellum,
Et perjuria Punici furoris,
Et Syllas, Mariosque, Mutiosque,
Magna voce sonas, manumque tota.
Jam dic, postume, de tribus capellis.*

*Aliud vi-
tium, res
levissimas
magni viri
auctoritate
comproba-
re:*

Huic vitio vicinum est illud aliorum, qui, ut plus majestatis habeat oratio, levissima quæque, quæ nemo ignorare potest, magni alicujus ex antiquitate Viri auctoritate comprobant, quasi vero non liceret dicere, *solem lucere*, nisi ante idem *Alphonsus Arragonie Rex*, aut *Agésilas interrogatus* dixisset. Qui quidem oratores sæpe non minus risu digni sunt, atque ille esset, qui in Convivio sodales ad hilaritatem excitaturus, ita graviter ordiretur: *Non minus vere quam eleganter Venusinus Olor: Nunc, inquit, est bibendum.*

*Et ma-
gnam ora-
tionem
parvis re-
bus aptare.*

Magnam præterea orationem parvis rebus aptant; quorum in comædiis servus loquitur, ut *Oedipus in Tragedia*: in quo-

quorum *Eclogis* Tityrus loquitur, ut *Æneas*: in quorum *Tragædiis* *nutrix* cum *Medea* de sublimitate sententiarumque magnificentia certare videtur: qui in *elegiâ* ita flent, ut *Hercules* furens bacchatur; qui in *epistolis* *familiaribus* ita loquuntur, tanquam si in senatu aut pro rostris dicerent: qui *colloquia* fingunt, qualia cum Diis sunt *Sibyllarum*, quoties oracula consulunt. Et quis omnes in hanc partem peccantes enumeraret?

X. *Alterum meteoris genus* non in eo peccat, quod humili argumento orationem magnificam, *infanti*, ut loquuntur, *Herculis cothurnos* aptat, sed quod in grandi argumento, *vitiosa* sit *sublimis* orationis: Ita omne illud voco, quod quibusdam *sublime* videtur, sed *revera non est*. Quo in genere peccant primo ii, quibus *sublime* omne id est, quod est *obscurum*. Quære ex his, quinam oratores sint maxime *sublimes*, *Panegyricos Cesarum* aut *Tertullianum* nominabunt, aut recentiores quosdam horum imitatores: Quid *Cicero*? Quem tu mihi *Ciceronem* narras, cujus oratio vel à pueris intelligitur? In historia longe *Tacitus Livio* est *sublimior*; quoniam hic longe facilius intelligitur. In *Satyra* *Persius* regnat, qui vix post tot doctissimorum

Alterum meteoris genus, cum in grandi argumento vitiosa est sublimitas orationis. Hic peccant ii quibus omne obscurum est sublime.

virorum commentarios capi potest. Mirantur, in Epico carmine *Virgilio* primas tribui, qui multo est intellectu facilior *Lucano*, *Statio*, *Claudiano*, *Prudentio*, & hodiernis quamplurimis. *Horatii* odas contemnunt, quamdiu capiunt, tum demum Poëtam admirantur, cum ex conspectu suo se subducit: tum vero sublimis, tum alter *Pindarus* est.

Multe
erroris
caussa.

Mirari aliquis posset, unde hoc hominibus in mentem venire potuerit, ut & ipsi in obscuritate gloriam quærent, & aliorum obscuritatem admirarentur, cum oratio nobis non ad obscuranda, sed ad patefacienda animi sensa data sit? Multas hic error causas habet. Præterquam enim, quod semper ea majora habentur, quæ latent: existimant quidam, auctorem, qui librum suum intelligit, te, qui non intelligis, necessario hoc ipso esse superiorem; capit enim, quod tu non capis; alii, quia in pueritia scriptores vere sublimes intelligere non potuerunt, assueverunt jam in scholis obscuri & sublimis notionem confundere: quod & iis accidit, qui admirantur auctores grandes illos quidem sed simul intellectu difficiles: solemus enim in iis, quos admiramur, promiscue virtutes & vitia admirari: alii deni-

denique magnitudinem ingenii, atque eruditionis, quæ ab interpretibus ad intelligentiam obscuri auctoris requiritur, ad ipsum auctorem transferunt? Quantum est illud, quod vix *Heinsii, Casauboni, Grotii, Salmasii, Scaligeri* intelligere potuerunt?

In quam sententiam memini cujusdam eloquentiam his verbis mihi jactantis: *Quid tu? ait, nostis illum, nominabat hominem in humanioribus literis apprime versatum: doctum predicantem & ingeniosum: nostis? sed nihil ad me. Scripsi ad eum his diebus literas, quas vellem vidisses. Venio ad hominem postridie: æquid literas meas acceperit, rogo. Annuit, sed quid mihi vellem his literis querit: quasi verò, inquam, tu illas non intelligas: tum vero ille dejerare, se ne verbulum quidem capere: ego hominis misereri, dicta explicare. Quid multis? coactus est denique fateri, se, nisi venissem, nihil horum, quæ dicere volebam, unquam fuisse divinatorum. Hæc cum dixisset homo sublimis eloquentiæ, ridens me aspexit: & ego ridebam; uter nostrum graviores ridendi causas habuerit, alii velim judicent.*

Ad has causas affectatæ obscuritatis, si accedit ineptus præceptor, qui discipu-

Quintil.
Institur.
Orator.
l. 8. c. 2.

verba
Rhetoris
apud
Quinti-
lianum,
ibid.

*Tenebra in
oratione
non studio
quaerenda,
cum vix
vitari pos-
sint, etiam
cum maxi-
me vitare
volumus.*

lis illud σιότιον, σιότιον, ubique inculcat, qui illis obscurissimos quosque scriptores, ut nimirum illos videatur intelligere, prae cæteris commendat, qui discipulos propter obscuritatem laudat: *tamò melius, ne ipse quidem intellexi*, facile quilibet videt, unde tanta obscuritatis veniat reverentia: At non necesse erat tenebras in oratione quærere, vix vitari possunt, cum summo studio illas vitamus; quod tot optimorum Scriptorum exempla docent; in sublimi præsertim genere dicendi, cum & grandia, & grandibus verbis dicere volumus. Cum enim magnam in mente rei imaginem formare conamur, sæpenumero tot tantaque imagine nostra simul complecti volumus, ut imaginatio turbetur & confundatur, ipsique adeo, quid imaginemur, nesciamus; quod necessario obscuram & confusam parit orationem. Nonnunquam imagine in mente recte formata, verba grandia desunt, quæ cum nimis longe petimus, non intelligimur. Nonnunquam nimis grandem sensum verbis nimis paucis, ad augendam orationis vim, exprimere volumus; quod si raro fit, & fit salva orationis perspicuitate, summam affert ei sublimitatem: sed quam facilis sit inde in obscuritatem lapsus, *Taciti* exemplum declarat.

declarat. Excusanda hæc sunt in magnis scriptoribus, non imitanda, præsertim ab iis, qui nonnisi vitia eorum imitari possunt.

XI. Sed & illi *meteora* tanquam sublimia captant, quibus omne id sublime videtur, quod est *insolens, rarum, atque extraordinarium*. His sordent omnia verba, omnes loquendi formæ vulgares & consuetæ. Cum legunt scriptores, ea tantum observant, quæ raro, aut, ut loqui solent, *rare*nter occurrunt. Fastidiunt fere *Ciceronem, Casarem, Cornelium Nepotem, Terentium*; nihil in horum libris est, quod excerpas. Quanto his *Barclajus* sublimior? quantus ex hoc auctore colligi potest rarissimarum vocum, phrasium, ut loquuntur, formularum, sententiarum, troporum, figurarum thesaurus. In Poëtis etiam præsertim hodiernis multa rara; In *præfationibus* vero librorum, in *Inscriptionibus*, in *programmatibus*, quot phrasæ occurrunt, *cedro dignæ & auro contra cara*.

Tot phrasium raritatibus, ex omnium seculorum Poëtis, Oratoribus, Philosophis, magno numero congestis, tandem stylus formatur, similis cimeliarchio, quo nonnisi rara naturæ & artis asservari solent. Hi homines nunquam ita se abji-

T 5 : cient,

Et illi meteora tanquam sublimia captant, quibus omne insolens videtur sublimia.

cient, ut *Ciceronem*, *Ciceronem* vocent: *Arpinas noster* ex libro phraſium eſt vocandus: *Plautus*, *familiaris noster*. *Sarſinas*. *Horatius* nunquam *Horatius* eſt, ſed *Venusinus Cygnus*; hunc ſi forte cum *Virgilio* comparant, dicent, ſe *lacrymas* & *ſuſpiria* inter ſe comparare. Quantumcumque nomen *Homeri* ſit, nunquam tamen *Homerus* eſt vocandus, ſed ex *Horatio*, *is qui nil molitur inepte*. Loquere cum hiſde *Martiali*; quærent an *Rilbititanum argutorem* velis dicere, Erras, ſi hos unquam vinum bibere aut panem edere putas: *Bacchi munera hauriunt, Cererem conſumunt*. Quid quæris? Omnes communes loquendi formas *Spaniologi* iſti *cane pojus* & *angue*, ſic enim loquuntur, *fugiunt*, & *plusquam Vatiniano odio proſequuntur*; & ne quidem cum Deo niſi ex *Viridario* aut ex formularum libro loqui poſſunt.

Errant

quibus rariora ſemper ſublimiora videntur.

A. Gell. lib. I. c. 10.

Exempla.

Sed errant, quibus rariora ſemper ſublimiora videntur: aliter ſenſit C. Cæſar, qui *verbum inſolens tanquam ſcopulum fugiendum eſſe* cenſuit. Rara quoque ſunt monſtra, ſed non ideo pulchra: Rari nani, ſed non ideo grandes. Illis *Plauti*; *ipſiſſimus*, *geminiffimus*, *excluſiſſimus*, *occiſiſſimus*, *ſycolatronida*, *argentiexterebronida*, *fuſtiſtudi-nea*, *ferricrepina inſula*, quæ ad riſum captan-

ptandum conficta sunt, in oratione sublimi
uti velle, quis non videt esse ridiculum?
Qui Alexandrum ubique *Pelleum juvenem*,
Aristoteli *Stagyritam* vocant; magnifice
sibi loqui videntur, quasi Alexandri &
Aristotelis nomina non essent grandiora.
Magnopere videlicet Carolum V. Imper-
ratorem & Henricum IV. Galliae Regem
extolleret, qui alterum *Gandensem juvenem*,
alterum *Bearnensem* appellaret? Grandius
se loqui existimat, qui Pindarum, *The-
bane lyra fidicinem*, quam qui Pindarum
dicit, qui tamen ipse mallet Pindarus,
quam fidicen vocari. Sunt, quos nullis
conditionibus permoveres, ut dicerent:
Omniis hoc notum est; malunt ex for-
mularum libro: *Et lippis & tonsoribus est
notum*: at lippi hi cum suis tonsoribus il-
lustri praesentia magnificam orationem
non valde condecorant.

Alii magnopere sibi extollere videntur
quaslibet res, si tantum eas inter cæteras
sui generis caput efferre dicunt,

Quantum lenta solent inter viburna cupressi:
neque animadvertunt, hominem agre-
stem apud Virgilium ita loqui, cui cam-
pis, pratis atque arboribus nihil prius
est.

Ita *tropi* quoque, tametsi propriis ver-
bis

bis sint rariores, non ideo semper sunt sublimiores. Iniqua sæpe conditione propria cum alienis permutamus, plusque est in hac permutatione jacturæ quam lucri. Qui de excellentia hominis loquuntur, non augent orationem, si cum non trita voce hominem, sed *mortalem* vocant. Qui toties de *mundi fornicibus* loquuntur, plus dicerent si *cælum cælum* vocarent. Qui *cælum buccinare* ait, longe minus dicit, quam si proprie tonare diceret. Qui mare appellavit *fossam ponti*, significantiore usus esset verbo, si quotidianum maris nomen retinuisset. Ita nihil in permutatione vocum lucri capiunt, qui terram cum *terre pila*, mare cum *Neptunia lacuna*, equum cum *ungula*, domum cum *nido*, majus cum minori, significantius cum minus significanti permutant vocabulo. Addere possumus honestum cum turpi & obscæno: ut sunt, *nubes Varronis aquam vomentes*, *Furii Jupiter Alpes nive conspuens*: de quibus sapienter Cicero: *Quoniam hac vel summa*, inquit, *laus est verbi transferendi, ut sensum feriat id, quod translatum sit, fugienda est omnis turpitudo earum rerum, ad quas eorum animos, qui audiunt, trahet similitudo. Nolo morte Africani castratam esse Rempubl. nolo sterces Curia dici Glanciam.*

• *Quam-*

ungula
vchi Sar-
bievius. d.

Cicero li-
bro 3. de
Oratore.

Quamvis sit simile, tamen est in utroque deformis cogitatio similitudinis. Viderint igitur, quam magnifice loquantur, quibus: maledicta evomere, blasphemias eructare, in patrios cineres mingere, cacata charta, Judæis cutis oppedere, & aliæ hujusmodi munditiæ tantopere placent.

XII. Neque illi *μετέωρον* in Oratione & sublime distinguunt, qui nimis exquisitum in sublimi oratione affectant *ornatum*. *Meteora eorum qui nimis exquisitum in sublimi oratione affectant ornatum.*

Periodos ubique quærunt probe *mensuratas*, omnia *cola* & *incisa* apte sibi *respondentia*, *libratis* plurium membrorum *antitheses* & *comparationes*, earum æquales itus *reditusque*, *voces sonosque* ad numerum *repetitos*, *similiter incipientia* & *cadentia*, *rotundas sententias*, *clausulas inexpectatas*, *argutos lusus in similibus*, *oppositis*, aut *verborum ambiguitatibus*, *dicta factaque veterum*, *fabulas*, totamque rerum *naturam* per ingeniosam allegoriam *ad argumentum* suum *tractam*, ne dicam *tortam*. Horum quædam si modice adhibentur in oratione ad delectationem composita, aliquid venustatis habent: si frequentantur, inepta vel in ludicra oratione, at in gravi & sublimi monstra sunt non ferenda, neque magis decent, quam si vir gravis in concione populi ad numerum saltare vellet.

Ro-

*Ha delicia
non tempo-
re Augusti,*

*sed Neronis
quari coe-
perunt.*

*a Petron.
initio
Satyr.*

*b Quint.
lib. 2. & 8.*

*Et paulo
post in Ec-
clesiam
transie-
runt.*

*c Epist. ad
Pamma-
chium.*

*His multo-
rum Pa-
trum
scripta
sunt plena.*

Romani Augusti ævo has delicias non magnopere captabant; solus *Ovidius* his interdum lusibus delectari videtur: Tem- pore vero *Neronis* frequentari cœperunt, quod *Senecarum scripta* demonstrant: ac paulo post tota eloquentia in his poneba- tur, ut *Petronii* ^a & *Quintiliani* ^b docent *querela*.

Inde transit hæc dicendi consuetudo in Ecclesiam. *Non pudet*, inquit ^c *Hiero- nymus*, *Christianos & Sacerdotes Dei, quasi de rebus ludicris agatur, verbis dubiis herere, & ambiguas librare sententias, quibus loquens magis quam audiens decipitur.* Multorum *Ecclesia Patrum* scripta his lusibus plena: à quibus eadem dicendi ratio ad nostra us- que tempora manavit, quam tanta fide sacri quidam Oratores retinent, ut nullus dubitem, eos hanc consuetudinem posteris quoque esse tradituros. Ubi dolendum est, in iis orationibus maxime ludi, ubi minime ludi oportebat.

Hæc vel aptissime summoque cum ju- dicio adhibita orationem aliquando ve- nustiore reddunt, nunquam sublimio- rem & grandiore; atque adeo tantum Orationi gravitatis detrahunt, quantum addunt venustatis. Recte *Demetrius*:

*περί ἱμνη-
σεως.*

*ἡ ὁμοιότης ἢ περί τὰ κῶλα καὶ ἡ ἀντίθεσις ἐκλύει
τὴν*

τὴν δεινότητα. Id de omnibus hujus generis pigmentis dici potest. Exemplo sit elegantissimum illud de *Dionis Interitu* Epigramma:

Infelix Dido, nulli bene nupta marito:

Hoc pereunte fugis, hoc fugiente peris.

Nihil venustius est, sed & nihil minus sublime: hoc enim quisquis legit, non Didonis interitum miseratur, sed Poëtae argutiam miratur: ἀντισθένης concinnitas, tamque apta alternatio verborum *fugere & perire* facit, ut Didonis tantum non obliviscamur. Augustinus certe, qui lecto quarto libro *Æneidos* Virgilianæ mortem Didonis lachrymis prosecutus est, fideis hoc Epigramma oculis legisset.

XIII. Convenit quidem sublimi dictioni parcior ornatus, sed non ubique. Quod si enim imago rei, quam mente concepimus, vere magna est, tanto major videbitur, quo simplicioribus eam verbis exprimimus: prorsus quemadmodum eximia pulchritudo vestibus elegantissimis non tam ornatur quam tegitur: cibis exquisiti saporis multis condimentis corrumpitur, suavissimumque melos nimis vocis modulationibus redditur deterius; denique omne id, quod nudum & simplex optimum est, tale si relinquatur, est

*Ausonii
epigramma elegans
quidem,
Epitaph.
Heroum
30.*

*sed non
sublimis.*

*Sublimi
dictioni
convenit
parcior or-
natus, sed
non ubi-
que.*

Quo quid est gratissimum. Illud Geneseos: *Dixit*
simplicius, *Dens fiat lux & facta est lux, fiat terra, &*
eo subli- *facta est terra;* Cujus dicti sublimitatem
mius. tantopere Longinus deprædicat, ideo tam
 cap. 7. sublime est, quia tam simplex.

Ornatus in Quod si vero quædam in oratione subli-
oratione mi verbis ornanda sunt; danda est opera,
sublimi ut nullus, quantum fieri potest, ornatus
apparere appareat, nusquam enim minus conspicuus
non debet. esse debet. Poscunt Architecturæ regulæ,
 ut columnæ ornatus gratia splendidis
 ædibus additæ, necessitatis causa, ad
 fulciendum ædificii pondus, illi subtru-
 ctæ esse videantur: Ita & in Oratione id
 ipsum quod ornat, non ornatus causa quæ-
 situm, sed ad pondus sententiæ nostræ
 sustinendum necessario dictum esse videa-
 tur.

In ornatu Talis denique in ornatu *modus adhibea-*
modus ad- *tur,* ne auditorem ab illo affectu, quem
hibendus. in eo concitare volumus, ad orationis
 venustatem admirandam aliasque cogita-
 tiones avocemus. Id quod faciunt illi,
 qui, ut ait Quintilianus, *sententiosis flent,*
 aut *Periodis postulant,* itaque nihil aliud
 Quint. dicendo consequuntur, quam ut, qui his
 1.11.&12. capiuntur, dicant, elegantem se audi-
 visse orationem; cæterum dictis neque
 moventur neque mutantur.

XIV. Huc

XIV. Huc pertinent quoque, quas *Periphrasē affectatā meteorā dīci merentur.* adeo multi affectant, periphrases, quæ non semper plus sensus habent, ut plus habent verborum, nisi forte magnifice is de Cicerone locutus est, qui illum *Romanorum aromatum Myropolam* vocavit. Sed & minus ineptæ enervant sæpius orationem quam augent, fitque, ut propter verborum multitudinem sententiæ vis ac sublimitas non conspiciatur. Quam sublimē est illud Virgilii:

Et campus ubi Troja fuit.

Da periphrastice, ut Præceptor clamât, magna sublimitatis pars evanescet. Quid illud *Lucani* excusantis Romæ universæ, Cæsare adventante, terrorem, quem cum magnifice descripsisset, subjicit:

Danda tamen venia est tantorum danda *Lucan. lib. i.*
pavorum,

Pompejo fugiente timent.

tribus his verbis plus dixit Poëta, quam si omnem Pompeji magnitudinem, si fugam ipsius magno verborum ambitu descripsisset. Id quod iis etiam dictum esse volo, qui nullum nomen, ut loquuntur, substantivum solum incedere patiuntur, sed omnia honoris causa splendido epitheto comitantur.

XV. At nec illi in Oratione *περίωρον* &
V subli-

*Aliud me-
teorum.**Voces gran-
de sonan-
tes, &c.
nihil ma-
gni signifi-
cantes.**Art. Poët.*

sublime discernunt, qui dictionis subli-
mitatem ponunt in grande quiddam so-
nantibus vocibus, ac magnifica & nescio
quid promittente verborum grandium
nihil magni significantium structura. In
Poëtis id appellat Horatius:

Versus inopes rerum nugasque canoras.

Qui hæc affectant, aut nesciunt in quo
vera orationis granditas consistat, aut in-
genio destituti, illam cum assequi non
possint, magnam sibi sonantium verbo-
rum copiam comparant, quibus ingenii
parvitatem utcunque tegant, ut quidam
splendore vestium paupertatem.

Exempla.

Hi non magnopere solliciti sunt quid
dicant, aut num omnino aliquid dicant,
dummodo possint Orationem, ut Sedulii,
magni in hac arte Magistri, verbis utar,

*Sedul. l. i.
Operis
Paschalis.*

*Grandisonis pompare modis tragicoque
boatu;*

dummodo verba sint, *resonantia, undantia,
rorantia, rutilantia, radiantia, flammantia,
coruscantia, tumultuantia, bacchantia, qua-
drupedantia.* Hæc verba parum aut nihil
significant: dummodo *tonent, fulgurent,
fulminent, late grassentur, quaquaversum
omnia quatiant, pertumpant, proruant.*
Sit sensus humilis; dum verba sint
aurata, marmorea, turrita, fastigiata.

Nihil

Nihil in oratione cohaereat, dum in ea compareat *bosphorus, campi hyperborei, æstivantis Adriæ sinus, Carpathium pelagus, cum inhospitali Caucaſo & Acrocerunniis.* Tantorum verborum sono quis non deciperetur, ut existimaret, sublime eſſe in Oratione, quod, ſi ſenſum quæret, non niſi ~~perceptum~~ eſſe videbit.

Hæc fere eſt cauſa, quare multi ſequioris ævi Poëtas iis, qui Auguſti tempore & ante floruerunt, tanquam grandiores anteponunt. Hi *Claudianum* libros de *raptu Proſerpinae* longe ſublimiori ſtylo incipere dicent, quam Virgilius *Æneida*, aut Ovidius *Metamorphoſes* orditur. Ita enim ille:

Talium amatores, ſequiores Poëtas melioribus anteponunt.

*Inferni raptoris equos, afflataque curru
Sidera Tenario, caligantesque profunda
Junois thalamos audaci promere cantu
Mens congeſta jubet.*

Claudiani verborum granditas,

Videamur hoc exemplo, an non verborum granditas lectori fucum facere poſſit, ut majus quam, quod legit, ſibi legere videatur. Ambitioſa illa epitheta: *Raptor infernas, currus Tenarius, thalami caligantes, Juno profunda, cantus audax & mens congeſta* plus ſonant, quam ſignificant. Quomodo interpretabimur iſta: *mens congeſta jubet promere, aut prodere*, ut alii legunt,

gunt, *cantu equos & sidera curru afflata?* Maluisssem, Poëta nobis cecinisset, infandum Plutonis facinus, crudeles horrendi raptoris manus, durissima brachia, quæ Jovis filiam, unicum Cereris delictum, Deam perpetua luce dignam, nequicquam Patrem Matremque implorantem, corripuerunt, comprehensamque per immanes specus ad æternas secum tenebras traxerunt.

*inani-
tas.*

Nihil horum in isto Claudiani exordio videmus: *equi* raptoris comparent, post *currus* sequitur: *Proserpinam* non conspiciamus, nisi in *thalamis*, cum jam *Juno profunda* est, fortasse ne rapta Proserpina commiseratione nos tangat. Hujus nuptiæ *thalami* appellantur *caligantes*; qua in re Juno profunda non infelix videbitur illis, qui in his thalamis lucem non requirunt. Magnam igitur Poëta neque concepit, neque verbis expressit imaginem argumenti sui, in quo equi Plutonis, currus ejus & nuptiæ Proserpinæ minimum atrocitatis habent: Maximum in hoc raptu est ipse raptus. Similisque adeo pictori est Poëta, qui quadrigam nobis depingeret trahentem currum, quo homines velati veherentur: post in alia tabulæ parte, tanquam in loco remotiore, lectum in tenebris,

nebris, cum hac Inscriptione: *Raptus Proserpina.* Quanto rectius Ovidius orditur Metamorphoses:

*In nova fert animus mutatas dicere formas
Corpora.*

paucis verbis iisque perspicuis omnem argumenti sui magnitudinem complectitur, ut de *Aeneidos initio, secundique libri Lucretii*, quo vix quicquam sublimius est, taceam.

Cæterum, quod Claudiano contigit, quem non negamus ingentis spiritus Poëtam fuisse, id si hodiernis quoque Poëtis cum illo minime comparandis aliquando accidit, ut plus soni quam sensus habeant eorum carmina, minime est mirandum: facilius quippe est grandia verba ex Poëtis, aut, quod quidam faciunt, ex phrasium Poëticarum Thesauris excerpere, quam grandes sensus ex pectore depromere.

XVI. Inter omnia verò *μετέωρα* nulla sunt, quæ magis sublimitatis speciem mentiuntur, quam illa quæ *precipitia* Quintilianus, alii *tumida, turgida & inflata* appellant. Est autem *tumor orationis* nihil aliud, quam *quidam granditatis excessus*, in quem ii omnes prolabuntur, qui, cum imaginandi potius facultate, quam judi-

*Meteora
tumida,
turgida,
inflata.*

*Tumor o-
rationis.*

candi pollent, quoties magnifice dicere volunt, omnia quidem adhibent, quibus orationem sublimem fieri diximus, sed nusquam aut modum aut decorum servare possunt.

Exempla.

Hi igitur si magnam rei in mente imaginem formare volunt, formant vastam; si sublimem, formant enormem; si admirabilem, formant portentosam prorsus & incredibilem. Cum *procerum hominem* concipere volunt, concipiunt *gigantem*: cum *virum fortem*; nescio quem *fabulosum* concipiunt *Heroem*. Grandem Cicero amicitiae imaginem animo complexus est:

In Lælio. *Non aqua, inquit, non igni, non aëre pluribus locis utimur, quam amicitia: Si quis Cicéronem hic superaturus diceret: amicitia longe pluribus in locis utimur, quam aëre, modum excederet. Magnam corrupti seculi ideam concipit, qui dicit, usque eo rem venisse, ut scelerum neminem pudeat, multi iis etiam gloriantur. Nimiam conciperet, si quis cum Seneca diceret: nullum intra se manet hodie vitium, adeo unusquisque sua amat, ut nolit peccare, nisi adsit testis.*

Seneca c.
pist. 93.

*Meteora in
soluta ora-
tione.*

Qui hæc *μετέωρα* amant, ii in soluta oratione tantum nonnunquam imaginationi indulgent, quantum Poëtæ, imo quan-

quantum vix Poëtis concederetur. Hos si audis, D. Brutus Gallacos domuit, atque omnes Gallicie populos, formidatumque militibus flumen oblivionis, peragratoque victor Oceanilittore non prius signa convertit, quam cadentem in maria solem, obrutumque aquis ignem, non sine quodam sacrilegii metu & horrore deprehendit. Si temperatam describunt regionem: Nulla unquam nubes cælum asperat, nulla bruma segetes extinguit, nulli æstus adurunt. Si sapientem laudant: Quovis ille adamante durior est: non modo nulli telo penetrabilis, sed ipsi etiam arietes & machine, quæ altissimas turres prosternunt, minutissimas arces diruunt, hunc ne agitant quidem: firmior est Babylonis, Carthaginis, Numantie, ipsius denique Capitolii muris. Quancumque telorum multitudinem in eum conicias, nullum eorum hominem tantum vulnerat, ferit, imò ne quidem attingit. Quemcunque aut Regem aut Principem extollere volunt: hic vero magis Alexander est & Cæsar, quam ipse Alexander & Cæsar fuerunt: & si quando crescit imaginationis fervor: totus mundus basis est nimis exigua ad imaginem ejus sustentandam: non satis in hoc universo papyri est, ad virtutes ejus describendas: neque omnino calamo id peragi potest: solem has radiis suis scribere oportet.

Florus
lib.2. cap.
17.

Barclajus.

Senecæ
effigies
sapientis.

Relation
d'Espa-
gne.

*Meteora in
poësi.*

In carmine vero, quid non audet concitata nulloque iudicio frenata imaginatio; quia multa licent, omnia licere putat. Nihil tam vastum, tam enorme, tam monstrosus est, quod non effundit. Nunc in nubibus est, nunc in abyſſo, nunc extra mundum rapitur, cœlum terramque miscet:

*Horat.
art. poët.*

*Cum variare volet rem prodigialiter unam,
Delphinum sylvis appingit, fluctibus aprum.*

*Auvray
lettre 46.*

Hic milites nobis adeo pugnae intentos narrat, ut etiam post mortem in pugnando perseverarint, non animadvertentes, se mortuos esse: Hic aggerem, quem Poëta inter Zodiaci signa collocarent nisi metuerent, ne firmitate & altitudine sua solis cursum impediret. Si tempeſtas describitur mare concutiens; quo non aufertur imaginatio? Venti bella gerunt: Aquilo vincit: hic non fluctus concitat, sed maria integrâ loco movet: commiscuntur mare Ægeum & Tyrrhenum, Ionium & Adriaticum: Oceanus à reliquis ventis tenetur: terra denique omnis inundatur, mare est sine littore, cœlo solo tenetur:

*Lucan.
lib. 5.*

*Tunc quoque tanta maris moles crevisset in
astra,*

Ni superum rector pressisset nubibus undas.
In sacro etiam argumento non minus ima-
gi-

ginatio sibi permittit. Licuerit Homero
nescio quæ monstra Deorum fingere; Deos
ab hominibus vulneratos, quod cum Marti
contigisset, clamaverit bellator iste Deus,

Ὅσπον τ' ἐννεάχιλοι ἐπ' ἄλκον ἢ δεκάχιλοι. Iliad. 5.

Neque enim certo id scit Poëta. Quis
Christianum Poëtam feret, Christo na-
scente, hæc evenisse fingentem:

stellataque machina mundi

Proscripsit ferale jubar, micuere secundo

Omne siderea facies: dum pignora cælum

*Tanta sibi promissa putat: sua frigora ful-
gens*

Ægoceros media voluit mitescere bruma,

Et tepuit glacialis hiems, decessit Olympo

*Arctophylax, fugit socia cum conjuge Ce-
pheus*

Et Chiron Persæusque furens & Plejæ & ipse

Amphitryoniades.

Ut illam permixtionem religionis nostræ
mysteriorum cum absurdissimis Gentilium
fabulis, in qua tantum sibi Christiani Poë-
tæ nonnunquam indulgent, silentio præ-
teream.

XVII. Cum vero non in sensu tantum
orationis, sed in verbis etiam sublimita-
tem quærunt ii, qui plus ingenii, quam
judicii habent, quæ non verba, quas lo-
quendi formas non adducunt? Ad peten-

Barlæus
Hymno in
Christum
lib. 1. He-
roicor.

Aliud me-
teoron.
Etiam in
verbis sub-
limitatem
quærunt
nonnulli.

das *metaphoras* aliosque tropos uno mundi extremo ad aliud currunt; quæ sponte sequi nolunt, trahuntur: *periphrases* finguntur *enormes*, & non uno spiritu enuntiandæ: quicquid in hoc universo magnum est, cælum cum plagis suis omnibusque astris, omnes terræ earumque populi, omnia maria, lacus, flumina, montes, omnes Dii Deæque, omnia denique monstra nomina sua, cognomina atque *epithesa* scribenti commodare debent, ut his coacervatis granditas orationis augeatur. Neptuno tridens, Minervæ clypeus, cum capite Medusæ, Phœbo quadriga, Mercurio tales alæ, ipsi denique Herculi clava, imo Jovi trifidum fulmen eripitur. Xerxes jam non amplius est Persarum Rex, sed *Persarum Jupiter*. Vultures jam non amplius aves sunt rapaces, sed *sepulchra animata*. *Heliotropium* florum est *Mathusalem*. Qui lac equinum bibunt, illi ex cornipedis visceribus cibos extrahunt. Nullæ jam amplius in aëre sagittæ volitant, sed *pennata mortes æthera sibi vindicant*. Non jam amplius orator clamat, *quid primum, quid deinde dicam?* sed ita: *Quas aristas horreis inferam, quas relinquam?* En formulam oratoris Panegyrici ad finem orationis properantis: *Vellem,*
fa-

*Exempla
ridicula.*

Longin.
c. 2.

Gongora
Hispan. Poë-
ta.
Ennod.
Paneg.
Theodo-
ric. dict.

fatear, ad orationis terminum victus gestorum
 tuorum enormitate descendere & novellas a-
 doreas, hebetatus priscorum luce, transire.
 Quemadmodum si aetherei axis in numerum
 redigere ornamenta voluissim &, trionum
 fulgore comprehenso, celi decorem impotenti
 lingua describere, cederet divino splendori
 mortalis obscuritas, jubavis lampadi non suf-
 ficeret humilium scintilla sermonum.

Denique ne singulae quidem voces, vul-
 gares si sunt, placent; nulla satis digni-
 tatis, aut soni, aut sensus habet. Novae
 fingendae, veteres revocandae; ubi con-
 suetae justam mensuram non habent. Del-
 phini sunt repandirostrum & incurvicervi-
 um pecus, grande periculum est hypobry-
 chium irrespirabile, aries est animal recipro-
 corne, aper Nemorivagus, cerva sylvicul-
 trix, huc faciunt Poetica illa composita no-
 mina cum verbis gero & fero, ad quorum
 imitationem alia plura confingi possunt;
 nomina superlativa, patronymica; verba
 frequentativa, inchoativa, imitativa, desi-
 derativa; omnia denique majoris & sesqui-
 pedalis mensurae vocabula.

XVIII. Quum supra diximus, ad sub-
 limitatem orationis facere, si magnum
 illa & excelsum animum praeseferat; mul-
 ti, qui inter veram animi magnitudinem

& su-

*Aliud Me-
teorum.*

*Mulsi illa
dicta subli-
mia esse
existi-
mant,*

quæ sunt
superba &
impia.

& superbiam distinguere nequeunt, illa dicta sublimia esse existimant, quæ sunt arrogantia, superba, ferocia atque impia: quæ arguunt contemptum non rerum parvarum, sed rerum contemptore longe majorum atque adeo maximarum, quorum illud animi magni, hoc superbi est.

Exempla.

Exod. 5. 2.

2 Reg. 18.

vs. 35.

Isaiz 14.

vs. 14.

Plal. 73.

vs. 8, 9.

Sueton. in

Augusto.

Idem in

Caligula.

Tale μετέωρον est illud Pharaonis, *quis est Jehova, cui dicto audiens sim?* tale illud Sennacharibi: *quis tandem est ex omnibus terrarum diis, qui suam terram à me manu defenderit?* tale Nabuchodonosoris:

Ascendam super altitudinem nubium, similis ero altissimo. Hi nimirum sunt illi μετεωρο-

λόγοι, qui, ut ait Psalmista, *de sublimi loquuntur, qui ponunt os suum in cælum, quorum lingua ambulat in terra.* Tale est illud,

quod Augusto à quibusdam tribuitur, *etiam invito Neptuneo victoriam se adepturum;*

Tale illud Caligulae, Jovi suo ita com-

minantis: *Εἰς γαῖον Δαναῶν περᾶω σέ.* Hu-

jus adeo omnia dicta, ipsæ etiâ metaphoræ truculentam quandam superbiam

redoluerunt plane, ut peroraturus, *stridendum se lucubrationis suæ telum minaretur.*

Pari arrogantia Domitianus, cum procuratorum tuorum nomine formalem dictaret epistolam, sic cœpit: *Dominus &*

Deus noster sic fieri jubet.

Fal-

Falluntur in hoc sæpe Poëtæ, ut, cum magnum quiddam & sublime dicere volunt, superbum & impium dicant. Sic Lucanus de Nerone Successore eorum, qui per bella civilia multaque scelera ad imperium pervenerunt: *scelera ipsaque nefasque hac mercede placent*. Idem conferens Cæsaris & Pompeji partes:

Lucan.
lib. 1.

Victrix causa Diis placuit, sed victa Catoni.
Unum Catonem omnibus Diis opponit, si non anteponit. Hercules apud Senecam, si modo Seneca Tragœdiæ auctor est, his verbis à Jove in cœlum recipi postulat:

Quid tamen neclis moras?

Herculis
Octavi, qui
Senecæ
tribuitur
act. 1. sc. 1.

*Numquid timeamur? numquid impositum
sibi*

Non poterit Atlas ferre cum cœlo Herculem? &c.

Da da tuendos Jupiter saltem Deos.

Illam licebit fulmen à parte auferas,

Ego quam tuebor, sive glaciale polum,

Sen me tueri fervidam partem jubes,

Hac esse superos parte securos puta.

Typhon aut Enceladus ita loquitur cœlum oppugnaturus, non Heros. Cui non dissimile illud Martialis ad Domitianum epigramma, quo vitam illi longævam precatur:

Esse

Martialis
l. 8. epi-
gram. 39.

Esse velis, oro, serus conviva conamus.

At tu si properas, Jupiter, ipse veni.

Ita non modo superbus & impitius est ille
mos Poëtarum, Deos accusandi, invi-
diam iis conflandi, convitiis onerandi,
sed & illæ loquendi formæ nescio quid ar-
rogantiæ & impietatis habent, quibus *Diis*
invidia exonerari, probari, absolvi dicun-
tur, omnes denique, quæ contemptum sa-
pient rerum minime contemnendarum:
quales sunt res sacræ, probitas, pietas,
iustitia, reliquæ virtutes, præstantes vi-
ri, dicta factaque præclara, Reges, ma-
gistratus, qui nobis præsunt, patria,
parentes, jura, leges, patriæ consuetu-
dines, & hujusmodi alia: quæ dicta ha-
rum rerum contemptum redolent, nihil
veræ granditatis habent.

*Unde hoc
vitium.*

Quod si hæc audacter & intrepide dicta
nobis quadam sublimitatis specie abblan-
diuntur, inde id oritur, quia omnes,
quotquot sumus, superba animalia sumus,
qui non modo amamus nos efferre supra ea,
quæ nobis inferiora sunt, qua in re mini-
me peccaremus, sed tum etiam, cum in-
fra vilissimas nos res abjicimus, quasi ad
dignitatem recuperandam, nos ipsos su-
pra omne id, quod excellit, evehimus.
Quod cum facimus, mirificam volupta-
tem

tem capimus ex omnibus dictis, quæ nos in hac superbia confirmant, hæc dicta consideramus tanquam specula, in quibus animi nostri longe grandiores apparent, atque sunt; eaque propterea tanquam grandia atque sublimia amamus atque exosculamur. Hanc causam viri perspicaces esse putant, quare omnis orationis sublimitas tantopere audientibus placeat, sapienter certe, si modo inter veram & animi & orationis sublimitatem, & vanum utriusque factum discrimen agnoscerent.

Neque tamen culpandi illi sunt scriptores, qui, cum alios in libris suis loquentes introducunt, superbiam loquentium ipsa oratione depingunt. Egregie T. Livius, cum Servius Tullius rebellem Tarquinium his verbis comprimere vellet: *Quid hoc, Tarquini, rei est? quæ tu audacia me vivo vocare ausus es Patres? aut in sede considerare mea?* hoc Tarquinium & Regi & Socero suo respondisse inquit: Se patris sui tenere sedem, multo, quam servum, potio rem filium regis regni hæredem: satis illum diu per licentiam eludentem insultasse Dominis. Superbus est Tarquinus, qui ita loquitur, at Livius sublimis, qui tantam hujus superbiæ in oratione expri-

Nec tamen culpandi scriptores, qui superbiam loquentium oratione depingunt.
Liv. dec.
l. l. l.
c. 48.

primit imaginem. Medæ apud Senecam, cum a nutrice objiceretur, nihil illi è tantis opibus reliquum esse, ad levitatem Jafonis ulciscendam; ita Medea:

*Medea superest: hæc mare & terras vides,
Ferrumque & ignes & Deos & fulmina.*

Superba, impia, imò insaniens est Medea, quæ ita loquitur; at præclare Seneca audacis mulieris rabiem his verbis depingit: qua ratione neque Polyphemi meteora in Ovidio sunt reprehendenda; horrida est Polyphemi eloquentia, at Ovidii carmen elegantissimum. In his non id quod repræsentatur, sed repræsentatio nobis placere debet.

*Tertium
meteori ge-
nus: Viti-
osa orationis
sublimitas.*

XIX. Dicendum tandem aliquid est de tertio, partitionis nostræ, *meteorigenerere*, ubi duo priora ita concurrunt, ut non modo argumentum orationis sublimis humile sit, sed & vitiosa orationis sublimitas; hoc est infanti non cothurnos Herculis, sed Polyphemi aut Typhonis calceos aptare.

Exempla.

Neque tamen defuerant, neque etiam nunc defunt, qui his meteoris capiuntur; qui se adeo demittere nequeunt, ut res etiam vulgatissimas atque communissimas turgida oratione induant. Aves appellatur *pennatas tibias aut alatos Poëtas* vocabunt:

bunt: virginem μένανδρον dicent: Gal- Vide plu-
 lum gallinaceum ὀρθροβόον. Quære ex ho- ra hujus-
 rum aliquo quodnam munus exerceat: Re- modi a-
 spondet fortasse ex Sedulio: *Ego deca-* pud Athe-
chordo psalterio inter beati dogmatis choros nzum lib.
Davidica modulationis cantus exerceo. 3. p. m.
 Cantorem in Ecclesia se vult dicere. Quære 98, 99.
 ex alio, ut valeat; *Satis bene se in caruncu-*
la folliculo constitutum esse, dicet: quid agat,
 interroga: dicet, *se in castris Musarum*
militare, aut, si scribit, dicet, *se aliquid*
Niliaci papyro gurgitis calamo perarante con- ex Sedulio.
tradere.

Quære, quo anno aliquid factum sit,
 annum ita describet, *post tempora incarnati*
Verbi, ignea romphea in ostio Paradisi fonte
lateris Christi extincta, ut regnum Dei vio-
lentius raperetur, hoc vel illo anno res con-
 tigit; aut si magnis vocibus magis capi-
 tur, quam magnis periphrasibus: dicet,
 ex nescio quo antiquo *tabulario,* id acci-
 disse, hoc illove *Præsule Archiepiscopante,*
 hoc illove *Rege Ptolomante:* aut, si cul-
 tius loqui velit, dicet, adolescentem in
 Siciliam venisse tum, cum *nondum orbis*
adoraverat Romam, cum nondum Oceanus
concesserat Tybri. Parum etiam aberit, quin
 servo mandaturus, ut ocreas sibi demat,
 formulâ utatur, quam in hoc casu nescio

Glossar.
 Du Fresne
 verb. Pto-
 lomare.

quis Rhetor magnifice dicturo suadet : *Tu qui me inferior es, innitere corporis tui columnis, & ab his mortui bovis exuviis me libera.*

Alius familiarem ætatis tempore ex urbe in agrum ad se vocabit his verbis : *Fam ver decedit ætati, & per lineas sol altatus extremas, in axem Scythicum radio peregrinante porrigitur. Mundus incanduit, glacies Alpina deletur, & hiulcis arentium rimarum flexibus terra perscribitur, squalet glareæ in vadis, limus in ripis, pulvis in campis, aqua ipsa quocunque perpetuo labens, tractu cunctante languescit. Etiam non solum calet unda sed coquitur, & nunc, dum in carbaso sudat unus, alter in bombyce : tu endromidatus exterius, intrinsecus fasciatus, insuper & concava municipii Camerini sede compressus, discipulis non æstu minus, quam timore palentibus, exponere oscitabundus ordiris : Samia mihi mater fuit. Quin tu mage, si quid salubre tibi cordi, raptim subduceris anhelantibus angustiis civitatis & contubernio nostro avertere insertus, fallis clementissimo recessu inclementiam canicularum. Hunc stylum facile agnoscet vigilax lector, qui Sidonii Apollinaris Avernorum Episcopi lectitandis epistolis voluptuosam patientiam impendit. Adco enim ubique sibi constat, ut amicum*
ne

Sidon. Apollinar.
Epist. ad Domitium lib.
2. cap. 2.

Sidonii
verba.

he salutare quidem possit, nisi in *salutationem erumpat*. Ad Papam i. e. Episcopum & fratrem vero cum scribit, se ipsum superat: *Papæ attremitturba collegii: ingratitatis ipsius comparationem ipsa etiam grandævorum corda puerascunt: spiritalia castra eum venerantur tanquam quendam conclamatisimum primipilarem utriusque sanctorum ordinis: qui manum lingua porrigit omnibus in conscientia sauciatis, neque proinde est mirandum, quod Papæ se submissurus lixam se & calonem vocat, imo leprosi illius in Evangelio conleprosum.*

Idem ad
Papam
Iupum
epist. 1.
lib. 6.

Maxime terribilia *meteora* Africa produxit. Tale est *Martiani Capella* liber, cuius vel ipse titulus, *de nuptiis Philologiae & Mercurii* nescio quid magni promittere videtur. Orditur eum magnificis versibus, quibus *Hymenæum* invocat; fabulam telegere crederes, quam Romanensem vocant. Omnes Dii Deæque in scenam prodeunt. Singulæ Musæ singula canunt epithalamia. Sponsa tandem deducitur in *fovialem domum*, quæ etiam granditate miramundatum ambitum possideret, & decore conspicuo fulgorem siderum vinceret, & novitate situs signiferum circulum decussaret. Ita loquitur auctor, cum intelligi vult: pleaque longe obscuriora. Legis primum,

Martianus
Capella.

legis secundum, legis initium tertii libri: per longos & sinuosos Labyrinthi alicujus magnifici sed tenebrofi anfractus putes te duci nescio quo: expectas exitum: subito tandem lux apparet, locum notum agnoscis: in *Grammaticam* es delatus, *literarum, syllabarum, vocum* ratio explicatur, hincque ad *Dialecticam* *prædicabilia* deducis, tandemque vides heroicam hanc fabulam eò tendere, ut generalia artium liberalium præcepta tradat.

Tertullianus de pallio.

Huic terribili meteoris nihilo inferius est *Tertulliani liber de Pallio*. Auctor notatus erat ab Afris, quod, posita toga, Pallium sumserit: Indignum neque ferendum hoc cum illi videretur convicium; scripsit *Apologiam pallii*; ubi postquam omnes, quasunque vastissima totumque mundum complectens imaginatio excogitare poterat, mutationes, ad suam palliandam, adduxisset, quicquid magnificentissime de pallio dici potest, coacervasset; tandem pallium ipsum loquens introducit: *Adigo, audite pallium loquens, canterem ambitioni * Dabo catharticum impuritati, * De occursum meo vitia suffundo * De meo vestiuntur & primus informator literarum & primus enodator vocis, & primus numerorum arenarius & Grammaticus, & Rhe-*

& Rhetor & Sophista & Medicus & Poëta & qui Musicam pulsat, & qui stellarum conjectat & qui volaticam spectat. Omnis liberalitas studiorum quatuor meis angulis continetur. Quisquamne unquam magnificentius, atque hic pallium, verba fecit; Integram ejus orationem adduxissem, nisi stylus hujus pallii paulo esset obscurior; quâ virtute vel ipsum Dominum superat.

His duobus Afris tertium adungere Apulejus. possem, Apulejum, in quo multa etiam meteora observabis: *modo si papyrus Ægyptiam tu, argutia Nilotici calami inscriptam, non spreveris inspicere.* Sed Scriptor iste in omnium manibus est, adeoque à multis amatur, ut, si quis eum reprehenderet, illum *invidia nefaria lethali plaga percussus* esse clamarent. Nihil audemus dicere, quando Lipsius ipse stylum ejus *adversus istos de Arpinati Schola investes* pueros, ita eleganter Ciceronis cultores vocat, asserere non veretur.

Epist.
quæst.
epist. 22.

Optandum esset, ut hæc sublimis videlicet eloquentia non pueris in scholis instillaretur. Inde enim prima styli corruptio provenit. Eam sublimitatis ideam multi retinent, quam à præceptore suo acceperant, qui si inepte hic sentit, discipulis eundem

Prima styli corruptio provenit ab hac sublimitate quæ pueris in scholis instillatur.

tradit errorem. Cum præceptorem identidem audiunt & affectantem & commendantem mellitos nescio quos verborum globos, dictaque quasi papavere & sesamo sparsa: non magis, ut ait Eumolpus apud Petronium, sapere possunt, quam bene olere qui in culina habitant: nisi eo sint in pueritia iudicio, quod in Henrico Valesio fuisse Frater Hadrianus Valesius commemorat. Digna res quæ hic adducatur: Præceptor Henrici vocabatur Russellus, homo minime malus, sed admodum imperitus & artis, quam profitebatur, rudis & ignarus, qui in prosa eloquentia verba grandia & bene sonantia, orationem in re vel levissima numerosam, plenam pompæ & majestatis, descriptionesque ne in carmine quidem tolerabiles affectabat: qualis est hæc primæ lucis descriptio, quam Valesius à ludo recens sæpe recitantis more graviter pronunciabat: Dilucescebat: &, emissâ jam uberioris affutura lucis quasi præcone aurora flavoscentem auro casariem pullulantibus in altum radiis sol matutinus depecebat. Actum erat, inquit Hadrianus, de Valesio, si talem Præceptorem esset imitatus: sed exemplis magistri malis atque vitiosis iudicium discipuli prævaluit. Quam sibi placerent multi Magistri, si tam alte in oratione, ut Russellus iste, possent ascendere, nunc cum id
non

non possint; satis sublimes sibi videntur; si discipulis, ut epistolas ita incipiant: *Salutem à fonte salutis Amice medullitus peramando*: itaque finiant: *Tuus per saxa per ignes*, & alias hujusmodi formulas præcipiunt.

XX. Sed & extra scholas in vulgaribus *Etiam extra scholas* linguis meteora inveniuntur. Pleni sunt *in vulgari-* illis *Itali*, pleni *Hispani* scriptores; *Germani* multi eos in his imitantur. *Galli hodierni* saniores patribus atque avis, veram *meteora in-* tandem, fulgoribus his relictis, scribendi formam animo sunt complexi, quam si retinere possent; est autem difficile huic genti diu aliquid retinere; proxime eorum eloquentia ad priscam illam, quæ in Græcia Demosthenis & Romæ Ciceronis tempore viguit, accederet. Superfunt tamen in omnibus linguis hodiernis, nescio quæ meteora priscis incognita. Hæc sunt formulæ illæ, quibus alii aliis observantiam & reverentiam testamur, *Complementa* vocant, ad quod significandum neque Græci neque Romani ullum nomen invenerunt, *verba honoris* quidam appellant; ubi magnis & nescio quid promittentibus verbis nihil fere significamus; dicere se *humilimum* atque *obedientissimum* alicui, *us servum aut mancipium*, nihilo plus

significat quam Græcorum χαῖρε & ave
Latinorum : ut alias longiores atque sub-
limiores formulas taceam. Nemini suade-
rem ut hæc, ubi illa consuetudo poscit,
omitteret : optandum tamen esset, ut
paulatim politiores homines hanc ineptam
consuetudinem dediscere possent ; non
tot inutilibus vocibus oratio inflaretur at-
que enervaretur.

F I N I S.

IN-

INDEX

RERUM & VERBORUM

de quibus in Dissertatione de Logomachiis fit mentio.

A.

Æ Nigmata solvere conantes quomodo imitandi in Logomachiis. 198

Affectus ad præjudicia accedentes, majus hoc malum reddunt, præsertim invidia & odium. 186

A. Gellii lepida narratio de Plutarcho qui servum loris cædi jusserat. 31

Henr. Altingii studium discernendi Logomachias à reliquis controversiis, in Theologia Elenctica. 25

Ambiguitatis affectatio etiam parit Logomachias, 159. ejus studium frequens. ibid. & exempla plurima. 159. 160

Amor verborum. vide Verborum amor.

Angli tempore Cromwelli, nomen regni adeo abhorrebant, ut etiam ex oratione Dominica ejicerent. 178

Argumenta ridicula de quibus sæpe disputatur. 9. 10

Aristotelis & Aristotelicorum obscuritates. 152. 153

Assentiri alteri, non est nostri arbitrii. 7

Athenienses fame pressi beneficio peregrini uti nolunt, antequam barbarismum correxisset. 104

Attentio ad verba, remedium adversus Logomachias. 243

X 5

de

I N D E X.

Contentio inter Jesuitas, novos Thomistas & Jansenistas. 77

Contradicimus nobis, ubi & quando. 201

Controversia cucurbitaria inter Augustinum & Hieronymum. 10

Critici quomodo & quando imitandi in Logomachiis. 198

Critici veterum scriptorum emendatores quidam Logomachis accensendi. 16. eorum frivola sæpe concertationes. ibid.

Critici sui temporis à Turnebo notati. 17

Cupiditas immoderata aliorum mentibus imperandi, causa primaria Logomachiae 4. ejus absurditas pluribus ostensa. 5. rixarum & convitiarum fons est. ibid.

D.

Definitiones rei non tam reprehenduntur ob falsitatem quam quod perfectæ definitionis legibus non sint conformes. 209

de Definitionibus nominum in philosophia disputare est aperta Logomachia. 209

Demetrius Rex barbarismi indicium Idc mendicis frumenti remunerat. 103

Demonstrationes arithmeticae & geometricae, utilissimae studiosis. 259

Dialecticorum pleraque controversiae ad Logomachias referendae. 63

Dictoria & scommata imperitorum in eruditos oriuntur ex Logomachiis ridiculis. 102

Disceptationes eruditorum de rebus, quae solam veritatis cognitionem intendunt, non sunt vitiosae, nec morbi. 3

Disceptatio Scaligeri & Cardani, an bædus tot habeat pilos quot caper? 11

Disci-

I N D E X.

Discipuli in tenera aetate non nimis assuescendi studio contradicendi. 257. nimium disputandi exercitium quam sit noxium. ibid.

Disputantes variis modis causam præbent Logomachiis. 142

Disputatio hodierna de moralitate Sabbathi. 49
de ἀφ᾽ ἑσῆς ἔκ παλαιοῦ ἀμαρτιῶν. 52. auctoris sententia de origine hujus disputationis. 55

Disputationes paucae absque Logomachia. 49. studioforum quales esse debeant. 258. quæ alia illis adungere debeant. 259. de definitionibus ἔκ divisionibus, pleraque sunt Logomachiae. 208. 209. 210

Dissensus inter disputantes, à sermone disputantium provenit, verborum varia significatione ἔκ vocum homonymia. 123

Dissensus nullus esse potest de multis rebus. 194
ut de axiomatibus. 195. de enunciatis immediate ex axiomatibus deductis. 196.

Dissensus verus est in probabilibus. 196. est ἔκ in rebus certis, sed cognitu difficilioribus. ibid.

Dissentientem cur quis ferre possit. 7
de Divisionibus rerum disputare levissimum. 210

Divitiarum cupido saepe Logomachia. 110

Dubitandi causæ non desunt. 230. dubitatio hæc non est periculosa. 232

E.

Epicureorum ἔκ Stoicorum Logomachia de voluptate. 33. 117. 118

Epicurus in voluptate, bono sensu, summum bonum posuit. 117. alii Philosophi non tam contra

I N D E X.

- contra ejus sententiam, quam contra vocabu-
 lum voluptatis disputant.* 118. *veram ejus
 sententiam vitæ ratio probat.* 204
*Erroris confessio, remedium adversus Logoma-
 chias.* 236. *magni animi est, si quis profi-
 teri audeat se errasse.* 237
Eruditi sæpe & extra conflictum sunt obscuri.
 146. *maxime philosophi.* 146. *id ostenditur
 exemplis.* 147. 148
*Eruditio multorum est in solis verbis: hinc eru-
 diti omnes in nominales & reales distingui
 possunt.* 166
Exercitium disputandi nimium quam sit noxium.
 257. *quæ alia exercitia disputationibus adjun-
 genda.* 259

F.

- Felicitis Urgelitani Logomachia.* 23

G.

- Gallici Legati Regi suo apud Hispanos uxorem
 querentes, ex duabus sororibus majorem for-
 mosissimamque negligunt propter illius nomen.* 177
*Steph. Gaußenus laudat Cartesium quod Logo-
 machias è Philosophia sustulerit.* 42. *ejus sen-
 tentia de methodis disciplinarum.* 66. *judicium
 de usu terminorum philosophicorum in theolo-
 gia.* 141. 223. *ejus confessio de eruditione quæ
 est in solis verbis.* 166
Gloriæ cupido sæpe Logomachia. 110
*Grammaticalis belli acerrimi specimen inter
 Frischlinum & Crusium.* 13
Gram-

I N D E X.

Grammaticorum & Philologorum rixæ. 12

H.

Heinsii & Salmastii disputatio de lingua Hellenistica. 206. 207

Hobbesius à Cartesio correctus. 167

Huerti verba de bruta discendi ratione. 171. 172.
narratio lepida de Legatis Gallicis Regi suo uxorem querentibus apud Hispanos, qui juniorem sororem minus formosam præferunt majori licet formosissima, ob nominis odium. 177

I.

Ingenia volatica & desultoria sententiam illorum quibuscum disputant perperam intelligentes, non mala fide agunt. 162. illorum mentis levitas ex variis causis procedit. 163

Ingenia superficialia aliorum verba non intellecta oppugnant. 164. quomodo differant ab ingeniis desultoriis. ibid.

qui Ingenio suo utuntur, verbis utplurimum egent cum sententiam suam exponere volunt. 175

de Imputatione consequentiarum, quæstio. 239. opinionis, à qua se alienum quis dicit. 238

in Institutione observanda: non tam verba quam res docenda. 254. præceptorum in his officium. 255. mos perversus instituendi. ibid. alia in institutionibus observanda. 257. 258 &c.

Institutionis & educationis vitio assuescimus verba non intellecta pronunciare. 168

Intelligere multi alios nolunt, & qui. 189. 190.

191

Invidia

I N D E X.

- Invidia & odium præjudicia reddunt majora.* 186
Invidiam qui constare volunt aliis, vel invident, nolunt eos intelligere. 190
à Judicando in rebus incertis abstinere tutissimum. 243
Jureconsultorum Logomachia. 26. & eorum qui jus naturæ explicant. 27

L.

- Laco consilii quamvis egregii, quod non ipse afferret, inimicus.* 189
Lectionem sicut discipuli recitare qui dicantur. 169
Lexicon universale vocum Logomachicarum quomodo adornandum. 220. 263. ejus utilitas. 221
pro Libertate decertantibus, libertas semper in ore est. 212
Libri quomodo scribendi, ut Logomachiis occasio præcidatur. 260. 261 &c. quomodo legendi. 264. requiritur ante lectionem voluntas intelligendi. ibid. & facultas. 265. cavendum ne aliorum judicia nos auferant. ibid. in ipsa lectione, attentio. 266. & cautio. 267
Libros legentium varia præjudicia. 182. 183. &c.
Linguarum defectus qui emendare sunt conati philosophi, magnam linguis mutationem attulerunt. 139. idque pluribus Logomachiis originem dedit. 140
Litteratorum multorum omnis eruditio est in verbis; hinc omnes eruditi in nominales & reales distinguí possunt. 166
Locus Pauli 1. Tim. VI. 4. 5. Logomachia morbo labo-

I N D E X.

- laborantem describens, fusius explicatus.* 78.
79. &c. alius locus Rom. I. 21. 22. explica-
tus. 200
Logomachia morbus est, vel teste Paulo Aposto-
lo. 2 rei literariæ & religioni perquam
noxius. 4. de verbis est vel adversus verba,
vel pro verbis. 8. late se extendit. 9. pura
& mixta. 48. cæca. 67. 150. morbus est con-
tagiosus. 85. qui literatos literasque in con-
temptum adducit. 98
Logomachia morbus curatu difficilissimus & quare.
112. 113. &c. etiam morbus periculosus, cum
sæpe augeatur dum illum sanare volumus. 117
Logomachia morbo laborantem quomodo descri-
bat S. Paulus. 78. 79. & seqq.
Logomachia significatio duplex. 2. causæ prima-
ria. 4. de verbis definitio generalis & variæ
nomina. 9. definitio specialis. 11. magna diver-
sitas. ibid. curandæ methodus in hac disserta-
tione observata. 19. variæ species. 47
Logomachia multæ in Theologia, earumque
exempla. 21. inter Græcos & Latinos de Hy-
postasi. ibid. de Trinitate. 22. de processione
Sp. S. ibid. Nestorii & Orthodox. ibid. Fe-
licis Urgelitani. 23. in Belgio nuper acerrimæ. 75
Logomachia aliorum si nos petant, quid agen-
dum. 244. 245. huic remedio non semper est
locus. 246
Logomachia Jureconsultorum. 26. & eorum qui
jus naturæ explicant. 27
Logomachia Medicorum. 27. in Mathesi. 45
Logomachia Scholasticorum. 24. etiam inter
Theologos hodiernos. 25. Philosophorum Scho-
lasticorum. 36. in Physica & Metaphysica. 37.
Y
Rea-

I N D E X.

- Realium & Nominalium.* [38.](#) [39.](#) in logica. [41](#)
- Logomachiae dantur etiam extra scholas, in foro, in curia &c.* [103.](#) exemplo Demetrii R. ibid. Atheniensium. [104.](#) Romanorum multivariae. [104.](#) [105.](#) &c. dantur & hodie extra scholas. [108.](#) [109](#)
- Logomachia de particulis indeclinabilibus in Concilio Basiliensi cum Græcis.* [98.](#) quos hinc irridet Sultanus Turcicus. [99.](#) P. Manutii & Lambini super verbo consumptum. [100.](#) Philosophi Comici super forma vel figura pilei. [101](#)
- Logomachia Stoicorum & Epicureorum de voluptate.* [33.](#) [117.](#) [118.](#) Aristotelicorum & P. Rami. [57.](#) [58.](#) &c.
- Logomachiarum magna ubique copia, maxime inter eruditos.* [20.](#) Philosophia semper feracissima. [28.](#) plena est Physica Scholasticorum. [40.](#) variae species. [48.](#) harum differentia prima. ibid. altera. [56.](#) [57.](#) tertia. [67.](#) aliae species. [70.](#) fructus perniciosi in Theologia. [86.](#) alii perniciosi effectus. [87.](#) nocumenta in aliis disciplinis. [90.](#) mala plura. [96](#)
- Logomachiarum causae omnes ad duo genera reductae.* [122.](#) fontis ubertas. [124.](#) synonymia etiam saepe causa. [135.](#) & philosophi qui linguarum defectus emendare sunt conati. [140.](#) nec non obscuritas orationis. [150.](#) quod probatur testimoniis & exemplis variis. [151.](#) [152](#) &c.
- Logomachiarum signa cognoscere, est utile.* [192.](#) signum primum. [192.](#) [193.](#) secundum. [193.](#) tertium. [197.](#) quartum. [201.](#) quintum. [203.](#) sextum. [206.](#) septimum. [208.](#) octavum. [211.](#) nonum. [213.](#) X. & XI. [215.](#) XII. [216.](#) signa haec omnia non aequae certa sunt. [217](#)
Lo-

I N D E X.

Logomachi omnium ineptissimi sunt, qui existimant se de rebus gravissimis disputare, cum non nisi verbis dissideant. 18. quibus sint similes. *ibid.* *virtus perspicacibus* non minus sunt risui quam cæci disgladiantes. 19. 99

Logomachiis solis, non veris controversiis, impediuntur hodie plurimi, quo minus pacem cum fratribus in fundamento non dissentientibus colant. 73. pluribus originem dederunt Philosophi qui linguarum defectus emendare sunt conati. 140

Logomachis accensendi emendatores quidam critici veterum scriptorum. 16

Logomachorum rixosa pertinacitas. 113

Logomachos qui vult sanare, odium illorum incurrit maximum. 113. 114. Et alia mala sibi arcessit. 115. an illos conciliare. 249. an vero ridere sit utile. 250

Luciani notabile dictum de Philosophis. 2

M.

Malebrancii verba de vocibus mente cassis. 148.

149. de ingeniorum defectu. 165. de zelo adulterino. 188

in Matthesi Logomachias esse exemplis demonstratur. 45

Medicorum Logomachia. 27

Memoria quidem exercenda. 169. at quis modus sit tenendus. 170

Methodus curanda Logomachia in hac dissertatione observata. 20

Montaltius laudatus. 76

Morbi gravitas ex periculosis symptomatibus dignoscenda. 78

I N D E X.

<i>Mos occultandi sapientiam divinam & humanam apud varias gentes.</i>	<u>151</u>
<i>Mos perversus instituendi.</i>	<u>255</u>
<i>Multa sunt de quibus dissensus nullus esse potest.</i>	<u>194</u>

N.

<i>Nestorii & Orthodoxorum dissensus.</i>	<u>22</u>
<i>Nomina aliquot odiosa.</i>	<u>179. 180</u>
<i>Nomine quicquid significatur, multi lubentius amittunt, quam nomen, & contra.</i>	<u>190</u>
<i>Nugæ sunt nugæ, ut ut sint difficiles.</i>	<u>11</u>
<i>Numeri Pythagorici & Platonici.</i>	<u>151. 152</u>

O.

<i>de Objecto suo cuique disciplinæ assignando, sententia auctoris. <u>64.</u> Senecæ locus in hanc rem. ibid.</i>	
<i>Obscuritas verborum vel involuntaria est, vel affectata: illa summis quandoque ingeniis adheret, & cur? <u>143.</u> obscuritatis causæ aliquot. <u>143. 144.</u> alia causæ.</i>	<u>145</u>
<i>ex Obscuritate orationis affectata oriuntur Logomachia. <u>150.</u> quod probatur testimoniis & exemplis variis.</i>	<u>150. 151</u>
<i>Obscuritatis Platonis, Aristotelis, eorumque qui illos sunt sectati. <u>152. 153.</u> Scholasticorum. <u>153. 154.</u> causæ vel potius prætextus hujus obscuritatis. <u>154. 155.</u> &c.</i>	
<i>Obscuritates sæpe in conflictibus disputationum, unde.</i>	<u>145</u>
<i>Odia aliquando <u>zeli</u> nomine teguntur.</i>	<u>187</u>
<i>Odium & invidia, præjudicia reddunt majora. <u>186</u></i>	<u>186</u>
<i>Odium</i>	

I N D E X.

Odiū verborum. vide *Verborum odiū.*
Opinio an nunquam alicui tribui possit, à qua se alienum esse dicit. 238
Oratores & Poëtæ copiam synonymorum augent, & multa illis sunt synonyma, quæ ab aliis significatione distinguuntur. 137
Ordo semper & ubique observandus; sed de eo non disputandum. 65. *Philosophi contrarium facientes similes sunt malis causarum patronis.* 66. *nimis anxia de ordine sollicitudo putidam diligentiam redolet.* *ibid.*

P.

Pauli II. Pontif. nomen Formosi averfantis historia & quare. 178
Peripateticorum & Stoicorum Logomachia de bono & malo. 28. *ridetur à Cicerone.* 29. 30. *alia eorundem, de affectibus.* 31.
Philosophia Logomachiarum semper feracissima 28. *quod probatur exemplis.* *ibid.* &c.
Philosophi qui defectus linguarum emendare sunt conati, magnam linguis mutationem attulerunt. 139. *idque pluribus Logomachiis originem dedit.* 140. *sunt maxime obscuri.* 146. *id ostenditur exemplis.* 147. 148. *causæ, vel potius prætextus hujus obscuritatis.* 154. 155 &c.
Philosophorum recentiorum Logomachia pauciores. 40
Philosophorum Scholasticorum Logomachia. 36. *in Physica & Metaphysica.* 37. *Realium & Nominalium.* 38. 39.
Philosophorum sententiæ multæ æquius sunt interpretandæ, ut Platonis, Socratis, Peripateti-

I N D E X.

<i>teticorum, Cartesii &c.</i>	<u>199. 200</u>
<i>Platonis & Platoniorum obscuritates.</i>	<u>152. 153</u>
<i>Plato defensio contra Ciceronem.</i>	<u>202</u>
<i>Plutarchi lepida disputatio cum servo, quem loris cadi jusserat.</i>	<u>31</u>
<i>Præceptorum officium ne tam verba quam res discantur.</i>	<u>254. 255.</u> varia observanda in in- stitutionibus. <u>257. 258.</u> &c.
<i>Præjudicia efficiunt, ut sententias aliorum male intellectas oppugnemus.</i>	<u>181.</u> unde potissimum oriantur. <u>181.</u> quenam maximæ noxia. <i>ibid.</i> varia legentium libros. <u>182. 183.</u> ad præju- dicia affectus accedentes majus hoc malum reddunt, præcipue invidia & odium. <u>186</u>
<i>Præservativa adversus Logomachias novas.</i>	<u>254</u>
<i>in Probabilibus est verus dissensus.</i>	<u>196</u>
<i>Pugnæ cum hominibus, si mutantur in pugnas cum sententiis; remedium est adversus Logo- machias.</i>	<u>225.</u> respondetur objectionibus. <i>ibid.</i>
<i>Pugnantes cum videmus revera inter se consen- tire, quid faciendum.</i>	<u>249</u>
<i>Purgatio animi à pravis affectibus: remedium adversus Logomachias: ejusque difficultas.</i>	<u>234</u>
<i>Purgatio artium à vocibus obscuris, incertis &c. remedium adversus Logomachias.</i>	<u>222.</u> occur- ritur objectionibus. <u>224</u>
<i>Pyrrhoniorum secta, secta mendacium.</i>	<u>194</u>
<i>Pyrrhonis sententia absurda.</i>	<u>203</u>
<i>Pyrrhonismus apud multos nascitur ex Logo- machis.</i>	<u>96.</u> horum error. <u>97</u>

Q.

Quintilianus laudatus.

143

P. Rami

I N D E X.

R.

P. Rami bellum cum Aristotelicis prolixius representatum. 57. 58. &c.

Realium & Nominalium contentiones. 38. 39.

Remedia adversus Logomachias. 218. *remedium universale primum: Lexicon vocum Logomachicarum.* 220. *secundum: purgatio artium à vocibus obscuris, incertis, &c.* 222. *tertium: si pugna cum hominibus mutentur in pugnas cum sententiis.* 225. *quartum: si disputationes transferantur à genere ad speciem.* &c. 227

Remedia specialia adversus Logomachias: primum. 229. *secundum.* 233. *tertium.* 234. *quartum.* 236. *quintum.* 243. *qua ratione aliis hæc remedia sint adhibenda; & quid agendum si nos ipsos petant aliorum Logomachiae.* 244. 245. *huic remedio non semper est locus.* 246. *leniora remedia adhibenda.* 247

Romani nomen Regis execrantur, regnum patiuntur. 104. 105. *controversia inter patres & plebem de consulatu.* 106. *Logomachiae eorum varia.* 107. 108.

S.

Salmasii & Heinsii disputatio de lingua Hellenistica. 206. 207

de Saltationibus controversia. 123

Scholarum rixosarum fructus perniciosi, inter quos spiritus contentionis, &c. 86

Scholasticorum Logomachiae. 24. *etiam inter Theologos hodiernos.* 25. *Philosophorum.* 36

I N D E X.

<i>Scholasticorum quædam pugna ad Logomachiam cæcam referendæ.</i>	68.	illorum etiam qui disputant de iis quæ captum hominum superant.	69
<i>de Scholasticorum cæca Logomachia ex Senecæ verbis.</i>	92.	<i>Baconis verba.</i>	93.
<i>Theologi cujusdam narratio.</i>			94
<i>Scholasticorum obscuritates.</i>			153
<i>Scioli Grammatici a Br. Waltonò notati.</i>			15
<i>Senecæ iudicium de illo quod in Logomachiis est inane.</i>	91.	<i>ad scholasticorum cæcas Logomachias applicatum.</i>	92.
<i>decisio de ridicula Stoicorum controversia.</i>	95.	<i>verba de Pyrrhonismo ex Logomachiis nascente.</i>	96.
<i>verba de disputationibus ineptis.</i>	102.	<i>testimonium de Epicuro.</i>	205
<i>Sententiæ multæ philosophorum veterum & recentiorum æquius sunt interpretandæ.</i>	199.	<i>ut Platonis, Socratis, ibid. Peripateticorum, Cartesii, &c.</i>	200
<i>qui Sententiam illorum quibuscum disputant perperam intelligunt, horum alii bona fide agant, in aliis affectatus est error.</i>			161. 162
<i>qui Sententias aliorum, ex perpetuo contradicendi studio intelligere nolunt, etiam fovent Logomachias.</i>			189
<i>Sententias dissipatas & solutas qui memoria tenent, nil nisi nuda verba retinent.</i>	172.	<i>nec ferunt ut disciplinarum vocabula mutantur.</i>	173.
<i>quibus sint similes.</i>			173
<i>Sententias quidem multi cum verbis quoque percipiunt, neque tamen sententiarum nexum mente complectuntur.</i>			172
<i>Sententias & verba quidam ita colligarunt, ut hæc ab illis abstrahere non possint.</i>	173.	<i>Hi longe cæteris expeditius loquuntur.</i>	174
			Signa

I N D E X.

Signa Logomachiarum duodecim. 192. ad. 216.
non sunt omnia æque certa. 217

Spirituum à corpore sejunctorum dissensus qua-
lis. 122

Stoicorum sententia de bono & malo. 28. ride-
tur à Cicerone. 29. 30. eorum controversia:
an omnia peccata sint paria? 30. an vir-
tutes & vitia sint animalia. ibid. an vo-
luptas sit summum bonum 33. 117. 118. con-
troversia ridicula: an cum sapientia bonum
sit, etiam sapere sit bonum. 94

Stuporis & malitiæ non accusandi, quos sanare
cupimus, sed remedia leniora adhibenda. 247

Synonymia sæpe causa Logomachiarum. 135

Synonymorum copia unde. 135. 136. ingensim
qualibet lingua: quàm augent Oratores &
Poëtæ, quibus multa sunt synonyma, quæ ab
aliis significatione distinguuntur. 137. iisdem
hominibus nonnunquam vocabula idem signi-
ficant, quæ alias distinguere solent. 138

T.

qui Terminos scholasticos in Theologiam invexe-
runt, Logomachiis occasionem præbuerunt. 161

Theologi ex praxi adversariorum de eorundem
doctrina sæpius judicare deberent. 205

Theologorum Logomachia multa. 21. de Hypo-
stasi. ibid. de Trinitate. 22. de processione

Spiritus S. à Patre & Filio. ibid. Nestorii
& orthodoxorum. ibid. Felicis Urgelitani. 23

Turnebi locus in criticos sui temporis. 17

V.

Verba non intellecta pronuntiare assuescimus
vitio

Y.

I N D E X.

<i>vinio institutionis & educationis.</i>	168
<i>Verba non tam quam res docendæ.</i>	254
<i>Verba non natura significant id quod significant.</i>	
175. <i>etiam Platonis sententia.</i>	176
<i>Verborum odium & amor.</i> 176. <i>amor sæpe in</i>	
<i>superstitionem abit.</i> 176. <i>nec minus odium.</i> 177.	
<i>Huarti hac de re narratio.</i> <i>ibid.</i> & <i>hystoria de</i>	
<i>Paulo. II. Pontif.</i> 178. <i>Angli tempore Crom-</i>	
<i>welli regni nomen adeo abhorrebant, ut etiam</i>	
<i>ex oratione dominica ejicerent.</i> 179. <i>Comæ-</i>	
<i>diarum nomen exosum.</i> <i>ibid.</i> & <i>alia hujus-</i>	
<i>modi nomina.</i>	179. 180
<i>Verborum ambiguitas multiplex.</i> 125. 126. 130.	
131. <i>parit Logomachias.</i> 159. <i>obscuritas.</i> <i>vide</i>	
<i>Obscuritas.</i>	
<i>Verborum non intellectorum causæ.</i>	188
<i>pro Veritate pugnare videntur, cum pro formu-</i>	
<i>lis loquendi pugnant illi, quorum scientia in</i>	
<i>verbis consistit.</i>	168
<i>Veritatis amans, alium non odio dignum judicat,</i>	
<i>quem ab ea aberrare credit, sed commiseratione.</i> 6	
<i>Lud. Vivis querela de scholis rixosis.</i> 84. <i>de cau-</i>	
<i>sis corruptarum artium.</i>	85
<i>Vocabula omnia, quæ nostros de rebus sensus</i>	
<i>significant, aliquid ambiguitatis habent.</i> 130.	
<i>dantur vocabula quæ in unius ore, idque simul,</i>	
<i>res diversissimas denotant.</i> 131. <i>exempla varia.</i>	
	132. 133. 134
<i>Vocabula nonnunquam iisdem hominibus idem</i>	
<i>significant, quæ alias distinguere solent.</i> 138	
<i>Vocabulis, quid ipsi intelligamus, sæpe longe</i>	
<i>melius cognoscimus, quam verbis explicare</i>	
<i>possumus.</i> 127. <i>exempla.</i>	127. 128. 129
<i>de Vocibus mente cassis, Malebrancii verba.</i>	
	148. 149.
	an

I N D E X.

<i>an Voluntas cogi possit?</i>	57
<i>Vox temere elapsa, & pertinaciter defensa, ab in Logomachiam curatu difficilem.</i>	119.
<i>præsertim si accedat odium inter Logomachos.</i>	120

W.

<i>Waltoni verba in sciolos grammaticos.</i>	15
--	----

Z.

<i>Zeli nomine odia aliquando teguntur.</i>	187
---	-----

F I N I S.

DIS-

DISSERTATIONIS De Meteoris Orationis

Summarium.

§. 1. **M**eteora Orationis quid.
Longinus Rhetor author hujus vocabuli.

Infelix vocabuli fatum, in pejorem partem tracti.

271

Abusus nominis *Phæbi* apud Gallos.

272

§. 2. Sublime in Oratione, quid.

ὕψος & *μέγιστος* an differant. *ibid.*

§. 3. Ad sublimem Orationem quid requiratur.

ibid.

Res sublimes quænam.

Res magnæ & sublimes bonæ & malæ. 273

Oratori quid magnum. 274

§. 4. Rei magnæ magna concipienda idea, quæ argumentum adæquat.

Capacitas imaginationis quid. 275

Vis imaginationis in quo consistat.

Utraque in Poëtis maximè conspicua.

In Ovidio capacitas nunquam, vis interdum desideratur. 276

§. 5. Judicii præcipuæ in dicendo partes.

Judicium, acere, incorruptum, severum esse debet. 277

§. 6. Verba æquare debent imaginem, ut imago rem.

Grandia verba sunt auctoritate utentium, sono, & significatione.

Auctoritate utentium grandia quænam.

Sono grandia quæ, exemplis ex Virgilio & Claudiano allatis ostenditur.

Grandia & sublimia significatione quænam. 278.

279

Si.

Significationes secundariæ.	280
Nulla re Oratio grandior fit quàm vocibus, quæ multas significationes habent.	
Exemplum Valerii Poplicolæ apud Livium; Ciceronis.	281
Tropis quomodo grandior fiat Oratio.	282
§. 7. Non res modo sublimis, sed animus etiam in sublimi genere pingendus.	
Magnus animus quinam.	282
Pingit se integro Orationis habitu.	283
Affectibus, qui generosi in Oratore, sparsis per Orationem sententiis animi magnitudinem prodiit Orator.	
Livius in exemplum Magni Oratoris proponitur. Quædam priscorum Apophtegmata animi magnitudinem produunt.	
Ducis Genuensis hodierni responsum Gallis datum, à magno animo profectum.	
Piratæ magnanima verba ad Alex. M.	285
§. 8. Sublimis Oratio quàm difficilis sit res.	
Meteororum Orationis origo à malè affectata Orationis sublimitate.	286
§. 9. Omnia Orationis meteora ad tria genera referuntur.	<i>ibid.</i>
Primi generis duæ causæ.	
Plerumque literati de rebus suis loquentes, nimis magnifica Oratione utuntur.	
Exemplum in Julio Cæs. Scaligero proponitur.	287
In Longolio, verbis Ludovici Vivis.	288
In Imitatoribus Scriptorum Magnorum.	289
Abusus magnorum nominum ex Historia Romana quàm exosus in Gallia.	291
Martialis Epigramma in eam rem.	
Aliud vitium eorum, qui res levissimas Virorum Magnorum auctoritate comprobant: Et qui magnam Orationem parvis rebus aptant.	292
§. 10. Alterum Meteori genus, quando in grandi argumento vitiosa est sublimitas Orationis.	
Peccant hic primo ii, quibus sublimè id omne est, quod est obscurum.	Ex-

Exemplis id variis docetur. 293

Erroris causæ multæ recensentur. 294

Tenebræ in Oratione non sunt studio quærendæ,
cùm vix vitari possint, etiam cùm maximè vita-
re volumus. 296

§. 11. Meteora tanquam sublimia captant, qui-
bus omne id sublime videtur, quod est inso-
lens, rarum, atque Extraordinarium.

Istorum ineptiæ pluribus exemplis declarata. 297

Errant quibus rariora semper sublimiora videntur.

Exempla multa producantur. 298. 299

§. 12. Meteora eorum qui nimis exquisitum in
sublimi Oratione affectant ornatum. 301

Augusti ævo has Orationis affectatas elegantias
non captabant Romani, sed tempore Nero-
nis quæri coeperunt, quod Senecarum scripta
demonstrant, ac paulò post tota Eloquentia in
his ponebatur.

Hæc dicendi ratio inde transiit in Ecclesiam.

Multorum Patrum scripta his lusibus plena; à qui-
bus illi ad nostra usque tempora manarunt. 302

Ausonii Epigramma de Didonis interitu elegan-
tissimum quidem & argutum, non tamen sub-
lime.

§. 13. Convenit sublimi dictioni parcior Orna-
tus, sed non ubique.

Sæpe quò quid simplicius, eò sublimius. 303

Verba Gen. 1. Fiat lux, & facta est lux. &c.

Ornatus in Oratione sublimi apparere non debet:
ne auditorem ab illo affectu quem in illo con-
citare volumus, ad orationis venustatem admi-
randam, avocemus.

§. 14. Periphrases à multis affectatæ, Meteo-
ra dici merentur.

Exempla varia. 305

§. 15. Alia meteori species in illis, qui subli-
mitatem quærent in vocibus grande quiddam
sonantibus, & magnifica eorum, sed nihil ma-
gni significantium structura. 306

Hinc

Hinc est, quodd multi sequioris ævi Poëtas illis
Augustæi ævi, tanquam grandiores anteponunt.

Claudianæ verborum granditas. 307

& inanitas. 308

§. 16. Meteora quæ maximè sublimitatis spe-
ciem mentiuntur, sunt illa quæ tumida, tur-
gida, & inflata appellantur.

Tumor Orationis quid. 309

Exempla Varia.

Meteora in soluta Oratione. 310

Meteora in poësi. 311. 312

§. 17. Etiam in verbis ipsiis, non in sensu tan-
tùm Orationis sublimitatem quærunt nonnul-
li, qui plus ingenii quam iudicii habent.

313

Exempla ridicula. 314

§. 18. Sunt, qui illa dicta sublimia esse existi-
mant, quæ sunt arrogantia, superba, fero-
cia, atque impia: Hi novum orationis me-
teorum effingunt.

315

Exempla varia produciuntur. 316. 317

Unde hoc vitium sit, ostenditur. 318

Illius non reddunt se participes, qui alios superbe
loquentes repræsentaturi, huiusmodi verbis u-
tuntur. Exemplo Livii, Senecæ, Ovidii doce-
tur.

319

In his non id quod repræsentatur, sed repræsentatio nobis placere debet.

§. 19. Tertium Meteoræ genus, quando non
modo argumentum Orationis sublimis humi-
le, sed & vitiosa Orationis sublimitas.

320

Exemplis variis hoc ostenditur.

Ex Sedulio, 321

Sidonio Apollinari, 322

Martiano Capella, 323

Tertulliano, 324

Apulejo, aliis. 325

Eam sublimitatis ideam multi retinent, quam à
Præceptoribus suis acceperunt discipuli, nisi
sint

sint in pueritia eo iudicio, quo fuit Henricus
Valesius, de quo verba Hadriani Valesii addu-
cuntur. 326

§. 20. Denique etiam extra scholas in Vulgari-
bus linguis Meteora inveniuntur.

Meteora Italorum, Hispanorum, Gallorum, Ger-
manorum. 327

F I N I S.





